

॥ नमो तस्स भगवतो अरहतो सम्मासम्बुद्धस्स ॥

दीघनिकाये

पाथिकवग्गटीका

१. पाथिकसुत्तवण्णना

सुनक्खत्तवत्थुवण्णना

१. अपुब्बपदवण्णनाति अत्थसंवण्णनावसेन हेट्ठा अग्गहितताय अपुब्बस्स अभिनवस्स पदस्स वण्णना अत्थविभावना । “हित्वा पुनप्पुनागतमत्थ”न्ति (दी० नि० अट्ठ० १. गन्थारम्भकथा) हि वुत्तं । मल्लेसूति एत्थ यं वत्तब्बं, तं हेट्ठा वुत्तनयमेव । छायूदकसम्पन्ने वनसण्डे विहरतीति अनुपियसामन्ता कतस्स विहारस्स अभावतो । यदि न ताव पविट्ठो, कस्मा “पाविसी”ति वुत्तन्ति आह “पविसिस्सामी”तिआदि, तेन अवस्सं भाविनि भूते विय उपचारा होन्तीति दस्सेति । इदानी तमत्थं उपमाय विभावेन्तो “यथा कि”न्तिआदिमाह । एतन्ति एतं “अतिप्पगो खो”तिआदिकं चिन्तनं अहोसि । अतिविय पगो खोति अतिविय पातोव । छन्नकोपीनताय, परिब्बाजकपब्बज्जुपगमेन च छन्नपरिब्बाजकं, न नग्गपरिब्बाजकं ।

२. यस्मा भगवतो उच्चाकुलप्पसुततं, महाभिनिक्खमननिक्खन्ततं, अनञ्जसाधारणदुक्करचरणं, विवेकवासं, लोकसम्भाविततं, ओवादानुसासनीहि लोकस्स बहुपकारतं, परप्पवादमद्दनं, महिद्धिकतं, महानुभावतन्ति एवमादिकं तंतं अत्तपच्चक्खगुणविसेसं निस्साय येभुय्येन अञ्जतित्थियापि भगवन्तं दिस्वा आदरगारवबहुमानं दस्सेन्तियेव, तस्मा वुत्तं “भगवन्तं दिस्वा मानथद्धतं अकत्वा”तिआदि । लोकसमुदाचारवसेनाति लोकोपचारवसेन । चिरस्सन्ति चिरकालेन । आदीनि वदन्ति उपचारवसेन । तस्साति भग्गवगोत्तस्स परिब्बाजकस्स । गिहिसहायोति गिहिकालतो पट्टाय सहायो । पच्चक्खातोति येनाकारेन पच्चक्खाना, तं दस्सेतुं “पच्चक्खामी”तिआदि वुत्तं ।

३. उद्दिस्साति सत्थुकारभावेन उद्दिस्साति अयमेत्थ अधिप्पायोति तं दस्सेन्तो “भगवा मे”तिआदिमाह । यदा सुनक्खत्तस्स “भगवन्तं पच्चक्खामी”ति चित्तं उप्पन्नं, वाचा भिन्ना, तदा एवस्स भगवता सद्धिं कोचि सम्बन्धो नत्थि असक्यपुत्तियभावतो सासनतो परिबाहिरत्ता । अयं तावेत्थ सासनयुत्ति, सा पनायं ठपेत्वा सासनयुत्तिकोविदे अञ्जेसं न सम्मदेव विसयोति भगवा सब्बसाधारणवसेनस्स अत्तना सम्बन्धाभावं दस्सेतुं “अपि नू”ति आदिं वत्वा सुनक्खत्तं “को सन्तो कं पच्चाचिक्खसी”ति आह । यस्मा मुखागतोयं सम्बन्धो, न पूजागतादिको, यो च याचकयाचितब्बतावसेन होति, तदुभयज्वेत्थ नत्थीति दस्सेन्तो भगवा सुनक्खत्तं “को सन्तो कं पच्चाचिक्खसी”ति अवोच, तस्मा तमत्थं दस्सेतुं “याचको वा”तिआदि वुत्तं । याचितको वा याचकं पच्चाचिक्खेय्याति सम्बन्धो । त्वं पन नेव याचको “अहं भन्ते भगवन्तं उद्दिस्स विहरिस्सामी”ति एवं मम सन्तिकं अनुपगतत्ता । न याचितको “एहि त्वं सुनक्खत्त ममं उद्दिस्स विहराही”ति एवं मया अपत्थितत्ता ।

को समानोति याचकयाचितकेसु को नाम होन्तो । कन्ति याचकयाचितकेसु एव कं नाम होन्तं मं पच्चाचिक्खसि ।

तुच्छपुरिसाति ज्ञानमग्गादिउत्तरिमनुस्सधम्मेषु कस्सचिपि अभावा रित्तपुरिसा । ननु चायं सुनक्खतो लोकियज्झानानि, एकच्चाभिज्जञ्च उप्पादेसीति? किञ्चापि उप्पादेसि, ततो पन भगवति आघातुप्पादनेन सहेव परिहीनो अहोसि । अपराधो नाम सुप्पटिपत्तिया विरज्जनहेतुभूतो किलेसुप्पादोति आह “यत्तको ते अपराधो, तत्तको दोसो”ति । यावज्जाति अवधिपरिच्छेदभावदस्सनं “यावज्ज तेन भगवता”तिआदीसु (दी० नि० १.३) विय । तेति तथा । इदन्ति निपातमत्तं । अपरद्धन्ति अपरज्झितं । इदं वुत्तं होति — “पच्चाचिक्खामिदानाहं भन्ते भगवन्त”न्तिआदीनि वदन्तेन तुच्छपुरिस तथा यावज्जिदं अपरद्धं, न तस्स अपराधस्स पमाणं अत्थीति ।

४. मनुस्सधम्माति भावनानुयोगेन विना मनुस्सेहि अनुद्धातब्बधम्मा । सो हि मनुस्सानं चित्ताधिद्वानमत्तेन इज्जनतो तेसं सम्भावितधम्मो विय ठितो तथा वुत्तो, मनुस्सग्गहणज्चेत्थ तेसु बहुलं पवत्तनतो । इद्धिभूतं पाटिहारियं, न आदेसनानुसासनीपाटिहारियन्ति अधिप्पायो । कतेति पवत्तिते । निव्यातीति निग्गच्छति, वट्टदुक्खतो निग्गमनवसेन पवत्ततीति अत्थो । धम्मे हि निग्गच्छन्ते तंसमङ्गिपुग्गलो “निग्गच्छती”ति वुच्चति, अट्टकथायं पन नि-सद्धो उपसग्गमत्तं, याति इच्चेव अत्थोति दस्सेतुं गच्छतीति अत्थो वुत्तो । तत्राति पधानभावेन वुत्तस्स अत्थस्स भुम्मवसेन पटिनिद्देसोति तस्मिं धम्मे सम्मा दुक्खक्खयाय निव्यन्तेति अयमेत्थ अत्थोति दस्सेन्तो आह “तस्मिं...पे०... संवत्तमाने”ति ।

५. अगगन्ति जायतीति अगगज्जं । लोकपज्जत्तिन्ति लोकस्स पज्जापनं । लोकस्स अगगन्ति लोकूपत्तिसमये “इदं नाम लोकस्स अगग”न्ति एवं जानितब्बं बुज्झितब्बं । अगगमरियादन्ति आदिमरियादं ।

६. एत्तकं विप्पलपित्वाति “न दानाहं भन्ते भगवन्तं उद्दिस्स विहरिस्सामी”ति, “न हि पन मे भन्ते भगवा उत्तरिमनुस्सधम्मा इद्धिपाटिहारियं करोती”ति, “न हि पन मे भन्ते भगवा अगगज्जं पज्जपेती”ति च एत्तकं विप्पलपित्वा । इदं किर सो भगवा सत्थुकिच्चं इद्धिपाटिहारियं, अगगज्जपज्जापनज्ज कातुं न सक्कोतीति पकासेन्तो कथेसि । तेनाह “सुनक्खत्तो किरा”तिआदि । उत्तरवचनवसेन पतिट्ठाभावतो अप्पत्तिट्ठो । ततो एव निरवो निस्सद्धो ।

आदीनवदस्सनत्थन्ति दिट्ठधम्मिकस्स आदीनवस्स दस्सनत्थं । तेनाह “सयमेव गरहं पापुणिससी”ति । सम्परायिका पन आदीनवा अनेकविधा, ते दस्सेन्तो सुनक्खत्तो न सद्दहेय्याति दिट्ठधम्मिकस्सेव गहणं । अनेककारणेनाति “इतिपि सो भगवा अरह”न्तिआदिना (दी० नि० १.१५७, २५५) अनेकविधेन वण्णकारणेन । एवं मे अवण्णो न भविस्सतीति अज्झासयेन अत्तनो बालताय वण्णारहानं अवण्णं कथेत्वा । एवं भगवा मक्खिभावे आदीनवं दस्सेत्वा पुन तस्स कथने कारणं विभावेतुं “इति खो ते”तिआदिमाहाति तं दस्सेतुं “ततो”तिआदि वुत्तं । एवज्झि सुनक्खत्तस्स अप्पकोपि वचनोकासो न भविस्सतीति । अपक्कमीति अत्तना यथाठिता वुट्ठाय अपसक्कि । अपक्कन्तो सासनतो भट्ठो । तेनाह “चुतो”ति । एवमेवाति अपक्कमन्तो च न यथा तथा अपक्कमि, यथा पन कायस्स भेदा अपाये निब्बत्तेय्य, एवमेव अपक्कमि ।

कोरखत्तियवत्थुवण्णना

७. द्वीहि पदेहीति द्वीहि वाक्येहि आरब्धं व्यतिरेकवसेन तदुभयत्थनिद्देसवसेन उपरिदेसनाय पवत्तता । अनुसन्धिदस्सनवसेनाति यथानुसन्धिसङ्घातानुसन्धिदस्सनवसेन ।

एकं समयन्ति च भुम्मत्थे उपयोगवचनन्ति आह “एकस्मिं समये”ति च । थूलू नाम जनपदोति जनपदीनं

राजकुमारानं वसेन तथालद्धनामो । कुक्कुरवतं समादानवसेन एतस्मिं अत्थीति **कुक्कुरवतिको**ति आह “**समादिन्नकुक्कुरवतो**”ति । **अञ्जम्पी**ति “चतुक्कोण्डिकस्सेव विचरणं, तथा कत्वाव खादनं, भुञ्जनं, वामपादं उद्धरित्वा मुत्तस्स विस्सज्जन”न्ति एवमादिकं अञ्जम्पि सुनखेहि कातब्बकिरियं । चतूहि सरीरावयवेहि कुण्डनं गमनं **चतुक्कोण्डो**, सो एतस्मिं अत्थीति **चतुक्कोण्डिको** । सो पन यस्मा चतूहि सरीरावयवेहि सङ्घट्टितगमनो होति, तस्मा वुत्तं “**चतुसङ्घट्टितो**”ति । तेनेवाह “**द्वे जण्णूनी**”तिआदि । **भक्खसन्ति** वा भक्खितब्बं, असितब्बञ्च । तेनेवाह “**यं किञ्चि खादनीयं भोजनीयं**”न्ति । कामं खादनञ्च नाम मुखेन कातब्बं, हत्थेन पन तत्थ उपनामनं निवारेतुं अवधारणं कतन्ति आह “**हत्थेन अपरामसित्वा**”ति, अगगहेत्वाति अत्थो । **सुन्दररूपो**ति सुन्दरभावो । **वताति पत्थनत्थे निपातो** “अहो वताहं लाभी अस्स”न्तिआदीसु विय । “समणेन नाम एवरूपेन भवितब्बं अहो वताहं एदिसो भवेय्य”न्ति एवं तस्स पत्थना अहोसि । तेनाह “**एवं किरा**”तिआदि ।

गरहत्थे अपि-कारो “अपि सिञ्चे पलण्डक”न्तिआदीसु विय । **अरहन्ते च** बुद्धे, बुद्धसावके “अरहन्तो खीणासवा न होन्ती”ति **एवं तस्स दिट्ठि उप्पन्ना** । यथाह **महासीहनादसुत्ते** “नत्थि समणस्स गोतमस्स उत्तरिमनुस्सधम्मा अलमरियजाणदस्सनविसेसा”ति (म० नि० १.१४६) । **सत्तमं दिवसन्ति** भुम्मत्थे उपयोगवचनं । **अलसकेनाति** अजीरणेन आमरोगेन ।

अट्ठितचमत्तताय **पुराणपण्णसदिसो** । **बीरणत्थम्बकन्ति** बीरणगच्छा ।

मत्ता एतस्स अत्थीति **मत्तं**, भोजनमत्तवन्तन्ति अत्थो । तेनाह “**पमाणयुत्तं**”न्ति । **मन्ता मन्ताति** मन्ताय मन्ताय ।

८. एकद्वीहिकाय गणनाय । निराहारोव अहोसि भगवतो वचनं अञ्जथा कातुकामो, तथाभूतोपि सत्तमे दिवसे उपट्ठाकेन उपनीतं भक्खसं दिस्वा “**धी**”ति उपट्ठापेतुं असक्कोन्तो भोजनतण्हाय आकड्डियमानहदयो तं कुच्छिपूरं भुज्जित्वा भगवता वुत्तनियामेनेव कालमकासि । तेन वुत्तं “**अथस्सा**”तिआदि । **सचेपि...पे०... चिन्तेय्याति** यदि एसो अचेलो “**धी**”ति पच्चुपट्ठपेत्वा “अज्जपि अहं न भुज्जेय्य”न्ति चिन्तेय्य, तथाचिन्तने सतिपि देवताविग्गहेन **तं दिवसं... पे०... करेय्य** । कस्मा? **अद्वेज्जवचना हि तथागता**, न तेसं वचनं वितथं होति ।

गतगतट्ठानं अङ्गणमेव होतीति तेहि तं कड्डित्वा गच्छन्तेहि गतगतप्पदेसो उत्तरकसामन्ता विवटङ्गणमेव हुत्वा उपट्ठाति । तेति तित्थिया । **सुसानंयेव गन्त्वाति** “बीरणत्थम्बकं अतिक्कमिस्सामा”ति गच्छन्तापि अनेकवारं तं अनुसंयायित्वा पुनपि तंयेव सुसानं उपगन्त्वा ।

९. इदन्ति इदं मतसरीरं । “तमेव वा सरीरं कथापेसीति तं सरीरं अधिद्वित्वा ठितपेतेन कथापेसी”ति केचि । कोरखत्तियं वा असुरयोनितो आनेत्वा कथापेतु अञ्जं वा पेतं, को एत्थ विसेसो । “**अचिन्तेय्यो हि बुद्धविसयो**”ति पन वचनतो तदेव सरीरं सुनक्खत्तेन पहतमत्तं बुद्धानुभावेन उट्ठाय तमत्थं जापेसीति दट्ठब्बं । पुरिमोयेव पन अत्थो अट्ठकथासु विनिच्छितो । तथा हि वक्खति “**निब्बत्तट्ठानतो**”तिआदि (दी० नि० अट्ठ० ३.१०) ।

१०. विपाकन्ति फलं, अत्थनिब्बत्तीति अत्थो ।

समानेतब्बानीति सम्मा आनेतब्बानि, सरूपतो आनेत्वा दस्सेतब्बानीति अत्थो । पाटिहारियानं पठमादिता भगवता

वृत्तानुपुब्बिया वेदितब्बा । केचि पनेत्थ “परचित्तविभावनं, आयुपरिच्छेदविभावनं, ब्याधिविभावनं, गतिविभावनं, सरीरनिक्खेपविभावनं, सुनक्खत्तेन सद्धिं कथाविभावनञ्चाति छ पाटिहारियानी”ति वदन्ति, तं यदि सुनक्खत्तस्स चित्तविभावनं सन्धाय वृत्तं, एवं सति “सत्ता”ति वत्तब्बं तस्स भाविअवण्णविभावनाय सद्धिं । अथ अचेलस्स मरणचित्तविभावनं, तं “सत्तमं दिवसं कालं करिस्सती”ति इमिना सङ्गहितन्ति विसुं न वत्तब्बं, तस्मा अट्ठकथायं वृत्तनयेनेव गहेतब्बं ।

अचेलकळारमट्टकवत्थुवण्णना

११. निक्खन्तदन्तमट्टकोति निक्खन्तदन्तो मट्टको । सो किर अचेलकभावतो पुब्बे मट्टकितो हुत्वा विचरि विवरदन्तो च, तेन नं “कोरमट्टको”ति सञ्जानन्ति । यं किञ्चि तस्स देन्तो “साधुरूपो अयं समणो”ति सम्भावेन्तो अगं सेट्ठयेव देन्ति । तेन वृत्तं “लाभगं पत्तो, अगलाभं पत्तो”ति । बहू अचेलका तं परिवारेत्वा विचरन्ति, गहट्ठा च तं बहू अट्ठा विभवसम्पन्ना कालेन कालं उपसङ्कमित्वा पयिरुपासन्ति । तेन वृत्तं “यसगं अगपरिवारं पत्तो”ति । वतानियेव पज्जितब्बतो पदानि । अज्जमज्जं असङ्करतो वतकोट्टासा वा । समत्तानीति समं अत्तनि गहितानि । पुरत्थिमेनाति एन-सद्वसम्बन्धेन “वेसालि”न्ति उपयोगवचनं, अविदूरत्थे च एन-सद्वो पज्जम्यन्तोति आह “वेसालितो अविदूरे”ति ।

१२. सासने परिचयवसेन तिलक्खणाहतं पज्जं पुच्छि । न सम्पायासीति नावबुज्झि न सम्पादेसि । तेनाह “सम्मा जाणगतिया”तिआदि । सम्पायनं वा सम्पादनं । पज्जं पुट्टस्स च सम्पादनं नाम सम्मदेव कथनन्ति तदभावं दस्सेन्तो “अथ वा”तिआदिमाह । कोपवसेन तस्स अक्खीनि कम्पनभावं आपज्जिंसूति आह “कम्पनक्खीनिपि परिवत्तेत्वा”ति । कोपन्ति कोधं, सो पन चित्तस्स पकुप्पनवसेन पवत्ततीति आह “कुप्पनाकार”न्ति । दोसन्ति आघातं, सो पन आरम्मणे दुस्सनवसेन पवत्तीति आह “दुस्सनाकार”न्ति । अतुट्ठाकारन्ति तुट्ठिया पीतिया पटिपक्खभूतप्पवत्तिआकारं । कायवचीविकारेहि पाकटमकासि । मा वत नोति एत्थ माति पटिक्खेपो, नोति मय्हन्ति अत्थोति आह “अहो वत मे न भवेय्या”ति । मं वत नोति एत्थ पन नोति संसयेति आह “अहोसि वत नु ममा”ति ।

१४. परिपुब्बो दहित-सद्वो वत्थनिवासनं वदतीति आह “परिदहितो निवत्थवत्थो”ति । यसनिमित्तकताय लाभस्स यसपरिहानियाव लाभपरिहानि वृत्ता होतीति पाळियं “यसा निहीनो”ति वृत्तं ।

अचेलपाथिकपुत्तवत्थुवण्णना

१५. “अहं सब्बं जानामी”ति एवं सब्बञ्जुतज्जाणं वदति पटिजानातीति जाणवादो, तेन मया जाणवादेन सद्धिं । अतिक्कम्म गच्छतोति उपट्ठुभागेन परिच्छिन्नं पदेसं अतिक्कमित्वा इद्धिपाटिहारियं कातुं गच्छतो । किं पनायं अचेलो पाथिकपुत्तो अत्तनो पमाणं न जानातीति? नो न जानाति । यदि एवं, कस्मा सुक्खगज्जितं गज्जीति? “एवाहं लोके पासंसो भविस्सामी”ति कोहज्जे कत्वा सुक्खगज्जितं गज्जि । तेन वृत्तं “नगरवासिनो”तिआदि । पट्टपेत्वाति युगगाहं आरभित्वा ।

१६. हीनज्झासयत्ता...पे०... उदपादि । वृत्तज्हेतं “हीनाधिमुत्तिका सत्ता हीनाधिमुत्तिके एव सत्ते सेवन्ति भजन्ति पयिरुपासन्ती”ति (सं० नि० २.९८) ।

यस्मा तथಾವृत्ता वाचा तथारूपचित्तहेतुका, तज्ज चित्तं तथारूपदिट्ठिचित्तहेतुकं, तस्मा “तं वाचं अप्पहाया”ति वत्वा

यथा तस्मा अप्पहानं होति, तं दस्सेन्तो “तं चित्तं अप्पहाया”ति आह, तस्स च यथा अप्पहानं होति, तं दस्सेतुं “तं दिट्ठिं अप्पटिनिस्सज्जित्वा”ति अवोच । यस्मा वा तथारूपा वाचा महासावज्जा, चित्तं ततो महासावज्जतरं तंसमुट्ठापकभावतो, दिट्ठि पन ततो महासावज्जतमा तदुभयस्स मूलभावतो, तस्मा तेसं महासावज्जताय इमं विभागं दस्सेत्वा अयं अनुक्कमो ठपितोति वेदितब्बो । तेसं पन यथा पहानं होति, तं दस्सेतुं “अहं”न्तिआदि वुत्तं । “नाहं बुद्धो”ति वदन्तोति साठेय्येन विना उज्जुक्कमेव “अहं बुद्धो न होमी”ति वदन्तो । चित्तदिट्ठिप्पहानेपि एसेव नयो । विपतेय्याति एत्थ वि-सद्धो पठमे विकप्पे उपसगमत्तं, दुतिये पन विसरणत्थोति आह “सत्तथा वा पन फलेय्या”ति ।

१७. एकंसेनाति एकन्तेन, एकन्तिकं पन वचनपरियायविनिमुत्तं होतीति आह “निप्परियायेना”ति । ओधारिताति अवधारिता नियमेत्वा भासिता । विगतरूपेनाति अपगतसभावेन । तेनाह “विगच्छित्तसभावेना”ति, इद्धानुभावेन अपनीतसकभावेन । तेन वुत्तं “अत्तनो”तिआदि ।

१८. द्वयं गच्छतीति द्वयगामिनी । कीदिसं द्वयन्ति आह “सरूपेना”तिआदि । अयज्झि सो गण्डस्सुपरिफोडुब्बादोसं ।

१९. अजितस्स लिच्छविसेनापतिस्स महानिरये निब्बत्तित्वा ततो आगन्त्वा अचेलस्स पाथिकपुत्तस्स सन्तिके परोदनं । अभावाति पुब्बे वुत्तप्पकारस्स पाटिहारियकरणस्स अभावा । भगवा पन सन्निपतितपरिसायं पसादजननत्थं तदनु रूपं पाटिहारियमकासियेव । यथाह “तेजोधातुं समापज्जित्वा”तिआदि ।

इद्धिपाटिहारियकथावण्णना

२०. निचयनं धनधज्जानं सज्चयनं निचयो, तत्थ नियुत्ताति नेचयिका, गहपति एव नेचयिका गहपतिनेचयिका । एत्तकानि जङ्घसहस्सानीति परिमाणाभावतो सहस्सेहिपि अपरिमाणगणना । तेनेवाति इमस्स वसेन सन्निपतिताय एवं महतिया परिसाय बन्धनमोक्खं कातुं लब्भति, एतेनेव कारणेन ।

२१. चित्तुत्रासभयन्ति चित्तस्स उत्रासनाकारेन पवत्तभयं, न जाणभयं, नापि “भायति एतस्मा”ति एवं वुत्तं आरम्मणभयं । छम्भितत्तन्ति तेनेव चित्तुत्रासभयेन सकलसरीरस्स छम्भितभावो । लोमहंसोति तेनेव भयेन, तेन च छम्भितत्तेन सकलसरीरे लोमानं हट्ठभावो, सो पन तेसं भित्तिं नागदन्तानं विय उद्धंमुखताति आह “लोमानं उद्धग्गभावो”ति । अन्तन्तेन आविज्झित्वाति अत्तनो निसीदनत्थं निगूळ्हट्ठानं उपपरिक्खन्तो परिब्बाजकारामं परियन्तेन अनुसंयायित्वा, कस्सचिदेव सुनक्खत्तस्स वा सुनक्खत्तसदिसस्स वा सब्बज्जुपटिज्जं अप्पहाय सत्थु सम्मुखीभावे सत्तथा तस्स मुद्धाफलनं धम्मता । तेन वुत्तं “मा नस्सतु बालो”तिआदि ।

२२. संसप्पतीति तत्थेव पासाणफलके बालदारको विय उट्ठातुं असक्कोन्तो अवसीदनवसेन इतो चितो च संसप्पति । तेनाह “ओसीदती”ति । तत्थेव सज्चरतीति तस्मिंयेव पासाणे आनिसदुपट्ठिनो सज्चलनं निसज्जवसेनेव सज्चरति, न उट्ठाय पदसा ।

२३. विनट्ठरूपोति सम्भावनाय विनासेन, लाभस्स विनासेन च विनट्ठसभावो ।

पठमभाणवारवण्णना निट्ठिता ।

२५. गोयुत्तेहीति बलवन्तबलीबदयोजितेहि ।

२६. तस्साति जालियस्स । अयज्झि मण्डिसेन परिब्बाजकेन सद्धिं भगवन्तं उपसङ्कमित्वा धम्मं सुणि, ततो पुरेतं भगवतो गुणानं अजाननकाले अयं पवत्ति । तेनेवाह “तिट्ठु ताव पाटिहारियं...पे०... पराजयो भविस्सती”ति ।

२७. तिणसीहोति तिणसदिसहरितवण्णो सीहो । काळसीहोति काळवण्णो सीहो । पण्डुसीहोति पण्डुवण्णो सीहो । केसरसीहोति केसरवन्तो सेतवण्णो, लोहितवण्णो वा सीहो । मिगरज्जोति एत्थ मिग-सद्धो किञ्चापि पसदकुरुङ्गादीसु केसुचिदेव चतुप्पदेसु निरुळ्हो, इध पन सब्बसाधारणवसेनाति दस्सेन्तो “मिगरज्जोति सब्बचतुप्पदानं रज्जो”ति वुत्तं । आगन्त्वा सेति एत्थाति आसयो, निवासनट्ठानं । सीहनादन्ति परिस्सयानं सहनतो, पटिपक्खस्स च हननतो “सीहो”ति लद्धनामस्स मिगाधिपस्स घोसं, सो पन तेन यस्मा कुतोचिपि अभीतभावेन पवत्तीयति, तस्मा वुत्तं “अभीतनाद”न्ति । तत्थ तत्थ तासु तासु दिसासु गन्त्वा चरितब्बताय भक्खितब्बताय गोचरो घासोति आह “गोचरायाति आहारत्थाया”ति । वरं वरन्ति मिगसङ्घे मिगसमूहे मुदुमंसताय वरं वरं महंसवनवराहादिं वधित्वाति योजना । तेनाह “थूलं थूल”न्ति । वरवरभावेन हि तस्स वरभावो इच्छितो । सूरभावं सन्निस्सितं सूरभावसन्निस्सितं, तेन । सूरभावेनापि हि “किं इमे पाणके दुब्बले हन्त्वा”ति अप्पथामेसु पाणेसु कारुज्जं उपतिट्ठति ।

२८. विघासोति परस्स भक्खितसेसताय विरूपो घासो विघासो, उच्छिड्ढं । तेनाह “भक्खितातिरित्तमंस”न्ति, तस्मिं विघासे, विघासनिमित्तन्ति अत्थो । अस्मिमानदोसेनाति अस्मिमानदोसहेतु, अहंकारनिमित्तन्ति अत्थो । सो पनस्स अस्मिमानो यथा उप्पज्जि, तं दस्सेतुं “तत्राय”न्तिआदि वुत्तं ।

“सेगालकंयेवा”तिपि पाठो, यथावुत्तोव अत्थो । भेरण्डकंयेवाति भेरण्डसकुणरवसदिसंयेव, भेरण्डो नाम एको पक्खी द्विमुखो, तस्स किर सद्धो अतिविय विरूपो अमनापो । तेनाह “अप्पियअमनापसद्दमेवा”ति । सम्मापटिपत्तिया विसेसतो सुट्ठु गताति सुगता, सम्मासम्बुद्धा । ते अपदायन्ति सोधेन्ति सत्तसन्तानं एतेहीति सुगतापदानानि, तिस्सो सिक्खा । यस्मा ताहि ते “सुगता”ति लक्खीयन्ति, ता च तेसं ओवादभूता, तस्मा “सुगतलक्खणेसू”तिआदि वुत्तं । यदि ता सुगतस्स लक्खणभूता, सासनभूता च, कथं पनेस पाथिकपुत्तो तत्थ तासु सिक्खासु जीवति, को तस्स ताहि सम्बन्धोति आह “एतस्स ही”तिआदि । सम्बुद्धानं देमाति देन्तीति बुद्धसज्जाय देन्तीति अधिप्पायो । तेन एस...पे०... जीवति नाम न सुगतन्वयअज्झुपगमनतो । “तथागते”तिआदि एकत्ते पुथुवचनन्ति आह “तथागत”न्तिआदि । बहुवचनं एव गरुस्मिं एकस्मिम्पि बहुवचनप्पयोगतो एकवचनं विय वुत्तं वचनविपल्लासेन ।

२९. समेक्खित्वाति समं कत्वा मिच्छादस्सनेन अपेक्खित्वा, तं पन अपेक्खनं तथा मज्जनमेवाति आह “मज्जित्वा”ति । पुब्बे वुत्तं समेक्खनम्पि मज्जनं एवाति वुत्तं “अमज्जीति पुन अमज्जित्था”ति, तेन अपरापरं तस्स मज्जनप्पवत्तिं दस्सेति । भेरण्डकरवं कोसति विक्कोसतीति कोत्थु ।

३०. ते ते पाणे ब्यापादेन्तो घसतीति ब्यग्घोति इमिना निब्बचनेन “ब्यग्घो”ति मिगराजस्सपि सिया नामन्ति आह “ब्यग्घोति मज्जतीति सीहोहमस्मीति मज्जती”ति । यदिपि यथावुत्तनिब्बचनवसेन सीहोपि “ब्यग्घो”ति वत्तब्बतं अरहति, ब्यग्घ-सद्धो पन मिगराजे एव निरुळ्होति दस्सेन्तो “सीहेन वा”तिआदिमाह ।

३१. सीहेन विचरितवने संवट्ठत्ता वुत्तं “महावने सुज्जवने विवट्ठो”ति ।

३४. किलेसबन्धनाति तण्हाबन्धनतो । तण्हाबन्धनज्झि थिरं दळ्ळहबन्धनं दुम्मोचनीयं । यथाह —

“सारत्तरत्ता मणिकुण्डलेसु,
पुत्तेसु दारेसु च या अपेक्खा ।
एतं दळ्ळहं बन्धनमाहु धीरा,
ओहारिनं सिथिलं दुप्पमुज्ज”न्ति ॥ (ध० प० ३४६; जा० १.२.१०२) ।

किलेसबन्धनाति वा दसविधसंयोजनतो । महाविदुग्गं नाम चत्तारो ओघा महन्तं जलविदुग्गं विय
अनुपचितकुसलसम्भारेहि दुग्गमट्टेन ।

अग्गज्जपज्जत्तिकथावण्णना

३६. इमस्स पदस्स । इदं नाम लोकस्स अगगन्ति जानितब्बं, तं अग्गज्जं, सो पन लोकस्स उप्पत्तिक्कमो पवत्ति
पवेणी चाति आह “लोकुप्पत्तिचरियवंस”न्ति । सम्मासम्बोद्धितो उत्तरितरं नाम किञ्चि नत्थि पजानितब्बेसु, तं पन कोटिं
कत्वा दस्सेन्तो “याव सब्बज्जुतज्जाणा पजानामी”ति आह । “मम पजानना”ति अस्सादेन्तो तण्हावसेन, “अहं
पजानामी”ति अभिनिविसन्तो दिट्ठिवसेन, “सुट्ठु पजानामि सम्मा पजानामी”ति पग्गण्हन्तो मानवसेन न परामसामीति
योजना । “पच्चत्तज्जेवा”ति पदं “निब्बुति विदिता”ति पदद्वयेनापि योजेतब्बं “पच्चत्तयेव उप्पादिता निब्बुति च पच्चत्तयेव
विदिता”ति, सयम्भुजाणेन निब्बत्तिता निब्बुति सयमेव विदिताति अत्थो । अट्ठकथायं पन “पच्चत्त”न्ति पदं
विविधविभक्तिकं हुत्वा आवुत्तिनयेन आवत्ततीति दस्सेतुं “अत्तनायेव अत्तनी”ति वुत्तं । अविदितनिब्बानाति
अप्पटिलद्धनिब्बाना मिच्छापटिपन्नत्ता । पजाननम्पि हि तदधिगमवसेनेव वेदितब्बं । एति इट्ठभावेन पवत्ततीति अयो, सुखं ।
तप्पटिक्खेपेन अनयो, दुक्खं । तदेव हितसुखस्स ब्यसनतो ब्यसनं ।

३७. तं दस्सेन्तोति भगवापि “अज्जतित्थियो तत्थ सारसज्जी”ति तं दस्सेन्तो । आधिपच्चभावेनाति
आधिपच्चसभावेन । यस्स आचरियवादस्स वसेन पुरिसो “आचरियो”ति वुच्चति, सो आचरियवादो आचरियभावोति
आह “आचरियभावं आचरियवाद”न्ति । एत्थाति आचरियवादे । इति कत्वाति इमिना कारणेन । सोति आचरियवादो ।
“अग्गज्जं” त्वेव वुत्तो अग्गज्जविसयत्ता । केन विहितन्ति केन पकारेन विहितं । तेनाह “केन विहितं किन्ति
विहित”न्ति । ब्रह्मजालेति ब्रह्मजालसंवण्णनायं (दी० नि० अट्ठ० १.२८) । तत्थ हि वित्थारतो वुत्तविधिं इध अतिदिसति,
पाळि पन तत्थ चेव इध च एकसदिसा वाति ।

४१. खिड्डा पदोसिका मूलभूता एत्थ सन्तीति खिड्डापदोसिकं, आचरियकं । तेनेवाह “खिड्डापदोसिकमूलक”न्ति ।
मनोपदोसिकन्ति एत्थापि एसेव नयो ।

४७. येन वचनेन अब्भाचिक्खन्ति, तस्स अविज्जमानता नाम अत्थवसेनेवाति आह “असंविज्जमानट्टेना”ति ।
तुच्छा, मुसाति च करणत्थे पच्चत्तवचनन्ति आह “तुच्छेन, मुसावादेना”ति । वचनस्स अन्तोसारं नाम अविपरीतो
अत्थोति तदभावेनाह “अन्तोसारविरहितेना”ति । अभिआचिक्खन्तीति अभिभवित्वा घट्टेन्ता कथेन्ति, अक्कोसन्तीति
अत्थो । विपरीतसज्जोति अयाथावसज्जो । सुभं विमोक्खन्ति “सुभ”न्ति वुत्तविमोक्खं । वण्णकसिणन्ति
सुनीलकसुपीतकादिवण्णकसिणं । सब्बन्ति यं सुभं, असुभज्ज वण्णकसिणं, तज्ज सब्बं । न असुभन्ति असुभम्पि

“असुभं”न्ति तस्मिं समये न सज्जानाति, अथ खो “सुभं” त्वेव सज्जानातीति अत्थो। **विपरीता** अयाथावगाहिताय, अयाथाववादिताय च।

४८. यस्मा सो परिब्बाजको अविस्सट्ठमिच्छागाहिताय सम्मा अप्पटिपज्जितुकामो सम्मापटिपन्नं विय मं समणो गोतमो, भिक्खवो च सज्जानन्तूति अधिप्पायेन “**तथा धम्मं देसेतु**”न्ति आदिमाह, तस्मा वुत्तं “**मया एतस्स...पे०... वट्ठती**”ति। **मम्मन्ति** मम्मप्पदेसं पीळाजननट्ठानं। **सुट्ठति** सक्कच्चं। यथा न विनस्सति, एवं **अनुरक्ख**।

वासनायाति किलेसक्खयावहाय पटिपत्तिया वासनाय। सेसं सुविज्जेय्यमेवाति।

पाथिकसुत्तवण्णनाय लीनत्थप्पकासना।

२. उदुम्बरिकसुत्तवण्णना

निग्रोधपरिब्बाजकवत्थुवण्णना

४९. **उदुम्बरिकायाति** सम्बन्धे सामिवचनन्ति आह “**उदुम्बरिकाय देविया सन्तके परिब्बाजकारामे**”ति। “उदुम्बरिकाय”न्ति वा पाठो, तथा सति अधिकरणे एतं भुम्मं। अयज्हेत्थ अत्थो उदुम्बरिकाय रज्जो देविया निब्बत्तितो आरामो उदुम्बरिका, तस्सं उदुम्बरिकायं। तेनाह “**उदुम्बरिकाय देविया सन्तके**”ति। ताय हि निब्बत्तितो तस्सा सन्तको। वरणादिपाठवसेन चेत्य निब्बत्तत्थबोधकस्स सदस्स अदस्सनं। **सन्धानोति** भिन्नानम्मि तेसं सन्धापनेन “**सन्धानो**”ति एवं लद्धनामो। **संवण्णितोति** पसंसितो। **इरियतीति** पवत्तति। **अरियेन जाणेनाति** किलेसेहि आरकत्ता अरियेन लोकुत्तरेन जाणेन। **अरियाय विमुत्तियाति** सुविसुद्धाय लोकुत्तरफलविमुत्तिया।

दिवा-सद्दो दिन-सद्दो विय दिवसपरियायो, तस्स विसेसनभावेन वुच्चमानो दिवा-सद्दो सविसेसं दिवसभागं दीपेतीति आह “**दिवसस्स दिवा**”ति आदि। यस्मा समापन्नस्स चित्तं नानारम्मणतो पटिसंहतं होति, ज्ञानसमङ्गी च पविवेकूपगमनेन सङ्गणिकाभावतो एकाकियाय निलीनो विय होति, तस्मा वुत्तं “**ततो ततो...पे०... गतो**”ति। मनो भवन्ति मनसो विवट्ठनिस्सितं वट्ठं आवहन्तीति **मनोभावनियाति** आह “**मनवट्ठकान**”न्ति आदि। **उन्नमति** न सङ्कुचति, अलीनञ्च होतीति अत्थो।

५१. **यावताति** यावन्तोति अयमेत्थ अत्थोति आह “**यत्तका**”ति। **तेसन्ति** निद्धारणे सामिवचनं। निद्धारणञ्च केनचि विसेसेन इच्छितब्बं। येहि च गुणविसेसेहि समन्नागता भगवतो सावका उपासका राजगहे पटिवसन्ति, अयञ्च तेहि समन्नागतोति इमं विसेसं दीपेतुं “**तेसं अब्भन्तरो**”ति वुत्तं। तेनाह “**भगवतो किरा**”ति आदि।

५२. **तेसन्ति** परिब्बाजकानं। **कथायाति** तिरच्छानकथाय। **दस्सनेनाति** दिट्ठिदस्सनेन। **आकप्पेनाति** वेसेन। **कुत्तेनाति** किरियाय। **आचारेनाति** अज्जमज्जस्मिं आचरितब्बआचारेन। **विहारेनाति** रत्तिन्दिवं विहरितब्बविहरणेन। **इरियापथेनाति** ठानादिइरियापथेन। अज्जाकारताय अज्जतिथ्ये नियुत्ताति **अज्जतिथिया**। **सङ्गन्त्वा** समागन्त्वा **रासी** हुत्वा परेहि **निसिन्नट्ठाने**। अरज्जानि च तानि वनपत्थानि चाति **अरज्जवनपत्थानि**। तत्थ यं अरज्जकङ्गनिष्पादकं आरज्जकानं, तं “**अरज्ज**”न्ति वेदितब्बं। **वनपत्थन्ति** गामन्तं अतिक्कमित्वा मनुस्सानं अनुपचारट्ठानं, यत्थ न कसीयति

न वष्पीयति । वृत्तज्हेतं “वनपत्थन्ति दूरानमेतं सेनासनानं अधिवचन”न्ति “वनपत्थन्ति वनसण्डानमेतं सेनासनानं, वनपत्थन्ति भीसनकानमेतं, वनपत्थन्ति सलोमहंसानमेतं, वनपत्थन्ति परियन्तानमेतं वनपत्थन्ति न मनुस्सूपचारानमेतं सेनासनानं अधिवचन”न्ति (विभ० ५३१) । तेन वृत्तं “गामूपचारतो मुत्तानी”तिआदि । पन्तानीति परियन्तानि अतिदूरानि । तेनाह “दूरतरानी”तिआदि । विहारूपचारेनाति विहारस्स उपचारप्पदेसेन । अद्धिकजनस्साति मग्गगामिनो जनस्स । मन्दसद्धानीति उच्चासद्दमहासद्दाभावतो तनुसद्धानि । मनुस्सेहि समागम्म एकज्झं पवत्तितसद्दो निग्घोसो, तस्स यस्मा अत्थो दुब्बिभावितो होति, तस्मा वृत्तं “अविभावितत्थेन निग्घोसेना”ति । विगतवातानीति विगतसद्धानि । “रहस्स करणस्स युत्तानी”ति इमिनापि तेसं ठानानं अरज्जलक्खणयुत्ततं, जनविवित्ततं, वनविवित्तमेव च विभावेति, तथा “एकीभावस्स अनुरूपानी”ति इमिना ।

५३. केनाति हेतुम्हि, सहयोगे च करणवचनन्ति आह “केन कारणेन केन पुग्गलेन सद्धि”न्ति । एकोपि हि विभक्तिनिद्देशो अनेकत्थविभावनो होति, तथा तद्धितत्थपदसमाहारेति ।

संसन्दनन्ति आलापसल्लापवसेन कथासंसन्दनं । जाणब्बत्तभावन्ति ब्यत्तजाणभावं, सो पन परस्स वचने उत्तरदानवसेन, परेन वा वृत्तउत्तरे पच्चुत्तरदानवसेन सियाति आह “उत्तरपच्चुत्तरनयेना”ति । यो हि परस्स वचनं तिपुक्खलेन नयेन रूपेति, तथा परस्स रूपनवचनं जातिभावं आपादेति, तस्स तादिसं वचनसभावं जाणवेय्यत्तियं विभावेति पाकटं करोतीति । सुज्जागारेसु नट्ठाति सुज्जागारेसु निवासेसु नट्ठा विनट्ठा अभावं गता । नास्स पज्जा नस्सेय्य तेहि तेहि कतपुच्छनपटिपुच्छननिमित्तं नानापटिभानुप्पत्तिया विसारमापन्नं पुच्छितं पज्झं विस्सज्जेतुं असमत्थताय । ओरोधेय्यामाति निरुस्साहं विय करोन्ता अवरोधेय्याम, तं परस्स ओरोधनं वादजालेन विनन्धनं विय होतीति आह “विनन्धेय्यामा”ति । तदत्थं तेन तुच्छकुम्भिनिदस्सनं कतं, तं ब्यतिरेकमुखेन दस्सेतुं “पूरितघटो ही”तिआदि वृत्तं ।

बलं दीपेन्तोति अभूतमेव अत्तनो जाणबलं पकासेन्तो । असम्भिन्नन्ति जातिसम्भेदाभावेन असम्भिन्नं । अज्जजातिसम्भेदे सति अस्सतरस्स अस्सस्स जातभावो विय सीहस्सपि सीहथामाभावो सियाति आह “असम्भिन्नकेसरसीह”न्ति । ठानसो वाति तद्धुणे एव ।

५४. “सुमागधा नाम नदी”ति केचि, तं मिच्छाति दस्सेन्तो “सुमागधा नाम पोक्खरणी”ति वत्त्वा तस्सा पोक्खरणिभावस्स सुत्तन्तरे आगततं दस्सेतुं “यस्सा तीरे”तिआदि वृत्तं । मोरानं निवापो एत्थाति मोरनिवापो । ब्यधिकरणानम्पि हि पदानं बाहिरत्थसमासो होतियेव यथा “उरसिलोमो”ति । अथ वा निवृत्थं एत्थाति निवापो, मोरानं निवापो मोरनिवापो, मोरानं निवापदिन्नट्टानं । तेनाह “यत्थ मोरान”न्तिआदि । यस्मा निग्रोधो तपोजिगुच्छवादो, सासने च भिक्खू अत्तकिलमथानुयोगं वज्जेत्वा भावनानुयोगेन परमस्सासप्पत्ते विहरन्ते पस्सति, तस्मा “कथं नु खो समणो गोतमो कायकिलमथेन विनाव सावके विनेती”ति सज्जातसन्देहो “को नाम सो”तिआदिना भगवन्तं पुच्छि । अस्ससति अनुसङ्कितपरिसङ्कितो होति एतेनाति अस्सासो, पीतिसोमनस्सन्ति आह “अस्सासप्पत्ताति तुट्ठिप्पत्ता सोमनस्सप्पत्ता”ति । अधिको सेट्ठो आसयो निस्सयो अज्झासयोति आह “उत्तमनिस्सयभूत”न्ति । आदिभूतं पुरातनं सेट्ठचरियं आदिब्रह्मचरियं, लोकुत्तरमग्गन्ति अत्थो । तथा हेस सब्बबुद्धपच्चेकबुद्धसावकेहि तेनेव आकारेन अधिगतो । तेनाह “पुराण...पे०... अरियमग्ग”न्ति । तथा हि तं भगवा “अद्दस पुराणं मग्गं पुराणमज्जस”न्ति अवोच । पूरेत्वा भावनापारिपूरिवसेन । “पूरेत्वा”ति वा इदं “अज्झासयं आदिब्रह्मचरियं”न्ति एत्थ पाठसेसोति वदन्ति । “अज्झासयं आदिब्रह्मचरियं पटिजानन्ति अस्सासप्पत्ता”ति एवं वा एत्थ योजना ।

तपोजिगुच्छावादवण्णना

५५. पकता हुत्वा विच्छिन्ना विप्पकताति आह “अनिद्धिताव हुत्वा ठिता”ति ।

५६. वीरियेन पापजिगुच्छनवादोति लूखपटिपत्तिसाधनेन वीरियेन अत्ततण्हाविनोदनवसेन पापकस्स जिगुच्छनवादो । जिगुच्छतीति जिगुच्छो, तब्भावो जेगुच्छं, अधिकं जेगुच्छं अधिजेगुच्छं, अतिविय पापजिगुच्छनं, तस्मिं अधिजेगुच्छे । कायदळ्हीबहुलं तपतीति तपो, अत्तकिलमथानुयोगवसेन पवत्तं वीरियं, तेन कायदळ्हीबहुलतानिमित्तस्स पापस्स जिगुच्छनं, विरज्जनम्पि तपोजिगुच्छाति आह “वीरियेन पापजिगुच्छा”ति ।
घासच्छादनसेनासनतण्हाविनोदनमुखेन अत्तस्नेहविरज्जनन्ति अत्थो । उपरि वुच्चमानेसु नानाकारेसु अचेलकादिवत्तेसु एकज्झं समादिन्नानं परिसोधनमेवेत्थ पारिपूरणं, न सब्बेसं अनवसेसतो समादानं तस्स असम्भवतोति आह “परिपुण्णाति परिसुद्धा”ति । परिसोधनञ्च नेसं सकसमयसिद्धेन नयेन पटिपज्जनमेव । विपरियायेन अपरिसुद्धता वेदितब्बा ।

५७. “एकं पज्हम्पि न कथेती”ति पठमं अत्तना पुच्छितपज्हस्स अकथितत्ता वुत्तं ।

तपनिस्सितकोति अत्तकिलमथानुयोगसङ्घातं तपं निस्साय समादाय वत्तनको । सीहनादेति सीहनादसुत्तवण्णनायं । यस्मा तत्थ वित्थारितनयेन वेदितब्बानि, तस्मा तस्सा अत्थप्पकासनाय वुत्तनयेनपि वेदितब्बानि ।

उपक्विकलेसवण्णना

५८. “सम्मा आदियती”ति वत्वा सम्मा आदियनञ्चस्स दळ्हग्गाहो एवाति आह “दळ्हं गण्हाती”ति ।
“सासनावचरेनापि दीपेतब्ब”न्ति वत्वा तं दस्सेतुं “एकच्चो ही”तिआदि वुत्तं, तेन धुतङ्गधरतामत्तेन अत्तमनता, परिपुण्णसङ्कप्पता सम्मापटिपत्तिया उपक्विकलेसोति इममत्थं दस्सेति, न यथावुत्ततपसमादानधुतङ्गधरतानं सतिपि अनिय्यानिकत्ते सदिसतन्ति दट्ठब्बं ।

“दुविधस्सापीति ‘अत्तमनो होति परिपुण्णसङ्कप्पो’ति च एवं उपक्विकलेसभेदेन वुत्तस्स दुविधस्सापि तपस्सिनो”ति केचि । यस्मा पन अट्ठकथायं सासनिकवसेनापि अत्थो दीपितो, तस्मा बाहिरकस्स, सासनिकस्स चाति एवं दुविधस्सापि तपस्सिनोति अत्थो वेदितब्बो । तथा चेव हि उपरिपि अत्थवण्णनं वक्खतीति । एत्तावताति यदिदं “को अज्जो मया सदिसो”ति एवं अतिमानस्स, अनिद्धितकिच्चस्सेव च “अलमेत्तावता”ति एवं अतिमानस्स च उप्पादनं, एत्तावता ।

उक्कंसतीति उक्कट्टं करोति । उक्खिपतीति अज्जेसं उपरि खिपति, पग्गण्हातीति अत्थो । परं संहारेतीति परं संहरं निहीनं करोति । अवक्खिपतीति अधो खिपति, अवमज्जतीति अत्थो ।

मानमदकरणेनाति मानसङ्घातस्स मदस्स करणेन उप्पादनेन । मुच्छितो होतीति मुच्छापन्नो होति, सा पन मुच्छापत्ति अभिज्झासीलब्बतपरामासकायगन्थेहि गधितचित्तता, तत्थ च अतिलगभावोति आह “गधितो अज्झोसन्नो”ति ।
पमज्जनञ्चेत्थ पमज्जनमेवाति आह “पमादमापज्जती”ति । केवलं धुतङ्गसुद्धिको हुत्वा कम्मट्ठानं अननुयुज्जन्तो ताय एव धुतङ्गसुद्धिकताय अत्तुक्कंसनादिवसेन पवत्तेय्याति दस्सेतुं “सासने”तिआदि वुत्तं । तेनाह “धुतङ्गमेव...पे०... पच्चेती”ति ।

५९. तेयेव पच्चया । सुट्टु कत्वा पटिसङ्घरित्वा लद्धाति आदरगारवयोगेन सक्कच्चं अभिसङ्घरित्वा दानवसेन उपनयवसेन लद्धा । वण्णभणनन्ति गुणकित्तनं । अस्साति तपस्सिनो ।

६०. वोदासन्ति ब्यासनं, विभज्जनन्ति अत्थो । तं पनेत्थ विभज्जनं द्विधा इच्छितन्ति आह “द्वेभागं आपज्जती”ति । द्वे भागे करोति रुच्चनारुच्चनवसेन । गेधजातोति सज्जातगेधो । मुच्छनं नाम सतिविप्पवासेनेव होति, न सतिया सतीति आह “समुट्टस्सती”ति । आदीनवमत्तम्पीति गधितादिभावेन परिभोगे आदीनवमत्तम्पि न पस्सति । मत्तज्जुताति परिभोगे मत्तज्जुता । पच्चवेक्खणपरिभोगमत्तम्पीति पच्चवेक्खणमत्तेन परिभोगम्पि एकवारं पच्चवेक्खित्वापि परिभुज्जनम्पि न करोति ।

६१. विचक्कसण्ठानाति विपुलतमचक्कसण्ठाना । सब्बस्स भुज्जनतो अयोक्कूटसदिसा दन्ता एव दन्तकूटं । अपसादेतीति पसादेति । अचेलकादिवसेनाति अचेलकवतादिवसेन । लूखाजीविन्ति सल्लेखपटिपत्तिया लूखजीविकं ।

६२. तपं करोतीति भावनामनसिकारलक्खणं तपं चरति चरन्तो विय होति । चङ्कमं ओतरति भावनं अनुयुज्जन्तो विय । विहारङ्गणं सम्मज्जति वत्तपटिपत्तिं पूरेन्तो विय ।

“आदस्सयमानो”ति वा पाठो ।

किञ्चि वज्जन्ति किञ्चि कायिकं वा वाचसिकं वा दोसं । दिट्ठिगतन्ति विपरीतदस्सनं । अरुच्चमानन्ति अत्तनो सिद्धन्ते पटिक्खित्तभावेन अरुच्चमानं । रुच्चति मेति “कप्पति मे”ति वदति । अनुजानितब्बन्ति तच्छाविपरीतभूतभावेन “एवमेत”न्ति अनुजानितब्बं । सवनमनोहारिताय “साधु सुट्ठु”ति अनुमोदितब्बं ।

६३. कुज्जनसीलताय कोधनो । वुत्तलक्खणो उपनाहो एतस्स अत्थीति उपनाही । एवंभूतो च तंसमङ्गी होतीति “समन्नागतो होती”ति वुत्तं । एस नयो इतो परेसुपि ।

अयं पन विसेसो — इस्सति उसूयतीति उस्सुकी । सठनं असन्तगुणसम्भावनं सठो, सो एतस्स अत्थीति सठो । सन्तदोसपटिच्छादनसभावा माया, माया एतस्स अत्थीति मायावी । गरुट्टानियानम्पि पणिपाताकरणलक्खणं थम्भनं थद्धं, तमेत्थ अत्थीति थद्धो । गुणेहि समानं, अधिकज्ज अतिक्कमित्वा निहीनं कत्वा मज्जनसीलताय अतिमानी । असन्तगुणसम्भावनत्थिकतासङ्घाता पापा लामका इच्छा एतस्साति पापिच्छो । मिच्छा विपरीता दिट्ठि एतस्साति मिच्छादिट्ठिको । “इदमेव सच्चं, मोघमज्ज”न्ति (म० नि० १८७, २०२, ४२७; ३.२७, २९; उदा० ५५; महानि० २०; नेत्ति० ५८) एवं अत्तना अत्ताभिनिविट्ठताय सता दिट्ठि सन्दिट्ठि, तमेव परामसतीति सन्दिट्ठिपरामासी । अट्ठकथायं पन “सयं दिट्ठि सन्दिट्ठी”ति वत्थुवसेन अत्थो वुत्तो । आ बाळ्हं विय धीयतीति आधानन्ति आह “दळ्हं सुट्टु ठपित”न्ति । यथागहितं गाहं पटिनिस्सज्जनसीलो पटिनिस्सग्गी, तप्पटिक्खेपेन दुप्पटिनिस्सग्गी । पटिसेधत्थो हि अयं दु-सदो यथा “दुप्पज्जो, (म० नि० १.४४९) दुस्सीलो”ति (अ० नि० ५.२१३; १०.७५; पारा० १९५; ध० प० ३०८) च ।

परिसुद्धपटिकप्पत्तकथावण्णना

६४. इध निग्रोध तपस्सीति यथानुक्कन्तं पुरिमपाळिं निगमनवसेन एकदेसेन दस्सेति । तेनाह “एवं भगवा”तिआदि । गहितलद्धिन्ति “अचेलकादिभावो सेय्यो, तेन च संसारसुद्धि होती”ति एवं गहितलद्धिं । रक्खितं

तपन्ति ताय लद्धिया समादियित्वा रक्खितं अचेलकवतादितपं । “सब्बमेव संकिलिट्ठं”न्ति इमिना यं वक्खति परिसुद्धपाळिवण्णनायं “लूखतपस्सिनो चेव धुतङ्गधरस्स च वसेन योजना वेदितब्बा”ति (दी० नि० अट्ठ० ३.६४), तस्स परिकप्पितरूपस्स लूखस्स तपस्सिनोति अयमेत्थ अधिप्पायोति दस्सेति । “परिसुद्धपाळिदस्सनत्थ”न्ति च इमिना तित्थियानं वसेन पाळि येवेत्थ लब्भति, न पन तदत्थोति दस्सेति । वुत्तविपक्खवसेनाति वुत्तस्स अत्थस्स पटिपक्खवसेन, पटिक्खेपवसेनाति अत्थो । तस्मिं ठानेति हेतुअत्थे भुम्मन्ति तस्स हेतुअत्थेन करणवचनेन अत्थं दस्सेन्तो “एवं सो तेना”तिआदिमाह । उत्तरि वायममानोति यथासमादिन्नेहि धुतधम्मोहि अपरितुट्ठो, अपरियोसितसङ्कप्पो च हुत्वा उपरि भावनानुयोगवसेन सम्मावायामं करोन्तो ।

६९. इतो परन्ति इतो यथावुत्तनयतो परं । अग्गभावं वा सारभावं वाति तपोजिगुच्छाय अग्गभावं वा सारभावं वा अजानन्तो । “अयमेवस्स अग्गभावो सारभावो”ति मज्जमानो “अग्गप्पत्ता, सारप्पत्ता चा”ति आह ।

परिसुद्धतचप्पत्तादिकथावण्णना

७०. यमनं संयमनं यामो, हिंसादीनं अकरणवसेन चतुब्बिधो यामोव चातुयामो, सो एव संवरो, तेन संवुतो गुत्तसब्बद्वारो चातुयामसंवरसंवुतो । तेनाह “चतुब्बिधेन संवरेण पिहितो”ति । अतिपातनं हिंसनन्ति आह “पाणं न हनती”ति । लोभचित्तेन भावितं सम्भावितन्ति कत्वा भावितं नाम पञ्च कामगुणा । अयञ्च तेसु तेसंयेव समुदाचारो मग्गोद्वापकं वियाति आह “तेसं सज्जाया”ति ।

एतन्ति अभिहरणं, हीनाय अनावत्तनञ्च । तेनाह “सो अभिहरतीति आदिलक्खण”न्ति । अभिहरतीति अभिबुद्धिं नेति । तेनाह “उपरूपरि वट्ठेती”ति । चक्कवत्तिनापि पब्बजितस्स अभिवादनादि करीयतेवाति पब्बज्जा सेट्ठा गुणविसेसयोगतो, दोसविरहिततो च, यतो सा पण्डितपज्जत्ता वुत्ता । गिहिभावो पन निहीनो तदुभयाभावतोति आह “हीनाय गिहिभावत्थाया”ति ।

७१. तचप्पत्ताति तचं पत्ता, तचसदिसा होतीति अत्थो ।

७४. तित्थियानं वसेनाति तित्थियानं समयवसेन । नेसन्ति तित्थियानं । तन्ति दिब्बचक्खुं । सीलसम्पदाति सब्बाकारसम्पन्नं चतुपरिसुद्धिसीलं । तचसारसम्पत्तितोति तचतपोजिगुच्छायासारसम्पत्तितो । विसेसभावन्ति विसेससभावं ।

अचेलकपाळिमत्तम्पीति अचेलकपाळिआगतत्थमत्तम्पि नत्थि, तस्मा मयं अनस्साम विनट्ठाति अत्थो । अ-कारो वा निपातमत्तं, नस्सामाति विनस्साम । कुतो परिसुद्धपाळीति कुतो एव अम्हेसु परिसुद्धपाळिआगतपटिपत्ति । एस नयो सेसेसुपि । सुतिवसेनापीति सोतपथागमनमत्तेनापि न जानाम ।

निग्रोधस्सपज्जायनवण्णना

७५. अस्साति सन्धानस्स गहपतिस्स । कक्खलन्ति फरुसं । दुरासदवचनन्ति अवत्तब्बवचनं । यस्मा फरुसवचनं यं उद्दिस्स पयुत्तं, तस्मिं खमापिते खमापकस्स पटिपाकतिकं होति, तस्मा “अयं मयी”तिआदि वुत्तं ।

७६. बोधत्थाय धम्मं देसेति, न अत्तनो बुद्धभावघोसनत्थाय । वादत्थायाति परवादभञ्जनवादत्थाय । रागादिसमनत्थाय धम्मं देसेति, न अन्तेवासिकम्यताय । ओघनित्थरणत्थायाति चतुरोघनित्थरणत्थाय धम्मं देसेति सब्बसो ओरपारातिण्णमावहत्ता देसनाय । सब्बकिलेसपरिनिब्बानत्थाय धम्मं देसेति किलेसानं लेसेनपि देसनाय अपरामट्टभावतो ।

ब्रह्मचरियपरियोसानादिवण्णना

७७. इदं सब्बम्पीति सत्तवस्सतो पट्ठाया याव “सत्ताह”न्ति पदं, इदं सब्बम्पि वचनं । असठो पन अमायावी उजुजातिको तिकखपज्जो उग्घटितज्जूति अधिप्पायो । सो हि तंमुहुत्तेनेव अरहत्तं पत्तुं सक्खिस्सतीति । वड्ढवड्ढोति कायवड्ढादीहिपि वड्ढेहि वड्ढो जिम्हो कुटिलो । “सठं पनाहं अनुसासितुं न सक्कोमी”ति न इदं भगवा किलासुभावेनेव वदति, अथ खो तस्स अभाजनभावेनेव ।

७८. पकतिया आचरियोति यो एव तुम्हाकं इतो पुब्बे पकतिया आचरियो अहोसि, सो एव इदानीपि पुब्बाचिण्णवसेन आचरियो होतु, न मयं तुम्हे अन्तेवासिके कातुकामाति अधिप्पायो । न मयं तुम्हाकं उद्देसेन अत्थिका, धम्मतन्ति मेव पन तुम्हे जापेतुकामम्हाति अधिप्पायो । आजीवतोति जीविकाय वुत्तितो । अकुसलाति कोट्टासं पत्ताति अकुसलाति तं तं कोट्टासतंयेव उपगता । किलेसदरथसम्पयुत्ताति किलेसदरथसहिता तंसम्बन्धनतो । जातिजरामरणानं हिताति जातिजरामरण्या । संकिलेसो एत्थ अत्थि, संकिलेसे वा नियुत्ताति संकिलेसिका । वोदानं वुच्चति विसुद्धि, तस्स पच्चयभूतत्ता वोदानिया । तथाभूता चेते वोदापेन्तीति आह “सत्ते वोदापेन्ती”ति । सिखाप्पत्ता पज्जाय पारिपूरिवेपुल्लता मग्गफलवसेनेव इच्छितब्बाति आह “मग्गपज्जा... पे०... वेपुल्लत”न्ति । उभोपि वा एतानि पारिपूरिवेपुल्लानि । या हि तस्स पारिपूरी, सा एव वेपुल्लताति । ततोति संकिलेसधम्मप्पहानवोदानधम्माभिबुद्धिहेतु ।

७९. “यथा मारेना”ति नयिदं निदस्सनवसेन वुत्तं, अथ खो तथाभावकथनमेवाति दस्सेतुं “मारो किरा”तिआदि वुत्तं । अथाति मारेन तेसं परियुट्ठानप्पत्तितो पच्छा अज्जासीति योजना । कस्मा पन भगवा पगेव न अज्जासीति? अनावज्जितत्ता । मारं पटिबाहित्वाति मारेन तेसु कतं परियुट्ठानं विधमेत्वा, न तेसं सति पयोजने बुद्धानं दुक्करं । सोति मग्गफलुप्पत्तिहेतु । तेसं परिब्बाजकानं ।

फुट्ठाति परियुट्ठानवसेन फुट्ठा । यत्राति निद्धारणे भुम्मन्ति आह “येसू”ति । अज्जाणत्थन्ति आजाननत्थं, उपसग्गमत्तज्जेत्थ आ-कारोति आह “जाननत्थ”न्ति, वीमंसनत्थन्ति अत्थो । चित्तं नुप्पन्नन्ति “जानाम तावस्स धम्म”न्ति आजाननत्थं “ब्रह्मचरियं चरिस्सामा”ति एकस्मिं दिवसे एकवारम्पि तेसं चित्तं नुप्पन्नं । सत्ताहो पन वुच्चमानो एतेसं किं करिस्सतीति योजना । सत्ताहं पूरेतुन्ति सत्ताहं ब्रह्मचरियं पूरेतुं, ब्रह्मचरियवसेन वा सत्ताहं पूरेतुन्ति अत्थो । परवादभिन्दनन्ति परवादमद्दनं । सकवादसमुस्सापनन्ति सकवादपग्गण्हनं । वासनायाति सच्चसम्पटिवेधवासनाय । नेसन्ति च पकरणवसेन वुत्तं । तदज्जेसम्पि हि भगवतो सम्मुखा, परम्पराय च देवमनुस्सानं सुणन्तानं वासनाय पच्चयो एवाति । यं पनेत्थ अत्थतो न विभत्तं, तं सुविज्जेय्यमेवाति ।

उदुम्बरिकसुत्तवण्णनाय लीनत्थप्पकासना ।

३. चक्कवत्तिसुत्तवण्णना

अत्तदीपसरणतावण्णना

८०. उत्तानं वुच्चति पाकटं, तप्पटिक्खेपेन अनुत्तानं अपाकटं, पटिच्छन्नं, अपचुरं, दुविज्जेय्यञ्च । अनुत्तानानं पदानं वण्णना अनुत्तानपदवण्णना । उत्तानपदवण्णनाय पयोजनाभावतो अनुत्तानगगहणं । “मातुला”ति इत्थिलिङ्गवसेन लद्धनामो एको रुक्खो, तस्सा आसन्नप्पदेसे मापितत्ता नगरम्पि “मातुला” त्वेव पज्जायित्थ । तेन वुत्तं “मातुलायन्ति एवं नामके नगरे”ति । अविदूरेति तस्स नगरस्स अविदूरे ।

कामञ्चेत्थ सुत्ते “भूतपुब्बं, भिक्खवे, राजा दळ्हेनेमि नाम अहोसी”तिआदिना अतीतवंसदीपिका कथा आदितो पट्टाय आगता, “अड्डतेय्यवस्ससतायुकानं मनुस्सानं वस्ससतायुका पुत्ता भविस्सन्ती”तिआदिना पन सविसेसं अनागतत्थपटिसंयुत्ता कथा आगताति वुत्तं “अनागतवंसदीपिकाय सुत्तन्तकथाया”ति । अनागतत्थदीपनज्झि अच्छरियं, तत्थापि अनागतस्स सम्मासम्बुद्धस्स पटिपत्तिकित्तनं अच्छरियतमं । समागमेनाति सन्निपातेन ।

“भत्तगं अमनाप”न्तिआदि केवलं तेसं परिवितक्कमत्तं । अमनापन्ति अमनुज्जं । बुद्धेसु कतो अप्पकोपि अपराधो अप्पको कारो विय गरुतरविपाकोति आह “बुद्धेहि सद्धि...पे०... सदिसं होती”ति । तत्राति तस्मिं मातुलनगरस्स समीपे, तस्सं वा परिसायं ।

अत्तदीपाति एत्थ कामं यो परो न होति, सो अत्ताति ससन्तानो “अत्ता”ति वुच्चति, हितसुखेसिभावेन पन अत्तनिब्बिसेसत्ता धम्मो इध “अत्ता”ति अधिप्पेतो । तेनाह “अत्ता नाम लोकियलोकुत्तरो धम्मो”ति । द्विधा आपो गतो एत्थाति दीपो, ओघेन अनज्झोत्थतो भूमिभागो । इध पन कामोघादीहि अनज्झोत्थरणीयत्ता दीपो वियाति दीपो, अत्ता दीपो पतिट्ठा एतेसन्ति अत्तदीपा । तेनाह “अत्तानं दीप”न्तिआदि । दीपभावो चेत्थ पटिसरणताति आह “इदं तस्सेव वेवचन”न्ति । अज्जसरणपटिक्खेपवचनन्ति अज्जसरणभावपटिक्खेपवचनं । इदज्झि न अज्जं सरणं कत्वा विहरणस्सेव पटिक्खेपवचनं, अथ खो अज्जस्स सरणसभावस्सेव पटिक्खेपवचनं तप्पटिक्खेपे च तेन इतरस्सापि पटिक्खेपसिद्धितो । तेनाह “न ही”तिआदि । इदानि तमेवत्थं सुत्तन्तरेन साधेतुं “वुत्तम्पि चेत”न्तिआदि । यदि एत्थ पाकतिको अत्ता इच्छितो, कथं तस्स दीपसरणभावो, तस्मा अधिप्पायिको एत्थ अत्ता भवेय्याति पुच्छति “को पनेत्थ अत्ता नामा”ति । इतरो यथाधिप्पेतं अत्तानं दस्सेन्तो “लोकियलोकुत्तरो धम्मो”ति । दुतियवारोपि पठमवारस्सेव परियायभावेन देसितोति दस्सेतुं “तेनाहा”तिआदि वुत्तं ।

गोचरेति भिक्खूनं गोचरट्टानभूते । तेनाह “चरितुं युत्तट्टाने”ति । सकेति कथं पनायं भिक्खूनं सकोति आह “पेत्तिके विसये”ति । पितितो सम्मासम्बुद्धतो आगतत्ता “अयं तुम्हाकं गोचरो”ति तेन उद्दिट्ठा पेत्तिके विसयेति । चरन्तन्ति सामिअत्थे उपयोगवचनन्ति आह “अयमेवत्थो”ति, चरन्तानन्ति च अत्थो, तेनायं विभत्तिविपल्लासेनपि वचनविपल्लासेनपीति दस्सेति । किलेसमारस्स ओतारालाभेनेव इतरमारानम्पि ओतारालाभो वेदितब्बो । अयं पनत्थोति गोचरे चरणं सन्थायाह, वत्थु पन ब्यतिरेकमुखेन आगतं ।

सकुणे हन्तीति सकुणग्घि, महासेनसकुणो । अज्झप्पत्ताति अभिभवनवसेन पत्ता उपगता । न म्यायन्ति मे अयं सकुणग्घि नालं अभविस्स । नङ्गलकट्टकरणन्ति नङ्गलेन कसितप्पदेसो । लेड्डुट्टानन्ति लेड्डूनं उड्डपितट्टानं । सके बलेति अत्तनो बलहेतु । अपत्थद्धाति अवगाळहत्थम्भा सज्जातत्थम्भा । अस्सरमानाति अक्कायन्ती ।

महन्तं लेडुन्ति नङ्गलेन भिन्नद्वाने सुखताय तिखिणसिङ्गअयोधनसदिसं महन्तं लेडुं। अभिरुहित्वाति तस्स अधोभागेन अत्तना पविसित्वा निलीनयोगगप्पदेसं सल्लकखेत्वा तस्सुपरि चङ्कमन्तो अस्सरमानो अट्टासि। “एहि खो”तिआदि तस्स अस्सरमानाकारदस्सनं। सन्नय्हाति वातगहणवसेन उभो पक्खे समं ठपेत्वा। पच्चुपादीति पाविसि। तत्थेवाति यत्थ पुब्बे लापो ठितो, तत्थेव लेडुम्हि। उरन्ति अत्तनो उरप्पदेसं। पच्चताळेसीति पति अताळेसि सारम्भवसेन वेगेन गन्त्वा पहरणतो विधारेन्ती पताळेसि। आरम्भणन्ति पच्चयं। “अवसर”न्ति केचि।

“कुसलान”न्ति एवं पवत्ताय देसनाय को अनुसन्धि? यथाअनुसन्धि एव। आदितो हि “अत्तदीपा, भिक्खवे, विहरथा”तिआदिना (दी० नि० ३.८०) येव अत्तधम्मपरियायेन लोकियलोकुत्तरधम्मा गहिता, ते येवेत्थ कुसलगहणेन गहिताति। अनवज्जलक्खणानन्ति अवज्जपटिपक्खसभावानं। “अवज्जरहितसभावान”न्ति केचि। तत्थ पुरिमे अत्थविकप्पे विपाकधम्मधम्मा एव गहिता, दुतिये पन विपाकधम्मापि। यदि एवं, कथं तेसं समादाय वत्तनन्ति? न खो पनेतं एवं दट्टब्बं “विपाकधम्मा सीलादि विय समादाय वत्तितब्बा”ति। समादानन्ति पन अत्तनो सन्ताने सम्मा आदानं पच्चयवसेन पवत्ति येवाति दट्टब्बं। विपाकधम्मा हि पच्चयविसेसेहि सत्तसन्ताने सम्मदेव आहिता आयुआदिसम्पत्तिविसेसभूता उपरूपरिकुसलविसेसुप्पत्तिया उपनिस्सया होन्तीति वदन्ति। पुञ्जं पवड्ढतीति एत्थ पुञ्जन्ति उत्तरपदलोपेनायं निद्वेसोति आह “पुञ्जफलं वड्ढती”ति। पुञ्जफलन्ति च एकदेससरूपेकसेसेन वुत्तं “पुञ्जञ्च पुञ्जफलञ्च पुञ्जफल”न्ति आह “उपरूपरि पुञ्जम्पि पुञ्जविपाकोपि वेदितब्बो”ति।

“मातापितून”न्तिआदि निदस्सनमत्तं, तस्मा अञ्जम्पि एवरूपं हेतूपनिस्सयं कुसलं दट्टब्बं। सिनेहवसेनाति उपनिस्सयभूतस्स सिनेहस्स वसेन, न सम्पयुत्तस्स। न हि सिनेहसम्पयुत्तं नाम कुसलं अत्थि। मुदुमद्ववचित्तन्ति मेत्तावसेन अतिविय मद्ववन्तं चित्तं। यथा मत्थकप्पत्तं वट्टगामिकुसलं दस्सेतुं “मातापितूनं ...पे०... मुदुमद्ववचित्त”न्ति वुत्तं, एवं मत्थकप्पत्तमेव विवट्टगामिकुसलं दस्सेतुं “चत्तारो सति...पे०... बोधिपक्खियधम्मा”ति वुत्तं। तदञ्जेपि पन दानसीलादिधम्मा वट्टस्स उपनिस्सयभूता वट्टगामिकुसलं विवट्टस्स उपनिस्सयभूता विवट्टगामिकुसलन्ति वेदितब्बा। परियोसानन्ति फलविसेसावहताय फलदाय कोटि सिखाप्पत्ति, देवलोके च पवत्तिसिरिविभवोति परियोसानं “मनुस्सलोके”ति विसेसितं, मनुस्सलोकवसेनेव चायं देसना आगताति। मग्गफलनिब्बानसम्पत्ति परियोसानन्ति योजना। विवट्टगामिकुसलस्स विपाकं सुत्तपरियोसाने दस्सिस्सति “अथ खो, भिक्खवे, सङ्खो नाम राजा”तिआदिना (दी० नि० ३.१०८)।

दळहनेमिचक्कवत्तिराजकथावण्णना

८१. इधाति इमस्मिं “कुसलानं, भिक्खवे, धम्मान”न्तिआदिना (दी० नि० ३.११०) सुत्तदेसनाय आरद्धद्वाने वट्टविवट्टगामिभावेन साधारणे कुसलगहणे। तत्थ वट्टगामिकुसलानुसन्धिवसेन “भूतपुब्बं भिक्खवे”ति देसनं आरभि, आरभन्तो च देसियमानमत्तं। धम्मपटिग्गाहकानं भिक्खून् सङ्खेपतो एवं दीपेत्वा आरभीति दस्सेतुं “भिक्खवे”तिआदि वुत्तं, पठमं तथा अदीपेन्तोपि भगवा अत्थतो दीपेति वियाति अधिप्पायो।

८२. ईसकम्पीति अप्पमत्तकम्पि। अवसक्कितन्ति ओगतभट्टं। नेमिअभिमुखन्ति नेमिप्पदेसस्स सम्मुखा। बन्धिसु चक्करतनस्स ओसक्कितानोसक्कितभावं जानितुं। तदेतन्ति यथावुत्तद्वाना चवनं। अतिबलवदोसेति रज्जो बलवति अनत्थे उपट्टिते सति।

अप्पमत्तोति रज्जो आणाय पमादं अकरोन्तो ।

एकसमुद्दपरियन्तमेवाति जम्बुदीपमेव सन्धाय वदति । सो उत्तरतो अस्सकण्णपब्बतेन परिच्छिन्नं हुत्वा अत्तानं परिक्षिपित्वा ठितएकसमुद्दपरियन्तो । पुज्जिद्धिवसेनाति चक्कवत्तिभावावहाय पुज्जिद्धिया वसेन ।

८३. एवं कत्वाति कासायानि वत्थानि अच्छादेत्वा । सुकतं कम्मन्ति दसकुसलकम्मपथमेव वदति ।

“दसविधं, द्वादसविधं”न्ति च वुत्तविभागो परतो आगमिस्सति । पूरेन्तेनेवाति पूरेत्वा ठितेनेव । निद्दोसेति चक्कवत्तिवत्तस्स पटिपक्खभूतानं दोसानं अपगमने निद्दोसे । चक्कवत्तीनं वत्तेति चक्कवत्तिराजूहि वत्तितब्बवत्ते । भाविनि भूते विय हि उपचारो यथा “अगमा राजगहं बुद्धो”ति (सु० नि० ४१०) । अधिगतचक्कवत्तिभावापि हि ते तत्थ वत्तन्तेवाति तथा वुत्तं ।

चक्कवत्तिअरियवत्तवण्णना

८४. अज्जथा वत्तितुं अदेन्तो सो धम्मो अधिद्धानं एतस्साति तदधिद्धानं, तेन तदधिद्धानेन चेतसा । सक्करोन्तोति आदरकिरियावसेन करोन्तो । तेनाह “यथा”तिआदि । गरुं करोन्तोति पासाणच्छत्तं विय गरुकरणवसेन गरुं करोन्तो । तेनेवाह “तस्मिं गारवुप्पत्तिया”ति । मानेन्तोति सम्भावनावसेन मनेन पियायन्तो । तेनाह “तमेवा”तिआदि । एवं पूजयतो अपचायतो एवञ्च यथावुत्तसक्कारादिसम्भवोति तं दस्सेतुं “तं अपदिसित्वा”तिआदि वुत्तं । “धम्माधिपत्तिभूतो आगतभावेना”ति इमिना यथावुत्तधम्मस्स जेट्ठकभावेन पुरिमपुरिमतरअत्तभावेसु सक्कच्च समुपचितभावं दस्सेति । “धम्मवसेनेव सब्बकिरियानं करणेना”ति एतेन ठाननिसज्जादीसु यथावुत्तधम्मनिन्नपोणपब्भारभावं दस्सेति । अस्साति रक्खावरणगुत्तिया । परं रक्खन्तो अज्जं दिट्ठधम्मिकादिअनत्थतो रक्खन्तो तेनेव परत्थसाधनेन खन्तिआदिगुणेन अत्तानं ततो एव रक्खति । मेत्तचित्तताति मेत्तचित्तताय । निवासनपारुपनगेहादीनं सीतुण्हादिपटिबाहनेन आवरणं । अन्तो जनस्मिन्ति अब्भन्तरभूते पुत्तदारादिजने ।

“सीलसंवरे पतिट्ठापेही”ति इमिना रक्खं दस्सेति, “वत्थगन्धमालादीनि देही”ति इमिना आवरणं, इतरेन गुत्तिं । भत्तवेतनसम्पदानेनपीति पि-सद्देन सीलसंवरे पतिट्ठापनादीनि सम्पिण्डेति । एसेव नयो इतो परेसुपि पि-सद्दग्गहणेसु । निगमो निवासो एतेसन्ति नेगमा, एवं जानपदाति आह “निगमवासिनो”तिआदि ।

नवविधा मानमदाति “सेय्योहमस्मी”तिआदि (सं० नि० ४.१०८; ध० स० ११२१; विभ० ८६६; महानि० २१, १७८) नयप्पवत्तिया नवविधा मानसङ्घाता मदा । मानो एव हेत्थ पमज्जनाकारेन पवत्तिया मानमदो । सोभने कायिकवाचसिककम्मे रतोति सूरतो उ-कारस्स दीधं कत्वा, तस्स भावो सोरच्चं, कायिकवाचसिको अवीतिक्कमो, सब्बं वा कायवचीसुचरितं । सुट्ठु ओरतोति सोरतो, तस्स भावो सोरच्चं, यथावुत्तमेव सुचरितं । रागादीनन्ति रागदोसमोहमानादीनं । दमनादीहीति दमनसमनपरिनिब्बापनेहि । एकमत्तानन्ति एकं चित्तं, एकच्चं अत्तनो चित्तन्ति अत्थो । रागादीनज्झि पुब्बभागियं दमनादिपच्चेकं इच्छितब्बं, न मग्गक्खणे विय एकज्झं पटिसङ्खानमुखेन पजहनतो । एकमत्तानन्ति वा विवेकवसेन एकं एकाकिनं अत्तानं । काले कालेति तेसं सन्तिकं उपसङ्कमितब्बे काले काले ।

इध ठत्वाति “इदं खो, तात, तं”न्ति एवं निगमनवसेन वुत्तद्धाने ठत्वा । वत्तन्ति अरियचक्कवत्तिवत्तं । समानेतब्बन्ति “दसविधं, द्वादसविधं”न्ति च हेट्ठा वुत्तगणनाय च समानं कातब्बं अनूनं अनधिकं कत्वा दस्सेतब्बं । अधम्मरागस्साति

अयुत्तद्धाने रागस्स । विसमलोभस्साति युत्तद्धानेपि अतिविय बलवभावेन पवत्तलोभस्स ।

चक्करतनपातुभाववण्णना

८५. वत्तमानस्साति परिपुण्णे चक्कवत्तिवत्ते वत्तमानस्स, नो अपरिपुण्णेति आह “पूरेत्वा वत्तमानस्सा”ति । कित्तावता पनस्स पारिपूरी होतीति? तत्थ “कताधिकारस्स ताव हेट्ठिमपरिच्छेदेन द्वादसहिपि संवच्छरेहि पूरति, पञ्चवीसतिया, पञ्जासाय वा संवच्छरेहि । अयञ्च भेदो धम्मच्छन्दस्सपि तिक्खमज्झमुदुतावसेन, इतरस्स ततो भिय्योपी”ति वदन्ति ।

दुतियादिचक्कवत्तिकथावण्णना

९०. अत्तनो मतियाति परम्परागतं पुराणं तन्तिं पवेणिं लङ्घित्वा अत्तनो इच्छिताकारेन । तेनाह “पोराणक”न्तिआदि ।

न पब्बन्तीति समिद्धिया न पूरेन्ति, फीता न होन्तीति अत्थो । तेनाह “न वड्ढन्ती”ति । तथा चाह “कत्थचि सुज्जा होन्ती”ति । तत्थ तत्थ राजकिच्चे रज्जा अमा सह वत्तन्तीति अमच्चा, येहि विना राजकिच्चं नप्पवत्तति । परम्परागता हुत्वा रज्जो परिसाय भवाति पारिसज्जा । तेनाह “परिसावचरा”ति । तस्मिं ठानन्तरे ठपिता हुत्वा रज्जो आयं, वयञ्च याथावतो गणेन्तीति गणका । जातिकुलसुताचारादिवसेन पुत्थुत्तं गतत्ता महती मत्ता एतेसन्ति महामत्ता, ते पन महानुभावा अमच्चा एवाति आह “महाअमच्चा”ति । ये रज्जो हत्थानीकादीसु अवट्ठिता, ते अनीकट्ठाति आह “हत्थिआचरियादयो”ति । मन्तं पज्जं असिता हुत्वा जीवन्तीति मन्तस्साजीविनो, मत्तिसजीवाति अत्थो, ये तत्थ तत्थ राजकिच्चे उपदेसदायिनो । तेनाह “मन्ता वुच्चति पज्जा”तिआदि ।

आयुवण्णादिपरिहानिकथावण्णना

९१. बलवलोभत्ताति “इमस्मिं लोके इदानि दलिहमनुस्सा नाम बहू, तेसं सब्बेसं धने अनुप्पदियमाने मय्हं कोसस्स परिक्खयो होती”ति एवं उप्पन्नबलवलोभत्ता । उपरूपपरिभूमीसूति छकामसग्गसङ्घातासु उपरूपरिकामभूमीसु । कम्मस्स फलं अग्गं नाम, तं पनेत्थ उद्धगामीति आह “उद्धं अग्गं अस्सा”ति । सग्गे नियुत्ता, सग्गप्पयोजनाति वा सोवग्गिका । दसन्नं विसेसानन्ति दिब्बआयुवण्णयससुखआधिपतेय्यानञ्चेव दिब्बरूपादीनञ्च फलविसेसानं । वण्णगगहणेन चेत्य सको अत्तभाववण्णो गहितो, रूपगगहणेन बहिद्धा रूपारम्मणं ।

९२. सुट्ठु निसिद्धन्ति यथायं इमिना अत्तभावेन अदिन्नं आदातुं न सक्कोति, एवं सम्मदेव ततो निसेधितं कत्वा । मूलहतन्ति जीविता वोरपनेन मूले एव हतं ।

९६. रागवसेन चरणं चरित्तं, चरित्तमेव चारित्तं, मेथुनन्ति अधिप्पायो, तं पन “परेसं दारेसू”ति वुत्तत्ता “मिच्छाचार”न्ति आह ।

१००. पच्चनीकदिट्ठीति “अत्थि दिन्न”न्तिआदिकाय (म० नि० १.४४१; २.९४; विभ० ७९३) सम्मादिट्ठिया पटिपक्खभूता दिट्ठी ।

१०१. मातुच्छादिका उपरि सयमेव वक्खति । **अतिबलवलोभो**ति अतिविय बलवा बहलकिलेसो, येन अकाले, अदेसे च पवत्ति । **मिच्छाधम्मो**ति मिच्छा विपरीतो अविशभागवत्थुको लोभधम्मो । तेनाह “**पुरिसान**”न्तिआदि ।

तस्स भावोति येन मेत्ताकरुणापुब्बङ्गमेन चित्तेन पुग्गलो “**मत्तेय्यो**”ति वुच्चति, सो तस्स यथावुत्तचित्तुप्पादो, तंसमुद्धाना च किरिया **मत्तेय्यता** । तेनाह “**मातरि सम्मा पटिपत्तिया एतं नाम**”न्ति । या सम्मा पज्जितब्बे सम्मा अप्पटिपत्ति, सोपि दोसो अगारवकिरियादिभावतो । विप्पटिपत्तियं पन वत्तब्बमेव नत्थीति आह “**तस्सा अभावो चेव तप्पटिपक्खता च अमत्तेय्यता**”ति । कुले जेद्धानन्ति अत्तनो कुले वुद्धानं महापितुचूळपितुजेड्ढकभातिकादीनं ।

दसवस्सायुकसमयवण्णना

१०३. “य”न्ति इमिना समयो आमद्दो, भुम्मत्थे चेतं पच्चत्तवचनन्ति आह “**यस्मिं समये**”ति । अलं पतिनोति **अलंपतेय्या** । तस्सा परियत्तता भरियाभावेनाति आह “**दातुं युत्ता**”ति । **अगगरसानी**ति मधुरभावेन, भेसज्जभावेन च अगगभूतरसानि ।

दिप्पिस्सन्तीति पटिपक्खभावेन समुज्जलिस्सन्ति । तेनाह “**कुसलन्तिपि न भविस्सती**”ति । **अहो पुरिसो**ति मातादीसुपि ईदिसो, अज्जेसं केसं किं विस्सज्जेस्सति, अहो तेजवपुरिसोति ।

गेहे मातुगामं वियाति अत्तनो गेहे दासिभरियाभूतमातुगामं विय । **मिस्सीभावन्ति** मातादीसु भरियाय विय चारित्तसङ्करं ।

बलवकोपोति हन्तुकामतावसेन उप्पत्तिया बलवकोपो । **आघातेती**ति आहनति, अत्तनो कक्खळफरुसभावेन चित्तं विबाधतीति अत्थो । निस्सयदहनरसो हि दोसो । **ब्यापादेती**ति विनासेति, **मनोपदूसनतो** मनस्स पकोपनतो । **तिब्बन्ति** तिक्खं, सा पनस्स तिक्खता सरीरे अवहन्तेपि सिनेहवत्थुं लङ्घित्वापि पवत्तिया वेदितब्बाति आह “**पियमानस्सपी**”तिआदि ।

१०४. कप्पविनासो **कप्पो** उत्तरपदलोपेन, अन्तराव कप्पो **अन्तरकप्पो** । तण्हादिभेदो कप्पो एतस्स अत्थीति **कप्पो**, सत्तलोकोति आह “**अन्तराव लोकविनासो**”ति । स्वायं अन्तरकप्पो कतिविधो, कथञ्चस्स सम्भवो, किं गतिकोति अन्तो गधं चोदनं सन्धायाह “**अन्तरकप्पो च नामा**”तिआदि । **लोभुस्सदाया**ति लोभाधिकाय **पजाय** वत्तमानाय ।

एवं चिन्तयिंसूति पुब्बे यथानुस्सवानुस्सरणेन, अत्तनो च आयुविसेसस्स लभनतो । **गुम्बलतादीहि गहनं ठानन्ति** गुम्बलतादीहि सञ्छन्नताय गहनभूतं ठानं । **रुक्खेहि गहनन्ति** रुक्खेहि निरन्तरनिचितेहि गहनभूतं । **नदीविदुग्गन्ति** छिन्नतटाहि नदीहि ओरतो, पारतो च विदुग्गं । तेनाह “**नदीन**”न्तिआदि । **पब्बतेहि विसमं** पब्बतन्तरं । **पब्बतेसु वा** छिन्नतटेसु दुरारोहं **विसमद्धानं** । **सभागे**ति जीवनवसेन समानभागे सदिसे **करिस्सन्ति** ।

आयुवण्णादिवड्डनकथावण्णना

१०५. **आयतन्ति** वा दीघं चिरकालिकं । मरणवसेन हि जातिक्खयो आयतो अपुनरावत्तनतो, न राजभयादिना उक्कमनवसेन पुनरावत्तियापि तस्स लब्धनतो । **ओसक्केय्यामा**ति ओरमेय्याम । विरमणम्मि अत्थतो पजहनमेव

परिचयजनभावतोति आह “पजहेय्यामाति अत्थो”ति । सीलगब्भे वड्डितत्ताति मातु, पितु च सीलवन्तताय तदवयवभूते गब्भे वड्डि “सीलगब्भे वड्डिता”ति वुत्ता, एतेन उतुआहारस्स विय तदज्जस्सापि बाहिरस्स पच्चयस्स वसेन सत्तसन्तानस्स विसेसाधानं होतीति दस्सेति । यं पनेत्थ वत्तब्बं, तं ब्रह्मजालटीकायं (दी० नि० टी० १.७) वुत्तमेव । खेत्तविसुद्धियाति अधिष्ठानभूतवत्थुविसुद्धिया । ननु च तं विसेसाधानं जायमानं रूपसन्ततिया एव भवेय्याति? सच्चमेतं, रूपसन्ततिया पन तथा आहितविसेसाय अरूपसन्ततिपि लद्धूपकारा एव होति तप्पटिबद्धवुत्तिभावतो । यथा कबळीकाराहारेण उपत्थम्भिते रूपकाये सब्बोपि अत्तभावो अनुगहितो एव नाम होति, यथा पन रज्जो चक्कवत्तिनो पुज्जविसेसं उपनिस्साय तस्स इत्थिरतनादीनं अनज्जसाधारणा ते ते विसेसा सम्भवन्ति तब्भावे भावतो, तदभावे च अभावतो, एवमेव तस्मिं काले मातापितूनं यथावुत्तपुज्जविसेसं उपनिस्साय तेसं पुत्तानं जायमानानं दीघायुकता खेत्तविसुद्धियाव होतीति वेदितब्बा संवेगधम्मछन्दादिसमुपबूहिताय तदा तेसं कुसलचेतनाय तथा उल्लारभावेन समुप्पज्जनतो । एत्थाति इमस्मिं मनुस्सलोके, तत्थाति यथावुत्तं कुसलधम्मं समादाय वत्तमाने सत्तनिकाये । तत्थेवाति तस्मिंयेव सत्तनिकाये । “अत्तनोव सीलसम्पत्तिया”ति वुत्तं ससन्ततिपरियापन्नस्स धम्मस्स तत्थ विसेसपच्चयभावतो । खेत्तविसुद्धिपि पन इधापि पटिक्खिपितुं न सक्का ।

कोट्टासाति चत्तारीसवस्सायुकातिआदयो असीतिवस्ससहस्सायुकपरियोसाना एकादस कोट्टासा । अदिन्नादानादीहीति आदि-सद्देन कुले जेट्ठापचायिकापरियोसानानं दसन्नं पापकोट्टासानं गहणं ।

सङ्घराजउप्पत्तिवण्णना

१०६. एवं उप्पज्जनकतण्हाति एवं वचीभेदं पापनवसेन पवत्ता भुज्जितुकामता । अनसनन्ति कायिककिरियाअसमत्थताहेतुभूतो सरीरसङ्कोचो । तेनाह “अविष्कारिकभावो”तिआदि । घननिवासतन्ति गामनिगमराजधानीनं घननिविद्धतं अज्जमज्जस्स नातिदूरवत्तितं । निरन्तरपूरितोति निरन्तरं विय पुण्णो ततुपगानं सत्तानं बहुभावतो ।

मेत्तेय्यबुद्धुप्पादवण्णना

१०७. किञ्चापि पुब्बे वड्डमानकवसेन देसना आगतं, इदं पन न वड्डमानकवसेन वुत्तं । कस्माति चे आह “न ही”तिआदि । सत्तानं वड्डमानायुककाले बुद्धा न निब्बत्तन्ति संसारे संवेगस्स दुब्बिभावनीयत्ता । ततो वस्ससतसहस्सतो ओरमेव बुद्धुप्पादकालो ।

१०८. समुस्सितट्ठेन यूपो वियाति यूपो, यूपन्ति एत्थ सत्ता अनेकभूमिकूटागारोवरकादिवन्ततायाति यूपो, पासादो । रज्जो हेतुभूतेनाति हेतुअत्थे करणवचनन्तिदस्सेतिउस्साहसम्पत्तिआदिना । महता राजानुभावेन, महता च कित्तिस्सद्देन समन्नागतत्ता चतूहि सङ्गहवत्थूहि महाजनस्स रज्जनतो महापनादो नाम राजा जातो । जातकेति महापनादजातके (जा० १.३.४० महापनादजातके) ।

पनादो नाम सो राजाति “अतीते पनादो नाम सो राजा अस्सोसी”ति अत्तभावन्तरताय अत्तानं परं विय निद्विसति । आयस्मा हि भद्दजित्थेरो अत्तना अज्झावुत्थपुब्बं सुवण्णपासादं दस्सेत्वा एवमाह । यस्स यूपो सुवण्णयोति यस्स रज्जो अयं यूपो पासादो सुवण्णयो सुवण्णमयो । तिरियं सोळसुब्बेधोति वित्थारतो सोळससरपातप्पमाणो, सो पन

अट्टयोजनप्पमाणो होति । उब्भमाहु सहस्सधाति उब्भं उच्चभावं अस्स पासादस्स सहस्सधा सहस्सकण्डप्पमाणं आहु, सो पन योजनतो पञ्चवीसतियोजनप्पमाणो होति । केचि पनेत्थ गाथासुखत्थं “आहु”ति दीघं कतं, अहु अहोसीति अत्थं वदन्ति ।

सहस्सकण्डोति सहस्सभूमिको, “सहस्सखण्डो” तिपि पाठो, सो एव अत्थो । सतगेण्डूति अनेकसतनियूहको । धजालूति तत्थ तत्थ नियूहसिखरादीसु पतिट्ठपितेहि सत्तिधजवीरङ्गधजादीहि धजेहि सम्पन्नो । हरितामयोति चामीकरसुवण्णमयो । केचि पन हरितामयोति “हरितमणिपरिक्खटो”ति वदन्ति । गन्धब्बाति नटा । छसहस्सानि सत्तधाति छमत्तानि गन्धब्बसहस्सानि सत्तधा तस्स पासादस्स सत्तसु ठानेसु रज्जो अभिरमापनत्थं नच्चिसूति अत्थो । ते एवं नच्चन्तापि किर राजानं हासेतुं नासक्खिंसु । अथ सक्को देवराजा देवनटं पेसेत्वा समज्जं कारेसि, तदा राजा हसीति ।

कोटिगामो नाम मापितो । वत्थूति भद्दजित्थेरस्स वत्थु । तं थेरगाथावण्णनायं (थेरगा० अट्ट० भद्दजित्थेरगाथावण्णनाय) वित्थारतो आगतमेव । इतरस्साति नळकारदेवपुत्तस्स । आनुभावाति पुज्जानुभावनिमित्तं ।

दानवसेन दत्त्वाति तं पासादं अत्तनो परिग्गहभाववियोजनेन दानमुखे नियोजेत्वा । विस्सज्जेत्वाति चित्तेनेव परिच्चजनवसेन दत्त्वा पुन दक्खिण्येयानं सन्तकभावकरणेन निरपेक्खपरिच्चागवसेन विस्सज्जेत्वा । एत्तकेनाति “भूतपुब्बं भिक्खवे”ति आदिं कत्वा याव “पब्बजिस्सती”ति पदं एत्तकेन देसनामग्गेन ।

भिक्खुनो आयुवण्णादिवड्डनकथावण्णना

११०. इदं भिक्खुनो आयुस्मिन्ति आयुस्मिं साधेतब्बे इदं भिक्खुनो इच्छितब्बं चिरजीविताय हेतुभावतोति । तेनाह “इदं आयुकारण”न्ति ।

सम्पन्नसीलस्स अविप्पटिसारपामोज्जपीतिपस्सद्धिसुखसमाधियथाभूतजाणादिसम्भवतो तंसमुट्ठानपणीतरूपेहि कायस्स फुट्ता सरीरे वण्णधातु विप्पसन्ना होति, कल्याणो च कित्तिसद्धो अब्भुग्गच्छतीति आह “सीलवतो ही”तिआदि ।

विवेकजं पीतिसुखादीति आदि-सद्देन समाधिजं पीतिसुखं, अपीतिजं कायसुखं, सतिपारिसुद्धिजं उपेक्खासुखञ्च सङ्गहाति ।

अप्पटिक्कूलतावहोति अप्पमाणानं सत्तानं, अत्तनो च तेसु अप्पटिक्कूलभावतो । हितूपसंहारादिवसेन पवत्तिया सब्बदिसासु फरणअप्पमाणवसेन सब्बदिसासु विप्फारिकता ।

“अरहत्तफलसङ्घातं बल”न्ति वुत्तं तस्स अकुप्पधम्मताय केनचि अनभिभवनीयभावतो ।

“लोके”ति इदं यथा “एकबलम्पी”ति इमिना सम्बन्धीयति, एवं “दुप्पसहं दुरभिसम्भव”न्ति इमेहिपि सम्बन्धितब्बं । लोकपरियापन्नेहेव हि धम्मेहि तेसं बलस्स दुप्पसहता, दुरभिसम्भवता, न लोकोत्तरेहीति । एत्थेवाति एतस्मिं अरहत्तफले एव, तदत्थन्ति अत्थो ।

लोकोत्तरपुज्जम्पीति लोकोत्तरपुज्जम्पि पुज्जफलम्पि । याव आसवक्खया पवड्ढति विवट्ठगामिकुसलधम्मानं

समादानहेतूति योजना । अमतपानं पिंविंसु हेट्टिममग्गफलसमधिगमवसेनाति अधिप्पायो ।

चक्कवत्तिसुत्तवण्णनाय लीनत्थप्पकासना ।

४. अग्गञ्जसुत्तवण्णना

वासेट्टुभारद्वाजवण्णना

१११. एत्थाति “पुब्बारामे, मिगारमातुपासादे”ति एतस्मिं पदद्वये । कोयं पुब्बारामो, कथञ्च पुब्बारामो, का च मिगारमाता, कथञ्चस्सा पासादो अहोसीति एतस्मिं अन्तोलीने अनुयोगे । अयं इदानीं वुच्चमाना अनुपुब्बिकथा आदितो पट्ठाय सङ्केपेनेव अनुपुब्बिकथा । पदुमुत्तरं भगवन्तं एकं उपासिकं अग्गुपट्ठायिकट्ठाने ठपेन्तिं दिस्वान तत्थ सञ्जातगारवबहुमाना तमेवत्थं पुरक्खत्वा भगवन्तं निमन्तेत्वा । मेण्डकपुत्तस्साति मेण्डकसेट्ठिपुत्तस्स । सोतापन्ना अहोसि तथा कताधिकारत्ता ।

मातुट्ठाने ठपेसि अत्तनो सीलाचारसम्पत्तिया गरुट्ठानियत्ता । उपयोगन्ति तत्थ तत्थ अप्पेतब्बट्ठाने अप्पनावसेन विनियोगं अगमंसु । अञ्जेहि च वेळुरियलोहितङ्कमसारगल्लादीहि । भस्सतीति ओतरति । सुद्धपासादोव न सोभतीति केवलो एकपासादो एव विहारो न सोभति । नियूहानि बहूनि नीहरित्वा कत्तब्बसेनासनानि “दुवड्डुगेहानी”ति वदन्ति । मज्झे गब्भो समन्ततो अनुपरियायतोति एवं द्विक्खत्तुं वट्ठेत्वा कतसेनासनानि दुवड्डुगेहानि । चूळपासादाति खुदकपासादा ।

उत्तरदेवीविहारो नाम नगरस्स पाचीनद्वारसमीपे कतविहारो ।

तित्थियलिङ्गस्स अग्गहितत्ता नेव तित्थियपरिवासं वसन्ति । अनुपसम्पन्नभावतो आपत्तिया आपन्नाय अभावतो न आपत्तिपरिवासं वसन्ति । भिक्खुभावन्ति उपसम्पदं । तेविज्जसुत्तन्ति इमस्मिं दीघनिकाये तेविज्जसुत्तं सुत्वा ।

११३. अनुवत्तमाना चङ्कमिंसु अननुचङ्कमने यथाधिप्पेतस्स अत्थस्स पुच्छनादीनं असक्कुण्यत्ता । तेसन्ति तेसं द्विन्नं । तेनाह “पण्डिततरो”ति । अत्थाति भवत्थ । कुलसम्पन्नाति सम्पन्नकुला उदितोदिते ब्राह्मणकुले उप्पन्ना । ब्राह्मणकुलाति केनच पारिजुञ्जेन अनुपट्ठता एव ब्राह्मणकुला । तेनाह “भोगादिसम्पन्न”न्तिआदि । इमे ब्राह्मणा उच्चा हुत्वा “इमं वसलं पब्बज्जं पब्बजिंसू”तिआदिना जातिआदीनि घट्टेन्ता अक्कोसन्ति । परिभासन्तीति परिभवित्वा भासन्ति । अत्तनो अनुरूपायाति अत्तनो अज्झासयस्स अनुरूपाय । अन्तरन्तरा विच्छिज्ज पवत्तियमाना परिभासा परिपुण्णा नाम न होति खण्डभावतो, तब्बिपरियायतो परिपुण्णा नाम होतीति आह “अन्तरा”तिआदि ।

अप्पतिट्ठतायाति अपस्सयरहितत्ता । विभिन्नोति विनट्ठो ।

इतरे तयो वण्णाति खत्तियादयो वण्णा हीना । ननु खत्तियाव सेट्ठा वण्णा यथा बुद्धा एतरहि खत्तियकुले एव उप्पन्नाति? सच्चमेतं, ते पन अत्तनो मिच्छाभिमानेन, मिच्छागाहेन च “ब्राह्मणोव सेट्ठो वण्णो”ति वदन्ति, तं तेसं वचनमत्तं । “सुज्झन्तीति सुद्धा होन्ति, न निन्दं गरहं पापुणन्ती”ति वदन्ति । सुज्झन्ति वा संसारतो सुज्झन्ति, न सेसा वण्णा असुक्कजातिकत्ता, मन्तज्जेनाभावतो चाति । ब्रह्मनो मुखतो जाता वेदवचनतो जाताति मुखतो जाता । ततो एव ब्रह्मनो महाब्रह्मनो वेदवचनतो विजाताति ब्रह्मजा । तेन दुविधेनापि निम्मिताति ब्रह्मनिम्मिता । वेदवेदङ्गादिब्रह्मदायज्जं

अरहन्तीति ब्रह्मदायादा। मुण्डके समणकेति एत्थ क-कारो गरहायन्ति आह “निन्दन्ता जिगुच्छन्ता वदन्ती”ति। इब्भेति सुद्धे, ते पन घरबन्धनेन बद्धा निहीनतराति आह “गहपतिके”ति। कण्हेति कण्हजातिके। बन्धनद्वेन बन्धु, कस्स पन बन्धूति आह “मारस्स बन्धुभूते”ति। पादापच्चेति पादतो जातापच्चे। अयं किर ब्राह्मणानं लद्धि “ब्राह्मणा ब्रह्मनो मुखतो जाता, खत्तिया उरतो, ऊरूहि वेस्सा, पादतो सुद्धा”ति।

११४. यस्मा पठमकप्पिककाले चतुवण्णववत्थानं नत्थि, सब्बेव सत्ता एकसदिसा, अपरभागे पन तेसं पयोगभेदवसेन अहोसि, तस्मा वुत्तं “पोराणं...पे०... अजानन्ता”ति। लद्धिभिन्दनत्थायाति “ब्राह्मणा ब्रह्मनो पुत्ता ओरसा मुखतो जाता”ति एवं पवत्ताय लद्धिया विनिवेठनत्थं। पुत्तप्पटिलाभत्थायाति “एवं मयं पेत्तिकं इणं सोधेस्सामा”ति लद्धियं ठत्वा पुत्तप्पटिलाभाय। अयं ज्हेत्थ धम्मिकानं ब्राह्मणानं अज्झासयो। सज्जातपुप्फाति रजस्सला। इत्थीनज्झि कुमारिभावप्पत्तितो पट्टाय पच्छिमवयतो ओरं असति विबन्धे अट्टमे अट्टमे सत्ताहे गम्भासयसज्जिते ततिये आवत्ते कतिपया लोहितपीळका सण्ठहित्वा अगगहितपुप्फा एव भिज्जन्ति, ततो लोहितं पग्घरति, तत्थ उतुसमज्जा, पुप्फसमज्जा च। नेसन्ति ब्राह्मणानं। सच्चवचनं सियाति “ब्रह्मनो पुत्ता”ति आदिवचनं सच्चं यदि सिया, ब्राह्मणीनं... पे०... मुखं भवेय्य, न चेत्तं अत्थि।

चतुवण्णसुद्धिवण्णना

११५. मुखच्छेदकवादन्ति “ब्राह्मणा महाब्रह्मनो मुखतो जाता”ति वादस्स छेदकवादं। अरियभावे असमत्थाति अनरियभावावहा। पकतिकाळकाति सभावेनेव न सुद्धा। कण्होति किलिद्धो उपतापको। तेनाह “दुक्खोति अत्थो”ति।

सुक्कभावो नाम परिसुद्धताति आह “निक्किलेसभावेन पण्डरा”ति। सुक्कोति न किलिद्धो अनुपतापकोति वुत्तं “सुखोति अत्थो”ति।

११६. उभयवोकिण्णेति वचनविपल्लासेन वुत्तन्ति आह “उभयेसु वोकिण्णसू”ति। मिस्सीभूतेसूति “कदाचि कण्हा धम्मा, कदाचि सुक्का धम्मा”ति एवं एकस्मिं सन्ताने, एकस्मिंयेव च अत्तभावे पवत्तिया मिस्सीभूतेसु, न पन एकज्झं पवत्तिया। एत्थाति अनन्तरवुत्तधम्माव अन्वाधिद्धाति आह “कण्हसुक्कधम्मसू”ति। यस्मा च ते ब्राह्मणा न चेव ते धम्मे अतिक्कन्ता, याय च पटिपदाय अतिक्कमेय्युं, सापि तेसं पटिपदा नत्थि, तस्मा वुत्तं “वत्तमानापी”ति। नानुजानन्ति अयथाभुच्चवादभावतो। अनुजाननञ्च नाम अब्भनुमोदनन्ति तदभावं दस्सेन्तेन “नानुमोदन्ति, न पसंसन्ती”ति वुत्तं। चतुन्नं वण्णानन्ति निद्धारणे सामिवचनं। तेसन्ति पन सम्बन्धेपि वा सामिवचनं। ते च ब्राह्मणा न एवरूपा न एदिसा, यादिसो अरहा एकदेसेनापि तेन तेसं सदिसताभावतो, तस्मा तेन कारणेन नेसं ब्राह्मणानं “ब्राह्मणोव सेट्ठो वण्णो”ति वादं विज्जू यथाभूतवादिनो बुद्धादयो अरिया नानुजानन्ति।

आरकत्तादीहीति एत्थ किलेसानं आरकत्ता पहीनभावतो दूरत्ता अरहं, किलेसारीनं हतत्ता अरहं, संसारचक्कस्स अरानं हतत्ता अरहं, पच्चयादीनं अरहत्ता अरहं, पापकरणे रहाभावेन अरहन्ति एवमत्थो वेदितब्बो। अयमेत्थ सङ्खेपो, वित्थारो पन विसुद्धिमग्गे (विसुद्धि० १.१२५ आदयो), तं संवण्णनासु (विसुद्धि० टी० १.१२४) च वुत्तनयेन वेदितब्बो। आसवानं खीणत्ताति चतुन्नम्पि आसवानं अनवसेसतो पहीनत्ता। ब्रह्मचरियवासन्ति मग्गब्रह्मचरियवासं। तस्स वासस्स परियोसितत्ता वुत्थवासो, दसन्नम्पि वा अरियवासानं वुत्थत्ता वुत्थवासो। वुत्तज्हेतं —

“दसयिमे, भिक्खवे, अरियावासा, यदरिया आवसिंसु वा आवसन्ति वा आवसिस्सन्ति वा । कतमे दस? इध, भिक्खवे, भिक्खु पञ्चङ्गविप्पहीनो होति छळङ्गसमन्नागतो एकारक्खो चतुरापस्सेनो पनुण्णपच्चेकसच्चो समवयसठेसनो अनाविलसङ्कप्पो पस्सद्भकायसङ्कारो सुविमुत्तचित्तो सुविमुत्तपज्जो । इमे खो, भिक्खवे, दस अरियावासा”ति (अ० नि० १०.१९) ।

वुस्सतीति वा **वुसितं**, अरियमग्गो, अरियफलञ्च, तं एतस्स अत्थीति अतिसयवचनिच्छावसेन अरहा “**वुसितवा**”ति वुत्तो । **करणीयं** नाम परिज्जापहानसच्छिकिरियाभावना दुक्खस्सन्तं कातुकामेहि एकन्ततो कत्तब्बत्ता, तं पन यस्मा चतूहि मग्गेहि पच्चेकं चतूसु सच्च्वेसु कातब्बं कतं, तस्मा वुत्तं “**चतूहि... पे०... कतकरणीयो**”ति । ओसीदापनट्टेन भारा वियाति **भारा**, किलेसा, खन्धा च । वुत्तज्झि “**भारा हवे पञ्चक्खन्धा**”ति (सं० नि० ३.२२) **ओहारितो**ति अपनीतो । **सको अत्थो सदत्थो**ति एत्थ द-कारो पदसन्धिकरो । कामं दिट्ठिआदयोपि संयोजनानि एव, तथापि तण्हाय भवसंयोजनट्टो सातिसयो । यथाह “**अविज्जानीवरणानं सत्तानं तण्हासंयोजनानं**”ति । (सं० नि० २.१२५, १२६, १२७, १३२, १३४, १३६, १४२; ३.५.५२०; कथा० ७५) ततो सा एव सुत्ते (दी० नि० २.४००; म० नि० १.९३, १३३; ३.३७३; सं० नि० ३.१०८१; पटि० म० १.३४ आदयो) समुदयसच्चभावेन वुत्ता, तस्मा वुत्तं “**भवसंयोजनं वुच्चति तण्हा**”ति । **सम्मदज्जा विमुत्तो**ति सम्मा अज्जाय जाननभूताय अगमगपज्जाय सम्मा यथाभूतं यं यथा जानितब्बं, तं तथा जानित्वा विमुत्तो । **इमस्मिं लोके**ति इमस्मिं सत्तलोके । **इधत्तभावे**ति इमस्मिं अत्तभावे, **परत्तभावे**ति परस्मिं अत्तभावे, इधलोके, परलोके चाति अत्थो ।

११७. अन्तरविरहिताति विभागविरहिता । तेनाह “**अत्तनो कुलेन सदिसा**”ति । अनुयन्तीति अनुयन्ता, अनुयन्ता एव **आनुयन्ता**, अनुवत्तका । तेनाह “**वसवत्तिनो**”ति ।

११८. निविट्ठाति सद्देय्यवत्थुस्मिं अनुपविसनवसेन निविट्ठा । ततो एव तस्मिं अधिकं निविसनतो **अभिनिविट्ठा** । **अचलट्ठिता**ति अचलभावे ठिता ।

यन्ति यं कथेतब्बधम्मं अनुपधारेत्वा, तदत्थञ्च अप्पच्चक्खं कत्वा कथनं, **एतं अट्ठानं** अकारणं तस्स बोधिमूलेयेव समुच्छिन्नत्ता । **विच्छिन्दजननत्थन्ति** रतनत्तयसद्भाय विच्छिन्दस्स उप्पादनत्थं, अज्जथत्तायाति अत्थो । **सो**ति मारो । **मुसावादं कातुं नासक्खी**ति आगतफलस्स अरियसावकस्स पुरतो मुसा वात्तुं न विसहि, तस्मा **आम मारोस्मीति पटिजानि** । **सिलापथवियन्ति** रतनमयसिलापथवियं । सिनेरुं किर परिवारेत्वा ठितो भूमिप्पदेसो सत्तरतनमयो, “**सुवण्णमयो**”ति केचि, सा वित्थारतो, उब्बेधतो अनेकयोजनसहस्सपरिमाणा अतिविय निच्चला । **किं त्वं एत्था**ति किं कारणा त्वं एत्थ । “**ठितो**”ति **अच्छरं पहरि** । **ठातुं असक्कोन्तो**ति अरियसावकस्स पुरतो ठातुं असक्कोन्तो । अयज्झि अरियधम्माधिगमस्स आनुभावो, यं मारोपि नाम महानुभावो उजुकं पटिप्परितुं न सक्कोति ।

मग्गो एव मूलं **मग्गमूलं**, तस्स । **सज्जातत्ता** उप्पन्नत्ता । **तेन मग्गमूलेन** पतिट्ठितसन्ताने लद्धपतिट्ठा । भगवतो देसनाधम्मं निस्साय अरियाय जातिया जातो “**भगवन्तं निस्साय अरियभूमियं जातो**”ति वुत्तो । “**उरे वसित्वा**”ति इदं धम्मघोसस्स उरतो समुट्ठानताय वुत्तं । उरे वायामजनिताभिजातिताय वा **ओरसो** । मुखतो जातेन जातो “**मुखतो जातो**”ति वुत्तो । कारणकारणेपि हि कारणे विय वोहारो होति “**तिणेहि भत्तं सिद्धं**”ति । केचि पन “**विमोक्खमुखस्स वसेन जातत्ता मुखतो जातो**”ति वदन्ति, तत्थापि वुत्तनयेनेव अत्थो वेदितब्बो । पुरिमेनत्थेन योनिजो, सेदजो, मुखजोति तीसु सम्बन्धेसु मुखजेन सम्बन्धेन भगवतो पुत्तभावो विभावितो । अत्थद्वयेनापि धम्मजभावोयेव दीपितो । अरियधम्मप्पत्तितो लद्धविसेसो

हुत्वा पवत्तो तदुत्तरकालिको खन्धसन्तानो “अरियधम्मतो जातो”ति वेदितब्बो, अरियधम्मं वा मग्गफलं निस्साय, उपनिस्साय च जातो सब्बोपि धम्मप्पबन्धो “अरियधम्मतो जातो”ति गहेतब्बो। तेसं पन अरियधम्मानं अपरियोसितकिच्चताय अरियभावेन अभिनिब्बत्तिमत्तं उपादाय “अरियधम्मतो जातत्ता”ति वुत्तं। परियोसितकिच्चताय तथा निब्बत्तिपरिपूरिं उपादाय “निम्मितत्ता”ति वुत्तं, यतो “धम्मजो धम्मनिम्मितो”ति वुत्तं। “नवलोकुत्तरधम्मदायं आदियतीति धम्मदायादो”तिपि पाठो। अस्साति “भगवतोमिपुत्तो”तिआदिना वुत्तस्स वाक्यस्स। अत्थं दस्सेन्तोति भावत्थं पकासेन्तो। तथागतस्स अनज्जसाधारणसीलादिधम्मक्खन्धस्स समूहनिवेसवसेन धम्मकायताय न किञ्चि वत्तब्बं अत्थि, सत्थुट्ठानियस्स पन धम्मकायतं दस्सेतुं “कस्मा तथागतो धम्मकायोति वुत्तो”ति सयमेव पुच्छं समुट्ठापेत्वा “तथागतो ही”तिआदिना तमत्थं विस्सज्जेति। हृदयेन चिन्तेत्वाति “इमं धम्मं इमस्स देसेस्सामी”ति तस्स उपगतस्स वेनेय्यजनस्स बोधनत्थं चित्तेन चिन्तेत्वा। वाचाय अभिनीहरीति सद्धम्मदेसनावाचाय करवीकरुतमज्जुना ब्रह्मस्सरेन वेनेय्यसन्तानाभिमुखं तदज्झासयानुरूपं हितमत्थं नीहरि उपनेसि। तेनाति तेन कारणेन एवंसद्धम्माधिमुत्तिभावेन। अस्साति तथागतस्स। धम्ममयत्ताति धम्मभूतत्ता। इधाधिप्पेतधम्मो सेट्ठेन ब्रह्मभूतोति आह “धम्मकायत्ता एव ब्रह्मकायो”ति। सब्बसो अधम्मं पजहित्वा अनवसेसतो धम्मो एव भूतोति धम्मभूतो। तथारूपो च यस्मा सभावतो धम्मो एवाति वत्तब्बतं अरहतीति आह “धम्मसभावो”ति।

११९. सेट्ठच्छेदकवादन्ति “ब्राह्मणोव सेट्ठो वण्णो”ति (दी० नि० ३.११६) एवं वुत्तसेट्ठभावच्छेदकवादं। अपरेनपि नयेनाति यथावुत्तसेट्ठच्छेदकवादतो अपरेनपि पोरानकलोकुप्पत्तिदस्सनयेन। सेट्ठच्छेद...पे०... दस्सेतुन्ति सोपि हि “ब्राह्मणोव सेट्ठो वण्णो, हीना अज्जे वण्णा”ति, “ब्राह्मणा ब्रह्मणो पुत्ता ओरसा मुखतो जाता ब्रह्मजा”ति (दी० नि० ३.११४) च एवं पवत्ताय मिच्छादिट्ठिया विनिवेठनो जातिब्राह्मणानं सेट्ठभावस्स छेदनतो सेट्ठच्छेदनवादो नाम होतीति दस्सेतुन्ति अत्थो।

इत्थभावन्ति इमं पकारतं मनुस्सभावं। सामज्जजोतना हि विसेसे अवतिट्ठति, पकरणवसेन वा अयमत्थो अवच्छिन्नो दट्ठब्बो। मनेनेव निब्बत्ताति बाहिरपच्चयेन विना केवलं उपचारज्ञानमनसाव निब्बत्ता। याय उपचारज्ञानचेतनाय ते तत्थ निब्बत्ता, नीवरणविक्रम्भनादिना उळारो तस्सा पवत्तिविसेसो, तस्मा ज्ञानफलकप्पो तस्सा फलविसेसोति आह “ब्रह्मलोके विया”तिआदि। “सयंपभा”ति पदानं तत्थ सूरियालोकादीहि विना अन्धकारं विधमन्ता सयमेव पभासन्तीति सयंपभा, अन्तलिक्खे आकासे चरन्तीति अन्तलिक्खचरा, तदज्जकामावचरसत्तानं विय सरीरस्स विचरणद्वानस्स असुभताभावतो सुभं, सुभेव तिट्ठन्तीति सुभट्ठायिनोति अत्थो वेदितब्बो।

रसपथविपातुभाववण्णना

१२०. सब्बं चक्कवाळन्ति अनवसेसं कोटिसतसहस्सं चक्कवाळं। समतनीति सज्झादेन्ती विप्परि, सा पन तस्मिं उदके पतिट्ठिता अहोसीति आह “पतिट्ठही”ति। वण्णेन सम्पन्नाति सम्पन्नवण्णा। मक्खिक्खण्डकरहितन्ति मक्खिकाहि च तासं अण्डकेहि च रहितं।

अतीतानन्तरेपि कप्पे लोलोयेव। कस्मा? एवं चिरपरिचितलोलतावसेन सब्बपठमं तथा अकासीति दस्सेति। किमेविदन्ति “वण्णतो, गन्धतो च ताव जातं, रसतो पन किमेविदं भविस्सती”ति संसयजातो वदति। तिट्ठतीति अट्ठासि।

चन्दिमसूरियादिपातुभाववण्णना

१२१. आलुप्पकारकन्ति एत्थ आलोपपरियायो आलुप्प-सद्दोति आह “आलोपं कत्वा”ति । पच्चक्खभूतानम्पि चन्दिमसूरियानं पवत्तियं लोकियानं सम्मोहो होति, तं विधमितुं “को पन तेस”न्तिआदिना अट्ठ पज्हाविस्सज्जनानि गहितानि । तत्थ तेसन्ति चन्दिमसूरियानं । कस्मिन्ति कस्मिं ठाने । “को उपरी”ति एतेनेव को हेट्ठाति अयमत्थो वुत्तोयेव । तथा “को सीघं गच्छती”ति इमिना को सणिकं गच्छतीति अयम्पि अत्थो वुत्तोयेव । वीथियोति गमनवीथियो । एकतोति एकस्मिं खणे पातुभवन्ति । सूरियमण्डले पन अत्थङ्गते चन्दमण्डलं पज्जायित्थ । छन्दं जत्वा वाति रुचिं जत्वा विय ।

उभयन्ति अन्तो, बहि च ।

उजुकन्ति आयामतो, वित्थारतो, उब्बेधतो च । परिमण्डलतोति परिक्खेपतो ।

उजुकं सणिकं गच्छति अमावासियं सूरियेन सद्धिं गच्छन्तो दिवसे दिवसे थोकं थोकं ओहीयन्तो पुण्णमासियं उपट्ठमग्गमेव ओहीयन्तो । तिरियं सीघं गच्छति एकस्मिम्पि मासे कदाचि दक्खिणतो, कदाचि उत्तरतो दस्सनतो । “द्वीसु पस्सेसू”ति इदं येभ्य्यवसेन वुत्तं । चन्दस्स पुरतो, पच्छतो, समञ्च तारका गच्छन्तियेव । अत्तनो ठानन्ति अत्तनो गमनट्ठानं । न विजहन्ति अत्तनो वीथियाव गच्छन्तो । सूरियस्स उजुकं गमनस्स सीघता चन्दस्स गमनं उपादाय वेदितब्बा । तिरियं गमनं दक्खिणदिसतो उत्तरदिसाय, उत्तरदिसतो च दक्खिणदिसाय गमनं दन्धं छहि छहि मासेहि इज्झन्तो । सोति सूरियो । काळपक्खउपोसथतोति काळपक्खे उपोसथे चन्देन सहेव गन्त्वा ततो परं । पाटिपददिवसेति सुक्कपक्खपाटिपददिवसे । ओहाय गच्छति अत्तनो सीघगामिताय, तस्स च दन्धगामिताय । लेखा विय पज्जायति पच्छिमदिसायं । याव उपोसथदिवसाति याव सुक्कपक्खउपोसथदिवसा । “चन्दो अनुक्कमेन वट्ठित्वा”ति इदं उपरिभागतो पतितसूरियालोकताय हेट्ठतो पवत्ताय सूरियस्स दूरभावेन दिवसे दिवसे अनुक्कमेन परिहायमानाय अत्तनो छायाय वसेन अनुक्कमेन चन्दमण्डलपदेस्स वट्ठमानस्स विय दिस्समानताय वुत्तं, तस्मा अनुक्कमेन वट्ठित्वा विय । उपोसथदिवसे पुण्णमायं परिपुण्णो होति, परिपुण्णमण्डलो हुत्वा दिस्सतीति अत्थो । धावित्वा गण्हाति चन्दस्स दन्धगतिताय, अत्तनो च सीघगतिताय । अनुक्कमेन हायित्वाति एत्थ “अनुक्कमेन वट्ठित्वा”ति एत्थ वुत्तनयेन अत्थो वेदितब्बो । तत्थ पन छायाय हायमानताय मण्डलं वट्ठमानं विय दिस्सति, इध छायाय वट्ठमानताय मण्डलं हायमानं विय दिस्सति ।

याय वीथिया सूरिये गच्छन्ते वस्सवलाहका देवपुत्ता सूरियाभितापसन्तत्ता अत्तनो विमानतो न निक्खमन्ति, कीळापसुता हुत्वा न विचरन्ति, तदा किर सूरियस्स विमानं पकतिमग्गतो अधो ओतरित्वा विचरति, तस्स ओरुह चरणेनेव चन्दविमानम्पि अधो ओरुह चरति तग्गतिकत्ता, तस्मा सा वीथि उदकाभावेन अजानुरूपताय “अजवीथी”ति समञ्जं गता । याय पन वीथिया सूरिये गच्छन्ते वस्सवलाहका देवपुत्ता सूरियाभितापाभावतो अभिण्हं अत्तनो विमानतो बहि निक्खमित्वा कीळापसुता इतो चितो च विचरन्ति, तदा किर सूरियविमानं पकतिमग्गतो उद्धं आरुहित्वा विचरति, तस्स उद्धं आरुह चरणेनेव चन्दविमानम्पि उद्धं आरुह चरति तग्गतिकत्ता, तग्गतिकता च समानगतिना वातमण्डलेन विमानस्स फेल्लितब्बत्ता, तस्मा सा वीथि उदकबहुभावेन नागानुरूपताय “नागवीथी”ति समञ्जं गता । यदा सूरियो उद्धमनारुहन्तो, अधो च अनोतरन्तो पकतिमग्गेनेव गच्छति, तदा वस्सवलाहका यथाकालं, यथारुचि च विमानतो निक्खमित्वा सुखेन विचरन्ति, तेन कालेन कालं वस्सनतो लोके उतुसमता होति, ताय उतुसमताय हेतुभूताय सा चन्दिमसूरियानं गति गवानुरूपताय “गोवीथी”ति समञ्जं गता । तेन वुत्तं “अजवीथी”तिआदि ।

एवं “कति नेसं वीथियो”ति पज्जं विस्सज्जेत्वा “कथं विचरन्ती”ति पज्जं विस्सज्जेतुं “चन्दिमसूरिया”तिआदि

वृत्तं । तत्थ सिनेरुतो बहि निक्खमन्तीति सिनेरुसमीपेन तं पदक्खिणं कत्वा गच्छन्ता ततो गमनवीथितो बहि अत्तनो तिरियगमनेन चक्कवाळाभिमुखा निक्खमन्ति । अन्तो विचरन्तीति एवं छ मासे खणे खणे सिनेरुतो अपसक्कनवसेन ततो निक्खमित्वा चक्कवाळसमीपं पत्ता, ततोपि छ मासे खणे खणे अपसक्कनवसेन निक्खमित्वा सिनेरुसमीपं पापुणन्ता अन्तो विचरन्ति । इदानीं तमेवत्थं सङ्खेपेन वृत्तं विवरितुं “तेही”ति आदि वृत्तं । सिनेरुस्स, चक्कवाळस्स च यं ठानं वेमज्झं, तस्स, सिनेरुस्स च यं ठानं वेमज्झं, तेन गच्छन्ता “सिनेरुसमीपेन विचरन्ती”ति वृत्ता, न सिनेरुस्स अग्गाळिन्दअल्लीना । चक्कवाळसमीपेन चरित्वाति एत्थापि एसेव नयो । मज्झेनाति सिनेरुस्स, चक्कवाळस्स च उजुकं वेमज्झेन मग्गेन । चित्रमासे मज्झेनाति एत्थापि एसेव नयो ।

एकप्पहारेनाति एकवेलाय, एकेनेव वा अत्तनो एकप्पहारेन । मज्झन्हिकोति ठितमज्झन्हिको कालो होति । तदा हि सूरियमण्डलं उगच्छन्तं हुत्वापि इमस्मिं दीपे ठितस्स उपड्डमेव दिस्सति, उत्तरकुरुसु ठितस्स ओगच्छन्तं हुत्वा । एवञ्च एकवेलायमेव तीसु दीपेसु आलोककरणं ।

येसु कत्तिकदिनक्खत्तसमज्जा, तानिपि तारकरूपानि येवाति वृत्तं “सेसतारकरूपानि चा”ति, नक्खत्तसज्जिततारकरूपतो अवसिद्धतारकरूपानीति अत्थो । उभयानिपि तानि देवतानं वसनकविमानानीति वेदितब्बानि । रा-सद्धो तियति छिज्जति एत्थाति रत्ति, सत्तानं सद्धस्स वूपसमनकालोति अत्थो । दिब्बन्ति सत्ता कीळन्ति जोतन्ति एत्थाति दिवा । सत्तानं आयुं मिनन्तो विय सियति अन्तं करोतीति मासो । तं तं किरियं अरति वत्तेतीति उत्तु । तं तं सत्तं, धम्मप्पवत्तिज्ज सङ्गम्म वदन्तो विय सरति वत्तेतीति संवच्छरो ।

१२२. विवज्जनं विवज्जो, सो एव वेवज्जं, वण्णस्स वेवज्जं वण्णवेवज्जं, वण्णसम्पत्तिया विगमो, तस्स पन अत्थिता “वण्णवेवज्जता”ति वृत्ता । तेनाह “विवज्जभावो”ति । तेसन्ति वण्णवन्तानं सत्तानं । अतिमानप्पच्चयाति दुब्बण्णवम्भनवसेन अतिक्कम्म अत्तनो वण्णं पटिच्च मानपच्चया, मानसम्पग्गणहननिमित्तन्ति अत्थो । सातिसयो रसो एतिसा अत्थीति रसाति लब्धमानाय, अनुभासिसूति अनुरोधवसेन भासिसु । लोकूप्पत्तिवंसकथन्ति लोकूप्पत्तिवंसजं पवेणीकथं, आदिकाले उप्पन्नं पवेणीआगतकथन्ति अत्थो । “अनुपतन्ती”तिपि पाठो, सो एवत्थो ।

भूमिपप्पटकपातुभावादिवण्णना

१२३. एदिसो हुत्वाति अहिच्छत्तकसदिसो हुत्वा ।

१२४. पदालताति “पदा”ति एवंनामा एका लता, सा पन यस्मा सम्पन्नवण्णगन्धरसा, तस्मा “भदलता”ति वृत्ता । नाळिकाति नाळिवल्लि । अहायीति नस्सि ।

१२५. अकट्टपाकोति अकट्टेयेव ठाने उप्पज्जित्वा पच्चनको, नीवारो विय सज्जातो हुत्वा निप्पज्जनकोति अत्थो । कणो “कुण्डक”न्ति च वुच्चति । थुसन्ति तण्डुलं परियोन्धित्वा ठितत्तचो, तदभावतो “अकणो, अथुसो”ति सालि वृत्तो । “पटिविरूळह”न्ति इदं पक्कभावस्स कारणवचनं । पटिविरूळहतो हि तं पक्कन्ति । यस्मिं ठाने सायं पक्को सालि गहितो, तदेव ठानं दुतियदिवसे पातो पक्केन सालिना परिपुण्णं हुत्वा तिद्धतीति आह “सायं गहितट्टानं पातो पक्कं होती”ति आदि । अलायितन्ति लायितट्टानमपि तेसं कम्मप्पच्चया अलायितमेव हुत्वा अनूनं परिपुण्णमेव पज्जायति, न केवलं पज्जायनमेव, अथ खो तथाभूतमेव हुत्वा तिद्धति ।

इत्थिपुरिसलिङ्गादिपातुभाववण्णना

१२६. “मनुस्सकाले”ति इदं पुब्बे मनुस्सभूतानंयेव तत्थ इदानीं निकन्तिवसेन उप्पत्ति होतीति कत्वा वुत्तं, देवतानम्पि पुरिमजातियं इत्थिभावे ठितानं तत्थ विरागादिपुरिसत्तप्पच्चये असति तदा इत्थिलिङ्गमेव पातुभवति ।
पुरिसत्तपच्चयेति “अत्तनोपि अनिस्सरता, सब्बकालं परायत्तवुत्तिता, रजस्सलता वञ्चता, गम्भधारणं, पठमाय पकतिया निहीनपकतिता, सूरवीरताभावो, ‘अप्पका जना’ति ‘हीळेतब्बता’ति एवमादि आदीनवपच्चवेक्खणपुब्बकम्पि इत्थिभावे ‘अलं इत्थिभावेन, न हि इत्थिभावे ठत्वा चक्कवत्तिसिरिं, न सक्कमारब्रह्मसिरियो पच्चनुभवितुं, न पच्चेकबोधिं, न सम्मासम्बोधिं अधिगन्तुं सक्का’ति एवं इत्थिभावविरज्जनं, ‘यथावुत्तआदीनवविरहतो उत्तमपकतिभावतो सम्पदमिदं पुरिसत्तं नाम सेट्ठं उत्तमं, एत्थ ठत्वा सक्का एता सम्पत्तियो सम्पापुणितु’न्ति एवं पुरिसत्तभावे सम्भावनापुब्बकं पत्थनाठपनं, ‘तत्थ निन्नपोणपब्भारचित्ता’ति” एवमादिके पुरिसभावस्स पच्चयभूते **धम्मे** । **पूरेत्वा** वड्डेत्वा । पच्चक्खं भूतं, सदिसञ्च दिट्ठधम्मिकं, सम्परायिकञ्च सुविपुलं अनत्थं अचिन्तेत्वा पुरिसस्स कामेसु मिच्छाचरणं केवलं इत्थियं आसापत्ति फलेनेवाति आसाआपत्ति इत्थिभावावहापि होतियेव । तन्निन्नपोणपब्भारभावेन तन्निकन्तिया निमित्तभावापत्तितोति वुत्तं “पुरिसो इत्थत्तभावं लभन्तो कामेसुमिच्छाचारं निस्साय लभती”ति । तदाति यथावुत्ते पठमकप्पिककाले ।
पकतियाति सभावेन । **मातुगामस्सा**ति पुरिमत्तभावे मातुगामभूतस्स । **पुरिसस्सा**ति एत्थापि “पकतिया”ति पदं आनेत्वा सम्बन्धितब्बं । **उपनिज्झायतन्ति** उपेच्च निज्झायन्तानं । यथा अञ्जमञ्जस्मिं सारागो उप्पज्जति, एवं सापेक्खभावेन ओलोकेन्तानं । **रागपरिळाहो**ति रागजो परिळाहो ।

निब्बुद्दमानायाति परिणता हुत्वा निय्यमानाय ।

मेथुनधम्मसमाचारवण्णना

१२७. **गोमयपिण्डमत्तम्पि नालत्था**ति सम्मदेव विवाहकम्मं नालत्थाति अधिप्पायेन वदन्ति । **पातब्ब्यतन्ति** तस्मिं असद्धम्मे किलेसकामेन पिवितब्बतं किञ्चि पिवितब्बवत्थुं पिवन्ता विय अतिविय तोसेत्वा परिभुज्जितब्बतं **आपज्जिंसु**, **पातब्ब्यतन्ति** वा परिभुज्जनकतं **आपज्जिंसु** उपगच्छिंसु । परिभोगत्थो हि अयं **पा**-सद्दो, कत्तुसाधनो च **तब्ब्य**-सद्दो, यथारुचि परिभुज्जिंसूति अत्थो ।

सन्निधिकारकन्ति सन्निधिकारं, **क**-कारो पदवड्डनमत्तन्ति आह “**सन्निधिं कत्वा**”ति । **अपदानन्ति** अवखण्डनं । **एकेकस्मिं ठाने**ति यत्थ यत्थ वहितं, तस्मिं तस्मिं एकेकस्मिं ठाने । **गुम्बगुम्बा**ति पुज्जपुज्जा ।

सालिविभागवण्णना

१२८. **सीमं ठपेय्यामाति** “अयं भूमिभागो असुकस्स, अयं भूमिभागो असुकस्सा”ति एवं परिच्छेदं करेय्याम । तं **अगं कत्वा**ति तं आदिं कत्वा ।

महासम्मतराजवण्णना

१३०. **पकासेतब्बन्ति** दोसवसेन पकासेतब्बं । **खिपितब्बन्ति** खेपं कातब्बं । तेनाह “**हारेतब्ब**”न्ति, सत्तनिकायतो नीहरितब्बं ।

नेसन्ति निद्धारणे सामिवचनं ।

१३१. अक्खरन्ति निरुत्तिं । सा हि महाजनेन सम्मतोति निद्दारेत्वा वत्तब्बतो निरुत्ति, तस्मिंयेव निरूळ्हभावतो, अज्जत्थ असज्जरणतो अक्खरन्ति च वुच्चति, तथा सङ्घातब्बतो सङ्घा, समज्जायतीति समज्जा, पज्जापनतो पज्जन्ति, वोहरणतो वोहारो । उप्पन्नोति पवत्तो । न केवलं अक्खरमेवाति न केवलं समज्जाकरणमेव । खेत्तसामिनोति तं तं भूमिभागं परिग्गहेत्वा ठितसत्ता । तीहि सङ्घेहीति तिविधकिरियाभिसङ्घतेहि तीहि सङ्घेहि खत्तियादीहि तीहि वण्णेहि परिग्गहितेहि । “खत्तियानुयन्तब्राह्मणगहपतिकनेगमजानपदेहि तीहि गहपतीहि परिग्गहितेही”ति च वदन्ति । अग्गन्ति जातेनाति अग्गं कुलन्ति जातेन । खत्तियकुलज्झि लोके सब्बसेट्ठं । यथाह “खत्तियो सेट्ठो जनेतस्मिं, ये गोत्तपटिसारिनो”ति, (दी० नि० १.२७७; ३.१४०; म० नि० २.३०; सं० नि० १.१८२, २४५) अभेदोपचारेन पन अक्खरस्स खत्तियसदस्सपि सेट्ठताति पाळियं “अग्गज्जेन अक्खरेना”ति वुत्तं । इदानीं अभेदोपचारेन विना एव अत्थं दस्सेतुं “अग्गे वा”तिआदि वुत्तं ।

ब्राह्मणमण्डलादिवण्णना

१३२. येन अनारम्भभावेन बाहिताकुसला “ब्राह्मणा”ति वुत्ता, तमेव ताव दस्सेतुं पाळियं “वीतङ्गारा”तिआदि वुत्तन्ति तदत्थं दस्सेन्तो “पचित्वा”तिआदिमाह । तमेनन्ति वचनविपल्लासेन निद्देसोति आह “ते एते”ति । अभिसङ्घरोन्ताति चित्तमन्तभावेन अज्जमज्जं अभिविसिट्ठे करोन्ता, ब्राह्मणाकप्पभावेन सङ्घरोन्ता च । वाचेन्ताति परेसं कथेन्ता, ये तथा गन्थे कातुं न जानन्ति । अच्छन्तीति आसन्ति, उपविसन्तीति अत्थो । तेनाह “वसन्ती”ति । अच्छेन्तीति कालं खेपेन्ति । हीनसम्मतं ज्ञानभावनानुयोगं छुट्टेत्वा गन्थे पसुततादीपनतो । सेट्ठसम्मतं जातं “वेदधरा सोत्तिया सुब्राह्मणाति एवं सेट्ठसम्मतं जातं ।

१३३. मेथुनधम्मं समादियित्वाति जायापतिकभावेन द्वयं द्वयं निवासं अज्झुपगन्त्वा । वाणिजकम्मादिकेति आदि-सद्देन कसिकम्मादिं सङ्गणहाति ।

१३४. लुद्धाचारकम्मखुद्धाचारकम्मुनाति परविहेठनादिलुद्धाचारकम्मुना, नळकारदारुकम्मादिखुद्धाचारकम्मुना च । सुद्वन्ति एत्थ सु-इति सीघत्थे निपातो । दा-इति गरहणत्थेति आह “सुदं सुदं लहुं लहुं कुच्छितं गच्छन्ती”ति ।

१३५. अहूति कालविपल्लासवसेन वुत्तन्ति दस्सेन्तो “होति खो”ति आह । इमिनाति “इमेहि खो, वासेट्ठ, चतूहि मण्डलेहि समणमण्डलस्स अभिनिब्बत्ति होती”ति इमिना वचनेन । इमं दस्सेतीति समणमण्डलं नाम...पे०... सुद्धिं पापुणन्तीति इमं अत्थजातं दस्सेति । यदि इमेहि...पे०... अभिनिब्बत्ति होती, एवं सन्ते इमानेव चत्तारि मण्डलानि पधानानि, समणमण्डलं अप्पधानं ततो अभिनिब्बत्तताति? नयिदमेवन्ति दस्सेतुं “इमानी”तिआदि वुत्तं । समणमण्डलं अनुवत्तन्ति गुणेहि विसिट्ठभावतो । गुणो हि विज्जूनं अनुवत्तनहेतु, न कोलपुत्तियं, वण्णपोक्खरता, वाक्करणमत्तं वा । तेनाह “धम्मेनेव अनुवत्तन्ति, नो अधम्मेना”ति । सो धम्मो च लोकुत्तरोव अधिपेतो, येन संसारतो विसुज्झति, तस्मा समणमण्डलन्ति च सासनिकमेव समणगणं वदतीति दट्ठब्बं । तेनाह “समणमण्डलज्ही”तिआदि ।

दुच्चरितादिकथावण्णना

१३६. मिच्छादिट्ठिवसेन समादिन्नकम्मं नाम “को अनुबन्धितब्बो । अजोतगिसोट्ठिमिसो”तिआदिना यज्जविधानादिवसेन पवत्तितं हिंसादिपापकम्मं । मिच्छादिट्ठिकम्मस्साति “एस सद्भाधिगतो देवयानो, येन यन्ति पुत्तिनो

विसोकां”तिआदिना पवत्तितस्स मिच्छादिट्ठिसहगतकम्मस्स । **समादानं** तस्स तथा पवत्तनं, तस्सा वा दिट्ठिया उपगमनं ।

१३७. द्वयकारीति कुसलाकुसलद्वयस्स कत्ता । तयिदं द्वयं यस्मा एकज्झं नप्पवत्तति, तस्मा आह “**कालेना**”तिआदि । **एकखणे उभयविपाकदानट्टानं नाम नत्थि** एकस्मिं खणे चित्तद्वयूपसञ्जिताय सत्तसन्ततिया अभावतो । यथा पन द्वयकारिनो सुखदुखपटिसंवेदिता सम्भवति, तं दस्सेतुं “**येन पना**”तिआदि वुत्तं । **एवंभूतोति** विकलावयवो । द्वेपिहि कुसलाकुसलकम्मानि कतूपचितानि सभावतो बलवन्तानेव होन्ति, तस्मा मरणकाले उपट्ठहन्ति । **तेसु अकुसलं बलवतरं होति** पच्चयलाभतो । निकन्तिआदयो हि पच्चयविसेसा अकुसलस्सेव सभागा, न कुसलस्स, तस्मा कतूपचितभावेन समानबलेसुपि कुसलाकुसलेसु पच्चयलाभेन विपच्चितुं लद्धोकासताय कुसलतो अकुसलं बलवतरं होतीति, तथाभूतम्पि तं यथा विपाकदाने लद्धोकासस्स कुसलस्सापि अवसरो होति, तथा लद्धपच्चयं पटिसन्धिदानाभिमुखं **कुसलं पटिबाहित्वा** पटिसन्धिं देत्तं **तिरच्छानयोनियं निब्बत्तापेतीति** । “अकुसलं बलवतरं होती”ति एत्थ “अकुसलं चे बलवतरं होति, तं कुसलं पटिबाहित्वा”ति वुत्तनयेनेव अत्थं वत्वा तेसु कुसलं चे बलवतरं होति, तच्च अकुसलं पटिबाहित्वा मनुस्सयोनियं निब्बत्तापेति, अकुसलं पवत्तिवेदनीयं होति, अथ न तं काणम्पि करोति खुज्जम्पि पीठसप्पिम्पि कुच्छिरोगादीहि वा उपट्ठुतं । एवं सो पवत्तियं नानप्पकारं दुक्खं पच्चनुभवतीति इदं सन्धाय वुत्तं “सुखदुखपटिसंवेदी होती”ति । तत्रायं विनिच्छयो — वुत्तकाले वा कारेन समानबलेसु कुसलाकुसलकम्मेसु उपट्ठहन्तेसु मरणस्स आसन्नवेलायं यदि बलवतरानि कुसलजवनानि जवन्ति, यथाउपट्ठितं अकुसलं पटिबाहित्वा कुसलं वुत्तनयेन पटिसन्धिं देति । अथ बलवतरानि अकुसलजवनानि जवन्ति, यथाउपट्ठितं कुसलं पटिबाहित्वा अकुसलं वुत्तनयेनेव पटिसन्धिं देति । तं किस्स हेतु? उभिन्नं कम्मानं समानबलवभावतो, पच्चयन्तरसापेक्खतो चाति, सब्बं वीमंसित्वा गहेतब्बं ।

बोधिपक्खियभावनावण्णना

१३८. बोधि वुच्चति मग्गसम्मादिट्ठि, चत्तारि अरियसच्चानि बुज्झतीति कत्वा, सभावतो, तंसभावतो च तस्सा पक्खे भवाति बोधिपक्खिया, सतिवीरियादयो धम्मा, तेसं **बोधिपक्खियानं** । **पटिपाटियाति** बोधिपक्खियदेसनापटिपाटिया । **भावनं अनुगन्त्वाति** अनुक्कमेन पवत्तं भावनं पत्वा । तेनाह “**पटिपज्जित्वा**”ति । सउपादिसेसाय निब्बानधातुया वसेन खीणासवस्स सेट्ठभावं लोकस्स पाकटं कत्वा दस्सेतुं सक्का, न इतराय सब्बसो अपज्जत्तिभावूपगमने तस्स अदस्सनतोति वुत्तं “**परिनिब्बातीति किलेसपरिनिब्बानेन परिनिब्बायती**”ति । **विनिवत्तेत्वाति** ततो चतुवण्णतो नीहरित्वा ।

१४०. तमेवत्थन्ति “खीणासवोव देवमनुस्सेसु सेट्ठो”ति वुत्तमेवत्थं ।

सेट्ठच्छेदकवादमेवाति जातिब्राह्मणानं सेट्ठभावसमुच्छेदकमेव कथं । **दस्सेत्वा** भासित्वा । **सुत्तन्तं विनिवत्तेत्वाति** पुब्बे लोकियधम्मसन्दस्सनवसेन पवत्तं अगगज्जसुत्तं “सत्तन्तं बोधिपक्खियानं धम्मानं भावनमन्वाया”तिआदिना ततो विनिवत्तेत्वा नीहरित्वा तेन असंसट्ठं कत्वा । **आवज्जन्ताति** समन्नाहरन्ता । **अनुमज्जन्ताति** पुब्बेनापरं अत्थतो विचरन्ताति ।

अगगज्जसुत्तवण्णनाय लीनत्थप्पकासना ।

५. सम्पसादनीयसुत्तवण्णना

सारिपुत्तसीहनादवण्णना

१४१. पावारेन्ति सञ्छादेन्ति सरीरं एतेनाति पावारो, वत्थं। पावरणं वा पावारो, “वत्थं दुस्स”न्ति परियायसद्वा एतेति दुस्समेव पावारो, सो एतस्स बहुविधो अनेककोटिप्पभेदो भण्डभूतो अत्थीति दुस्सपावारिको। सो किर पुब्बे दहरकाले दुस्सपावारभण्डमेव बहुं परिगगहेत्वा वाणिज्जं अकासि, तेन नं सेट्ठिद्वाने ठितम्पि “पावारिको” त्वेव सञ्जानन्ति। भगवतीति इति-सद्दो आदिअत्थो, पकारत्थो वा, तेन भगवन्तं उपसङ्कमित्वा थेरेन वुत्तवचनं सब्बं सङ्गण्हाति। “कस्मा एवं अवोचा”ति तथावचने कारणं पुच्छित्वा “सोमनस्सपवेदनत्थ”न्ति कस्मा पयोजनं विस्सज्जितं, तयिदं अम्बं पुट्टस्स लबुजं ब्याकरणसदिसन्ति? नयिदमेवं चिन्तेतब्बं। या हिस्स थेरस्स तदा भगवति सोमनस्सुप्पत्ति, सा निद्धारितरूपा कारणभावेन चोदिता, तस्मा एवं अवोचाति, सा एव च यस्मा निद्धारितरूपा पवेदनवसेन भगवतो सम्मुखा तथावचनं पयोजेति, तस्मा “अत्तनो उप्पन्नसोमनस्सपवेदनत्थ”न्ति पयोजनभावेन विस्सज्जितं।

तत्राति तस्मिं सोमनस्सपवेदने। विहारे निवासपरिवत्तनवसेन सुनिवत्थनिवासनो। आभुजित्वाति आबन्धित्वा।

समापत्तितो वुट्ठाय “अहो सन्तो वतायं अरियविहारो”ति समापत्तिसुखपच्चवेक्खणमुखेन अत्तनो गुणे अनुस्सरितुं आरब्धो, आरभित्वा च नेसं तं तं सामञ्जविसेसविभागवसेन अनुस्सरि। तथा हि “समाधी”ति सामञ्जतो गहितस्सेव “पठमं ज्ञान”न्तिआदिना विसेसविभागो, “पञ्जा”ति सामञ्जतो च गहितस्सेव “विपस्सनाजाण”न्तिआदिना विसेसविभागो उट्ठटो। “लोकियाभिज्जासु दिब्बचक्खुजाणस्सेव गहणं थेरस्स इतरेहि सातिसयन्ति दस्सेतु”न्ति वदन्ति, पुब्बेनिवासजाणम्पि पन “कप्पसतसहस्साधिकस्सा”तिआदिना किच्चवसेन दस्सितमेव, लक्खणहारवसेन वा इतरेसं पेत्य गहितता वेदितब्बा।

अत्थप्पभेदस्स सल्लक्खणविभावनववत्थानकरणसमत्थं अत्थे पभेदगतं जाणं अत्थपटिसम्भिदा। तथा धम्मप्पभेदस्स सल्लक्खणविभावनववत्थानकरणसमत्थं धम्मे पभेदगतं जाणं धम्मपटिसम्भिदा। निरुत्तिपभेदस्स सल्लक्खणविभावनववत्थानकरणसमत्थं निरुत्तियं पभेदगतं जाणं निरुत्तिपटिसम्भिदा। पटिभानप्पभेदस्स सल्लक्खणविभावनववत्थान करणसमत्थं पटिभाने पभेदगतं जाणं पटिभानपटिसम्भिदा। अयमेत्थ सङ्केपो, वित्थारो पन विसुद्धिमग्गे, (विसुद्धि० २.४२८) तं संवण्णनासु (विसुद्धि० टी० २.४२८) वुत्तनयेनेव वेदितब्बो। सावकविसये परमुक्कंसगतं जाणं सावकपारमिजाणं सब्बज्जुतज्जाणं विय सब्बजेय्यधम्मेसु। तस्सापि हि विसुं परिकम्मं नाम नत्थि, सावकपारमिया पन सम्मदेव परिपूरितत्ता अग्गमग्गसमधिगमेनेवस्स समधिगमो होति। सब्बज्जुतज्जाणस्सेव सम्मासम्बुद्धानं याव निसिन्नपल्लङ्का अनुस्सरतोति योजना।

भगवतो सीलं निस्साय गुणे अनुस्सरितुमारब्धोति योजना। यस्मा गुणानं बहुभावतो नेसं एकज्झं आपाथागमनं नत्थि, सति च तस्मिं अनिरूपितरूपेनेव अनुस्सरणेन भवितब्बं, तस्मा थेरो सविसये ठत्वा ते अनुपदं सरूपतो अनुस्सरि, अनुस्सरन्तो च सब्बपठमं सीलं अनुस्सरि, तं दस्सेन्तो “भगवतो सीलं निस्साया”ति आह, सीलं आरब्भाति अत्थो। सेसपदेसुपि एसेव नयो। यस्मा चेत्य थेरो एकेकवसेन भगवतो गुणे अनुस्सरित्वा ततो परं चतुक्कपञ्चकादिवसेन अनुस्सरि, तस्मा “चत्तारो इद्धिपादे”ति वत्वा ततो परं बोज्झङ्गभावनासामञ्जेन इन्द्रियेसु वत्तब्बेसु तानि अग्गहेत्वा “चत्तारो मग्गे”तिआदि वुत्तं। चतुयोनिपरिच्छेदकजाणं महासीहनादसुत्ते (म० नि० १.१५२) आगतनयेनेव वेदितब्बं।

चत्तारो अरियवंसा अरियवंससुत्ते (अ० नि० ४.२८) आगतनयेनेव वेदितब्बा ।

पधानियङ्गादयो सङ्गीति (दी० नि० ३.३१७) दसुत्तरसुत्तेसु (दी० नि० ३.३५५) आगमिस्सन्ति । **छ सारणीय धम्मा** परिनिब्बानसुत्ते (दी० नि० २.१४१) आगता एव । सुखं सुपनादयो (अ० नि० ११.१५; पटि० म० २.२२) **एकादस** मेत्तानिसंसा । “इदं दुक्खं अरियसच्च”न्ति आदिना सं० नि० ५.१०८१, महाव० १५, पटि० म० २.३०) चतूसु अरियसच्चेसु तिपरिवत्तवसेन आगता **द्वादस धम्मचक्काकारा** । मग्गफलेसु पवत्तानि अट्ट जाणानि, छ असाधारणजाणानि चाति **चुद्दस बुद्धजाणानि** । **पञ्चदस विमुत्तिपरिपाचनिया धम्मा** मेघियसुत्तवण्णनायं (उदा० अट्ट० ३१) गहेतब्बा, **सोळसविधा आनापानस्सति** आनापानस्सतिसुत्ते (म० नि० ३.१४८), **अट्टारस बुद्धधम्मा** (महानि० ६९, १५६; चूळनि० ८५; पटि० म० ३.५; दी० नि० अट्ट० ३.३०५) एवं वेदितब्बा —

अतीतंसे बुद्धस्स भगवतो अप्पटिहत्तं जाणं, अनागतंसे, पच्चुप्पन्नंसे बुद्धस्स भगवतो अप्पटिहत्तं जाणं । इमेहि तीहि धम्मेहि समन्नागतस्स बुद्धस्स भगवतो सब्बं कायकम्मं जाणपुब्बङ्गमं जाणानुपरिवत्ति, सब्बं वचीकम्मं, सब्बं मनोकम्मं जाणपुब्बङ्गमं जाणानुपरिवत्ति । इमेहि छिहि धम्मेहि समन्नागतस्स बुद्धस्स भगवतो नत्थि छन्दस्स हानि, नत्थि धम्मदेसनाय हानि, नत्थि वीरियस्स हानि, नत्थि समाधिस्स हानि, नत्थि पञ्जाय हानि, नत्थि विमुत्तिया हानि । इमेहि द्वादसहि धम्मेहि समन्नागतस्स बुद्धस्स भगवतो नत्थि दवा, नत्थि रवा, नत्थि अप्फुट्टं, नत्थि वेगायितत्तं, नत्थि अब्बावटमनो, नत्थि अप्पटिसङ्खानुपेक्खाति ।

तत्थ “**नत्थि दवाति** खिड्ढाधिप्पायेन किरिया नत्थि । **नत्थि रवाति** सहसा किरिया नत्थी”ति वदन्ति । सहसा पन किरिया **दवा**, “अज्जं करिस्सामी”ति अज्जस्स करणं **रवा** । **नत्थि अप्फुटन्ति** जाणेन अफुसितं नत्थि । **नत्थि वेगायितत्तन्ति** तुरितकिरिया नत्थि । **नत्थि अब्बावटमनोति** निरत्थकचित्तसमुदाचारो नत्थि । **नत्थि अप्पटिसङ्खानुपेक्खाति** अज्जाणुपेक्खा नत्थि । केचि पन “नत्थि धम्मदेसनाय हानी”ति अपठित्वा “नत्थि छन्दस्स हानि, नत्थि वीरियस्स हानि, नत्थि सतिया [सत्तिया (विभ० मूलटी० सुत्तन्तभाजनीयवण्णना)] हानी”ति पठन्ति ।

जरामरणादीसु एकादससु पटिच्चसमुप्पादङ्गेषु पच्चेकं चतुसच्चयोजनावसेन पवत्तानि **चतुचत्तालीस** जाणानियेव (सं० नि० २.३३) सुखविसेसानं अधिट्ठानभावतो **जाणवत्थूनि** । वुत्तज्हेतं —

“यतो खो भिक्खवे अरियसावको एवं जरामरणं पजानाति, एवं जरामरणसमुदयं पजानाति, एवं जरामरणनिरोधं पजानाति, एवं जरामरणनिरोधगामिनिं पटिपदं पजानाती”ति आदि (सं० नि० २.३३) ।

जरामरणसमुदयोति चेत्थ जाति अधिप्पेता । सेसपदेसु भवादयो वेदितब्बा ।

कुसलचित्तुप्पादेसु फस्सादयो **परोपण्णास कुसलधम्मा** ।

“जातिपच्चया जरामरण”न्ति जाणं, “असति जातिया नत्थि जरामरण”न्ति जाणं, अतीतमि अद्धानं “जातिपच्चया जरामरण”न्ति जाणं, “असति जातिया नत्थि जरामरण”न्ति जाणं, अनागतमि अद्धानं “जातिपच्चया जरामरण”न्ति जाणं, “असति जातिया नत्थि जरामरण”न्ति जाणं । “यमि इदं धम्मद्विजाणं, तमि खयधम्मं वयधम्मं विरागधम्मं निरोधधम्म”न्ति जाणन्ति एवं जरामरणादीसु एकादससु पटिच्चसमुप्पादङ्गेषु पच्चेकं सत्त सत्त कत्वा **सत्तसत्तति**

जाणवत्थूनि (सं० नि० २.३४) वेदितब्बानि । तत्थ **यम्पी**ति छब्बिधम्मि पच्चवेक्खणजाणं विपस्सनारम्माणभावेन एकज्झं गहेत्वा वुत्तं । **धम्मट्ठितिजाणन्ति** छपि जाणानि सङ्खिपित्वा वुत्तं जाणं । “**खयधम्म**”न्ति आदिना पन पकारेण पवत्तजाणस्स दस्सनं, विपस्सनादस्सनतो विपस्सना पटिविपस्सनादस्सनमत्तमेवाति न तं “अङ्ग”न्ति वदन्ति, पाळियं (सं० नि० २.३४) पन सब्बत्थ जाणवसेन अङ्गानं वुत्तत्ता “**निरोधधम्मन्ति जाण**”न्ति इति-सद्देन पकासेत्वा वुत्तं विपस्सनाजाणं सत्तमं जाणन्ति अयमत्थो दिस्सति । न हि यम्पि इदं धम्मट्ठितिजाणं, तम्पि जाणन्ति सम्बन्धो होति जाणगहणेन एतस्मिं जाणभावदस्सनस्स अनधिप्पेतत्ता, “**खयधम्मं...पे०... निरोधधम्म**”न्ति एतेसं सम्बन्धभावप्पसङ्गो चाति । **चतुवीसति...पे०... वजिरजाणन्ति** एत्थ केचि ताव आहु “भगवा देवसिकं द्वादसकोटिसतसहस्सक्खत्तुं महाकरुणासमापत्तिं समापज्जति, द्वादसकोटिसतसहस्सक्खत्तुमेव च अरहत्तफलसमापत्तिं समापज्जति, तासं पुरेचरं, सहवचरञ्च जाणं पटिपक्खेहि अभेज्जतं, महत्तञ्च उपादाय **महावजिरजाणं** नाम । वुत्तञ्हेतं भगवता —

‘तथागतं, भिक्खवे, अरहन्तं सम्मासम्बुद्धं द्वे वितक्का बहुलं समुदाचरन्ति — खेमो च वितक्को, पविवेको च वितक्को’ति (इतिवु० ३८) ।

खेमवितक्को हि भगवतो महाकरुणासमापत्तिं पूरेत्वा ठितो, पविवेकवितक्को अरहत्तफलसमापत्तिं । बुद्धानज्झि भवङ्गपरिवासो लहुको, मत्थकप्पत्तो समापत्तीसु वसीभावो, तस्मा समापज्जनवुद्धानानि कतिपयचित्तक्खणेहेव इज्जन्ति । पच्च रूपावचरसमापत्तियो चतस्सो अरूपसमापत्तियो अप्पमज्जासमापत्तिया सङ्खि दस, निरोधसमापत्ति, अरहत्तफलसमापत्ति चाति द्वादसेता समापत्तियो भगवा पच्चेकं दिवसे दिवसे कोटिसतसहस्सक्खत्तुं पुरेभत्तं समापज्जति, तथा पच्छाभत्त”न्ति । “एवं समापज्जितब्बसमापत्तिसञ्चारितजाणं **महावजिरजाणं** नामा”ति केचि ।

अपरे पन “यं तं भगवता अभिसम्बोधिदिवसे पच्छिमयामे पटिच्चसमुप्पादमुखेन पटिलोमनयेन जरामरणतो पट्टाय जाणं ओतारेत्वा अनुपदधम्मविपस्सनं आरभन्तेन यथा नाम पुरिसो सुविदुगं महागहनं महावनं छिन्दन्तो अन्तरन्तरा निसानसिलायं फरसुं सुनिसितं करोति, एवमेव निसानसिलासदिसियो समापत्तियो अन्तरन्तरा समापज्जित्वा जाणस्स तिक्खविसदसूरभावं सम्पादेतुं अनुलोमपटिलोमतो पच्चेकं पटिच्चसमुप्पादङ्गवसेन सम्मसन्तो दिवसे दिवसे लक्खकोटिलक्खकोटिफलसमापत्तियो समापज्जति, तं सन्धाय वुत्तं “**चतुवीसति...पे०... महावजिरजाणं निस्साया**”ति” । ननु भगवतो समापत्तिसमापज्जने परिकम्मे पयोजनं नत्थीति? नयिदं एकन्तिकं । तथा हि वेदनापटिप्पणामनादीसु सविसेसं परिकम्मपुब्बङ्गमेन समापत्तियो समापज्जि । अपरे पन “लोकियसमापत्तिसमापज्जने परिकम्मेन पयोजनं नत्थि । लोकुत्तरसमापत्तिसमापज्जने तज्जं परिकम्मं इच्छितब्बमेवा”ति वदन्ति ।

“अपरम्परा”ति पदं येसं देसनाय अत्थि, ते **अपरम्परियाव** । **कुसलपज्जत्तियन्ति** कुसलधम्मानं पज्जापने । अनुत्तरोति उत्तमो । **उपनिस्सये ठत्वा**ति जाणूपनिस्सये ठत्वा यादिसो पुब्बूपनिस्सयो पुब्बयोगो, तत्थ पतिट्टाय । **महन्ततो सद्दहति** पटिपक्खविगमेन जाणस्स विय सद्दायपि तिक्खविसदभावापत्तितो । **अवसेसअरहन्तेही**ति पकतिसावकेहि । **असीति महाथेरा** परमत्थदीपनियं थेरगाथावण्णनायं नामतो उद्धटा । **चत्तारो महाथेरा**ति महाकस्सपअनुरुद्धमहाकच्चानमहाकोट्टिकत्थेरा । **तेसुपि** अगगसावकेसु **सारिपुत्तत्थेरो** पज्जाय विसिद्धभावतो । **सारिपुत्तत्थेरोपि एको पच्चेकबुद्धो** तिक्खविसदजाणो अभिनीहारमहन्तताय सम्भतजाणसम्भारत्ता । सतिपि पच्चेकबोधिया अविसेसेसु बहूसु एकज्झं सन्निपतितेसु पुब्बयोगवसेन लोकिये विसये सिया कस्सचि जाणस्स विसिद्धताति दस्सेतुं “**सचे पना**”ति आदि वुत्तं । “**सब्बज्जुबुद्धोव बुद्धगुणे महन्ततो सद्दहती**”ति इदं हेट्ठा आगतदेसनासोतवसेन

वुत्तं । बुद्धा हि बुद्धगुणे महत्तं पच्चक्खतोव पस्सन्ति, न सदहनवसेन ।

इदानीं यथावुत्तमत्थं उपमाय विभावेतुं “**सेय्यथापि नामा**”तिआदि आरब्धं । **गम्भीरो उत्तानो**ति गम्भीरो वा उत्तानो वाति **जाननत्थं** । “**एवमेवा**”तिआदि यथादस्सिताय उपमाय उपमेय्येन संसन्दनं । बुद्धगुणेषु अप्पमत्तविसयम्पि लोकियमहाजनस्स जाणं अपवत्तितरूपेनेव पवत्तति अनवत्तितसभावत्ताति वुत्तं “**एकव्याम...पे०... वेदितब्बा**”ति । तत्थ **जातउदकं विया**ति पमाणतो जातउदकं विय । अरियानं पन तत्थ अत्तनो विसये पवत्तनकजाणं पवत्तितरूपेनेव पवत्तति अत्तनो पटिवेधानुरूपं, अभिनीहारानुरूपञ्च अवत्तितसभावत्ताति दस्सेन्तो “**दसव्यामयोत्तेना**”तिआदिमाह । तत्थ पटिविद्धसच्चानम्पि पटिपक्खविधमनपुब्बयोगविसेसवसेन जाणं सातिसयं, महानुभावञ्च होतीति इममत्थं दस्सेतुं सोतापन्नजाणस्स दसव्यामउदकं ओपम्मभावेन दस्सेत्वा ततो परेसं दसुत्तरदिगुणदसगुणअसीतिगुणविसिट्ठं उदकं ओपम्मं कत्वा दस्सितं । ननु एवं सन्ते बुद्धगुणा परिमितपरिच्छिन्ना, थेरेन च ते परिच्छिज्ज जाताति आपज्जतीति? नापज्जतीति दस्सेन्तो “**तत्थ यथा सो पुरिसो**”तिआदिमाह । तत्थ **सो पुरिसो**ति सो चतुरासीतिव्यामसहस्सप्पमाणेन योत्तेन चतुरासीतिव्यामसहस्सट्ठाने महासमुद्धे उदकं मिनित्वा ठितो पुरिसो । सो हि थेरेस्स उपमाभावेन गहितो । **धम्मन्वयेना**ति अनुमानजाणेन । तज्झि सिद्धं धम्मं अनुगन्त्वा पवत्तनतो “**धम्मन्वयो**”ति वुच्चति, तथा अन्वयवसेन अत्थस्स बुज्जनतो **अन्वयबुद्धि**, अनुमेय्यं अनुमिनोतीति **अनुमानं**, निदस्सने दिट्ठनयेन अनुमेय्यं गणहातीति “**नयग्गाहो**”ति च वुच्चति । तेनाह “**धम्मन्वयेना**”तिआदि । स्वायं धम्मन्वयो न यस्स कस्सचि होति, अथ खो तथारूपस्स अगगसावकस्सेवाति आह “**सावकपारमिजाणे ठत्वा**”ति । यदि थेरो बुद्धगुणे एकदेसतो पच्चक्खे कत्वा तदज्जे नयग्गाहेन गण्हि, ननु एवं सन्ते बुद्धगुणा परिमितपरिच्छिन्ना आपन्नाति? नयिदं एवन्ति दस्सेन्तो “**अनन्ता अपरिमाणा**”ति ।

“**सद्वहती**”ति वत्वा पुन तमेवत्थं विभावेन्तो “**थेरेन हि...पे०... बहुतरा**”ति आह । कथं पनायमत्थो एवं दट्ठब्बोति एवं अधिप्पायभेदकं उपमाय सज्जापेतुं “**यथा कथं विया**”तिआदि वुत्तं “उपमायमिधेकच्चे विज्जू पुरिसा भासितस्स अत्थं आजानन्ती”ति (सं० नि० २.६७) **इतो नव इतो नवा**ति इतो मज्झट्ठानतो याव दक्खिणतीरा नव इतो मज्झट्ठानतो याव उत्तरतीरा नव । इदानीं यथावुत्तमत्थं सुत्तेन समत्थेतुं “**बुद्धोपी**”ति गाथमाह ।

यमकयुगलमहानदीमहोद्यो वियाति द्विन्नं एकतो समागतत्ता युगलभूतानं महानदीनं महोद्यो विय ।

अनुच्छविकं कत्वाति योयं मम पसादो बुद्धगुणे आरब्ध ओगाळ्हो हुत्वा उप्पन्नो, तं अनुच्छविकं अनुरूपं कत्वा । **पटिग्गहेतुं** सम्पटिच्छित्तुं अज्जो कोचि न **सक्खिस्सति** याथावतो अनवबुज्जनतो । **पटिग्गहेतुं सक्को**ति तस्स हेतुतो, पच्चयतो, सभावतो, किच्चतो, फलतो सम्मदेव पटिविज्जनतो । **पूरत्तन्ति** पुण्णभावो । **पग्घरणकाले**ति विकिरणकाले, पतनकालेति अत्थो । “**पसन्नो**”ति इमिना पसादस्स वत्तमानता दीपिताति “**उप्पन्नसद्धो**”ति इमिनापि सद्भाय पच्चुप्पन्नता पकासिताति आह “**एवं सद्वहामीति अत्थो**”ति । अभिज्जायतीति **अभिज्जो**, अधिको अभिज्जो **भिय्योभिज्जो**, सो एव अतिसयवचनिच्छावसेन “**भिय्योभिज्जतरो**”ति वुत्तोति आह “**भिय्यतरो अभिज्जातो**”ति । दुतियविकप्पे पन अभिजानातीति **अभिज्जा**, अभिविसिट्ठा पज्जा, भिय्यो अभिज्जा एतस्साति **भिय्योभिज्जो**, सो एव अतिसयवचनिच्छावसेन **भिय्योभिज्जतरो**, स्वायमस्स अतिसयो अभिज्जाय भिय्योभावकतोति आह “**भिय्यतराभिज्जो वा**”ति । सम्बुज्झति एतायाति **सम्बोधि**, सम्बज्जुतज्जाणं, अगगमगजाणञ्च । सम्बज्जुतज्जाणपदट्ठानज्झि अगगमगजाणं, अगगमगजाणपदट्ठानञ्च सम्बज्जुतज्जाणं सम्बोधि नाम । तत्थ पधानवसेन तदत्थदस्सने पठमविकप्पो, पदट्ठानवसेन दुतियविकप्पो । कस्मा पनेत्थ अरहत्तमगगजाणस्सेव गहणं, ननु हेट्ठिमानिपि भगवतो मगगजाणानि सवासनमेव यथासकं

पटिपक्खविधमनवसेन पवत्तानि । सवासनप्पहानज्झि जेय्यावरणप्पहानन्ति? सच्चमेतं, तं पन अपरिपुण्णं पटिपक्खविधमनस्स विप्पकतभावतोति आह “अरहत्तमग्गजाणे वा”ति । अग्गमग्गवसेन चेत्य अरियानं बोधित्तयपारिपूरीति दस्सेतुं “अरहत्तमग्गेनेव ही”तिआदि वुत्तं । निप्पदेसाति अनवसेसा । गहिता होन्तीति अरहत्तमग्गेन गहितेन अधिगतेन गहिता अधिगता होन्ति । सब्बन्ति तेहि अधिगन्तब्बं । तेनाति सम्बोधिना सब्बञ्जुतञ्जाणपदट्ठानेन अरहत्तमग्गजाणेन ।

१४२. खादनीयानं उळारता सातरसानुभावेनाति आह “मधुरे आगच्छती”ति । पसंसाय उळारता विसिद्धभावेनाति आह “सेट्ठे”ति, ओभासस्स उळारता महन्तभावेनाति वुत्तं “विपुले”ति । उसभस्स अयन्ति आसभी, इध पन आसभी वियाति आसभी । तेनाह “उसभस्स वाचासदिसी”ति । येन पन गुणेनस्सा तंसदिसता, तं दस्सेतुं “अचला असम्पवेधी”ति वुत्तं । यतो कुतोचि अनुस्सवनं अनुस्सवो । विज्जाट्ठानेसु कतपरिचयानं आचरियानं तं तमत्थं विज्जापेन्ती पवेणी आचरियपरम्परा । केवलं अत्तनो मतिया “इतिकिर एवंकिरा”ति परिकप्पना इतिकिर । पिटकस्स गन्थस्स सम्पदानतो सयं सम्पदानभावेन गहणं पिटकसम्पदानं । यथासुतानं अत्थानं आकारस्स परिवितक्कनं आकारपरिवितक्को । तथेव “एवमेत”न्ति दिट्ठिया निज्झानक्खमनं दिट्ठिनिज्झानक्खन्ति । आगमाधिगमेहि विना तक्कमग्गं निस्साय तक्कनं तक्को । अनुमानविधिं निस्साय नयग्गाहो । यस्मा बुद्धविसये ठत्वा भगवतो अयं थेरस्स चोदना, थेरस्स च सो अविसयो, तस्मा “पच्चक्खतो जाणेन पटिविज्झित्वा विया”ति वुत्तं । सीहनादो वियाति सीहनादो, तंसदिसता चस्स सेट्ठभावेन, सो चेत्य एवं वेदितब्बोति दस्सेन्तो “सीहनादो”तिआदिमाह । नेव दन्थायन्तेनाति न मन्दायन्तेन । न भग्गरायन्तेनाति अपरिसङ्कन्तेन ।

अनुयोगदापनत्थन्ति अनुयोगं सोधापेतुं । विमद्दक्खमज्झि सीहनादं नदन्तो अत्थतो तत्थ अनुयोगं सोधेति नाम । अनुयुज्जन्तो च नं सोधापेति नाम । दातुन्ति सोधेतुं । केचि “दानत्थ”न्ति अत्थं वदन्ति, तदयुत्तं । न हि यो सीहनादं नदति, सो एव तत्थ अनुयोगं देतीति युज्जति । निधंसनन्ति विमद्दनं । धममानन्ति तापयमानं, तापनञ्चेत्थ गग्गरिया धमापनसीसेन वदति । सब्बे तेति सब्बे ते अतीते निरुद्धे सम्मासम्बुद्धे, तेनेतं दस्सेति — ये ते अहेसुं अतीतं अद्धानं तव अभिनीहारतो ओरं सम्मासम्बुद्धा, तेसं ताव सावकजाणगोचरे धम्मे परिच्छिन्दन्तो मारादयो विय बुद्धानं लोकियचित्तचारं त्वं जानेय्यासि । ये पन ते अब्भतीता ततो परतो छिन्नवटुमा छिन्नपपञ्चा परियादिण्णवट्टा सब्बदुक्खवीतिवत्ता सम्मासम्बुद्धा, तेसं सब्बेसम्पि सावकजाणस्स अविसयभूते धम्मे कथं जानिस्ससीति ।

अनागतबुद्धानं पनाति पन-सद्दो विसेसत्थजोतनो, तेन अतीतेसु ताव खन्धानं भूतपुब्बत्ता तत्थ सिया जाणस्स सविसये गति, अनागतेसु पन सब्बसो असज्जातेसु कथन्ति इममत्थं जोतेति । तेनाह “अनागतापी”तिआदि । “चित्तेन परिच्छिन्दित्वा विदिता”ति कस्मा वुत्तं, ननु अतीतानागते सत्ताहे एव पवत्तं चित्तं चेतोपरियजाणस्स विसयो, न ततो परन्ति? नयिदं चेतोपरियजाणकिच्चवसेन वुत्तं, अथ खो पुब्बेनिवासअनागतंसजाणवसेन वुत्तं, तस्मा नायं दोसो ।

विदितट्ठाने न करोति सिक्खापदेनेव तादिसस्स पटिक्खेपस्स पटिक्खित्तत्ता, सेतुघाततो च । कथं पन थेरो द्वयसम्भवे पटिक्खेपमेव अकासि, न विभज्ज ब्याकासीति आह “थेरो किरा”तिआदि । पारं परियन्तं मिनीतीति पारमी, सा एव जाणन्ति पारमिजाणं, सावकानं पारमिजाणं सावकपारमिजाणं, तस्मिं । सावकानं उक्कंसपरियन्तगते जानने नायं अनुयोगो, अथ खो सब्बञ्जुतञ्जाणे सब्बञ्जुताय जानने । केचि पन “सावकपारमिजाणेति सावकपारमिजाणविसये”ति अत्थं वदन्ति । तथा सेसपदेसुपि । सील ..पे०... समत्थन्ति सीलसमाधिपञ्चाविमुत्तिसङ्घातकारणानं जाननसमत्थं ।

बुद्धसीलादयो हि बुद्धानं बुद्धकिच्चस्स, परेहि “बुद्धा”ति जाननस्स च कारणं ।

१४३. अनुमानजाणं विय संसयपिट्ठिकं अहुत्वा “इदमिदं”न्ति यथासभावतो जेय्यं धारेति निच्छिनोतीति धम्मो, पच्चक्खजाणन्ति आह “धम्मस्स पच्चक्खतो जाणस्सा”ति । अनुएतीति अन्वयोति आह “अनुयोगं अनुगन्त्वा”ति । पच्चक्खसिद्धज्झि अत्थं अनुगन्त्वा अनुमानजाणस्स पवत्ति दिट्ठेन अदिट्ठस्स अनुमानन्ति वेदितब्बो । विदिते वेदकम्पि जाणं अत्थतो विदितमेव होतीति “अनुमानजाणं नयग्गाहो विदितो”ति वुत्तं । विदितोति विद्धो पटिलद्धो, अधिगतोति अत्थो । अप्पमाणोति अपरिमाणो महाविसयत्ता । तेनाह “अपरियन्तो”ति । तेनाति अपरियन्तत्ता, तेन वा अपरियन्तेन जाणेन, एतेनेव थेरो यं यं अनुमेय्यमत्थं जातुकामो होति, तत्थ तत्थस्स असङ्गमप्पटिहटअनुमानजाणं पवत्ततीति दस्सेति । तेनाह “सो इमिना”तिआदि । तत्थ इमिनाति इमिना कारणेन । पाकारस्स थिरभावं उद्धमुद्धं आपेतीति उद्धापं, पाकारमूलं । आदि-सद्धेन पाकारद्वारबन्धपरिखादीनं सङ्गहो वेदितब्बो । पच्चन्ते भवं पच्चन्तिमं । पण्डितदोवारिकट्टानियं कत्वा थेरो अत्तानं दस्सेतीति दस्सेन्तो “एकद्वारन्ति कस्मा आहा”ति चोदनं समुद्गापेसि । यस्सा पज्जाय वसेन पुरिसो “पण्डितो”ति वुच्चति, तं पण्डिच्चन्ति आह “पण्डिच्चेन समन्नागतो”ति । तंतंइतिकत्तब्बतासु छेकभावो व्यत्तभावो वेय्यत्तियं । मेधति सम्मोसं हिंसति विधमतीति मेधा, सा एतस्स अत्थीति मेधावी । ठाने ठाने उप्पत्ति एतिस्सा अत्थीति ठानुप्पत्तिका, ठानसो उप्पज्जनकपज्जा । अनुपरियायन्ति एतेनाति अनुपरियायो, सो एव पथोति अनुपरियायपथो, परितो पाकारस्स अनुसंयायनमग्गो । पाकारभागा सन्धातब्बा एत्थाति पाकारसन्धि, पाकारस्स फुल्लितप्पदेसो । सो पन हेट्ठिमन्तेन द्विन्नम्पि इट्ठकानं विगमेन एवं वुच्चतीति आह “द्विन्नं इट्ठकानं अपगतट्टान”न्ति । छिन्नट्टानन्ति छिन्नभिन्नप्पदेसो, छिन्नट्टानं वा । तज्झि “विवर”न्ति वुच्चति ।

किलिट्ठन्ति मलीनं । उपतापेन्तीति किलेसपरिळाहेन सन्तापेन्ति । विबाधेन्तीति पीळेन्ति । उप्पन्नाय पज्जाय नीवरणेहि न किञ्चि कातुं सक्काति आह “अनुप्पन्नाय पज्जाय उप्पज्जितुं न देन्ती”ति । तस्माति पच्चयूपघातेन उप्पज्जितुं अप्पदानतो । चतूसु सतिपट्टानेसु सुट्ठु ठपितचित्ताति चतुब्बिधायपि सतिपट्टानभावनाय सम्मदेव ठपितचित्ता । यथासभावेन भावेत्वाति अविपरीतसभावेन यथा पटिपक्खा समुच्छिज्जन्ति, एवं भावेत्वा ।

पुरिमनये सतिपट्टानानि, बोज्झङ्गा च मिस्सका अधिप्पेताति ततो अज्जथा वत्तुं “अपिचेत्था”तिआदि वुत्तं । मिस्सकाति समथविपस्सनामगवसेन मिस्सका । “चतूसु सतिपट्टानेसु सुप्पतिट्ठितचित्ता”तिआदितो वुत्तत्ता सतिपट्टाने विपस्सनाति गहेत्वा “सत्त बोज्झङ्गे यथाभूतं भावेत्वा”ति वुत्तत्ता, मग्गपरियापन्नानंयेव च नेसं निप्परियायबोज्झङ्गभावतो, तेसु च सब्बसो अधिगतेसु लोकनाथेन सब्बज्जुतज्जाणम्पि अधिगतमेव होतीति “बोज्झङ्गे मग्गो, सब्बज्जुतज्जाणज्चाति गहिते सुन्दरो पज्जो भवेय्या”ति महासिवत्थेरो आह, न पनेवं गहितं पोरानेहीति अधिप्पायो । इतीति वुत्तप्पकारपरामसनं । थेरोति सारिपुत्तत्थेरो ।

तत्थाति तेसु पच्चन्तनगरादीसु । नगरं विय निब्बानं तदत्थिकेहि उपगन्तब्बतो, उपगतानज्ज परिस्सयरहितसुखाधिगमनट्टानतो । पाकारो विय सीलं तदुपगतानं परितो आरक्खभावतो । परियायपथो विय हिरि सीलपाकारस्स अधिट्टानभावतो । वुत्तज्हेतं “परियायपथोति खो भिक्खु हिरिया एतं अधिवचन”न्ति । द्वारं विय अरियमग्गो निब्बाननगरप्पवेसनअज्जसभावतो । पण्डितदोवारिको विय धम्मसेनापति निब्बाननगरपविट्ठपविसनकानं सत्तानं सल्लक्खणतो । दिन्नोति दापितो, सोधितोति अत्थो ।

१४४. निप्फत्तिदस्सनत्थन्ति सिद्धिदस्सनत्थं, अधिगमदस्सनत्थन्ति अत्थो । “पज्जनवुतिपासण्डे”ति इदं यस्मा

थेरो परिब्बाजको हुत्वा ततो पुब्बेव निब्बानपरियेसनं चरमानो ते ते पासण्डिनो उपसङ्गमित्वा निब्बानं पुच्छि, ते नास्स चित्तं आराधेसुं, तं सन्धाय वुत्तं । ते पन पासण्डा हेट्ठा वुत्ता एव । **तत्थेवाति** तस्सयेव भागिनेय्यस्स देसियमानाय देसनाय । परस्स वड्डितं भत्तं भुञ्जन्तो विय **सावकपारमिजाणं हत्थगतं अकासि** अधिगच्छि । **उत्तरुत्तरन्ति** हेट्ठिमस्स हेट्ठिमस्स उत्तरणतो अतिक्कमनतो उत्तरुत्तरं, ततो एव पधानभावं पापितताय **पणीतपणीतं** । **उत्तरुत्तरन्ति** वा उपरूपरि । **पणीतपणीतन्ति** पणीततरं, पणीततमञ्चाति अत्थो । **कण्हन्ति** काळकं संकिलेसधम्मं । **सुक्कन्ति** ओदातं वोदानधम्मं । **सविपक्खं कत्वाति** पहातब्बपहायकभावदस्सनवसेन यथाक्कमं उभयं सविपक्खं कत्वा । “अयं कण्हधम्मो, इमस्स अयं पहायको”ति एवं **कण्हं पटिबाहित्वा** देसनावसेन नीहरित्वा **सुक्कं**, “अयं सुक्कधम्मो, इमिना अयं पहातब्बो”ति एवं **सुक्कं पटिबाहित्वा कण्हं** । **सउस्साहन्ति** फलुप्पादनसमत्थतावसेन सब्बापारं । तेनाह “**सविपाक**”न्ति । विपाकधम्मन्ति अत्थो ।

तस्मिं देसिते धम्मेति तस्मिं वुत्तनयेन भगवा तुम्हेहि देसिते धम्मे **एकच्चं धम्मं नाम सावकपारमिजाणं जानित्वा** पटिविज्झित्वा । तं जानने हि वुत्ते चतुसच्चधम्मजाननं अवुत्तसिद्धन्ति । “**चतुसच्चधम्मसू**”ति इदं पोरणट्टकथायं वुत्ताकारदस्सनं । विपक्खो पन परतो आगमिस्सति । **एत्थाति** “धम्मेषु निट्ठं अगम”न्ति एतस्मिं पदे । **थेरसल्लापोति** थेरानं सल्लापसदिसो विनिच्छयवादो । **काळवल्लवासीति** काळवल्लविहारवासी । **इदानीति** एतरहि “इदाहं भन्ते”ति आदिवचनकाले । **इमस्मिं पन ठानेति** “धम्मेषु निट्ठं अगम”न्ति इमस्मिं पदेसे, इमस्मिं वा निट्ठानकारणभूते योनिसो परिवितक्कने । “इमस्मिं पन ठाने बुद्धगुणेषु निट्ठङ्गतो”ति कस्मा वुत्तं, ननु सावकपारमिजाणसमधिगतकाले एव थेरो बुद्धगुणेषु निट्ठङ्गतोति? सच्चमेतं, इदानी पन तं पाकटं जातन्ति एवं वुत्तं । **सब्बन्ति** “चतुसच्चधम्मसू”ति आदि सुमत्थेरेन वुत्तं सब्बं । **अरहत्ते निट्ठङ्गतोति** एत्थापि वुत्तनयेनेव अनुयोगपरिहारा वेदितब्बा । यदिपि धम्मसेनापति “सावकपारमिजाणं मया समधिगत”न्ति इतो पुब्बेपि जानातियेव, इदानी पन असङ्ख्येय्यापरिमेय्यभेदे बुद्धगुणे नयग्गाहवसेन परिग्गहेत्वा किच्चसिद्धिया तस्मिं जाणे निट्ठङ्गतो अहोसीति दस्सेन्तो “**महासिवत्थेरो... पे०... धम्मसूति** **सावकपारमिजाणे निट्ठङ्गतो**”ति अवोच ।

बुद्धगुणा पन नयतो आगता, ते नयग्गाहतो याथावतो जानन्तो सावकपारमिजाणे तथाजाननवसेन निट्ठङ्गतत्ता सावकपारमिजाणमेव तस्स अपरापरुप्पत्तिवसेन, तेन तेन भावेतब्बकिच्चबहुतावसेन च “**धम्मसू**”ति पुथुवचनेन वुत्तं । अनन्तापरिमेय्यानं अनञ्जविसयानं बुद्धगुणानं नयतो परिग्गहनेन थेरस्स सातिसयो भगवति पसादो उप्पज्जतीति आह “**भिय्योसोमत्ताया**”ति आदि । “सुट्ठु अक्खातो”ति वत्वा तं एवस्स सुट्ठु अक्खाततं दस्सेतुं “**निय्यानिको मग्गो**”ति वुत्तं । स्वाक्खातता हि धम्मस्स यदत्थं देसितो, तदत्थसाधनेन वेदितब्बा । **फलत्थाय निय्यातीति** अनन्तरविपाकत्ता, अत्तनो उप्पत्तिसमनन्तरमेव फलनिष्पादनवसेन पवत्ततीति अत्थो । वट्टचारकतो निय्यातीति वा **निय्यानिको**, निय्यानसीलोति वा । **रागदोसमोहनिम्मदनसमत्थोति** इधापि “पसन्नोस्मि भगवतीति दस्सेती”ति आनेत्वा सम्बन्धो । **वङ्कादीति आदि-**सद्देन जिम्हकुटिले, अञ्जे च पटिपत्तिदोसे सङ्गण्हाति । भगवा तुम्हाकं बुद्धसुबुद्धता विय धम्मसुधम्मता, सङ्गसुप्पटिपत्ति च धम्मेषु निट्ठङ्गमनेन सावकपारमिजाणे निट्ठङ्गतत्ता मय्हं सुट्ठु विभूता सुपाकटा जाताति दस्सेन्तो थेरो “स्वाक्खातो भगवता धम्मो, सुप्पटिपन्नो सङ्गोति पसीदि”न्ति अवोच ।

कुसलधम्मदेसनावण्णना

१४५. अनुत्तरभावोति सेट्ठभावो । अनुत्तरो भगवा येन गुणेन, सो अनुत्तरभावो, तं **अनुत्तरियं** । यस्मा तस्सापि

गुणस्स किञ्चि उत्तरितरं नत्थि एव, तस्मा वुत्तं “सा तुम्हाकं देसना अनुत्तराति वदती”ति । **कुसलेसु धम्मेषू**ति कुसलधम्मनिमित्तं । निमित्तत्थे हि एतं भुम्मं, तस्मा कुसलधम्मदेसनाहेतुपि भगवाव अनुत्तरोति अत्थो । **भूमिं दस्सेन्तो**ति विसयं दस्सेन्तो । कुसलधम्मदेसनाय हि कुसला धम्मा विसयो । **वुत्तपदे**ति “कुसलेसु धम्मेषू”ति एवं वुत्तवाक्ये, एवं वा वुत्तधम्मकोट्टासे । “पञ्चधा”ति कस्मा वुत्तं, ननु छेकट्टेनपि कुसलं इच्छितब्बं “कुसलो त्वं रथस्स अङ्गपच्चङ्गान”न्तिआदीसूति (म० नि० २.८७)? सच्चमेतं, सो पन छेकट्टो कोसल्लसम्भूतट्टेनेव सङ्गहितोति विसुं न गहितो । “कच्चि नु भोतो कुसलं, कच्चि भोतो अनामय”न्ति (जा० १.१५.१४६; २.२२.२००८) **जातके** आगतत्ता “**जातकपरियायं पत्वा आरोग्यट्टेन कुसलं वट्टती**”ति वुत्तं । “तं किं मज्जथ, गहपतयो, इमे धम्मा कुसला वा अकुसला वा सावज्जा वा अनवज्जा वा”तिआदीसु सुत्तपदेसेसु “कुसला”ति वुत्तधम्मा एव “अनवज्जा”ति वुत्ताति आह “**सुत्तन्तपरियायं पत्वा अनवज्जट्टेन कुसलं वट्टती**”ति । **अभिधम्मे** “कोसल्ल”न्ति पज्जा आगताति योनिमोमनसिकारहेतुकस्स कुसलस्स **कोसल्लसम्भूतट्टो**, दरथाभावदीपनतो **निदरथट्टो**, “कुसलस्स कतत्ता उपचितत्ता”ति वत्वा इट्ठविपाकनिदिसनतो **सुखविपाकट्टो** च अभिधम्मनयसिद्धोति आह “**अभिधम्म...पे०... विपाकट्टेना**”ति । **बाहितिकसुत्ते** (म० नि० २.३५८) भगवतो कायसमाचारादिके वण्णेन्तेन धम्मभण्डागारिकेन “यो खो महाराज कायसमाचारो अनवज्जो”ति कुसलो कायसमाचारो रज्जो पसेनदिसस्स वुत्तो । न हि भगवतो सुखविपाककम्मं अत्थीति सब्बसावज्जरहिता कायसमाचारादयो “कुसला”ति वुत्ता, इध पन “कुसलेसु धम्मेषू”ति बोधिपक्खियधम्मा “कुसला”ति वुत्ता, ते च समथविपस्सना मग्गसम्पयुत्ता एकन्तेन सुखविपाका एवाति अवज्जरहिततामत्तं उपादाय अनवज्जत्थो कुसल-सद्धोति आह “**इमस्मिं पन...पे०... दट्टब्ब**”न्ति । एवञ्च कत्वा “फलसतिपट्ठानं पन इध अनधिप्पेत”न्ति इदञ्च वचनं समत्थितं होति सविपाकस्सेव गहणन्ति कत्वा ।

“**चुदसविधेना**”तिआदि सतिपट्ठाने (दी० नि० २.३७६; म० नि० १.१०९) वुत्तनयेन वेदितब्बं । **पग्गहट्टेना**ति कुसलपक्खस्स पग्गणहनसभावेन । **किच्चवसेना**ति अनुप्पन्नाकुसलानुप्पादनादिकिच्चवसेन । ततो एव चस्स चतुब्बिधता । **इज्झनट्टेना**ति निप्पज्जनसभावेन । छन्दादयो एव इद्धिपादेसु विसिट्ठसभावा, इतरे अविसिट्ठा, तेसम्पि विसेसो छन्दादिकतोति आह “**छन्दादिवसेन नानासभावा**”ति ।

अधिमोक्खादिसभाववसेनाति पसादाधिमोक्खादिसलक्खणवसेन । **उपत्थम्भनट्टेना**ति सम्पयुत्तधम्मनं उपत्थम्भनकभावेन । **अकम्पियट्टेना**ति पटिपक्खेहि अकम्पियसभावेन । **सलक्खणेना**ति अधिमोक्खादिसभावेन । **नित्थानट्टेना**ति संकिलेसपक्खतो, वट्टचारकतो च निग्गमनट्टेन । **उपट्ठानादिना**ति उपट्ठानधम्मविचयपग्गहसम्पियायनपस्सम्भनसमाधानअज्झुपेक्खनसङ्घातेन अत्तनो सभावेन । **हेतुट्टेना**ति निब्बानस्स सम्पापकहेतुभावेन । **दस्सनादिना**ति दस्सनाभिनिरोपनपरिग्गहसमुट्ठापनवोदापनपग्गहुपट्ठानसमाधानसङ्घातेन अत्तनो सभावेन ।

सासनस्स परियोसानदस्सनत्थन्ति सासनं नाम निप्परियायतो सत्तत्तिस बोधिपक्खियधम्मा । तत्थ ये समथविपस्सनासहगता, ते सासनस्स आदि, मग्गपरियापन्ना मज्झे, फलभूता परियोसानं, तंदस्सनत्थं । तेनाह “**सासनस्स ही**”तिआदि ।

पुन **एतदानुत्तरियं भन्ते**ति यथारद्धाय देसनाय निगमनं । वुत्तस्सेव अत्थस्स पुन वचनज्हि निगमनं वुत्तं । **तं देसनन्ति** तं कुसलेसु धम्मेषु देसनाप्पकारं, देसनाविधिं, देसेतब्बञ्च, **सकलं** वा सम्पुण्णं अनवसेसं **अभिजानाति** अभिविसिट्टेन

जाणेन जानाति, असेसं अभिजाननतो एव उत्तरि उपरि अभिज्जेयं नत्थि। इतोति भगवता अभिज्जाततो। अज्जो परमत्थवसेन धम्मो वा पज्जत्तिवसेन पुग्गलो वा अयं नाम यं भगवा न जानातीति इदं नत्थि न उपलब्धति सब्बस्सेव सम्मदेव तुम्हेहि अभिज्जातत्ता। कुसलेसु धम्मेसु अभिजानने, देसनायज्च भगवतो उत्तरितरो नत्थि।

आयतनपण्णत्तिदेसनावण्णना

१४६. आयतनपज्जापनासूति चक्खादीनं, रूपादीनज्च आयतनानं सम्बोधनेसु, तेसं अज्जत्तिकबाहिरविभागतो, सभागविभागतो, समुदयतो, अत्थङ्गमतो, आहारतो, आदीनवतो, निस्सरणतो च देसनायन्ति अत्थो।

गब्भावक्कन्तिदेसनावण्णना

१४७. गब्भोक्कमनेसूति गब्भभावेन मातुकुच्छियं अवक्कमनेसु अनुप्पवेसेसु, गब्भे वा मातुकुच्छिस्मिं अवक्कमनेसु। पविसतीति पच्चयवसेन तत्थ निब्बत्तेन्तो पविसन्तो विय होतीति कत्वा वुत्तं। ठातीति सन्तानट्ठितिया पवत्तति, तथाभूतो च तत्थ वसन्तो विय होतीति आह “वसती”ति। पकतिलोकियमनुस्सानं पठमा गब्भावक्कन्तीति पचुरमनुस्सानं गब्भावक्कन्ति देसनावसेन इध पठमा। “दुतिया गब्भावक्कन्ती”ति आदीसुपि एवं योजना वेदितब्बा।

अलमेवाति युत्तमेव।

खिपितुं न सक्कोन्तीति तथा वातानं अनुप्पज्जनमेव वदति। सेसन्ति पुन “एतदानुत्तरिय”ति आदि पाठप्पदेसं वदति।

आदेसनविधादेसनावण्णना

१४८. परस्स चित्तं आदिसति एतेहीति आदेसनानि, यथाउपट्ठितनिमित्तादीनि, तानि एव अज्जमज्जस्स असंकिण्णरूपेण ठितत्ता आदेसनविधा, आदेसनाभागा, तासु आदेसनविधासु। तेनाह “आदेसनकोट्टासेसू”ति। आगतनिमित्तेनाति यस्स आदिसति, तस्स, अत्तनो च उपगतनिमित्तेन, निमित्तप्पत्तस्स लाभालाभादिआदिसनविधिदस्सनस्स पवत्तत्ता “इदं नाम भविस्सती”ति वुत्तं। पाळियं पन “एवम्पि ते मनो”ति आदिना परस्स चित्तादिसनमेव आगतं, तं निदस्सनमत्तं कतन्ति दट्ठब्बं। तथा हि “इदं नाम भविस्सती”ति वुत्तस्सेव अत्थस्स विभावनवसेन वत्थु आगतं। गतनिमित्तं नाम गमननिमित्तं। ठितनिमित्तं नाम अत्तनो समीपे ठाननिमित्तं, परस्स गमनवसेन, ठानवसेन च गहेतब्बनिमित्तं। मनुस्सानं परचित्तविदून्, इतरेसम्पि वा सवनवसेन परस्स चित्तं जत्वा कथेन्तानं सहं सुत्वा। यक्खपिसाचादीनन्ति हिङ्कारयक्खानज्चेव कण्णपिसाचादिपिसाचानं, कुम्भण्डनागादीनज्च।

वितक्कविप्फारवसेनाति विप्फारिकभावेन पवत्तवितक्कस्स वसेन। उप्पन्नन्ति ततो समुट्ठितं। विष्पलपन्तानन्ति कस्सचि अत्थस्स अबोधनतो विरूपं, विविधं वा पलपन्तानं। सुत्तपमत्तादीनन्ति आदि-सद्देन वेदनाट्ठित्तचित्तादीनं सङ्गहो। महाअट्ठकथायं पन “इदं वक्खामि, एवं वक्खामीति वितक्कयतो वितक्कविप्फारसद्दो नाम उप्पज्जती”ति (अभि० अट्ठ० १.वचीकम्मद्वारकथापि) आगतत्ता जागरन्तानं पकतियं ठितानं अविष्पलपन्तानं वितक्कविप्फारसद्दो कदाचि उप्पज्जतीति विज्जायति, यो लोके “मन्तजप्पो”ति वुच्चति। यस्स महाअट्ठकथायं असोतविज्जेय्यता वुत्ता। तादिसज्हि सन्धाय विज्जत्तिसहजमेव “जिक्हातालुचलनादिकरवितक्कसमुट्ठितं सुखुमसद्दं दिब्बसोतेन सुत्वा आदिसतीति

सुत्ते वुत्तं”न्ति (ध० स० मूलटी० वचीकम्मद्वारकथावण्णना) आनन्दाचरियो अवोच । वुत्तलक्खणो एव पन नातिसुखुमो अत्तनो, अच्चासन्नप्पदेसे ठितस्स च मंससोतस्सापि आपाथं गच्छतीति सक्का विञ्जातुं । तस्साति तस्स पुग्गलस्स । तस्स वसेनाति तस्स वितक्कस्स वसेन । एवं अयम्पि आदेसनविधा चेतोपरियजाणवसेनेव आगताति वेदितब्बा । केचि पन “तस्स वसेनाति तस्स सदस्स वसेना”ति अत्थं वदन्ति, तं अयुत्तं । न हि सदग्गहणेन तंसमुट्ठापकचित्तं गय्हति, सदग्गहणानुसारेणपि तदत्थस्सेव गहणं होति, न चित्तस्स । एतेनेव यदेके “यं वितक्कयतोति यमत्थं वितक्कयतो”ति वत्वा “तस्स वसेनाति तस्स अत्थस्स वसेना”ति वण्णेन्ति, तम्पि पटिक्खित्तं ।

मनसा सङ्खरीयन्तीति मनोसङ्कारा, वेदनासञ्जा । पणिहिताति पुरिमपरिबन्धविनयेन पधानभावेन निहिता ठपिता । तेनाह “चित्तसङ्कारा सुट्ठपिता”ति । वितक्कस्स वितक्कनं नाम उप्पादनमेवाति आह “पवत्तेस्सती”ति । “पजानाती”ति पुब्बे वुत्तपदसम्बन्धदस्सनवसेन आनेति । आगमनेनाति ज्ञानस्स आगमनद्वानवसेन । पुब्बभागेनाति मग्गस्स सब्बपुब्बभागेन विपस्सनारम्भेन । उभयं पेतं यो सयं ज्ञानलाभी, अधिगतमग्गो च अञ्जं तदत्थाय पटिपज्जन्तं दिस्वा “अयं इमिना नीहारेण पटिपज्जन्तो अद्धा ज्ञानं लभिस्सति, मग्गं अधिगमिस्सती”ति अभिञ्जाय विना अनुमानवसेन जानाति, तं दस्सेतुं वुत्तं । तेनाह “आगमनेन जानाति नामा”तिआदि । अनन्तराति वुट्ठितकालं सन्धायाह । तदा हि पवत्तवितक्कपजाननेनेव ज्ञानस्स हानभागियतादिविसेसपजाननं ।

किं पनिदं चेतोपरियजाणं परस्स चित्तं परिच्छिज्ज जानन्तं इद्धिचित्तभावतो अविसेसतो सब्बेसम्पि चित्तं जानातीति? नोति दस्सेन्तो “तत्था”तिआदिमाह । न अरियानन्ति येन चित्तेन ते अरिया नाम जाता, तं लोकुत्तरचित्तं न जानाति अप्पटिविद्धभावतो । यथा हि पुथुज्जनो सब्बेसम्पि अरियानं लोकुत्तरचित्तं न जानाति अप्पटिविद्धत्ता, एवं अरियोपि हेट्ठिमो उपरिमस्स लोकुत्तरचित्तं न जानाति अप्पटिविद्धत्ता एव । यथा पन उपरिमो हेट्ठिमं फलसमपत्तिं न समापज्जति, किं एवं सो तस्स लोकुत्तरचित्तं न जानातीति चोदनं सन्धायाह “उपरिमो पन हेट्ठिमस्स जानाती”ति, पटिविद्धत्ताति अधिप्पायो । “उपरिमो हेट्ठिमं न समापज्जती”ति वत्वा तत्थ कारणमाह “तेसज्ही”तिआदि । तेसन्ति अरियानं । हेट्ठिमा हेट्ठिमा समापत्ति भूमन्तरप्पत्तिया पटिप्पस्सद्धिकप्पा । तेनाह “तत्तुपपत्तियेव होती”ति, न उपरिभूमिपत्ति । निमित्तादिवसेन जातस्स कदाचि ब्यभिचारोपि सिया, न पन अभिञ्जाजाणेन जातस्साति आह “चेतो...पे०... नत्थी”ति । “तं भगवा”तिआदि सेसं नाम ।

दस्सनसमापत्तिदेसनावण्णना

१४९. ब्रह्मजालेति ब्रह्मजालसुत्तवण्णनायं । उत्तरपदलोपेन हेस निद्देसो । आतप्पन्ति वीरियं आतप्पति कोसज्जं सब्बम्पि संकिलेसपक्खन्ति । कुसलवीरियस्सेव हेत्थ गहणं अप्पमादादिपदन्तरसन्निधानतो । पदहितब्बतोति पदहनतो, भावनं उद्धिस्स वायमनतोति अत्थो । अनुयुज्जितब्बतोति अनुयुज्जनतो । ईदिसानं पदानं बहुलंकत्तुविसयताय इच्छितब्बत्ता आतप्पपदस्स विय इतरेसम्पि कत्तुसाधनता दट्ठब्बा । पटिपत्तियं नप्पमज्जति एतेनाति अप्पमादो, सतिअविप्पवासो । सम्मा मनसि करोति एतेनाति सम्मामनसिकारो, तथापवत्तो कुसलचित्तुप्पादो । भावनानुयोगमेव तथा वदति । देसनाक्कमेन पठमा, दस्सनसमापत्ति नाम करजकाये पटिक्कूलाकारस्स सम्मदेव दस्सनवसेन पवत्तसमापत्तिभावतो । निप्परियायेनेवाति वुत्तलक्खणदस्सनसमापत्तिसन्निस्सयत्ता, दस्सनमग्गफलभावतो च पठमसामञ्जफलं परियायेन विना दस्सनसमापत्ति ।

अतिक्कम्म छविमंसलोहितं अट्ठिं पच्चवेक्खतीति तानि अपच्चवेक्खित्वा अट्ठिमेव पच्चवेक्खति ।

अट्टिआरम्मणा दिब्बचक्खुपादकज्झानसमापत्तीति वुत्तनयेन अट्टिआरम्मणा दिब्बचक्खुअधिद्वाना पठमज्झानसमापत्ति । यो हि भिक्खु आलोककसिणे चतुत्थज्झानं निब्बत्तेत्वा तं पादकं कत्वा अधिगतदिब्बचक्खुजाणो हुत्वा सविज्जाणके काये अट्टिं परिगृहेत्वा तत्थ पटिकूलमनसिकारवसेन पठमं ज्ञानं निब्बत्तेति, तस्सायं पठमज्झानसमापत्ति **दुतिया दस्सनसमापत्ति** । तेन वुत्तं “अट्टि अट्टी”तिआदि । यो पनेत्थ पाळियं द्वत्तिंसाकारमनसिकारो वुत्तो, सो मग्गसोधनवसेन वुत्तो । तत्थ वा कतपरिचयस्स सुखेनेव वुत्तनया अट्टिपच्चवेक्खणा समिज्जतीति । तेनेवेत्थ “इमं चेवा”ति “अतिक्कम्म चा”ति च-सद्धो समुच्चयत्थो वुत्तो । तं ज्ञानन्ति यथावुत्तं पठमज्झानं । अयन्ति अयं सकदागामिफलसमापत्ति । सातिसयं चतुसच्चदस्सनागमनतो परियायेन विना मुख्या **दुतिया दस्सनसमापत्ति** । याव **ततियमग्गा वत्ततीति आह** “खीणासवस्स वसेन चतुत्था दस्सनसमापत्ति कथिता”ति ।

पाळियं **पुरिसस्स चाति च-सद्धो** व्यतिरेके, तेन यथावुत्तसमापत्तिद्वयतो वुच्चमानंयेव इमस्स विसेसं जोतेति । अविच्छेदेन पवत्तिया सोतसदिसताय विज्जाणमेव **विज्जाणसोतं**, तदेतं विज्जाणं पुरिमतो अनन्तरपच्चयं लभित्वा पच्छिमस्स अनन्तरपच्चयो हुत्वा पवत्ततीति अयं अस्स सोतागतताय सोतसदिसता, तस्मा पजानितब्बभावेन वुत्तं एकमेव चेत्थ विज्जाणं, तस्मा अट्टकथायं “**विज्जाणसोतन्ति विज्जाणमेवा**”ति वुत्तं । **द्वीहिपि भागेहीति** ओरभागपरभागेहि । इधलोको हिस्स ओरभागो, परलोको परभागो द्विन्नम्पि वसेनेतं सम्बन्धन्ति । तेनाह “**इधलोके पतिट्ठितं**”न्तिआदि । विज्जाणस्स खणे खणे भिज्जन्तस्स कामं नत्थि कस्सचि पतिट्ठितता, तण्हावसेन पन तं “पतिट्ठितं”न्ति वुच्चतीति आह “**छन्दरागवसेना**”ति । वुत्तज्हेतं —

“कबळीकारे चे भिक्खवे आहारे अत्थि रागो, अत्थि नन्दी, अत्थि तण्हा, पतिट्ठितं तत्थ विज्जाणं विरुळ्हं । यत्थ पतिट्ठितं विज्जाणं विरुळ्हं...पे०... अत्थि तत्थ आर्यातिं पुनब्भवाभिनिब्बत्ती”तिआदि (सं० नि० २.६४; कथा० २९६; महानि० ७) ।

कम्मन्ति कुसलाकुसलकम्मं, उपयोगवचनमेतं । **कम्मतो उपगच्छन्तन्ति** कम्मभावेन उपगच्छन्तं, विज्जाणन्ति अधिप्पायो । अभिसङ्खारविज्जाणज्हि येन कम्मुना सहगतं, अज्जदत्थु तब्भावमेव उपगतं हुत्वा पवत्तति । **इधलोके पतिट्ठितं नाम** इध कतूपचितकम्मभावूपगमनतो । **कम्मभवं आकट्ठन्तन्ति** कम्मविज्जाणं अत्तना सम्पयुत्तकम्मं जवापेत्वा पटिसन्धिनिब्बत्तनेन तदभिमुखं आकट्ठन्तं । तेनेव पटिसन्धिनिब्बत्तनसामत्थियेन **परलोके पतिट्ठितं नाम** अत्तनो फलस्स तत्थ पतिट्ठापनेन । केचि पन “अभिसङ्खारविज्जाणं परतो विपाकं दातुं असमत्थं इधलोके पतिट्ठितं नाम, दातुं समत्थं पन परलोके पतिट्ठितं नामा”ति वदन्ति, तं तेसं मतिमत्तं “उभयतो अब्बोच्छिन्न”न्ति वुत्तता । यच्च तेहि “परलोके पतिट्ठितं”न्ति वुत्तं, तं इधलोकेपि पतिट्ठितमेव । न हि तस्स इधलोके पतिट्ठितभावेन विना परलोके पतिट्ठितभावो सम्भवति । **सेक्खपुथुज्जनानं चेतोपरियज्जानन्ति** सेक्खानं, पुथुज्जनानञ्च चेतसो परिच्छिन्दनकजाणं । **कथितं** परिच्छिन्दितब्बस्स चेतसो छन्दरागवसेन पतिट्ठितभावजोतनतो ।

चतुत्थाय दस्सनसमापत्तिया ततियदस्सनसमापत्तियं वुत्तप्पटिकखेपेन अत्थो वेदितब्बो ।

पुरिमानं द्विन्नं समापत्तीनं पुब्बे समथवसेन अत्थस्स वुत्तता इदानी विपस्सनावसेन दस्सेतुं “अपिचा”तिआदि वुत्तं । **निच्चलमेव** पुब्बे वुत्तस्स अत्थस्स अपनेतब्बतो । अत्थन्तरत्थताय दस्सियमानाय पदं चलितं नाम होति । **अपरो नयोति** एत्थ पठमज्झानस्स पठमदस्सनसमापत्तिभावे अपुब्बं नत्थि । **दुतियज्झानं दुतियाति** एत्थ पन “अट्टिकवण्णकसिणवसेन पटिलद्धदुतियज्झानं दुतिया दस्सनसमापत्ती”ति वदन्ति, ततियज्झानम्पि तथेव पटिलद्धं । दस्सनसमापत्तिभावो पन यो

भिक्षु आलोककसिणो चतुत्थज्ज्ञानं निब्बत्तेत्वा तं पादकं कत्वा अधिगतदिब्बचक्खुको हुत्वा सविज्जाणके अट्ठि परिगहेत्वा तत्थ वण्णकसिणवसेन हेट्ठिमानि तीणि ज्ञानानि निब्बत्तेति, तस्स । **ततियज्ज्ञानं ततिया** दस्सनसमापत्ति अधिद्वानभूतस्स दिब्बचक्खुजाणस्स वसेन । **चतुत्थज्ज्ञानं चतुत्था**ति रूपावचरचतुत्थज्ज्ञानं निब्बत्तेत्वा तं पादकं कत्वा अधिगतदिब्बचक्खुजाणस्स तं चतुत्थज्ज्ञानं चतुत्था दस्सनसमापत्ति । इधापि सेक्खपुत्थुज्जनानं चेतसो परिच्छिन्दनेन ततिया दस्सनसमापत्ति, अरहतो चित्तस्स परिच्छिन्दनेन चतुत्था दस्सनसमापत्ति वेदितब्बा । एवज्जेसा अत्थवण्णना पाळिया संसन्देय्य । “**पठममग्गो**”तिआदीसु अट्ठिआरम्मणपठमज्ज्ञानपादको **पठममग्गो पठमा दस्सनसमापत्ति** । अट्ठिआरम्मणदुतियज्ज्ञानपादको **दुतियमग्गो दुतिया** दस्सनसमापत्ति । परचित्तजाणसहगता चतुत्थज्ज्ञानपादका **ततियचतुत्थमग्गा ततियचतुत्थदस्सनसमापत्तियो**ति । पुरिसस्स विज्जाणपजाननं पनेत्थ असम्मोहवसेन दट्ठब्बं ।

पुग्गलपण्णत्तिदेसनावण्णना

१५०. पुग्गलपण्णत्तीसूति पुग्गलानं पज्जापनेसु । गुणविसेसवसेन अज्जमज्जं असङ्करतो ठपनेसु । **लोकवोहारवसेना**ति लोकसम्मुतिवसेन । लोकवोहारो हेस, यदिदं “सत्तो पुग्गलो”तिआदि । रूपादीसु सत्तविसत्तताय **सत्तो** । तस्स तस्स सत्तनिकायस्स पूरणतो गलनतो, मरणवसेन पतनतो च **पुग्गलो** । सन्ततिया नयनतो **नरो** । अत्तभावस्स पोसनतो **पोसो** । **एवं पज्जापेतब्बासु** वोहरितब्बासु । “सब्बमेतं पुग्गलो”ति इमिस्सा साधारणपज्जत्तिया विभावनवसेन वुत्तं, न इधाधिप्पेतअसाधारणपज्जत्तिया, तस्मा **लोकपज्जत्तीसूति** सत्तलोकगतपज्जत्तीसु । **अनुत्तरो होति** अनज्जसाधारणत्ता तस्स पज्जापनस्स ।

द्वीहि भागेहीति कारणे, निस्सक्के चेतं पुत्थुवचनं, आवुत्तिआदिवसेन चायमत्थो वेदितब्बोति आह “**अरूपसमापत्तिया**”तिआदि, एतेन “समापत्तिया विक्खम्भनविमोक्खेन, मग्गेन समुच्छेदविमोक्खेन विमुत्तत्ता उभतोभागविमुत्तो”ति एवं पवत्तो **तिपिटकचूळनागत्येरादो**, “नामकायतो, रूपकायतो च विमुत्तत्ता उभतोभागविमुत्तो”ति एवं पवत्तो **तिपिटकमहाधम्मरक्खित्त्येरादो**, “समापत्तिया विक्खम्भनविमोक्खेन एकवारं विमुत्तोव मग्गेन समुच्छेदविमोक्खेन एकवारं विमुत्तत्ता उभतोभागविमुत्तो”ति एवं पवत्तो **तिपिटकचूळाभयत्थेरादो** चाति इमेसं तिण्णम्पि थेरादानं एकज्झं सङ्गहो कतोति दट्ठब्बं । **विमुत्तो**ति किलेसेहि विमुत्तो, किलेसविक्खम्भनसमुच्छेदनेहि वा कायद्वयतो विमुत्तोति अत्थो । **अरूपसमापत्तीनन्ति** निद्धारणे सामिवचनं । **अरहत्तप्पत्तअनागामिनो**ति भूतपुब्बगतिया वुत्तं । न हि अरहत्तप्पत्तो अनागामी नाम होति । **पाळी**ति पुग्गलपज्जत्तिपाळि । **अट्ठ विमोक्खे कायेन फुसित्वा**ति अट्ठ समापत्तियो सहजातनामकायेन पटिलभित्वा । **पज्जाय चस्स दिस्वा आसवा परिकखीणा होन्ती**ति विपस्सनापज्जाय सङ्घारगतं, मग्गपज्जाय चत्तारि सच्चानि पस्सित्वा चत्तारोपि आसवा परिकखीणा होन्ति । **दिस्वा**ति दस्सनहेतु । न हि आसवे पज्जाय पस्सन्ति, दस्सनकारणा पन परिकखीणा “दिस्वा परिकखीणा”ति वुत्ता दस्सनायत्तपरिकखीणत्ता । एवज्हि दस्सनं आसवानं खयस्स पुरिमकिरियाभावेन वुत्तं ।

पज्जाय विसेसतो मुत्तोति पज्जाविमुत्तो अनवसेसतो आसवानं परिकखीणत्ता । **अट्ठविमोक्खपटिक्खेपवसेनेव**, न तदेकदेसभूतरूपज्ज्ञानपटिक्खेपवसेन । एवज्हि अरूपज्ज्ञानेकदेसाभावेपि अट्ठविमोक्खपटिक्खेपो न होतीति सिद्धं होति । अरूपावचरज्ज्ञानेसु हि एकस्मिम्पि सति उभतोभागविमुत्तोयेव नाम होति, न पज्जाविमुत्तोति ।

फुट्टन्तं सच्छिकरोतीति फुट्टानं अन्तो **फुट्टन्तो**, फुट्टानं अरूपज्ज्ञानानं अनन्तरो कालोति अधिप्पायो, अच्चन्तसंयोगे चेतं उपयोगवचनं, फुट्टानन्तरकालमेव सच्छिकातब्बं, सच्छिकतो सच्छिकरणूपायेनाति वुत्तं होति । तेनाह “**सो**

ज्ञानफस्स’न्तिआदि । **एकच्चे आसवा**ति हेट्ठिममगगतयवज्झा आसवा । यो हि अरूपज्ज्ञानेन रूपकायतो, नामकायेकदेसतो च विक्खम्भनविमोक्खेन विमुत्तो, तेन निरोधसङ्घातो विमोक्खो आलोचितो पकासितो विय होति, न पन कायेन सच्छिकतो । निरोधं पन आरम्मणं कत्वा एकच्चेसु आसवेसु खेपितेसु तेन सच्छिकतो होति, तस्मा सो सच्छिकातब्बं निरोधं यथालोचितं नामकायेन सच्छिकरोतीति **कायसक्खी**ति वुच्चति, न तु विमुत्तोति एकच्चानं आसवानं अपरिक्खीणत्ता ।

दिट्ठन्तं पत्तोति दस्सनसङ्घातस्स सोतापत्तिमग्गजाणस्स अनन्तरं पत्तोति अत्थो । “दिट्ठत्ता पत्तो”तिपि पाठो, तेन चतुसच्चदस्सनसङ्घाताय दिट्ठिया निरोधस्स पत्तत्तं दीपेति । तेनाह “**दुक्खा सङ्घारा**”तिआदि । पठमफलतो पट्ठाय याव अगमग्गा दिट्ठिप्पत्तोति आह “**एसोपि कायसक्खी विय छब्बिधो होती**”ति । **इदं दुक्खन्ति** “इदं दुक्खं, एतकं दुक्खं, न इतो उद्धं दुक्ख”न्ति **यथाभूतं पजानाति** । यस्मा इदं याथावसरसतो पजानाति, पजानन्तो च ठपेत्वा तण्हं पञ्चुपादानक्खन्धे “दुक्खसच्च”न्ति पजानाति । तण्हं पन इदं दुक्खं इतो समुदेति, तस्मा “**अयं दुक्खसमुदयो**”ति **यथाभूतं पजानाति** । यस्मा इदं दुक्खञ्च समुदयो च निब्बानं पत्वा निरुज्झन्ति वूपसमन्ति अप्पवर्त्ति गच्छन्ति, तस्मा तं “**अयं दुक्खनिरोधो**”ति **यथाभूतं पजानाति** । अरियो पन अट्ठङ्गिको मग्गो तं दुक्खनिरोधं गच्छति, तेन तं “**अयं दुक्खनिरोधगामिनी पटिपदा**”ति **यथाभूतं पजानाति** । एत्तावता नानक्खणे सच्चववत्थानं दस्सितं । इदानीं तं एकक्खणे दस्सेतुं “**तथागतप्पवेदिता**”तिआदि वुत्तं । **तथागतप्पवेदिता**ति तथागतेन बोधिमण्डे पटिविद्धा विदिता पाकटा कता । **धम्मा**ति चतुसच्चधम्मा । **वोदिट्ठा होन्ती**ति सुदिट्ठा होन्ति । **वोचरिता**ति सुचरिता, तेसु तेन पज्जा सुट्ठु चरापिताति अत्थो । अयन्ति अयं एवरूपो पुग्गलो “**दिट्ठिप्पत्तो**”ति वुच्चति ।

सद्भाय विमुत्तोति सदहनवसेन विमुत्तो, एतेन सब्बथा अविमुत्तस्सपि सद्भामत्तेन विमुत्तभावं दस्सेति । **सद्भावमुत्तो**ति वा सद्भाय अधिमुत्तोति अत्थो । **वुत्तनयेनेवा**ति कायसक्खिम्मि वुत्तनयेनेव । **नो च खो यथा दिट्ठिप्पत्तस्सा**ति यथा दिट्ठिप्पत्तस्स आसवा परिक्खीणा, न एवं सद्भाय विमुत्तस्साति अत्थो । किं पन नेसं किलेसप्पहाने नानत्तं अत्थीति? नत्थि । अथ कस्मा सद्भावमुत्तो दिट्ठिप्पत्तं न पापुणातीति? आगमनीयनानत्तेन । दिट्ठिप्पत्तो हि आगमनम्मि किलेसे विक्खम्भेन्तो अप्पदुक्खेन, अकिलमन्तो च सक्कोति विक्खम्भेतुं, सद्भावमुत्तो दुक्खेन किलमन्तो विक्खम्भेति, तस्मा दिट्ठिप्पत्तं न पापुणाति । तेनाह “**एतेसु ही**”तिआदि ।

आरम्मणं याथावतो धारेति अवधारेतीति **धम्मो**, पज्जा । **पज्जापुब्बङ्गमन्ति** पज्जापधानं । पज्जं वाहेतीति **पज्जावाही**, पज्जं सातिसयं पवत्तेतीति अत्थो । पज्जा वा इमं पुग्गलं वाहेति, निब्बानाभिमुखं गमेतीति अत्थो । **सद्धानुसारिनिद्वेसेपि** एसेव नयो ।

तस्माति विसुद्धिमग्गे (विसुद्धि० २.७७०, ७७६) वुत्तत्ता, ततो एव विसुद्धिमग्गे, तं संवण्णनासु (विसुद्धि० टी० २.७७६) वुत्तनयेनेत्थ अत्थो वेदितब्बो ।

पधानदेसनावण्णना

१५१. पदहनवसेनाति भावनानुयोगवसेन । **सत्त बोज्झङ्गा पधानाति वुत्ता** विवेकनिस्सितादिभावेन पदहितब्बतो भावेतब्बतो ।

पटिपदादेसनावण्णना

१५२. दुक्खेन कसिरेन समाधिं उप्पादेन्तस्साति पुब्बभागे आगमनकाले किच्छेन दुक्खेन ससङ्खारेण सप्पयोगेन किलमन्तस्स किलेसे विक्खम्भेत्वा लोकुत्तरसमाधिं उप्पादेन्तस्स। दन्धं तं ठानं अभिजानन्तस्साति विक्खम्भितेसु किलेसेसु विपस्सनापरिवासे चिरं वसित्वा तं लोकुत्तरसमाधिसङ्घातं ठानं दन्धं सणिकं अभिजानन्तस्स पटिविज्झन्तस्स, सच्छिकरोन्तस्स पापुणन्तस्साति अत्थो। अयं वुच्चतीति या एसा एवं उप्पज्जति, अयं किलेसविक्खम्भनपटिपदाय दुक्खत्ता, विपस्सनापरिवासपज्जाय च दन्धत्ता मग्गकाले एकचित्तक्खणे उप्पन्नापि पज्जा आगमनवसेन “दुक्खपटिपदा दन्धाभिज्जा नामा”ति वुच्चति। उपरि तीसु पदेसुपि इमिनाव नयेन अत्थो वेदितब्बो।

भस्ससमाचारादिदेसनावण्णना

१५३. भस्ससमाचारेति वचीसमाचारे। ठितोति यथारुद्धं तं अविच्छेदवसेन कथेन्तो। तेनाह “कथामग्गं अनुपच्छिन्दित्वा कथेन्तो”ति। मुसावादूपसज्झितन्ति अन्तरन्तरा पवत्तेन मुसावादेन उपसंहितं। विभूति वुच्चति विसुंभावो, तत्थ नियुत्तन्ति वेभूतिकं, तदेव वेभूतियं, पेसुज्जं। तेनाह “भेदकरवाच”न्ति। करणुत्तरियलक्खणतो सारम्भतो जाताति सारम्भजा। तस्सा पवत्तिआकारदस्सनत्थं “त्वं दुस्सीलो”तिआदि वुत्तं। बहिद्वाकथा अमनापा, मनापापि परस्स चित्तविधातावहत्ता करणुत्तरियपक्खियमेवाति दस्सेन्तो “तुह”न्तिआदिमाह। विक्खेपकथापवत्तन्ति विक्खेपकथावसेन पवत्तं। जयपुरेक्खारो हुत्वाति अत्तनो जयं पुरक्खत्वा। यं किञ्चि न भासतीति योजना। “मन्ता”ति वुच्चति पज्जा, मन्तनं जाननन्ति कत्वा। “मन्ता”ति इदं “मन्तेत्वा”ति इमिना समानत्थं निपातपदन्ति आह “उपपरिक्खित्वा”ति। युत्तकथमेवाति अत्तनो, सुणन्तस्स च युत्तरूपमेव कथं। हृदये निदहितब्बयुत्तन्ति अत्थसम्पत्तिया, व्यज्जनसम्पत्तिया अत्थवेदादिपटिलाभनिमित्तत्ता चित्ते ठपेतब्बं, विमुत्तायतनभावेन मनसि कातब्बन्ति अत्थो। सब्बङ्गसम्पन्नापि वाचा अकाले भासिता अभाजने भासिता विय न अत्थावहाति आह “युत्तपत्तकालेना”ति। अयञ्च चतुरङ्गसमन्नागता सुभासितवाचा सच्चसम्बोधावहादिताय सत्तानं महिद्दिका महानिसंसाति दस्सेतुं “एवं भासिता ही”तिआदि वुत्तं।

सीलाचारेति सीले च आचारे च परिसुद्धसीले चेव परिसुद्धमनोसमाचारे च। ठितोति पतिट्ठहन्तो। सच्चं एतस्स अत्थीति सच्चोति आह “सच्चकथो”ति। एस नयो सद्धोति एत्थापि। तेनाह “सद्धासम्पन्नो”ति। “ननु च हेट्ठा सच्चं कथितमेवा”ति कस्मा वुत्तं? हेट्ठा हि वचीसमाचारं कथेन्तेन सच्चं कथितं, पटिपक्खपटिक्खेपवसेन इध सीलं कथेन्तेन तं परिपुण्णं कत्वा दस्सेतुं सच्चं सरूपेनेव कथितं। “पुग्गलाधिट्ठानाय कथाय आरब्भन्तरज्जेतं, तथापि सच्चं वत्त्वा अनन्तरमेव सच्चस्स कथनं पुनरुत्तं होतीति परस्स चोदनावसरो मा होतू”ति तत्थ परिहारं दातुकामो “इध कस्मा पुन वुत्त”न्ति आह। हेट्ठा वाचासच्चं कथितं चतुरङ्गसमन्नागतं सुभासितवाचं दस्सेन्तेन। अन्तमसो...पे०... दस्सेतुं इध वुत्तं “एवं सीलं सुपरिसुद्धं होती”ति। इमस्मिं पनत्थे “एवं परित्तकं खो, राहुल, तेसं सामज्जं, येसं नत्थि सम्पज्जानमुसावादे लज्जा”तिआदि नयप्पवत्तं राहुलोवादसुत्तं दस्सेतब्बं।

गुत्ता सतिकवाटेन पिदहिता द्वारा एतेनाति गुत्तद्वारोति आह “छसु इन्द्रियेसू”तिआदि। परियेसनपटिग्गणहनपरिभोगविस्सज्जनवसेन भोजने मत्तं जानातीति भोजने मत्तज्जू। समन्ति अविसमं। समचारिता हि कायविसमादीनि पहाय कायसमादिपूरणं। निसज्जायाति एत्थ इति-सद्धो आदिअत्थो, तेन “आवरणीयेहि धम्मेहि चित्तं परिसोधेती”ति एवमादिं सङ्गणहाति। भावनाय चित्तपरिसोधनज्झि जागरियानुयोगो, न निद्वाविनोदनमत्तं। नित्तन्दीति

विगतथिनमिद्धो । सा पन नित्तन्दिता कायालसियविगमने पाकटा होतीति वुत्तं “कायालसियविरहितो”ति । “आरद्धवीरियो”ति इमिना दुविधोपि वीरियारम्भो गहितोति तं विभजित्वा दस्सेतुं “कायिकवीरियेनापी”ति आदि वुत्तं । सङ्गम्म गणविहारो सहवासो सङ्गणिका, सा पन किलेसेहिपि एवं होतीति ततो विसेसेतुं “गणसङ्गणिक”न्ति वुत्तं । गणेन सङ्गणिकं गणसङ्गणिकन्ति । आरम्भवत्थुवसेनाति अनधिगतविसेसाधिगमकारणवसेन एकविहारी, न केवलं एकीभाववसेन । किलेससङ्गणिकन्ति किलेससहितचित्तं । यथा तथाति विपस्सनावसेन, पटिसङ्खानवसेन वा । समथवसेन आरम्माणूपनिज्झानं । विपस्सनावसेन लक्खणूपनिज्झानं ।

कल्याणपटिभानोति सुन्दरपटिभानो, सा पनस्स पटिभानसम्पदा वचनचातुरियसहिताव इच्छिताति आह “वाक्करण... पे०... सम्पन्नो चा”ति । “पटिभान”न्ति हि जाणम्पि वुच्चति जाणस्स उपट्ठितवचनम्पि । तत्थ अत्थयुत्तं कारणयुत्तं पटिभानमस्साति युत्तपटिभानो । पुच्छितानन्तरमेव सीधं व्याकातुं असमत्थताय नो मुत्तपटिभानं अस्साति नो मुत्तपटिभानो । इध पन विकिण्णवाचो मुत्तपटिभानो अधिप्पेतोति अधिप्पायेन “सीलसमाचारस्मिज्झि ठितभिक्षु मुत्तपटिभानो न होती”ति वुत्तं । गमनसमत्थायाति अस्सुतं धम्मं गमेतुं समत्थाय । धारणसमत्थायाति सातिसयं सतिवीरियसहितताय यथासुतं यथापरियत्तं धम्मं धारेतुं समत्थाय । मुननतो अनुमिननतो मुतीति अनुमान पज्जाय नामं । तीहि पदेहीति “गतिमा धितिमा मुतिमा”ति तीहि पदेहि । हेट्ठाति हेट्ठा “आरद्धवीरियो”ति वुत्तट्ठाने । इधाति “धितिमा”ति वुत्तट्ठाने । वीरियम्पि हेट्ठा गुणभूतं गहितन्ति वुत्तोवायमत्थो । हेट्ठाति “जागरियानुयोगमनुयुत्तो, ज्ञायी”ति एत्थ विपस्सनापज्जा कथिता । इधाति “धितिमा मुतिमा”ति एत्थ बुद्धवचनगणहनपज्जा कथिता करणपुब्बापरकोसल्लपज्जादीपनतो । किलेसकामोपि वत्थुकामो विय यथापवत्तो अस्सादीयतीति वुत्तं “वत्थुकामकिलेसकामेसु अगिद्धो”ति ।

अनुसासनविधादेसनादिवण्णना

१५४. अत्तनो उपायमनसिकारेनाति अत्तनि सम्भूतेन पथमनसिकारेन भावनामनसिकारेन । पटिपज्जमानोति विसुद्धिं पटिपज्जमानो ।

१५५. किलेसविमुत्तिजाणेति किलेसप्पहानजानने ।

१५६. परियादियमानोति परिच्छिज्ज गणहन्तोति अत्थो । सुद्धक्खन्धेयेव अनुस्सरति नामगोत्तं परियादियितुं असक्कोन्तो । वुत्तमेवत्थं विवरितुं “एको ही”ति आदि वुत्तं । सक्कोति परियादियितुं । असक्कोन्तस्स वसेन गहितं, “अमुत्रासिं एवंनामो”ति आदि वुत्तन्ति अत्थो । असक्कोन्तस्साति च आरोहने असक्कोन्तस्स, ओरोहने पन जाणस्स थिरभूतत्ता । तेनाह “सुद्धक्खन्धेयेव अनुस्सरन्तो”ति आदि । एतन्ति पुब्बापरविरोधं । न सल्लक्खेसि दिट्ठाभिनिवेसेन कुण्ठजाणत्ता । तेनाह “दिट्ठिगतिकत्ता”ति । ठानन्ति एकस्मिं पक्खे अवट्ठानं । नियमोति वादनियमो पटिनियतवादता । तेनाह “इमं गहेत्वा”ति आदि ।

१५७. पिण्डगणनायाति “एकं द्वे”ति आदिना अगणेत्वा सङ्कलनपदुप्पादनादिना पिण्डनवसेन गणनाय । अच्छिद्वकवसेनाति अविच्छिन्दकगणनावसेन गणना कमगणनं मुञ्चित्वा “इमस्मिं रुक्खे एत्तकानि पण्णानी”ति वा “इमस्मिं जलासये एत्तकानि उदकाळ्हकानी”ति वा एवं गणेतब्बस्स एकज्झम्पि पिण्डेत्वा गणना । कमगणना हि अन्तरन्तरा विच्छिज्ज पवत्तिया पच्छिन्दिका । सा पनेसा गणना सवनन्तरं अनपेक्खित्वा मनसाव गणेतब्बतो

“मनोगणना”तिपि वुच्चतीति आह “मनोगणनाया”ति । पिण्डगणनमेव दस्सेति, न विभागगणनं । सङ्घातुं न सक्का अज्जेहि असङ्ख्येय्याभावतो । पज्जापारमिया पूरितभावं दस्सेन्तो इतरासं पूरणेन विना तस्सा पूरणं नत्थीति “दसन्नं पारमीनं पूरितत्ता”ति आह । तेनाह “सब्बज्जुतज्जाणस्स सुप्पटिविद्धत्ता”ति । एतकन्ति दस्सेथाति दीपेति थेरो । यं पन पाळियं “साकारं सउद्देसं अनुस्सरती”ति वुत्तं, तं तस्स अनुस्सरणमत्तं सन्धाय वुत्तं, न आयुनो वस्सादिगणनाय परिच्छिन्दनं तस्स अविसयभावतो ।

१५८. तुम्हाकं सम्मासम्बुद्धानं येव अनुत्तरा अनज्जसाधारणत्ता । इदानीं तस्सा देसनाय मज्झे भिन्नसुवण्णस्स विय विभागाभावं दस्सेतुं “अतीतबुद्धापी”तिआदि वुत्तं । इमिनापि कारणेनाति अनुत्तरभावेन, अज्जेहि बुद्धेहि एकसदिसभावेन च ।

१५९. आसवानं आरम्मणभावूपगमनेन सासवा । उपेच्च आधीयन्तीति उपाधी, दोसारोपनानि, सह उपाधीहीति सउपाधिका । अनरियिद्धियज्हि अत्तनो चित्तदोसेन एकच्चे उपारम्भं ददन्ति, स्वायमत्थो केवट्टसुत्तेन दीपेतब्बो । नो “अरिया”ति वुच्चति सासवभावतो । निद्दोसेहि खीणासवेहि पवत्तेतब्बतो निद्दोसा दोसेहि सह अप्पवत्तनतो । ततो एव अनुपारम्भा । अरियानं इद्धीति अरियिद्धीति वुच्चति ।

अप्पटिक्कूलसज्जीति इट्ठसज्जी इट्ठाकारेन पवत्तचित्तो । पटिक्कूलेति अमनुज्जे अनिट्ठे । धातुसज्जन्ति “धातुयो”ति सज्जं । उपसंहरतीति उपनेति पवत्तेति । अनिट्ठस्मिं वत्थुस्मिन्ति अनिट्ठे सत्तसज्जिते आरम्मणे । मेत्ताय वा फरतीति मेत्तं हितेसितं उपसंहरन्तो सब्बत्थकमेव तं तत्थ फरति । धातुतो वा उपसंहरतीति धम्मसभावचिन्तनेन धातुसो, पच्चवेक्खणाय धातुमनसिकारं वा तत्थ पवत्तेति । अप्पटिक्कूले सत्ते जातिमित्तादिके याथावतो धम्मसभावचिन्तनेन अनिच्चसज्जाय विसभागभूते “केसादि असुचिकोट्टासमेवा”ति असुभसज्जं फरति असुभमनसिकारं पवत्तेति । छळङ्गुपेक्खायाति इट्ठानिट्ठळारम्मणापाथे परिसुद्धपकतिभावाविजहनलक्खणाय छसु द्वारेसु पवत्तनतो “छळङ्गुपेक्खाया”ति लद्धनामाय तत्रमज्जत्तुपेक्खाय ।

तं देसनन्ति तं द्वीसु इद्धिविधासु देसनप्पकारं देसनाविधिं । असेसं सकलन्ति असेसं निरवसेसं सम्पुण्णं अभिविसिट्ठेन जाणेन जानाति । असेसं अभिजानतो ततो उत्तरि अभिज्जेय्यं नत्थि । इतोति भगवतो अभिज्जाततो । अज्जो परमत्थवसेन धम्मो वा पज्जत्तिवसेन पुग्गलो वा अयं नाम यं भगवा न जानातीति इदं नत्थि न उपलब्धति सब्बस्सेव सम्मदेव तुम्हेहि अभिज्जातत्ता । द्वीसु इद्धिविधासु अभिजानने, देसनायज्ज भगवतो उत्तरितरो नत्थि । इमिनापीति पि-सद्दो न केवलं वुत्तत्थसमुच्चयत्थो, अथ खो अवुत्तत्थसमुच्चयत्थोपि दट्ठब्बो । यं तं भन्तेतिआदिनापि हि भगवतो गुणदस्सनं तस्सेव पसादस्स कारणविभावनं ।

अज्जथासत्थुगुणदस्सनादिवण्णना

१६०. पुब्बे “एतदानुत्तरियं भन्ते”तिआदिना यथावुत्तबुद्धगुणा दस्सिता, ततो अज्जो एवायं पकारो “यं तं भन्ते”तिआदिना आरद्धोति आह “अपरेनापि आकारेना”ति । बुद्धानं सम्मासम्बोधिया सद्दहनतो विसेसतो सद्दा कुलपुत्ता नाम बोधिसत्ता, महाबोधिसत्ताति अधिप्पायो । ते हि महाभिनीहारतो पट्टाय महाबोधियं सत्ता आसत्ता लगा नियतभावूपगमनेन केनचि असंहारियभावतो । यतो नेसं न कथज्जि तत्थ सद्दाय अज्जथत्तं होति, एतेनेव तेसं कम्मफलं सद्दायपि अज्जथत्ताभावो दीपितो दट्ठब्बो । तस्माति यस्मा अतिसयवचनिच्छावसेन, “अनुप्पत्तं तं भगवता”ति

सहन्तरसन्निधानेन च विसिद्धविसयं “सद्धेन कुलपुत्तेना”ति इदं पदं, तस्मा । लोकोत्तरधम्मसमधिगममूलकत्ता सब्बबुद्धगुणसमधिगमस्स “नव लोकोत्तरधम्मा”ति वुत्तं । “आरद्धवीरियेना”तिआदीसु समासपदेसु “वीरियं थामो”तिआदीनि अवयवपदानि । आदि-सद्धेन परक्कमपदं सङ्गण्हाति, न धोरहपदं । न हि तं वीरियवेवचनं, अथ खो वीरियवन्तवाचकं । धुराय नियुत्तोति हि धोरहो । तेनाह “तं धुरं वहनसमत्थेन महापुरिसेना”ति । पग्गहितवीरियेनाति असिथिलवीरियेन । थिरवीरियेनाति उस्सोळ्हीभावूपगमनेन थिरभावप्पत्तवीरियेन । असमधुरेहीति अनञ्जसाधारणधुरेहि । परेसं असहसहना हि लोकनाथा । तं सब्बं अचिन्तेय्यापरिमेय्यभेदं बुद्धानं गुणजातं । पारमिता, बुद्धगुणा, वेनेय्यसत्ताति यस्मा इदं तयं सब्बेसम्पि बुद्धानं समानमेव, तस्मा आह “अतीतानागत...पे०... ऊनो नत्थी”ति ।

कामसुखल्लिकानुयोगन्ति कामसुखे अल्लीना हुत्वा अनुयुञ्जनं । को जानाति परलोकं “अत्थी”ति, एत्थ “को एकविसयोयं इन्द्रियगोचरो”ति एवंदिट्ठि हुत्वाति अधिप्पायो । सुखोति इट्ठो सुखावहो । परिब्बाजिकायाति तापसपरिब्बाजिकाय तरुणिया । मुदुकायाति सुखुमालाय । लोमसायाति तरुणमुदुलोमवतिया । मोळिबन्धाहीति मोळि कत्वा बन्धकेसाहि । परिचारेन्तीति अत्तनो पारिचारिकं करोन्ति, इन्द्रियाणि वा तत्थ परितो चारेन्ति । लामकन्ति पटिकिलिट्ठं । गामवासीनं बालानं धम्मं । पुथुज्जनानमिदन्ति पोथुज्जनिकं । यथा पन तं “पुथुज्जनानमिद”न्ति वत्तब्बतं लभति, तं दस्सेतुं “पुथुज्जनेहि सेवितब्ब”न्ति आह । अनरियेहि सेवितब्बन्ति वा अनरियं । यस्मा पन निदोसत्थो अरियत्थो, तस्मा “अनरियन्ति न निदोस”न्ति वुत्तं । अनत्थसंयुत्तन्ति दिट्ठधम्मिकसम्परायिकादिविविधविपुलानत्थसज्जितं । अत्तकिलमथानुयोगन्ति अत्तनो किलमथस्स खेदनस्स अनुयुञ्जनं । दुक्खं एतस्स अत्थीति दुक्खं । दुक्खमनं एतस्साति दुक्खमं ।

आभिचेतसिकानन्ति अभिचेतो वुच्चति अभिक्कन्तं विसुद्धं चित्तं, अधिचित्तं वा, तस्मिं अभिचेतसि जातानीति आभिचेतसिकानि, अभिचेतोसन्निस्सितानि वा । दिट्ठधम्मसुखविहारानन्ति दिट्ठधम्मे सुखविहारानं, दिट्ठधम्मो वुच्चति पच्चक्खो अत्तभावो, तत्थ सुखविहारभूतानन्ति अत्थो, रूपावचरझानानमेतं अधिवचनं । तानि हि अप्पेत्वा निसिन्ना झायिनो इमस्मियेव अत्तभावे असंकिलिट्ठं नेक्खम्मसुखं विन्दन्ति, तस्मा “दिट्ठधम्मसुखविहारानी”ति वुच्चन्तीति । कथिता “दिट्ठधम्मसुखविहारो”ति सप्पीतिकत्ता, लोकोत्तरविपाकसुखमसज्जितत्ता च । सह मग्गेन विपस्सनापादकज्झानं कथितं “चत्तारोमे चुन्द सुखल्लिकानुयोगा एकन्तनिब्बिदाया”तिआदिना (दी० नि० ३.१८४) चतुत्थज्झानिकफलसमापत्तीति चतुत्थज्झानिका फलसमापत्ति दिट्ठधम्मसुखविहारभावेन कथिता । चत्तारि रूपावचरानि “दिट्ठधम्मसुखविहारज्झानानी”ति कथितानीति अत्थो । निकामलाभीति निकामेन लाभी अत्तनो इच्छावसेन लाभी । इच्छितिच्छितक्खणे समापज्जितुं समत्थोति अत्थो । तेनाह “यथाकामलाभी”ति । अदुक्खलाभीति सुखेनेव पच्चनीकधम्मानं समुच्छिन्नत्ता समापज्जितुं समत्थो । अकसिरलाभीति अकसिरानं विपुलानं लाभी, यथापरिच्छेदेनेव वुट्ठातुं समत्थो । एकच्चो हि लाभीयेव होति, न पन सक्कोति इच्छितिच्छितक्खणे समापज्जितुं । एकच्चो तथा समापज्जितुं सक्कोति, पारिबन्धके पन किच्छेन विक्खम्भेति । एकच्चो तथा च समापज्जति, पारिबन्धके च अकिच्छेनेव विक्खम्भेति, न सक्कोति नाळिकयन्तं विय यथापरिच्छेदे वुट्ठातुं । भगवा पन सब्बसो समुच्छिन्नपारिबन्धकत्ता वसिभावस्स सम्मदेव समधिगतत्ता सब्बमेतं सम्मदेव सक्कोति ।

अनुयोगदानप्पकारवण्णना

१६१. दससहस्सिलोकधातुयाति इमाय लोकधातुया सद्धिं इमं लोकधातुं परिवारेत्वा ठिताय

दससहस्सिलोकधातुया । जातिखेत्तभावेन हि तं एकज्झं गहेत्वा “एकिस्सा लोकधातुया”ति वुत्तं, तत्तकाय एव जातिखेत्तभावो धम्मतावसेन वेदितब्बो । “परिग्गहवसेना”ति केचि । सब्बेसम्पि बुद्धानं तत्तकं एव जातिखेत्तं । “तन्निवासीनयेव च देवानं धम्माभिसमयो”ति वदन्ति । पकम्पनदेवतूपसङ्कमनादिना जातचक्कवाळेन समानयोगक्खमट्टानं **जातिखेत्तं** । सरसेनेव आणापवत्तनट्टानं **आणाखेत्तं** । बुद्धजाणस्स विसयभूतं ठानं **विसयखेत्तं** । **ओक्कमनादीनं** छन्नमेव गहणं निदस्सनमत्तं महाभिनीहारादिकालेपि तस्स पकम्पनलब्धनतो । **आणाखेत्तं नाम**, यं एकच्चं संवट्ठति, विवट्ठति च । **आणा वत्तति** तन्निवासिदेवतानं सिरसा सम्पटिच्छनेन, तच्च खो केवलं बुद्धानं आनुभावेनेव, न अधिप्पायवसेन । “यावता पन आकङ्खेय्या”ति (अ० नि० ३.८१) वचनतो ततो परम्पि आणा पवत्तेय्येव ।

नुप्पज्जन्तीति पन अत्थीति “न मे आचरियो अत्थि, सदिसो मे न विज्जती”ति (म० नि० १.२८५; २.३४१; महाव० ११; कथा० ४०५) इमिस्सा लोकधातुया ठत्वा वदन्तेन भगवता, इमस्मिंयेव सुत्ते “किं पनावुसो, सारिपुत्त, अत्थेतरहि अज्जो समणो वा ब्राह्मणो वा भगवता समसमो सम्बोधिं”न्ति (दी० नि० ३.१६१) एवं पुट्ठो “अहं भन्ते नोति वदेय्य”न्ति (दी० नि० ३.१६१) वत्वा तस्स कारणं दस्सेतुं “अट्टानमेतं अनवकासो, यं एकिस्सा लोकधातुया द्वे अरहन्तो सम्मासम्बुद्धा”ति (दी० नि० ३.१६१; म० नि० ३.१२९; अ० नि० १.२७७; नेत्ति० ५७; मि० प० ५.१.१) इमं सुत्तं दस्सेन्तेन धम्मसेनापतिना च बुद्धखेत्तभूतं इमं लोकधातुं ठपेत्वा अज्जत्थ अनुप्पत्ति वुत्ता होतीति अधिप्पायो ।

एकतोति सह, एकस्मिं कालेति अत्थो । सो पन कालो कथं परिच्छिन्नोति? चरिमभवे पटिसन्धिगहणतो पट्टाय याव धातुपरिनिब्बानन्ति दस्सेन्तो “**तत्थ बोधिपल्लङ्के**”ति आदिमाह । **निसिन्नकालतो पट्टायाति** पटिलोमक्कमेन वदति । **खेत्तपरिग्गहो कतोव** होति “इदं बुद्धानं जातिखेत्तं”न्ति । केन पन परिग्गहो कतो? उप्पज्जमानेन बोधिसत्तेन । **परिनिब्बानतो पट्टायाति** अनुपादिसेसाय निब्बानधातुया परिनिब्बानतो पट्टाय । **एत्थन्तरेति** चरिमभवे बोधिसत्तस्स पटिसन्धिगहणं, धातुपरिनिब्बानन्ति इमेहि द्वीहि परिच्छिन्ने एतस्मिं अन्तरे ।

तिपिटकअन्तरधानकथावण्णना

“न निवारिता”ति वत्वा तत्थ कारणं दस्सेतुं “**तीणि ही**”ति आदि वुत्तं । पटिपत्तिअन्तरधानेन सासनस्स ओसक्कितत्ता अपरस्स उप्पत्ति लद्धावसरा होति । **पटिपदाति** पटिवेधावहा पुब्बभागपटिपदा ।

“परियत्ति पमाण”न्ति वत्वा तमत्थं बोधिसत्तं निदस्सनं कत्वा दस्सेतुं “**यथा**”ति आदि वुत्तं । तयिदं हीनं निदस्सनं कतन्ति दट्ठब्बं । निव्यानिकधम्मस्स हि ठितिं दस्सेन्तो अनिव्यानिकधम्मं निदस्सेति ।

मातिकाय अन्तरहितायाति “यो पन भिक्खू”ति आदि (पारा० ३९, ४४; पाचि० ४५) नयप्पवत्ताय सिक्खापदपाळिमातिकाय अन्तरहिताय । निदानुद्देससङ्घाते पातिमोक्खे, पब्बज्जाउपसम्पदाकम्मेसु च **सासनं तिड्ढति** । यथा वा पातिमोक्खे धरन्ते एव पब्बज्जा उपसम्पदा च, एवं सति एव तदुभये पातिमोक्खं तदुभयाभावे पातिमोक्खाभावतो । तस्मा तयिदं तयं सासनस्स ठितिहेतूति आह “**पातिमोक्खपब्बज्जाउपसम्पदासु ठितासु सासनं तिड्ढती**”ति । यस्मा वा उपसम्पदाधीनं पातिमोक्खं अनुपसम्पन्नस्स अनिच्छितत्ता, उपसम्पदा च पब्बज्जाधीना, तस्मा पातिमोक्खे, तं सिद्धिया सिद्धासु पब्बज्जुपसम्पदासु च सासनं तिड्ढति । **ओसक्कितं नामाति** पच्छिमकपटिवेधसीलभेदद्वयं एकतो कत्वा ततो परं विनट्ठं नाम होति, पच्छिमकपटिवेधतो परं पटिवेधसासनं, पच्छिमकसीलभेदतो परं पटिपत्तिसासनं विनट्ठं नाम होतीति अत्थो ।

सासनअन्तरहितवण्णना

एतेन कामं “सासनद्वितिया परियत्ति पमाण”न्ति वुत्तं, परियत्ति पन पटिपत्तिहेतुकाति पटिपत्तिया असति सा अप्पत्तिट्ठा होति पटिवेधो विय, तस्मा पटिपत्तिअन्तरधानं सासनोसक्कनस्स विसेसकारणन्ति दस्सेत्वा तयिदं सासनोसक्कनं धातुपरिनिब्बानोसानन्ति दस्सेतुं “तीणि परिनिब्बानानी”तिआदि वुत्तं। **धातूनं सन्निपातनादि** बुद्धानं अधिष्ठानेनेवाति वेदितब्बं।

ताति रस्मियो। **कारुज्जन्ति** परिदेवनकारुज्जं। जम्बुदीपे, दीपन्तरेसु, देवनागब्रह्मलोकेसु च विष्पकिरित्वा ठितानं धातूनं महाबोधिपल्लङ्कट्टाने एकज्झं सन्निपातनं, रस्मिविस्सज्जनं, तत्थ तेजोधातुया उट्टानं, एकजालिभावो चाति सब्बमेतं सत्थु अधिष्ठानवसेनेवाति वेदितब्बं।

अनच्छरियत्ताति द्वीसुपि उप्पज्जमानेसु अच्छरियत्ताभावदोसतोति अत्थो। बुद्धा नाम मज्झे भिन्नसुवण्णं विय एकसदिसाति तेसं देसनापि एकरसा एवाति आह “**देसनाय च विसेसाभावतो**”ति, एतेन च अनच्छरियत्तमेव सार्धेति। “**विवादभावतो**”ति एतेन विवादाभावत्थं द्वे एकतो न उप्पज्जन्तीति दस्सेति।

तत्थाति मिलिन्दपञ्चे (मि० प० ५.१.१)। **एकुद्देसोति** एको एकविधो अभिन्नो उद्देसो। सेसपदेसुपि एसेव नयो।

एकं एव बुद्धं धारेतीति **एकबुद्धधारणी**, एतेन एवंसभावा एते बुद्धगुणा, येन दूतियं बुद्धगुणं धारेतुं असमत्था अयं लोकधातूति दस्सेति। पच्चयविसेसनिष्फन्नानज्झि धम्मानं सभावविसेसो न सक्का निवारेतुन्ति। “न धारेय्या”ति वत्त्वा तमेव आधारणं परियायेहि पकासेन्तो “**चलेय्या**”तिआदिमाह। तत्थ **चलेय्याति** परिष्फन्देय्य। **कम्पेय्याति** पवेधेय्य। **नमेय्याति** एकपस्सेन नता भवेय्य। **ओणमेय्याति** ओसीदेय्य। **विनमेय्याति** विविधा इतो चितो च नमेय्य। **विकिरेय्याति** वातेन भुसमुट्ठि विय विष्पकिरेय्य। **विधमेय्याति** विनस्सेय्य। **विद्धंसेय्याति** सब्बसो विद्धस्ता भवेय्य। तथाभूता च न कत्थचि तिड्ढेय्याति आह “**न ठानं उपगच्छेय्या**”ति।

इदानी तत्थ निदस्सनं दस्सेन्तो “**यथा महाराजा**”तिआदिमाह। तत्थ **समुपादिकाति** समं उद्धं पज्जति पवत्ततीति समुपादिका, उदकस्स उपरि समंगामिनीति अत्थो। **वण्णेनाति** सण्ठानेन। **पमाणेनाति** आरोहेन। **किसथूलेनाति** किसथूलभावेन, परिणाहेनाति अत्थो। **द्विन्नम्पीति** द्वेपि, द्विन्नम्पि वा सरीरभारं।

छादेन्तन्ति रोचेन्तं रुचिं उप्पादेन्तं। **तन्दीकतोति** तेन भोजनेन तन्दीभूतो। **अनोणमितदण्डजातोति** यावदत्थभोजनेन ओणमितुं असमत्थताय अनोणमितदण्डो विय जातो। **सकिं भुत्तोवाति** एकं वड्ढितकं भुत्तमतोव **मरेय्याति**। **अतिधम्मभारेनाति** धम्मेन नाम पथवी तिड्ढेय्य, सकिं तेनेव चलति विनस्सतीति अधिष्पायेन पुच्छति। पुन थेरो रतनं नाम लोके कुटुम्बं सन्धारेन्तं, अभिमतज्ज लोकेन; तं अत्तनो गरुसभावताय सकटभङ्गस्स कारणं अतिभारभूतं दिट्ठमेवं धम्मो च हितसुखविसेसेहि तंसमङ्गिनं धारेन्तो, अभिमतो च विज्जूनं गम्भीरप्पमेय्यभावेन गरुसभावत्ता अतिभारभूतो पथविचलनस्स कारणं होतीति दस्सेन्तो “**इध महाराज द्वे सकटा**”तिआदिमाह, एतेनेव तथागतस्स मातुकुच्छिओक्कमनादिकाले पथविकम्पनकारणं संवण्णितन्ति दट्ठब्बं। **एकस्साति** एकस्मा, **एकस्स** वा सकटस्स **रतनं** तस्मा **सकटतो गहेत्वाति** अत्थो।

ओसारितन्ति उच्चारितं, कथितन्ति अत्थो।

अगगोति सब्बसत्तेहि अगगो ।

सभावपकत्तिमाति सभावभूता अकित्तिमा पकत्तिमा । कारणमहन्तत्ताति कारणानं महन्तताय, महन्तेहि बुद्धकरधम्मोहि पारमिसङ्घातेहि कारणेहि बुद्धगुणानं निब्बत्तितोति वुत्तं होति । पथविआदीनि महन्तानि वत्थूनि, महन्ता च सक्कभावादयो अत्तनो अत्तनो विसये एकेकाव, एवं सम्मासम्बुद्धोपि महन्तो अत्तनो विसये एको एव । को च तस्स विसयो? बुद्धभूमि, यावतकं वा जेय्यमेवं “आकासो विय अनन्तविसयो भगवा एको एव होती”ति वदन्तो “एकिस्सा लोकधातुया”ति वुत्तलोकधातुतो अज्जेसुपि चक्कवाळेसु अपरस्स बुद्धस्स अभावं दस्सेति ।

“सम्मूखा मेत”न्तिआदिना पवत्तितं अत्तनो ब्याकरणं अविपरीतत्थताय सत्थरि पसादुप्पादनेन सम्मापटिपज्जमानस्स अनुक्कमेन लोकुत्तरधम्मावहम्पि होतीति आह “धम्मस्स...पे... पटिपद”न्ति । वादस्स अनुपतनं अनुप्पवत्ति वादानुपातोति आह “वादोयेवा”ति ।

अच्छरियअब्भुतवण्णना

१६२. उदायीति नामं, महासरीरताय पन थरो महाउदायीति पज्जायित्थ, यस्स वसेन विनये निसीदनस्स दसा अनुज्जाता । पञ्चवण्णाति खुद्धिकादिभेदतो पञ्चप्पकारा । पीतिसमुद्धानेहि पणीतरूपेहि अतिव्यापितदेहो “निरन्तरं पीतिया फुटसरीरो”ति वुत्तो, ततो एवस्सा परियायतो फरणलक्खणम्पि वुत्तं । अप्प-सद्धो “अप्पकसिरेनेवा”तिआदीसु (सं० नि० १.१०१; ५.१५८; अ० नि० ७.७१) विय इध अभावत्थोति आह “अप्पिच्छताति नित्तण्हता”ति । तीहाकारेहीति यथालाभयथाबलयथासारुप्पप्पकारेहि ।

न न कथेति कथेतियेव । चीवरादिहेतुन्ति चीवरुप्पादादिहेतुभूतं पयुत्तकथं न कथेति । वेनेय्यवसेनाति विनेतब्बपुग्गलवसेन । कथेति “एवमयं विनयं उपगच्छती”ति । “सब्बाभिभू सब्बविदूहमस्मी”तिआदिका (म० नि० १.२८५; २.३४१; महाव० ११; कथा० ४०५; ध० प० ३५३) गाथापि “दसबलसमन्नागतो, भिक्खवे, तथागतो”तिआदिका (सं० नि० २.२१, २२) सुत्तन्तापि ।

१६३. अभिक्खणन्ति अभिण्हं । निग्गाथकत्ता, पुच्छनविस्सज्जनवसेन पवत्तितत्ता च “वेय्याकरण”न्ति वुत्तं । सेसं सब्बं सुविज्जेय्यं एवाति ।

सम्पसादनीयसुत्तवण्णनाय लीनत्थप्पकासना ।

६. पासादिकसुत्तवण्णना

निगण्ठनाटपुत्तकालङ्कियवण्णना

१६४. लक्खस्स सरवेधं अविरज्झित्वान विज्झनविधिं जानन्तीति वेधज्जा । तेनाह “धनुम्हि कतसिक्खा”ति । सिप्पं उग्गहणत्थायाति धनुसिप्पादिसिप्पस्स उग्गहणत्थाय । मज्झिमेन पमाणेन सरपातयोग्यतावसेन कतत्ता दीघपासादो ।

सम्पत्ति कालं कतोति अचिरकालं कतो। द्वेधिकजाताति जातद्वेधिका सज्जातभेदा। द्वेज्झजाताति दुविधभावप्पत्ता। भण्डन्ति परिभासन्ति एतेनाति **भण्डनं**, विरुद्धचित्तं। तन्ति भण्डनं। “इदं नहानादि न कत्तब्ब”न्ति पञ्चत्तवत्तं **पण्णत्ति**। **धम्मविनयन्ति** पावचनं सिद्धन्तं। **विज्झन्ता** मुखसत्तीहि। **सहितं मेति** मय्हं वचनं सहितं सिलिट्ठं पुब्बापरसम्बन्धं अत्थयुत्तं कारणयुत्तं। तेनाह “अत्थसंहित”न्ति। **अधिचिण्णन्ति** आचिण्णं। **विपरावत्तन्ति** विरोधदस्सनवसेन परावत्तितं, परावत्तं दूसितन्ति अत्थो। तेनाह “चिरकालवसेन पगुणं, तं मम वादं आगम्म निवत्त”न्ति। **परियेसमानो विचर** तत्थ गन्त्वा सिक्खाति अत्थो। **सचे सक्कोसि**, इदानियेव मया वेठितं दोसं निब्बेठेहि। **मरणमेवाति** अज्जमज्जघातनवसेन मरणमेव। नाटपुत्तस्स इमेति **नाटपुत्तिया**, ते पन तस्स सिस्साति आह “अन्तेवासिकेसू”ति। पुरिमपटिपत्तितो पटिनिवत्तनं **पटिवानं**, तं रूपं सभावो एतेसन्ति **पटिवानरूपा**। तेनाह “निवत्तनसभावा”ति। **कथनं** अत्थस्स आचिक्खनं। **पवेदनं** हेतुदाहरणानि आहरित्वा बोधनं। तेनाह “दुप्पवेदितेति दुविज्जापिते”ति। न उपसमाय संवत्ततीति **अनुपसमसंवत्तनं**, तदेव **अनुपसमसंवत्तनिकं**, तस्मिं। समुस्सितं हुत्वा पतिट्ठाहेतुभावतो **थूपं**, पतिट्ठाति आह “भिन्नथूपेति **भिन्नपतिट्ठे**”ति, **थूपो**ति वा धम्मस्स निव्यानभावो वेदितब्बो अज्जे धम्मे अभिभुय्य समुस्सितट्ठेन, सो निगण्ठस्स समये। केहिचि अभिन्नसम्मतोपि भिन्नो विनट्ठो एव सब्बेन सब्बं अभावतोति सो **भिन्नथूपो**, सो एव निव्यानभावो वट्टदुक्खतो मुच्चितुकामानं **पटिसरणं**, तमेत्थ नत्थीति **अप्पटिसरणो**, तस्मिं भिन्नथूपे अप्पटिसरणेति एवमेत्थ अत्थो वेदितब्बो।

आचरियप्पमाणन्ति आचरियमुट्ठि हुत्वा पमाणभूतं। **नानानीहारेनाति** नानाकारेन।

१६५. तथेव समुदाचरिंसु भूतपुब्बगतिया। **सामाकानन्ति** सामाकधज्ज्ञानं।

“येनस्स उपज्झायो”ति वत्त्वा यथास्स आयस्मतो चुन्दस्स धम्मभण्डागारिको उपज्झायो अहोसि, तं वित्थारेन दस्सेतुं “**बुद्धकाले किरा**”तिआदि वुत्तं। तत्थ **बुद्धकालेति** भूतकथनमेतं, न विसेसनं। सत्थु परिनिब्बानतो पुरेतरमेव हि धम्मसेनापति परिनिब्बुतो।

धम्मरतनपूजावण्णना

सद्धिविहारिकं अदासीति सद्धिविहारिकं कत्वा अदासि।

कथाय मूलन्ति भगवतो सन्निका लभितब्बधम्मकथाय कारणं। **समुट्ठापेतीति** उट्ठापेति, दालिद्वियपङ्क्तो उद्धरतीति अधिप्पायो। **सन्धमन्ति** सम्मदेव धमन्तो। एकेकस्मिं पहारेयेव तयो तयो वारे कत्वा **दिवा नववारे रत्ति नववारे**। **उपट्टानमेव गच्छति** बुद्धुपट्टानवसेन, पज्हापुच्छनादिवसेन पन अन्तरन्तरापि गच्छतेव, गच्छन्तो च **दिवसस्स...पे०...** **गच्छति**। जातुं इच्छितस्स अत्थस्स उद्धरणभावतो पज्जोव **पज्हुद्धारो**, तं गहेत्वाव **गच्छति** अत्तनो महापज्जताय, सत्थु च धम्मदेसनायं अकिलासुभावतो।

असम्मासम्बुद्धप्पवेदितधम्मविनयवण्णना

१६६. आरोचितेपि तस्मिं अत्थे। **सामिको** होति, तस्स सामिकभावं दस्सेतुं “**सोव तस्सा आदिमज्झपरियोसानं जानाती**”ति आह। एवन्ति वचनसम्पटिच्छनं। चुन्दत्थेरेन हि आनीतं कथापाभतं भगवा सम्पटिच्छन्तो “**एव**”न्ति आह। “**एव**”न्ति दुरक्खाते धम्मविनये सावकानं द्वेधिकादिभावेन विहरणकिरियापरामसनज्हेतं।

यस्मा ...पे०... पाकटं होति व्यतिरेकमुखेन च नेय्यस्स अत्थस्स विभूतभावापत्तिः। अथ वा यस्मा...पे०... पाकटं होति दोसेसु आदीनवदस्सनेन तप्पटिपक्खेसु गुणेसु आनिसंसस्स विभूतभावापत्तिः। वोक्कम्माति अपसक्केत्वा। आमेटितलोपेन चायं निद्वेसो, वोक्कम्म वोक्कम्माति वुत्तं होति, तेन तस्स वोक्कमनस्स अन्तरन्तराति अयमत्थो लब्धतीति आह “न निरन्तरं”न्तिआदि। धम्मनुधम्मपटिपत्तिआदयोति तेन सत्थारा वुत्तमुत्तिधम्मस्स अनुधम्मं अप्पटिपज्जनादयो। आदि-सद्देन पाळियं आगता असामीचिपटिपदादयो च सङ्गहन्ति। मनुस्सत्तम्पीति पि-सद्देन “विचारणपज्जाय असम्भवो, दोसेसु अनभिनिवेसिता, असन्दिद्धिपरामासिता”ति एवमादीनं सङ्गहो दट्ठब्बो। “तथा एव”न्ति पदेहि यथाक्कमं पकारस्स कामं तिरोक्खता, पच्चक्खता वुच्चति, तथापि यथा “तथा पटिपज्जतू”ति पदेन पटिपज्जनाकारो नियमेत्वा विहितो, तथा “एवं पटिपज्जतू”ति इमिनापीति इदं तस्स अत्थदस्सनभावेन वुत्तं। समादपितत्ता मिच्छापटिपदाय अपुज्जं पसवति।

१६७. जायति मुत्तिधम्मो एतेनाति जायो, तेन सत्थारा वुत्तो धम्मनुधम्मो, तं पटिपन्नोति जायप्पटिपन्नो, सो पन यस्मा तस्स मुत्तिधम्मस्स अधिगमे कारणसम्मतो, तस्मा वुत्तं “कारणप्पटिपन्नो”ति। निष्पादेस्सतीति साधेस्सति, सिद्धिं गमिस्सतीति वुत्तं होति। दुक्खनिब्बत्तकन्ति सम्पति, आयतिज्च दुक्खस्स निब्बत्तकं। वीरियं करोति मिच्छापटिपन्नत्ता।

सम्मासम्बुद्धप्पवेदितधम्मविनयादिवण्णना

१६८. निव्यातीति वत्तति, संवत्ततीति वा अत्थो।

१७०. इध सावकस्स सम्मापटिपत्तिया एकन्तिकअपस्सयदस्सनत्थं सत्थु सम्मासम्बुद्धता, धम्मस्स च स्वाक्खातता कित्तिताति “सम्मापटिपन्नस्स कुलपुत्तस्स पसंसं दस्सेत्वा”ति वुत्तं। एवज्हि इमिस्सा देसनाय संकिलेसभागियभावेन उट्ठिताय वोदानभागियभावेन यथानुसन्धिना पवत्ति दीपिता होति। अबोधितत्थाति अप्पवेदितत्था, परमत्थं चतुत्थसच्चपटिवेधं अपापिताति अत्थो। पाळियं “अस्सा”ति पदं “सावका सद्धम्मे”ति द्वीहि पदेहि योजेतब्बं “अस्स सम्मासम्बुद्धस्स सावका, अस्स सद्धम्मे”ति। सब्बसङ्गहपदेहि कतन्ति सब्बस्स सासनत्थस्स सङ्गहणनपदेहि एकज्झं कतं। तेनाह “सब्बसङ्गहिकं कतं न होतीति अत्थो”ति। पुब्बेनापरं सम्बन्धत्थभावेन सङ्गहेतव्वताय वा सङ्गहानि पदानि कतानि एतस्साति सङ्गहपदकतं, ब्रह्मचरियं। तप्पटिक्खेपेन न च सङ्गहपदकतन्ति योजना। रागादिपटिपक्खहरणं, यथानुसिद्धं वा पटिपज्जमानानं वट्टदुक्खतो पटिहरणं निब्बानपापनं पटिहारो, सो एव आ-कारस्स इ-कारं कत्वा पटिहिरो, पटिहिरो एव पाटिहिरो, सह पाटिहिरेनाति सप्पाटिहिरं, तथा सुप्पवेदितताय सप्पाटिहिरं कतन्ति सप्पाटिहिरकतं। तादिसं पन वट्टतो निव्याने नियुत्तं, निव्यानप्पयोजनज्च होतीति आह “निव्यानिक”न्ति। देवलोकतोति देवलोकतो पट्टाय रूपीदेवनिकायतो पभुति। सुप्पकासितन्ति सुट्ठु पकासितं। याव देवमनुस्सेहीति वा याव देवमनुस्सेहि यत्तका देवा मनुस्सा च, ताव ते सब्बे अभिव्यापेत्वा सुप्पकासितं। अनुतापाय होतीति अनुतप्पो, सो पन अनुतापं करोन्तो विय होतीति वुत्तं “अनुतापकरो होती”ति।

१७२. थिरोति ठितधम्मो केनचि असंहारियो, असेक्खा सीलक्खन्धादयो थेरकारका धम्मा।

१७३. योगेहि खेमत्ताति योगेहि अनुपट्टत्ता। सद्धम्मस्साति अस्स सद्धम्मस्स। अस्साति च अस्स सत्थुनो।

१७४. उपासका ब्रह्मचारिनो नाम विसेसतो अनागामिनो। सोतापन्नसकदागामिनोपि तादिसा तथा वुच्चन्तीति

“ब्रह्मचरियवासं वसमाना अरियसावका” इच्चेव वुत्तं ।

१७६. **सब्बकारणसम्पन्नन्ति** यत्तकेहि कारणेहि सम्पन्नं नाम होति, तेहि सब्बेहि कारणेहि सम्पन्नं सम्पत्तं उपगतं परिपुण्णं, समन्नागतं वा । **इममेव धम्मन्ति** इममेव सासनधम्मं ।

उदकेन पदेसञ्जुना अत्तनो पज्जावेय्यत्तियतं दस्सेतुं अनिय्यानिके अत्थे पयुत्तं पहेळिकसदिसं वचनं, भगवता अत्तनो सब्बञ्जुताय निय्यानिके अत्थे योजेत्वा दस्सेतुं “उदको सुद”न्तिआदि वुत्तन्ति तं दस्सेतुं “**सो किरा**”तिआदिमाह ।

सङ्गायितब्बधम्मादिवण्णना

१७७. **सङ्गम्म समागम्माति** तस्मिंयेव ठाने लब्धमानानं गतिवसेन सङ्गम्म ठानन्तरतो पक्कोसनेन समागतानं वसेन समागम्म । तेनाह “**सङ्गन्त्वा समागन्त्वा**”ति । **अत्थेन अत्थन्ति** पदन्तरे आगतअत्थेन सह तत्थ तत्थ आगतमत्थं । **व्यञ्जनेन व्यञ्जन्ति** एत्थापि एसेव नयो । **समानेन्तेहीति** समानं करोन्तेहि, ओपम्मं वा आनेन्तेहि । **सङ्गायितब्बन्ति** सम्मदेव गायितब्बं कथेतब्बं, तं पन सङ्गायनं वाचनामग्गाति आह “**वाचेतब्ब**”न्ति ।

१७८. **तस्स वा भासितेति** तस्स भिक्खुनो भासिते अत्थे चेव व्यञ्जने च । अत्थमिच्छागहणरोपनानि यथा होन्ति, तं दस्सेतुं “**चत्तारो सतिपट्टाना**”तिआदि वुत्तं । **आरम्मणं “सतिपट्टान”न्ति** गणहाति, न सतियेव “सतिपट्टान”न्ति । “**सतिपट्टानानी**”ति व्यञ्जनं रोपेति तस्मिं अत्थे, न “सतिपट्टाना”ति । **उपपन्नतरानीति** युत्तरानि । **अल्लीनतरानीति** सिलिट्टतरानि । **या चेवाति** लिङ्गविपल्लासेन वुत्तं, विभत्तिलोपेन वा । पुन **या चेवाति** लिङ्गविपल्लासेनेव निद्देसो । **नेव उस्सादेतब्बोति** न उक्कंसेतब्बो विरज्झित्वा वुत्तत्ता । **न अपसादेतब्बोति** न सन्तज्जेतब्बो विवादपरिहरणत्थं । **धारणत्थन्ति** उपधारणत्थं सल्लक्खणत्थं ।

१८१. **अत्थेन उपेतन्ति** अविपरीतेन अत्थेन उपेतं तं “अयमेत्थ अत्थो”ति उपेच्च पटिजानित्वा ठितं । तथारूपो च तस्स बुज्झिता नाम होतीति आह “**अत्थस्स विज्जातार**”न्ति । **एवमेतं भिक्खुं पसंसथाति** वुत्तनयेन धम्मभाणकं अमुं भिक्खुं “एवं लाभा नो आवुसो”तिआदिआकारेण पसंसथ । इदानीस्स पसंसभावं दस्सेतुं “**एसो ही**”तिआदि वुत्तं । **एसाति** परियत्तिधम्मस्स सत्थुकिच्चकरणतो, तत्थ चस्स सम्मदेव अवट्ठितभावतो “**बुद्धो नाम एसा**”ति वुत्तो । “लाभा नो”तिआदिना चस्स भिक्खूनं पियगरुभावं विभावेन्तो सत्था तं अत्तनो ठाने ठपेसीति वुत्तो ।

पच्चयानुज्जातकारणादिवण्णना

१८२. **ततोपि उत्तरितरन्ति** या पुब्बे सम्मापटिपन्नस्स भिक्खुनो पसंसनवसेन “इध पन चुन्द सत्था च होति सम्मासम्बुद्धो”तिआदिना (दी० नि० ३.१६७, १६९) पवत्तितदेसनाय उपरि “इध चुन्द सत्था च लोके उदपादी”तिआदिना (दी० नि० ३.१७०, १७१) देसना वट्ठिता । ततोपि उत्तरितरं सविसेसं देसनं वट्ठेन्तो “**पच्चयहेतू**”तिआदिमाह । तत्थ **पच्चयहेतूति** पच्चयसंवत्तनहेतु । **उप्पज्जनका आसवाति** पच्चयानं परियेसनहेतु चेव परिभोगहेतु च उप्पज्जनका कामासवादयो । तेसं दिट्ठधम्मिकानं आसवानं “इध, भिक्खवे, अरियसावको मिच्छाआजीवं पहाय सम्माआजीवेन जीवितं कप्पेती”ति (सं० नि० ५.८) “इध, भिक्खवे, भिक्खु पटिसङ्घा योनिसो चीवरं पटिसेवती”तिआदिना (म० नि० १.२३; अ० नि० ६.५८) च सम्मापटिपत्तिं उपदिसन्तो भगवा **पटिघाताय धम्मं देसेति** नाम । “यो तुम्हेसु पाळिया अत्थव्यञ्जनानि मिच्छा गणहाति, सो नेव उस्सादेतब्बो, न अपसादेतब्बो, साधुकं सज्जापेतब्बो तस्सेव अत्थस्स निसन्तिया”ति एवं

परियत्तिधम्मे मिच्छापटिपन्ने सम्मापटिपत्तियं भिक्खू नियोजेन्तो भगवा भण्डनहेतु उप्पज्जनकानं सम्परायिकानं आसवानं पटिघाताय धम्मं देसेति नाम। **यथा ते न पविसन्तीति** ते आसवा अत्तनो चित्तसन्तानं यथा न ओतरन्ति। **मूलघातेन पटिहननायाति** यथा मूलघातो होति, एवं मूलघातवसेन पजहनाय। तन्ति चीवरं। **यथा चीवरं** इदमत्थिकतमेव उपादाय अनुज्जातं, एवं **पिण्डपातादयोपि**।

सुखल्लिकानुयोगादिवण्णना

१८३. सुखितन्ति सज्जातसुखं। पीणितन्ति धातं सुहितं। तथाभूतो पन यस्मा थूलसरीरो होति, तस्मा **“थूलं करोती”**ति वुत्तं।

१८६. नठितसभावाति अनवद्धितसभावा, एवरूपाय कथाय अनवद्धानभावतो सभावोपि तेसं अनवद्धितोति अधिप्पायो। तेनाह **“जिह्वा नो अत्थी”**तिआदि। कामं **“पञ्चहि चक्खूही”**ति वुत्तं, अग्गहितग्गहणेन पन चत्तारि चक्खूनि वेदितब्बानि। सब्बज्जुतज्जाणहि समन्तचक्खूति। तस्स वा जेय्यधम्मेसु जाननवसेन पवत्ति उपादाय **“जानता”**ति वुत्तं। हत्थामलकं विय पच्चक्खतो दस्सनवसेन पवत्ति उपादाय **“पस्सता”**ति वुत्तं। **नेमं** वुच्चति थम्भादीहि अनुपविट्ठभूमिपेदेसोति आह **“गम्भीरभूमिं अनुपविट्ठो”**ति। **सुट्ठु निखातोति** भूमिं निखनित्वा सम्मदेव ठपितो। **तस्मिन्ति** खीणासवे। **अनज्झाचारो अचलो असम्पवेधी**, यस्मा अज्झाचारो सेतुघातो खीणासवानं। **सोतापन्नादयोति** एत्थ आदि-सद्देन गहितेसु अनागामिनो ताव नवसुपि ठानेसु खीणासवा विय अभब्बा, सोतापन्नसकदागामिनो पन **“ततियपच्चमद्धानेसु अभब्बा”**ति न वत्तब्बा, इतरेसु सत्तसु ठानेसु अभब्बाव।

पज्जव्याकरणवण्णना

१८७. गिहिव्यज्जनेनाति गिहिलिङ्गेन। खीणासवो पन गिहिव्यज्जनेन अरहत्तं पत्तोपि न तिद्धति विवेकद्धानस्स अभावाति अधिप्पायो। **तस्स वसेनाति** भुम्मदेवत्तभावे ठत्वा अरहत्तप्पत्तस्स वसेन। **अयं पज्जोति** **“अभब्बो सो नव ठानानि अज्झाचरितु”**न्ति अयं पज्जो **आगतो** इतरस्स पब्बज्जाय, परिनिब्बानेन वा अभब्बताय अवुत्तसिद्धत्ता। यदि एवं कथं भिक्खुगहणन्ति आह **“भिन्नदोसत्ता”**तिआदि। **अपरिच्छेदन्ति** अपरियन्तं, तयिदं सुविपुलन्ति आह **“महन्त”**न्ति। जेय्यस्स हि विपुलताय जाणस्स विपुलता वेदितब्बा, एतेन **“अपरिच्छेद”**न्ति वुच्चमानम्पि जेय्यं सत्थु जाणस्स वसेन परिच्छेदमेवाति दस्सितं होति। वुत्तज्जेतं **“जाणपरियन्तिकं नेय्य”**न्ति (महानि० ६९, १५६; चूळनि० ८५; पटि० म० ३.५) **अनागते अपज्जापनन्ति** अनागते विसये जाणस्स अपज्जापनं। **“पच्चक्खं विय कत्वा”**ति कस्मा विय-सद्गहणं कत्तं, ननु बुद्धानं सब्बम्पि जाणं अत्तनो विसयं पच्चक्खमेव कत्वा पवत्तति एकप्पमाणभावतोति? सच्चमेतं, **“अक्ख”**न्ति पन चक्खादिइन्द्रियं वुच्चति, तं अक्खं पति वत्ततीति चक्खादिनिस्सितं विज्जाणं, तस्स च आरम्भणं **“पच्चक्ख”**न्ति लोके निरुल्लहेतन्ति तं निदस्सनं कत्वा दस्सेन्तो **“पच्चक्खं विय कत्वा”**ति अवोच, न पन भगवतो जाणस्स अप्पच्चक्खाकारेन पवत्तनतो। तथा हि वदन्ति —

“आविभूतं पकासनं, अनुपट्ठुतचेतसं।

अतीतानागते जाणं, पच्चक्खानं वसिस्सती”ति॥

अज्जत्थ विहितकेनाति अज्जस्मिं विसये पवत्तितेन। **सङ्गाहेतब्बन्ति** समं कत्वा कथयितब्बं, कथनं पन पज्जापनं

नाम होतीति पञ्जापेतब्बन्ति अत्थो वुत्तो । तादिसन्ति सततं समितं पवत्तकं । जाणं नाम नत्थीति आवज्जनेन विना जाणुप्पत्तिया असम्भवतो । एकाकारेण च जाणे पवत्तमाने नानाकारस्स विसयस्स अवबोधो न सिया । अथापि सिया, अनिरुपितरूपेणैव अवबोधो सिया, तेन च जाणं जेय्यं अज्जातसदिसमेव सिया । न हि “इदं त”न्ति विवेकेन अनवबुद्धो अत्थो जातो नाम होति, तस्मा “चरतो च तिष्ठतो चा”तिआदि बाललापनमत्तं । तेनाह “यथरिव बाला अब्यत्ता, एवं मज्जन्ती”ति ।

सति अनुस्सरतीति सतानुसारि, सतियानुवत्तनवसेन पवत्तजाणं । तेनाह “पुब्बेनिवासानुस्सतिसम्पयुत्तक”न्ति । जाणं पेसेसीति जाणं पवत्तेसि । सब्बत्थकमेव जेय्यावरणस्स सुप्पहीनत्ता अप्पटिहतं अनिवारितं जाणं गच्छति पवत्तचित्तेव अत्थो । “बोधि वुच्चति चतूसु मग्गेषु जाण”न्ति (चूळनि० २११) वचनतो चतुमग्गजाणं बोधि, ततो तस्स अधिगतत्ता उप्पज्जनकं पच्चवेक्खणजाणं “बोधिजं जाणं उप्पज्जती”ति वुत्तं । बोधिजं बोधिमूले जातं चतुमग्गजाणं, तच्च खो अनागतं आरब्भ उद्दिस्स तस्स अप्पवत्तिअत्थं तथागतस्स उप्पज्जति तस्स उप्पन्नत्ता आयतिं पुनब्भवाभावतो । कथं तथागतो अनागतमद्धानं आरब्भ अतीरकं जाणदस्सनं पञ्जापेतीति? अतीतस्स पन अब्बुनो महन्तताय अतीरकं जाणदस्सनं तत्थ पञ्जापेतीति को एत्थ विरोधो । तित्थिया पन इममत्थं याथावतो अजानन्ता — “तयिदं किं सु, तयिदं कथंसू”ति अत्तनो अज्जाणमेव पाकटं करोन्ति । तस्मा भगवता ससन्ततिपरियापन्नधम्मप्पवत्तिं सन्धाय “अज्जविहितकं जाणदस्सन”न्तिआदि वुत्तं । इतरं पन सन्धाय वुच्चमाने सति तथारूपे पयोजने अनागतम्पि अब्धानं आरब्भ अतीरकमेव जाणदस्सनं पञ्जापेय्य भगवाति अनत्थसंहितन्ति अयमेत्थ अत्थोति आह “न इधलोकत्थं वा परलोकत्थं वा निस्सित”न्ति । यं पन सत्तानं अनत्थावहत्ता अनत्थसंहितं, तत्थ सेतुघातो तथागतस्स । “भारतयुद्धसीताहरणसदिस”न्ति इमिना तस्सा कथाय येभ्य्येन अभूतत्थतं दीपेति । सहेतुकन्ति आपकेन हेतुना सहेतुकं । सो पन हेतु येन निदस्सनेन साधीयति, तं तस्स कारणन्ति तेन सकारणं कत्वा । यथा हि पटिज्जातत्थसाधनतो हेतु, एवं साधकं निदस्सनन्ति । युत्तपत्तकालेयेवाति युत्तानं पत्तकाले एव । ये हि वेनेय्या तस्सा कथाय युत्ता अनुच्छविका, तेसंयेव योजने सन्धाय वा कथाय पत्तो उपकारावहो कालो, तदा एव कथेतीति अत्थो ।

१८८. “तथा तथेव गदनतो”ति इमिना “तथागतो”ति आमेटितलोपेनायं निद्वेसोति दस्सेति । तथा तथेवाति च धम्मअत्थसभावानुरूपं, वेनेय्यज्झासयानुरूपज्वाति अधिप्पायो । दिट्ठन्ति रूपायतनं दट्ठब्बतो, तेन यं दिट्ठं, यं दिस्सति, यं दक्खति, यं सति समवाये पस्सेय्यं, तं सब्बं “दिट्ठं” त्वेव गहितं कालविसेसस्स अनामट्ठभावतो । “सुत”न्तिआदीसुपि एसेव नयो । सुतन्ति सद्दायतनं सोतब्बतो । मुतन्ति सनिस्सयेन घानादिइन्द्रियेन सयं पत्वा पापुणित्वा गहेतब्बं । तेनाह “पत्वा गहेतब्बतो”ति । विज्जातन्ति विजानितब्बं, तं पन दिट्ठादिविनिमुत्तं विज्जेय्यन्ति आह “सुखदुक्खादिधम्मायतन”न्ति । पत्तन्ति यथा तथा पत्तं, हत्थगतं अधिगतन्ति अत्थो । तेनाह “परियेसित्वा वा अपरियेसित्वा वा”ति । परियेसितन्ति पत्तियामत्थं परियिट्ठं, तं पन पत्तं वा सिया अप्पत्तं वा उभयथापि परियेसितमेवाति आह “पत्तं वा अप्पत्तं वा”ति । पदद्वयेनापि द्विप्पकारम्पि पत्तं, द्विप्पकारम्पि परियेसितं, तेन तेन पकारेण तथागतेन अभिसम्बुद्धन्ति दस्सेति । चित्तेन अनुसज्जरितन्ति चोपनं अपापेत्वा चित्तेनेव अनुसंचरितं, परिवितक्कितन्ति अत्थो । पीतकन्ति आदीति आदि-सद्देन लोहितकओदातादि सब्बं रूपारम्माणविभागं सङ्गणहाति । सुमनोति रागवसेन, लोभवसेन, सद्वादिवसेन वा सुमनो । दुम्मनोति ब्यापादवितक्कवसेन, विहिंसावितक्कवसेन वा दुम्मनो । मज्झत्तोति अज्जाणवसेन वा जाणवसेन वा मज्झत्तो । एसेव नयो सब्बत्थ । तत्थ तत्थ आदि-सद्देन सङ्खसद्दो पणवसद्दो, पत्तगन्धो पुप्फगन्धो, पत्तरसो फलरसो, उपादिन्नं अनुपादिन्नं, मज्झत्तवेदना कुसलकम्मं अकुसलकम्मन्ति एवं आदीनं सङ्गहो दट्ठब्बो ।

अप्पत्तन्ति जाणेन असम्पत्तं, अविदितन्ति अत्थो। तेनाह “जाणेन असच्छिकत”न्ति। तथेव गतत्ताति तथेव जातत्ता अभिसम्बुद्धत्ता। गत-सदेन एकत्थं बुद्धि अत्थन्ति अत्थो। “गति अत्था हि धातवो बुद्धि अत्था भवन्ती”ति अक्खरचिन्तका।

अव्याकतद्वानादिवण्णना

१८९. “असमतं कथेत्वा”ति वत्त्वा समोपि नाम कोचि नत्थि, कुतो उत्तरितरोति दस्सेतुं “अनुत्तरत”न्ति वुत्तं। सा पनायं असमता, अनुत्तरता च सब्बञ्जुतं पूरेत्वा ठिताति दस्सेतुं “सब्बञ्जुत”न्ति वुत्तं। सा सब्बञ्जुता सद्धम्मवरचक्कवत्तिभावेन लोके पाकटा जाताति दस्सेतुं “धम्मराजभावं कथेत्वा”ति वुत्तं। तथा सब्बञ्जुभावेन च सत्था इमेसु दिट्ठिगतविपल्लासेसु एवं पटिपज्जतीति दस्सेन्तो “इदानी”ति आदिमाह। तत्थ सीहनादन्ति अभीतनादं सेट्टुनादं। सेट्टुनादो हेस, यदिदं ठपनीयस्स पज्जहस्स ठपनीयभावदस्सनं। ठपनीयता चस्स पाळिआरुळ्हा एव “न हेत”न्ति आदिना। यथा उपचितकम्मकिलेसेन इत्थत्तं आगन्तब्बं, तथा नं आगतोति तथागतो, सत्तो। तथा हि सो रूपादीसु सत्तो विसत्तोति कत्वा “सत्तो”ति च वुच्चति। इत्थत्तन्ति च पटिलद्धत्ता तथा पच्चक्खभूतो अत्तभावोति वेदितब्बो।

“अत्थसंहितं न होती”ति इमिना उभयत्थ विधुरतादस्सनेन निरत्थकविप्पलापतं तस्स वादस्स विभावेति, उभयलोकत्थविधुरम्पि समानं “किं नु खो विवट्टनिस्सित”न्ति कोचि आसङ्केय्याति तदासङ्कानिवत्तनत्थं “न च धम्मसंहित”न्ति वुत्तं। तेनाह “नवलोकुत्तरधम्मनिस्सितं न होती”ति। यदिपि तं न विवट्टोगतं होति, विवट्टस्स पन अधिद्वानभूतं नु खोति कोचि आसङ्केय्याति तदासङ्कानिवत्तनत्थं “न आदिब्रह्मचरियक”न्ति आदि वुत्तं।

१९०. कामं तण्हापि दुक्खसभावत्ता “दुक्ख”न्ति व्याकातब्बा, पभवभावेन पन सा ततो विसुं कातब्बाति “तण्हं ठपेत्वा”ति वुत्तं। तेनाह “तस्सेव दुक्खस्स पभाविका”ति आदि। ननु च अविज्जादयोपि दुक्खस्स समुदयोति? सच्चं समुदयो, तस्सा पन कम्मस्स विचित्तभावहेतुतो, दुक्खुप्पादने विसेसपच्चयभावतो च सातिसयो समुदयद्वोति सा एव सुत्तेसु तथा वुत्ता। तेनाह “तण्हा दुक्खसमुदयोति व्याकत”न्ति। उभिन्नं अप्पवत्तीति दुक्खसमुदयानं अप्पवत्तिनिमित्तं। “दुक्खपरिजाननो”ति आदि मग्गकिच्चदस्सनं, तेन मग्गस्स भावनत्थोपि अत्थतो दस्सितोवाति दट्टब्बं। न हि भावनाभिसमयेन विना परिज्वाभिसमयादयो सम्भवन्तीति। सच्चववत्थापनं अप्पमादपटिपत्तिभावतो असम्मोहकल्याणकित्तिसद्वादिनिमित्तताय यथा सातिसयं इधलोकत्थावहं, एवं याव जाणस्स तिक्खविसदभावप्पत्तिया अभावेन नवलोकुत्तरधम्मसम्पापकं न होति, ताव तत्थ तत्थ सम्पत्तिभवे अब्भुदयसम्पत्ति अनुगतमेव सियाति वुत्तं “एतं इधलोकपरलोकत्थनिस्सित”न्ति। नवलोकुत्तरधम्मनिस्सितन्ति नवविधम्पि लोकुत्तरधम्मं निस्साय पवत्तं तदधिगमूपायभावतो। यस्मा सच्चसम्बोधं उद्दिस्स सासनब्रह्मचरियं वुस्सति, न अज्जदत्थं, तस्मा एतं सच्चववत्थापनं “आदिपधान”न्ति वुत्तं पठमतं चित्ते आदातब्बतो।

पुब्बन्तसहगतदिट्ठिनिस्सयवण्णना

१९१. तं मया व्याकतमेवाति तं मया तथा व्याकतमेव, व्याकातब्बं नाम मया अव्याकतं नत्थीति व्याकरणावेकल्लेन अत्तनो धम्मसुधम्मताय बुद्धसुबुद्धतं विभावेति। तेनाह “सीहनादं नदन्तो”ति। पुरिमुप्पन्ना दिट्ठियो अपरापरुप्पन्नानं दिट्ठिनं अवस्सया होन्तीति “दिट्ठियोव दिट्ठिनिस्सया”ति वुत्तं। दिट्ठिगतिकाति दिट्ठिगतियो, दिट्ठिप्पवत्तियोति अत्थो। इदमेव दस्सनं सच्चन्ति “सस्सतो अत्ता च लोको चा”ति इदमेव दस्सनं सच्चं अमोघं

अविपरीतं । अज्जेसं वचनं मोघन्ति “असस्सतो अत्ता च लोको चा”ति एवमादिकं अज्जेसं समणब्राह्मणानं वचनं मोघं तुच्छं, मिच्छाति अत्थो । न सयं कातब्बोति असयंकारोति आह “असयंकतो”ति, यादिच्छिकत्ताति अधिप्पायो ।

१९२. अत्थि खोति एत्थ खो-सदो पुच्छायं, अत्थि नूति अयमेत्थ अत्थोति आह “अत्थि खो इदं आवुसो वुच्चती”तिआदि । आवुसो यं तुम्हेहि “सस्सतो अत्ता च लोको चा”ति वुच्चति, इदमत्थि खो इदं वाचामत्तं, नो नत्थि, तस्मा वाचावत्थुमत्ततो तस्स यं खो ते एवमाहंसु “इदमेव सच्चं मोघं अज्ज”न्ति, तं तेसं नानुजानामीति एवमेत्थ अत्थो च योजना च वेदितब्बा । यं पनेत्थ वत्तब्बं, तं ब्रह्मजालटीकायं (दी० नि० टी० १.३०) वुत्तमेव । दिट्ठिपज्जत्तियाति दिट्ठिया पज्जापने “एवं एसा दिट्ठि उप्पन्ना”ति तस्सा दिट्ठिया समुदयतो, अत्थङ्गमतो, अस्सादतो, आदीनवतो, निस्सरणतो च याथावतो पज्जापने । अविपरीतवुत्तिया समेन जाणेन समं कज्चि नेव समनुपस्सामि । अधिपज्जत्तीति अभिज्जेय्यधम्मपज्जापना । यं अजानन्ता बाहिरका दिट्ठिपज्जत्तियेव अल्लीनाति तज्च पज्जत्तितो अजानन्ता थामसा परामासा अभिनिविस्स वोहरन्ति । एत्थ च यायं “दिट्ठिपज्जत्ति नामा”ति वुत्ता दिट्ठिया दिट्ठिगतिकेहि एवं गहितताय विभावना, तत्थ च भगवतो उत्तरितरो नाम कोचि नत्थि, स्वायमत्थो ब्रह्मजाले (दी० नि० अट्ठ० १.३०) विभावितो एव । “अधिपज्जत्ती”ति वुत्ता पन विभावियमाना लोकस्स निब्बिदाहेतुभावेन बहुलीकाराति तस्सा वसेन भगवा अनुत्तरभावं पवेदेन्तो ‘नेव अत्तना समसमं समनुपस्सामी’ति सीहनादं नदी’ति केचि । अट्ठकथायं (दी० नि० अट्ठ० ३.१९२) पन “यज्च वुत्तं ‘पज्जत्तिया’ति यज्च ‘अधिपज्जत्ती’ति, उभयमेतं अत्थतो एक”न्ति “इध पन पज्जत्तियाति एत्थापि पज्जत्ति चेव अधिपज्जत्ति च अधिप्पेता, अधिपज्जत्तीति एत्थापी”ति च वुत्ता, उभयस्सपि वसेनेत्थ भगवा सीहनादं नदीति विज्जायति । उभयं पेतं अत्थतो एकन्ति च पज्जत्तिभावसामज्जं सन्धाय वुत्तं, न भेदाभावतो । तेनाह “भेदतो ही”तिआदि । खन्धपज्जत्तीति खन्धानं “खन्धा”ति पज्जापना दस्सना पकासना ठपना निक्खिपना । “आचिक्खति दस्सेति पज्जापेति पट्टपेती”ति (सं० नि० २.२०, ९७) आगतट्ठाने हि पज्जापना दस्सना पकासना पज्जत्ति नाम, “सुपज्जत्तं मज्जपीठ”न्ति (पारा० २६९) आगतट्ठाने ठपना निक्खिपना पज्जत्ति नाम, इध उभयम्पि युज्जति ।

दिट्ठिनिस्सयप्पहानवण्णना

१९६. पजहनत्थन्ति अच्चन्ताय पटिनिस्सज्जनत्थं । यस्मा तेन पजहनेन सब्बे दिट्ठिनिस्सया सम्मदेव अतिक्कन्ता होन्ति वीतिक्कन्ता, तस्मा “समतिक्कमायाति तस्सेव वेवचन”न्ति अवोच । न केवलं सतिपट्ठाना कथितमत्ता, अथ खो वेनेय्यसन्ताने पतिट्ठापिताति दस्सेतुं “देसिता”ति वत्वा “पज्जत्ता”ति वुत्तन्ति आह “देसिताति कथिता । पज्जत्ताति ठपिता”ति । इदानीं सतिपट्ठानदेसनाय दिट्ठिनिस्सयानं एकन्तिकं पहानावहभावं दस्सेतुं “सतिपट्ठानभावनाय ही”तिआदि वुत्तं । तत्थ सतिपट्ठानभावनायाति इमिना तेसं भावनाय एव नेसं पहानं, देसना पन तदुपनिस्सयभावतो तथा वुत्ताति दस्सेति । सेसं सब्बं सुविज्जेय्यमेवाति ।

पासादिकसुत्तवण्णनाय लीनत्थप्पकासना ।

७. लक्खणसुत्तवण्णना

द्वत्तिसमहापुरिसलक्खणवण्णना

१९९. अभिनीहारादिगुणमहत्तेन महन्तो पुरिसोति महापुरिसो, सो लक्खीयति एतेहीति महापुरिसलक्खणानि । तं

महापुरिसं व्यञ्जयन्ति पकासेन्तीति महापुरिसव्यञ्जनानि । महापुरिसो निमीयति अनुमीयति एतेहीति महापुरिसनिमित्तानि । तेनाह “अयं...पे०... कारणानी”ति ।

२००. धारेन्तीति लक्खणपाठं धारेन्ति, तेन लक्खणानि ते सरूपतो जानन्ति, न पन समुद्धानतोति दस्सेति । तेनाह “नो च खो”तिआदि, तेन अनञ्जसाधारणमेतं, यदिदं महापुरिसलक्खणानं कारणविभावनन्ति दस्सेति । कस्मा आहाति यथावुत्तस्स सुत्तस्स समुद्धानकारणं पुच्छति, आचरियो “अट्ठप्पत्तिया अनुरूपत्ता”ति वत्वा तमेवस्स अट्ठप्पत्तिं वित्थारतो दस्सेतुं “सा पना”तिआदिमाह । सब्बपालिफुल्लोति सब्बसो समन्ततो विकसितपुप्फो । विकसनमेव हि पुप्फस्स निष्फत्ति । पारिच्छत्तको वियाति अनुस्सवलद्धमत्तं गहेत्वा वदन्ति । उप्पज्जतीति लब्धति, निब्बत्ततीति अत्थो ।

येन कम्मेनाति येन कुसलकम्मुना । यं निब्बत्तन्ति यं यं लक्खणं निब्बत्तं । दस्सनत्थन्ति तस्स तस्स कुसलकम्मस्स सरूपतो, किच्चतो, पवत्तिआकारविसेसतो, पच्चयतो, फलविसेसतो च दस्सनत्थं, एतेनेव पटिपाटिया उद्दिट्ठानं लक्खणानं असमुद्देसकारणविभावनाय कारणं दीपितं होति समानकारणानं लक्खणानं एकज्झं कारणदस्सनवसेनस्स पवत्तत्ता । एवमाहाति “बाहिरकापि इसयो धारेन्ती”तिआदिना इमिना इमिना पकारेन आह ।

सुप्पतिट्ठितपादतालक्खणवण्णना

२०१. “पुरिमं जातिन्ति पुरिमायं जातियं, भुम्मत्थे एतं उपयोगवचनं”न्ति वदन्ति । “पुब्बे निवुत्थक्खन्धसन्ताने ठितो”ति वचनतो अच्चन्तसंयोगे वा उपयोगवचनं । यत्थ यत्थ हि जातियं महासत्तो पुञ्जकम्मं कातुं आरभति, आरभतो पट्टाय अच्चन्तमेव तत्थ पुञ्जकम्मप्पसुतो होति । तेनाह “दब्बहसमादानो”तिआदि । सेसपदद्वयेपि एसेव नयो । निवुत्थक्खन्धा “जाती”ति वुत्ता खन्धविनिमुत्ताय जातिया अभावतो, निब्बत्तिलक्खणस्स च विकारस्स इध अनुपयुज्जनतो । जातवसेनाति जायनवसेन । “तथा”ति इमिना “पुब्बे निवुत्थक्खन्धा”ति इमं पदं उपसंहरति । भवनवसेनाति पच्चयतो निब्बत्तनवसेन । निवुत्थवसेनाति निवुत्तिततावसेन । आलयट्ठेनाति आवसितभावेन । निवासत्थो हि निकेतत्थो ।

तत्थाति देवलोकादिम्हि । आदि-सद्देन एकच्चं तिरच्छानयोनिं सङ्गण्हाति । न सुकरन्ति देवगतिया एकन्तसुखताय, दुग्गतिया एकन्तदुक्खताय, दुक्खबहुलताय च पुञ्जकिरियाय ओकासो न सुलभरूपो पच्चयसमवायस्स दुल्लभभावतो, उप्पज्जमाना च सा उळारा, विपुला च न होतीति गतिवसेनापि खेतविसेसता इच्छितब्बा “तिरच्छानगते दानं दत्वा सतगुणा दक्खिणा पाटिकङ्घितब्बा, पुथुज्जनदुस्सीले दानं दत्वा सहस्सगुणा दक्खिणा पाटिकङ्घितब्बा”ति (म० नि० ३.३७९) वचनतो । मनुस्सगतिया पन सुखबहुलताय पुञ्जकिरियाय ओकासो सुलभरूपो पच्चयसमवायस्स च येभ्य्येन सुलभभावतो । यच्च तत्थ दुक्खं उप्पज्जति, तम्पि विसेसतो पुञ्जकिरियाय उपनिस्सयो होति, दुक्खूपनिसा सद्भाति । यथा हि अयोधनेन सत्थके निष्फादियमाने तस्स एकन्ततो अग्गिम्हि तापनं, उदकेन वा तेमनं छेदनकिरियासमत्थताय न विसेसपच्चयो, तापेत्वा पन समानयोगतो उदकतेमनं तस्सा विसेसपच्चयो, एवमेव सत्तसन्तानस्स एकन्तदुक्खसमङ्गिता दुक्खबहुलता एकन्तसुखसमङ्गिता सुखबहुलता च पुञ्जकिरियासमत्थताय न विसेसपच्चयो, सति पन समानयोगतो दुक्खसन्तापने, सुखुमब्रूहने च लद्धूपनिस्सया पुञ्जकिरिया समत्थताय सम्भवति, तथा सति उप्पज्जमाना पुञ्जकिरिया महाजुतिका महाविप्फारा पटिपक्खच्छेदनसमत्था होति । तस्मा मनुस्सभावो पुञ्जकिरियाय विसेसपच्चयो । तेन वुत्तं “तत्थ न सुकरं, मनुस्सभूतस्सेव सुकर”न्ति ।

अथ “मनुस्सभूतस्सा”ति एत्थ को वचनत्थो? “मनस्स उस्सन्नताय मनुस्साति,
सूरभावसतिमन्तताब्रह्मचरिययोग्यतादिगुणवसेन उपचितमनका उक्कट्टगुणचित्ताति अत्थो। के पन ते? जम्बुदीपवासिनो
सत्तविसेसा। तेनाह भगवा —

‘तीहि, भिक्खवे, ठानेहि जम्बुदीपका मनुस्सा उत्तरकुरुके च मनुस्से अधिगणहन्ति देवे च तावत्तिंसे।
कतमेहि तीहि? सूरा सतिमन्तो इध ब्रह्मचरियवासो’ति (अ० नि० ९.२१; कथा० २७१)।

तथा हि बुद्धा भगवन्तो, पच्चेकबुद्धा, अगगसावका, महासावका, चक्कवत्तिनो, अज्जे च महानुभावा सत्ता तत्थेव
उप्पज्जन्ति। ते हि समानरूपादिताय पन सद्धिं परित्तदीपवासीहि इतरमहादीपवासिनोपि मनुस्सा त्वेव पज्जायिंसू’ति
केचि। अपरे पन भणन्ति “लोभादीहि, अलोभादीहि च सहितस्स मनस्स उस्सन्नताय मनुस्सा। ये हि सत्ता
मनुस्सजातिका, तेसु विसेसतो लोभादयो, अलोभादयो च उस्सन्ना, ते लोभादिउस्सन्नताय अपायमग्गं,
अलोभादिउस्सन्नताय सुगतिमग्गं, निब्बानगामिमग्गञ्च परिपूरेन्ति, तस्मा लोभादीहि, अलोभादीहि च सहितस्स मनस्स
उस्सन्नताय परित्तदीपवासीहि सद्धिं चतुदीपवासिनो सत्तविसेसा मनुस्साति वुच्चन्ती’ति। लोकिया पन “मनुनो
अपच्चभावेन मनुस्सा”ति वदन्ति। मनु नाम पठमकप्पिको लोकमरियादाय आदिभूतो सत्तानं हिताहितविधायको
कत्तब्बाकत्तब्बतासु नियोजनतावसेन पितुड्डानियो, यो सासने “महासम्मतो”ति वुच्चति अम्हाकं महाबोधिसत्तो,
पच्चक्खतो, परम्परा च तस्स ओवादानुसासनियं ठिता सत्ता पुत्तसदिसताय “मनुस्सा, मानुसा”ति च वुच्चन्ति। ततो एव
हि ते “मानवा, मनुजा”ति च वोहरीयन्ति। मनुस्सभूतस्साति मनुस्सेसु भूतस्स जातस्स, मनुस्सभावं वा पत्तस्साति अत्थो।
अयञ्च नयो लोकियमहाजनस्स वसेन वुत्तो। महाबोधिसत्तानं पन सन्तानस्स महाभिनीहारतो पट्टाय कुसलधम्मपटिपत्तियं
सम्मदेव अभिसङ्खत्ता तेसं सुगतियं, अत्तनो उप्पज्जनदुग्गतियञ्च निब्बत्तानं कुसलकम्मं गरुतरमेवाति दस्सेतुं
“अकारणं वा एत”न्तिआदि वुत्तं।

एवरूपे अत्तभावेति हत्थिआदिअत्तभावे। ठितेन कतकम्मं न सक्का सुखेन दीपेतुं लोके अप्पज्जातरूपत्ता।
सुखेन दीपेतुं “असुकस्मिं देसे असुकस्मिं नगरे असुको नाम राजा, ब्राह्मणो हुत्वा इमं कुसलकम्मं अकासी”ति एवं
सुविज्जापयभावतो। थिरग्गहणोति असिथिलग्गाही थामप्पत्तग्गहणो। निच्चलग्गहणोति अचञ्चलग्गाही तत्थ केनचिपि
असंहारियो। पटिकुटतीति संकुटति, जिगुच्छनवसेन विवट्टति वा। पसारियतीति वित्थतं होति वेपुल्लं पापुणाति।

तवेसो महासमुद्दसदिसोति एसो उदकोधो तेव महासमुद्दसदिसो।

दीयति एतेनाति दानं, परिच्चागचेतना। दिव्यनवसेनाति देव्यधम्मस्स परियत्तं कत्वा परिच्चजनवसेन दानं।
संविभागकरणवसेनाति तस्सेव अत्तना सद्धिं परस्स संविभजनवसेन संविभागो, तथापवत्ता चेतना। सीलसमादानेति
सीलस्स सम्मदेव आदाने, गहणे पवत्तनेति अत्थो। तं पवत्तिकालेन दस्सेन्तो “पूरणकाले”ति आह। मातु हितो मत्तेय्यो,
यस्स पन धम्मस्स वसेन सो “मत्तेय्यो”ति वुच्चति, सो मत्तेय्यताति आह “मातु कातब्बवत्ते”ति। एसेव नयो
“पेत्तेय्यताया”तिआदीसु। अज्जतरज्जतरेसूति अज्जमज्जविसिद्धेसु अज्जेसु, ते पन कुसलभावेन वुत्ता कुसलाति आह
“एवरूपेसू”ति। अधिकुसलेसूति अभिविसिद्धेसु कुसलेसु, सा पन अभिविसिद्धता उपादायुपादाय होति। यं पनेत्थ
उक्कंसगतं अधिकुसलं, तदुक्कंसनयेन इधाधिप्येत्तन्ति तं दस्सेतुं “अत्थि कुसला, अत्थि अधिकुसला”तिआदि वुत्तं।
ननु पज्जापारमिसङ्गहजाणसम्भारभूता कुसला धम्मा निप्परियायेन सब्बज्जुतज्जाणपटिलाभपच्चया कुसला नाम, इमे पन
महापुरिसलक्खणनिब्बत्तका पुज्जसम्भारभूता कस्मा तथा वुत्ताति? सब्बेसम्पि महाबोधिसत्तसन्तानगतानं पारमिधम्मानं

सब्वञ्जुतञ्जाणपटिलाभपच्चयभावतो । महाभिनीहारतो पट्टाय हि महापुरिसो यं किञ्चि पुञ्जं करोति, सब्बं तं सम्मासम्बोधिसमधिगमायेव परिणामेति । तथा हि ससम्भाराब्बासो, दीघकालाब्बासो, निरन्तराब्बासो, सक्कच्चाब्बासोति चत्तारो अब्बासा चतुरधिट्ठानपरिपूरितसम्बन्धा अनुपुब्बेन महाबोधिट्ठाना सम्पज्जन्ति ।

सकिम्पीति पि-सद्देन अनेकवारमि कतं विजातियेन अन्तरितं सङ्गहति । **अभिण्हकरणेनाति** बहुलीकारेन । **उपचितन्ति** उपरूपरि वड्ढितं । **पिण्डीकतन्ति** पिण्डसो कतं । **रासीकतन्ति** रासिभावेन कतं । अनेकक्खत्तुहि पवत्तियमानं कुसलकम्मं सन्ताने तथालब्धपरिभावनं पिण्डीभूतं विय, रासीभूतं विय च होति । विपाकं पति संहच्चकारिभावत्ता **चक्कवाळं अतिसम्बाधं भवगं अतिनीचं**, सचे पने तं रूपं सियाति अधिप्पायो । **विपुलत्ताति** महन्तत्ता । यस्मा पन तं कम्मं मेत्ताकरुणासतिसम्पज्जञ्हाहि परिग्गहितताय दुरसमुस्सारितं पमाणकरणधम्मन्ति पमाणरहितताय “अप्पमाण”न्ति वत्तब्बतं अरहति, तस्मा “अप्पमाणत्ता”ति वुत्तं ।

अधिभवतीति फलस्स उल्लारभावेन अभिभुय्य तिड्ढति । अत्थतो पणीतपणीतानं भोगानं पटिलाभो एवाति आह “अतिरेकं लभती”ति । **अधिगच्छतीति** विन्दति, निब्बत्तमानोव तेन समन्नागतो होतीति अत्थो । एकदेसेन अफुसित्वा सब्बप्पदेसेहि फुसनतो सब्बप्पदेसेहि फुसन्तियो एतेसं पादतलानं सन्तीति “सब्बावन्तेहि पादतलेही”ति वुत्तं । यथा निक्खिपने सब्बे पादतलप्पदेसा संहच्चकारिनो अनिन्नताय समभावतो, एवं उद्धरणेपीति वुत्तं “समं फुसति, समं उद्धरती”ति । इदानि इमस्स महापुरिसलक्खणस्स समधिगमेन लब्धनिस्सन्दफलविभावनमुखेन आनुभावं विभावेतुं “सचेपि ही”तिआदि वुत्तं । तत्थ नरकन्ति आवाटं । **अन्तो पविसति** समभावापत्तिया । “चक्कलक्खणेन पतिट्ठातब्बट्ठान”न्ति इदं यं भूमिप्पदेसं पादतलं फुसति, तत्थ चक्कलक्खणमि फुसनवसेन पतिट्ठातीति कत्वा वुत्तं । तस्स पन तथा पतिट्ठानं सुप्पतिट्ठितपादताय एवाति सुप्पतिट्ठितपादताय आनुभावकित्तने “लक्खणन्तरानयनं किमत्थिय”न्ति न चिन्तेतब्बं । **सीलतेजेनाति** सीलप्पभावेन । **पुञ्जतेजेनाति** कुसलप्पभावेन । **धम्मतेजेनाति** जाणप्पभावेन । तीहिपि पदेहि भगवतो बुद्धभूतस्स धम्मा गहिता, “दसन्नं पारमीन”न्ति इमिना बुद्धकरधम्मा गहिता ।

२०२. महासमुद्दोव सीमा सब्बभूमिस्सरभावतो । “अखिलमनिमित्तमकण्टक”न्ति तीहिपि पदेहि थेय्याभावोव वुत्तोति आह “निच्चोर”न्तिआदि । **खरसम्फस्सट्ठेनाति** घट्टेनेन दुक्खसम्फस्सभावेन खिलाति । **उपद्दवपच्चयट्ठेनाति** अनत्थहेतुताय निमित्ताति । “अखिल”न्तिआदिना एकचारीहि चोराभावो वुत्तो, “निरब्बुद”न्ति इमिना पन गणबन्धवसेन विचरणचोराभावो वुत्तोति दस्सेतुं “गुम्बं गुम्बं हुत्वा”तिआदि वुत्तं । **अविक्खम्भनीयोति** न विबन्धनीयो केनचि अप्पटिबाहनीयो ठानतो अनिक्कट्ठनीयो । पटिपक्खं अनिट्ठं अत्थेतीति **पच्चत्थिको**, एतेन पाकटभावेन विरोधं अकरोन्तो वेरिपुग्गलो वुत्तो । पटिविरुद्धो अमित्तो **पच्चामित्तो**, एतेन पाकटभावेन विरोधं करोन्तो वेरिपुग्गलो वुत्तो । **विक्खम्भेतुं नासक्खिंसु**, अज्जदत्थु सयमेव विघातव्यसनं पापुणिसु चैव सावकत्तञ्च पवेदेसुं ।

“कम्म”न्तिआदीसु **कम्मं नाम** बुद्धभावं उद्दिस्स कतूपचितो लक्खणसंवत्तनियो पुञ्जसम्भारो । तेनाह “सतसहस्सकप्पाधिकानी”तिआदि । **कम्मसरिक्खकं नाम** तस्सेव पुञ्जसम्भारस्स करणकाले केनचि अकम्पनीयस्स दळ्हावत्थितभावस्स अनुच्छविको सुप्पतिट्ठितपादतासङ्घातस्स लक्खणस्स परेहि अविक्खम्भनीयताय आपकनिमित्तभावो, स्वायं निमित्तभावो तस्सेव लक्खणस्साति अट्ठकथायं “कम्मसरिक्खकं नाम... पे०... महापुरिसलक्खण”न्ति वुत्तं । ठानगमनेसु पादानं दळ्हावत्थितभावो **लक्खणं नाम** । पादानं भूमियं समं निक्खिपनं, पादतलानं सब्बभागेहि फुसनं, सममेव उद्धरणं, तस्मा सुट्ठु समं सब्बभागेहि पतिट्ठिता पादा एतस्साति **सुप्पतिट्ठितपादो**,

तस्स भावो सुप्पतिट्ठितपादताति वुच्चति लक्खणं । सुट्ठु समं भूमिया फुसनेनेव हि नेसं तत्थ दळ्हावत्थितभावो सिद्धो, यं “कम्मसरिक्खक”न्ति वुत्तं । **लक्खणानिसंसो**ति लक्खणपटिलाभस्स उद्रयो, लक्खणसंवत्तनियस्स कम्मस्स आनिसंसफलन्ति अत्थो । निस्सन्दफलं पन हेट्ठा भावितमेव ।

२०३. कम्मादिभेदेति कम्मकम्मसरिक्खकलक्खण लक्खणानिसंसविसज्जिते विभागे । **गाथाबन्धं सन्धाय वुत्तं**, अत्थो पन अपुब्बं नत्थीति अधिप्पायो । **पोराणकत्थेरा**ति अट्ठकथाचरिया । **वण्णनागाथा**ति थोमनागाथा वुत्तमेवत्थं गहेत्वा थोमनावसेन पवत्तत्ता । **अपरभागे थेरा** नाम पाळिं, अट्ठकथञ्च पोत्थकारोपनवसेन समागता महाथेरा, ये साट्ठकथं पिटकत्तयं पोत्थकारुळ्हं कत्वा सद्धम्मं अद्धनियचिरट्ठितिकं अकंसु । **एकपदिको**ति “**दळ्हसमादानो अहोसी**”ति आदिपाठे एकेकपदगाही । **अत्थुद्धारो**ति तदत्थस्स सुखग्गहणत्थं गाथाबन्धवसेन उद्धरणतो अत्थुद्धारभूतो, तयिदं पाळियं आगतपदानि गहेत्वा गाथाबन्धवसेन तदत्थविचारणभावदस्सनं, न पन धम्मभण्डागारिकेन ठपितभावपटिक्खपनन्ति दट्ठब्बं ।

कुसलधम्मानं वचीसच्चस्स बहुकारतं, तप्पटिपक्खस्स च मुसावादस्स महासावज्जतं दस्सेतुं अनन्तरमेव कुसलकम्मपथधम्मे वदन्तोपि ततो वचीसच्चं नीहरित्वा कथेति **सच्चे**ति वा सन्निधानेव “धम्मे”ति वुच्चमाना कुसलकम्मपथधम्मा एव युत्ताति वुत्तं “**धम्मेति दसकुसलकम्मपथधम्मे**”ति । गोबलीबद्दजायेन वा एत्थ अत्थो वेदितब्बो । **इन्द्रियदमने**ति इन्द्रियसंवरे । कुसलकम्मपथग्गहणेनस्स वारित्तसीलमेव गहितन्ति इतरम्पि सङ्गहेत्वा दस्सेतुं संयमस्सेव गहणं कतन्ति “**संयमेति सीलसंयमे**”ति वुत्तं । **सुचि** वुच्चति पुगलो यस्स धम्मस्स वसेन, तं **सोचेय्यं**, कायसुचरितादि । एतस्सेव हि विभागस्स दस्सनत्थं वुत्तम्पि चेतं पुन वुत्तं, मनोसोचेय्यग्गहणेन वा झानादिउत्तरिमानुस्सधम्मानम्पि सङ्गहणत्थं **सोचेय्यग्गहणं** । **आलयभूतन्ति** समथविपस्सनानं अधिट्ठानभूतं । **उपोसथकम्मन्ति** उपोसथदिवसे समादियित्वा समाचरितब्बं पुज्जकम्मं **उपोसथो** सहचरणजायेन । “**अविहिंसायाति** सत्तानं अविहेठनाया”ति वदन्ति, तं पन सीलग्गहणेनेव गहितं । तस्मा **अविहिंसायाति** करुणायाति अत्थो । **अविहिंसाग्गहणेनेव** चेत्य अप्पमज्जासामज्जेन चत्तारोपि ब्रह्मविहारा उपचारावत्था गहिता लक्खणहारनयेन । **सकलन्ति** अनवसेसं परिपुण्णं । एवमेत्थ कामावचरत्तभावपरियापन्नत्ता लक्खणस्स तंसंवत्तनिककामावचरकुसलधम्मा एव पारमितासङ्गहपुज्जसम्भारभूतकायसुचरितादीहि द्वादसधा विभत्ता एव । गाथायं “**सच्चे**”ति आदिना दसधा सङ्गह दस्सिता । एस नयो सेसलक्खणेपि ।

अनुभीति गाथासुखत्थं अकारं सानुनासिकं कत्वा वुत्तं । व्यञ्जनानि लक्खणानि आचिक्खन्तीति **वेयज्जनिका** । **विक्खम्भेतब्बन्ति** पटिबाहितब्बं **तस्सा**ति महापुरिसस्स, **तस्स** वा महापुरिसलक्खणस्स । लक्खणसीसेन चेत्य तंसंवत्तनिकपुज्जसम्भारो वुच्चति ।

पादतलचक्कलक्खणवण्णना

२०४. भयं नाम भीति, तं पन उब्बिज्जनाकारेन, उत्तसनाकारेन च पवत्तिया दुविधन्ति आह “**उब्बेगभयज्जेव उत्तासभयज्जा**”ति । तदुभयम्पि भयं विभागेन दस्सेतुं “**तत्था**”ति आदि वुत्तं । **अपनूदिता**ति यथा चोरादयो विलुप्पनबन्धनादीनि परस्स न करोन्ति, कतञ्च पच्चाहरणादिना पटिपाकतिकं होति, एवं यथा च चण्डहत्थिआदयो दूरतो परिवज्जिता होन्ति, अपरिवज्जिते तस्स यथा ठाने ठितेहि अभिभवो न होति, एवं अपनूदिता । **अतिवाहेतीति** अतिक्कामेति । तं **ठानन्ति** तं सासङ्कट्टानं । **असक्कोन्तानन्ति** उपयोगत्थे सामिवचनं, असक्कोन्तेति अत्थो ।

असक्कोन्तानन्ति वा अनादरे सामिवचनं । सह परिवारेनाति सपरिवारं । तत्थ किञ्चि देय्यधम्मं देन्तो यदा तस्स परिवारभावेन अज्जम्पि देय्यधम्मं देति, एवं तस्स तं दानमयं पुज्जं सपरिवारं नाम होति ।

तमत्यं वित्तारेन दस्सेतुं “तत्थ अन्न”न्तिआदि वुत्तं । तत्थ यथा देय्यधम्मं तस्स अन्नदानस्स परिवारो, एवं तस्स सक्कच्चकरणं पीति दस्सेन्तो “अथ खो”तिआदिमाह । यागुभत्तं दत्ताव अदासीति योजना । एस नयो इतो परतोपि । सुत्तं वट्ठेतीति चीवरस्स सिब्बनसुत्तकं दुवट्ठितिवट्ठादिवसेन वट्ठितं अकासि । रजनन्ति अल्लिआदिरजनवत्थुं । पण्डुपलासन्ति रजनुपगमेव पण्डुवण्णं पलासं ।

हेट्ठिमान्तीति अन्नादीनि चत्तारि । निसदग्गहणेनेव निसदपोतोपि गहितो । चीनपिट्ठं सिन्धुरकचुण्णं । कोजवन्ति उदलोमि एकन्तलोमिआदिकोजवत्थरण । सुविभत्तअन्तरानीति सुट्ठु विभत्तअन्तरानि, एतेन चक्कावयवट्ठानानं सुपरिच्छिन्नतं दस्सेति ।

लद्धाभिसेका खत्तिया अत्तनो विजिते विसविताय ब्राह्मणादिके चतूहि सङ्गहवत्थूहि रज्जेतुं सक्कोन्ति, न इतराति आह “राजानोति अभिसित्ता”ति । राजतो यथालद्धगामनिगमादिं इस्सरवताय भुज्जन्तीति भोजका, तादिसो भोगो एतेसं अत्थि, तत्थ वा नियुत्ताति भोगिका, ते एव “भोगिया”ति वुत्ता । सपरिवारं दानन्ति वुत्तनयेन सपरिवारदानं । जानातूति “सदेवको लोको जानातू”ति इमिना विय अधिप्पायेन निब्बत्तं चक्कलक्खणन्ति लक्खणस्सेव कम्मसरिक्खता दस्सिता । एवं सति तिकमेव सिया, न चतुक्कं, तस्मा चक्कलक्खणस्स महापरिवारताय आपकनिमित्तभावो कम्मसरिक्खकं नाम । तेनेवाह “सपरिवारं...पे... जानातूति निब्बत्त”न्ति । “दीघायुक्ताय तं निमित्त”न्ति (दी० नि० ३.२०७) च वक्खति, तथा “तं लक्खणं भवति तदत्थजोतक”न्ति (दी० नि० ३.२२१) च । निस्सन्दफलं पन पटिपक्खाभिभवो दट्ठब्बो । तेनेवाह गाथायं “सत्तुमद्दनो”ति ।

२०५. एतन्ति एतं गाथाबन्धभूतं वचनं, तं पनत्थतो गाथा एवाति आह “इमा तदत्थपरिदीपना गाथा वुच्चन्ती”ति ।

पुरत्थाति वा “पुरे”ति वुत्ततोपि पुब्बे । यस्मा महापुरिसो न अतीताय एकजातियं, नापि कतिपयजातीसु, अथ खो पुरिमपुरिमतरासु तथाव पटिपन्नो, तस्मा तत्थ पटिपत्तिं दस्सेतुं “पुरे पुरत्था”ति वुत्तं । इमिस्सापि जातियं अतीतकालवसेन “पुरेपुरत्था”ति वत्तुं लब्भाति ततो विसेसनत्थं “पुरिमासु जातीसू”ति वुत्तन्ति आह “इमिस्सा”तिआदि । केचि “इमिस्सा जातिया पुब्बे तुसितदेवलोके कतकम्मपटिक्खेपवचन”न्ति वदन्ति, तं तेसं मतिमत्तं तत्थ तादिसस्स कतकम्मस्स अभावतो । अपनूदन्तीति अपनेता । अधिमुत्तोति युत्तपयुत्तो ।

पुज्जकम्मेनाति दानादिपुज्जकम्मेन । एवं सन्तेति सतमत्तेन पुज्जकम्मेन एकेकं लक्खणं निब्बत्तेय्य, एवं सति । न रोचयिंसूति केवलं सतमत्तेन पुज्जकम्मेन लक्खणनिब्बत्तिं न रोचयिंसु अट्ठकथाचरिया । कथं पन रोचयिंसूति आह “अनन्तेसु पना”तिआदि । एकेकं कम्मन्ति एकेकं दानादिपुब्बकम्मं । एकेकं सतगुणं कत्वाति अनन्तासु लोकधातूसु यत्तका सत्ता, तेहि सब्बेहि पच्चेकं सतक्खत्तुं कतानि दानादिपुज्जकम्मानि यत्तकानि, ततो एकेकं पुज्जकम्मं महासत्तेन सतगुणं कतं “सत”न्ति अधिप्पेतं, तस्मा इध सत-सद्दो बहुभावपरियायो, न सङ्ख्यावचनोति दस्सेति “सतग्धि सतं देवमनुस्सा”तिआदीसु विय । तेनाह “तस्मा सतपुज्जलक्खणोति इममत्थं रोचयिंसू”ति ।

आयतपण्हितादितिलक्खणवण्णना

२०६. सरसचुति नाम जातस्स सत्तस्स यावजीवं जीवित्वा पकतिया मरणं । आकड्ढजियस्स धनुदण्डस्स विय पादानं अन्तोमुखं कुटिलताय अन्तोवङ्कपादता । बहिमुखं कुटिलताय बहिवङ्कपादता । पादतलस्स मज्झे ऊनताय उक्कुटिकपादता । अग्गपादेन खञ्जनका अग्गकोण्डा । पण्हिप्पदेसेन खञ्जनका पण्हिकोण्डा । उन्नतकायेनाति अनोनतभावेन समुस्सितसरीरेन । मुट्टिकतहत्थाति आवुधादीनं गहणत्थं कतमुट्टिहत्था । फणहत्थकाति अज्जमज्जं संसट्ठुल्लिहत्था । इदमेत्थ कम्मसरिक्खकन्ति इदं इमेसं तिण्णम्पि लक्खणानं तथागतस्स दीघायुकताय जापकनिमित्तभावो एत्थ आयतपण्हिता, दीघङ्गुलिता ब्रह्मजुगत्तताति एतस्मिं लक्खणत्तये कम्मसरिक्खकत्तं । निस्सन्दफलं पन अनन्तरायतादि दट्ठब्बं ।

२०७. भायितब्बवत्थुनिमित्तं उप्पज्जमानम्पि भयं अत्तसिनेहेहेतुकं पहीनसिनेहस्स तदभावतोति आह “यथा मय्हं मरणतो भयं मम जीवितं पिय”न्ति । सुचिण्णेनाति सुट्ठु कतूपचितेन सुचरितकम्मुना ।

चवित्वाति सग्गतो चवित्वा । “सुजातगत्तो सुभुजो”ति आदयो सरीरावयवगुणा इमेहि लक्खणेहि अविनाभाविनोति दस्सेतुं वुत्ता । चिरयपनायाति अत्तभावस्स चिरकालं पवत्तनाय । तेनाह “दीघायुकभावाया”ति । ततोति चक्कवत्ती हुत्वा यापनतो । वसिप्पत्तोति ज्ञानादीसु वसीभावज्जेव चेतोवसिभावज्ज पत्तो हुत्वा, कथं इद्धिभावनाय इद्धिपादभावनायाति अत्थो । यापेति चिरतरन्ति योजना ।

सत्तुस्सदतालक्खणवण्णना

२०८. रसो जातो एतेसन्ति रसितानि, महारसानि । तेनाह “रससम्पन्नान”न्ति । पिट्ठुखज्जकादीनीति पूपसक्खलिमोदकादीनि । आदि-सद्देन पन कदलिफलादिं सङ्गण्हाति । पिट्ठं पक्खिपित्वा पचितब्बपायसं पिट्ठपायसं । आदि-सद्देन तथारूपभोज्जयागुआदिं सङ्गण्हाति ।

इध कम्मसरिक्खकं नाम सत्तुस्सदतालक्खणस्स पणीतलाभिताय जापकनिमित्तभावो । इमिना नयेन तत्थ तत्थ लक्खणे कम्मसरिक्खकं निद्धारेत्वा योजेतब्बं ।

२०९. उत्तमो अग्गरसदायकोति सब्बसत्तानं उत्तमो लोकनाथो अग्गानं पणीतानं रसानं दायको । उत्तमानं अग्गरसानन्ति पणीतेसुपि पणीतरसानं । खज्जभोज्जादिजोतकन्ति खज्जभोज्जालाभजोतकं । लाभसंवत्तनिकस्स कम्मस्स फलं “लाभसंवत्तनिक”न्ति कारणूपचारेन वदति । तदत्थजोतकन्ति वा तस्स पणीतभोजनदायकत्तसङ्घातस्स अत्थस्स जोतकं । तदाधिगच्छतीति एत्थ आ-कारो निपातमत्तन्ति आह “तं अधिगच्छती”ति । लाभिरुत्तमन्ति र-कारो पदसन्धिकरो ।

करचरणादिलक्खणवण्णना

२१०. पब्बजितपरिक्खारं पत्तचीवरादिं गिहिपरिक्खारं वत्थावुधयानसयनादिं ।

सब्बन्ति सब्बं उपकारं । मक्खेत्वा नासेति मक्खिभावे ठत्वा । तेलेन विय मक्खेतीति सतधोततेलेन मक्खेति विय ।

अत्थसंवड्ढुकथायाति हितावहकथाय । कथागहणञ्चेत्थ निदस्सनमत्तं । परेसं हितावहो कायपयोगोपि अत्थचरिया । अट्टकथायं पन वचीपयोगवसेनेव अत्थचरिया वुत्ता ।

समानत्ततायाति सदिसभावे समानट्टाने ठपनेन, तं पनस्स समानट्टाने ठपनं अत्तसदिसताकरणं, सुखेन एकसम्भोगता, अत्तनो सुखुप्पत्तियं; तस्स च दुक्खुप्पत्तियं तेन अत्तनो एकसम्भोगताति आह “समानसुखदुक्खभावेना”ति । सा च समानसुखदुक्खता एकतो निसज्जादिना पाकटा होतीति तं दस्सेन्तो “एकासने”तिआदिमाह । न हि सक्का एकपरिभोगो कातुं जातिया हीनत्ता । तथा अकरियमाने च सो कुज्झति भोगेन अधिकत्ता, तस्मा दुस्सङ्गहो । न हि सो एकपरिभोगं इच्छति जातिया हीनभावतो । न अकरियमाने च कुज्झति भोगेन हीनभावतो । उभोहीति जातिभोगेहि । सदिसोपि सुसङ्गहो एकसदिसभावेनेव इतरेन सह एकपरिभोगस्स पच्चासीसाय, अकरणे च तस्स कुज्जनस्साभावतो । अदीयमानेपि किस्मिञ्च आमिसे अकरियमानेपि सङ्गहे । न पापकेन चित्तेन पस्सति पेसलभावतो । ततो एव परिभोगोपि...पे०... होति । एवरूपन्ति गिही चे, उभोहि सदिसं; पब्बजितो चे, सीलवन्तन्ति अधिप्पायो ।

सुसङ्गहिताव होन्तीति सुट्ठु सङ्गहिता एव होन्ति दब्बहभत्तिभावतो । तेनाह “न भिज्जन्ती”ति ।

दानादिसङ्गहकम्मन्ति दानादिभेदं परसङ्गहनवसेन पवत्तं कुसलकम्मं ।

२११. अनवज्जातेन अपरिभूतेन सम्भावितेन । पमोदो वुच्चति हासो, न अप्पमोदेनाति एत्थ पटिसेधद्वयेन सो एव वुत्तो । सो च ओदग्यसभावत्ता न दीनो धम्मूपसज्जितत्ता न गब्भयुत्तोति आह “न दीनेन न गब्भितेनाति अत्थो”ति । सत्तानं अगणहनगुणेनाति योजना ।

अतिरुचिरन्ति अतिविय रुचिरकत्तं, तं पन पस्सन्तानं पसादावहन्ति आह “सुपासादिक”न्ति । सुट्ठु छेकन्ति अतिविय सुन्दरं । विधातब्बोति विधातुं सन्दिसितुं सक्कुण्यो । पियं वदतीति पियवदू यथा “सब्बविदू”ति । सुखमेव सुखता, तं सुखतं । धम्मञ्च अनुधम्मञ्चाति लोकुत्तरधम्मञ्चेव तस्स अनुरूपपुब्बभागधम्मञ्च ।

उस्सङ्खपादादिलक्खणवण्णना

२१२. “अत्थूपसंहित”न्ति इमिना वट्टनिस्सिता धम्मकथा वुत्ताति आह “इधलोकपरलोकत्थनिस्सित”न्ति । “धम्मूपसंहित”न्ति इमिना विवट्टनिस्सिता, तस्मा दसकुसलकम्मपथा विवट्टसन्निस्सया वेदितब्बा । निदंसेसीति सन्दस्सेसि ते धम्मे पच्चक्खे कत्वा पकासेसि । निदंसनकथन्ति पाकटकरणकथं । जेट्ठेन अगो, पासंसट्ठेन सेट्ठो, पमुखट्ठेन पामोक्खो, पधानट्ठेन उत्तमो, हितसुखत्थिकेहि पकारतो वरणीयतो रजनीयतो पवरोति एवं अत्थविसेसवाचीनम्पि “अगो”तिआदीनं पदानं भावत्थस्स भेदाभावतो “सब्बानि अज्जमज्जवेवचनानी”ति आह ।

उद्धङ्गमनीयाति सुणन्तानं उपरूपरि विसेसं गमेन्तीति उद्धङ्गमनीया । सङ्खाय अधो पिट्ठिपादसमीपे एव पतिट्ठितत्ता अधोसङ्ख पादा एतस्साति अधोसङ्खपादो । सङ्खाति च गोप्फकानमिदं नामं ।

२१३. धम्मदानयज्जन्ति धम्मदानसङ्घातं यज्जं ।

सुदु सण्ठिताति सम्मदेव सण्ठिता । पिड्डिपादस्स उपरि पकतिअङ्गुलेन चतुरङ्गुले जङ्घापदेसे निगूळहा अपज्जायमानरूपा हुत्वा ठिताति अत्थो ।

एणिजङ्गलक्खणवण्णना

२१४. सिप्पन्ति सिक्खितब्बट्टेन “सिप्प”न्ति लद्धनामं सत्तानं जीविकाहेतुभूतं आजीवविधिं । जीविकत्थं, सत्तानं उपकारत्थञ्च वेदितब्बट्टेन विज्जा, मन्तसत्थादि । चरन्ति तेन सुगतिं, सुखञ्च गच्छन्तीति चरणं । कम्मस्सकताजाणं उत्तरपदलोपेन “कम्म”न्ति वुत्तन्ति आह “कम्मन्ति कम्मस्सकताजाननपज्जा”ति । तानि चेवाति पुब्बे वुत्तहत्थिआदीनि चेव । सत्त रतनानीति मुत्तादीनि सत्त रतनानि । च-सद्देन रज्जो उपभोगभूतानं वत्थसेय्यादीनं सङ्गहो । रज्जो अनुच्छविकानीति रज्जो परिभुज्जनयोग्यानि । सब्बेसन्ति “राजारहानी”तिआदिना वुत्तानं सब्बेसंयेव एकज्झं गहणं । बुद्धानं परिसा नाम ओधिसो अनोधिसो च समितपापा, तथत्थाय पटिपन्ना च होतीति वुत्तं “समणानं कोट्टासभूता चतस्सो परिसा”ति ।

सिप्पादिवाचनन्ति सिप्पानं सिक्खापनं । पाळियम्पि हि “वाचेता”ति वाचनसीसेन सिक्खापनं दस्सितं । उक्कुटिकासनन्ति तंतंवेय्यावच्चकरणेन उक्कुटिकस्स निसज्जा । पयोजनवसेन गेहतो गेहं गामतो गामं जङ्घायो किलमेत्वा पेसनं जङ्घपेसनिका । लिखित्वा पातितं विय होति अपरिपुण्णभावतो । अनुपुब्बउग्गतवट्टितन्ति गोप्फकट्टानतो पट्टाय याव जाणुपदेसा मंसूपचयस्स अनुक्कमेन समन्ततो वट्टितत्ता अनुपुब्बेन उग्गतं हुत्वा सुवट्टितं । एणिजङ्गलक्खणन्ति सण्ठानमत्तेन एणिमिगजङ्घासदिसजङ्गलक्खणं ।

२१५. “यतुपघाताया”ति एत्थ त-कारो पदसन्धिकरो, अनुनासिकलोपेन निद्देसोति आह “य”न्तिआदि । “उद्धग्गलोमा सुखुमत्तचोत्थता”ति वुत्तत्ता चोदकेन “किं पन अज्जेन कम्मेन अज्जं लक्खणं निब्बत्तती”ति चोदितो, आचरियो “न निब्बत्तती”ति वत्वा “यदि एवं इध कस्मा लक्खणन्तरं कथित”न्ति अन्तोलीनमेव चोदनं परिहरन्तो “यं पन निब्बत्ततीति...पे०... इध वुत्त”न्ति आह । तत्थ यं पन निब्बत्ततीति यं लक्खणं वुच्चमानलक्खणनिब्बत्तकेन कम्मुना निब्बत्तति । तं अनुब्यज्जनं होतीति तं लक्खणं वुच्चमानस्स लक्खणस्स अनुकूललक्खणं नाम होति । तस्मा तेन कारणेन इध एणिजङ्गलक्खणकथने “उद्धग्गलोमा सुखुमत्तचोत्थता”ति लक्खणन्तरं वुत्तं ।

सुखुमच्छविलक्खणवण्णना

२१६. समितपापट्टेन समणं, न पब्बज्जामत्तेन । बाहितपापट्टेन ब्राह्मणं, न जातिमत्तेन ।

महन्तानं अत्थानं परिगण्हनतो महती पज्जा एतस्साति महापज्जो । सेसपदेसुपि एसेव नयोति आह “महापज्जादीहि समन्नागतोति अत्थो”ति । नानत्तन्ति याहि महापज्जादीहि समन्नागतत्ता भगवा “महापज्जो”तिआदिना किच्चीयति, तासं महापज्जादीनं इदं नानत्तं अयं वेमत्तता ।

यस्स कस्सचि विसेसतो अरूपधम्मस्स महत्तं नाम किच्चसिद्धिया वेदितब्बन्ति तदस्सा किच्चसिद्धिया दस्सेन्तो “महन्ते सीलक्खन्धे परिगण्हातीति महापज्जा”तिआदिमाह । तत्थ हेतुमहन्तताय, पच्चयमहन्तताय, निस्सयमहन्तताय, पभेदमहन्तताय, किच्चमहन्तताय, फलमहन्तताय, आनिसंसमहन्तताय च सीलक्खन्धस्स महन्तभावो वेदितब्बो । तत्थ हेतु अलोभादयो । पच्चयो हिरोत्तप्पसद्भासतिवीरियादयो । निस्सयो

सावकबोधिपच्चेकबोधिसम्मासम्बोधिनीयतता, तंसमङ्गिनो च पुरिसविसेसा । **पभेदो** चारित्तवारित्तादिविभागो । **किच्चं** तदङ्गादिवसेन पटिपक्खविधमनं । **आनिसंसो** पियमनापतादि । अयमेत्थ सङ्खेपो, वित्थारो पन **विसुद्धिमग्गे**, (विसुद्धिं १.६) **आकङ्खेय्यसुत्तादीसु** (मं नि० १.६५) च आगतनयेनेव वेदितब्बो । इमिना नयेन **समाधिकखन्धा**दीनम्पि महन्तता यथारहं वित्थारेत्वा वेदितब्बा । **ठानाठानानं** पन महाविसयताय, सा **बहुधातुकसुत्ते** आगतनयेन वेदितब्बा । **विहारसमापत्तियो** समाधिकखन्धनिद्वारणनयेन वेदितब्बा । **अरियसच्चां** सकलसासनसङ्ग्रहतो, सो सच्चविभङ्ग- (विभ० १८९) तंसंवण्णनासु (विभ० अट्ठ० १८९) आगतनयेन, **सतिपट्टाना** दीनं सतिपट्टानविभङ्गादीसु, (विभ० ३५५) तंसंवण्णनासु (विभ० अट्ठ० ३५५) च आगतनयेन, **सामञ्जफलानं** महतो हितस्स, महतो सुखस्स, महतो अत्थस्स, महतो योगक्खेमस्स निब्बत्तिभावतो, सन्तपणीतनिपुणअतक्कावचरपण्डितवेदनीयभावतो च; **अभिज्ज्ञानं** महासम्भारतो, महाविसयतो, महाकिच्चतो, महानुभावतो, महानिब्बत्तितो च, **निब्बानस्स** मदनिममदनादिमहत्तसिद्धितो महन्तता वेदितब्बा ।

पुथुपज्जाति एत्थापि वुत्तनयानुसारेण अत्थो वेदितब्बो । अयं पन विसेसो — **नानाखन्धेसु जाणं पवत्ततीति** “अयं रूपक्खन्धो नाम...पे०... अयं विज्जाणक्खन्धो नामा”ति एवं पज्चन्नं खन्धानं नानाकरणं पटिच्च जाणं पवत्तति । तेसुपि “एकविधेन रूपक्खन्धो, एकादसविधेन रूपक्खन्धो । एकविधेन वेदनाक्खन्धो, बहुविधेन वेदनाक्खन्धो । एकविधेन सज्जाक्खन्धो । एकविधेन सङ्खारक्खन्धो । एकविधेन विज्जाणक्खन्धो, बहुविधेन विज्जाणक्खन्धो”ति एवं एकेकस्स खन्धस्स अतीतादिभेदवसेनापि नानाकरणं पटिच्च जाणं पवत्तति । तथा “इदं चक्खायतनं नाम...पे०...इदं धम्मायतनं नाम । तत्थ दसायतना कामावचरा, द्वे चतुभूमका”ति एवं आयतनानं नानत्तं पटिच्च जाणं पवत्तति । **नानाधातूसूति** “अयं चक्खुधातु नाम...पे०... अयं मनोविज्जाणधातु नाम । तत्थ सोळस धातुयो कामावचरा, द्वे धातुयो चतुभूमिका”ति एवं नानाधातूसु जाणं पवत्तति, तयिदं उपादिन्नकधातुवसेन वुत्तं । पच्चेकबुद्धानम्पि हि द्विन्नज्ज अगगसावकानं उपादिन्नकधातूसु एवं नानाकरणं पटिच्च जाणं पवत्तति, तज्ज खो एकदेसतोव, न निप्पदेसतो । अनुपादिन्नकधातूनं पन लक्खणादिमत्तमेव जानन्ति, न नानाकरणं । सब्बज्जुबुद्धानमेव पन “इमाय नामधातुया उस्सन्नत्ता इमस्स रुक्खस्स खन्धो सेतो, इमस्स काळो, इमस्स मट्ठो, इमस्स बहलत्तचो, इमस्स तनुत्तचो । इमस्स पत्तं वण्णसण्ठानादिवसेन एवरूपं । इमस्स पुप्फं नीलं, इमस्स पीतकं, लोहितकं, ओदातं, सुगन्धं, दुग्गन्धं । फलं खुद्दकं, महन्तं, दीघं, वट्ठं, सुसण्ठानं, दुस्सण्ठानं, मट्ठं, फरुसं, सुगन्धं, दुग्गन्धं, मधुरं, तिक्तकं, अम्बिलं, कटुकं, कसावं । कण्टको तिखिणो, अतिखिणो, उज्जुको, कुटिलो, कण्हो, नीलो, ओदातो होती”ति धातुनानत्तं पटिच्च जाणं पवत्तति ।

नानापटिच्चसमुप्पादेसूति अज्झत्तबहिद्वाभेदतो च नानापभेदेसु पटिच्चसमुप्पादङ्गेसु । अविज्जादिअङ्गानि हि पच्चेकं पटिच्चसमुप्पादसज्जितानि । तेनाह **सङ्खारपिटके** “द्वादस पच्चया द्वादस पटिच्चसमुप्पादा”ति । **नानासुज्जतमनुपलब्धेसूति** नानासभावेसु निच्चसारादिविरहितेसु सुज्जतभावेसु ततो एव इत्थिपुरिसअत्तत्तनयादिवसेन अनुपलब्धनसभावेसु पकारेसु । **म-**कारो हेत्थ पदसन्धिकरो । **नानाअत्थेसूति** अत्थपटिसम्भिदाय विसयभूतेसु पच्चयुप्पन्नादिवसेन नानाविधेसु अत्थेसु । **धम्मसेसूति** धम्मपटिसम्भिदाय विसयभूतेसु पच्चयादिवसेन नानाविधेसु धम्मसेसु । **निरुत्तीसूति** तेसंयेव अत्थधम्मानं निद्वारणवचनसङ्घातेसु नानानिरुत्तीसु । **पटिभानेसूति** अत्थपटिसम्भिदादीसु विसयभूतेसु “इमानि जाणानि इदमत्थजोतकानी”ति (विभ० ७२६, ७२९, ७३१, ७३२, ७३४, ७३६, ७३९) तथा तथा पटिभानतो उपतिट्ठनतो “पटिभानानी”ति लब्धनामेसु नानाजाणेसु । “**पुथुनानासीलक्खन्धेसू**”तिआदीसु सीलस्स पुथुत्तं वुत्तमेव, इतरेसं पन वुत्तनयानुसारेण सुविज्जेय्यत्ता पाकटमेव । यं पन अभिन्नं एकमेव निब्बानं, तत्थ उपचारवसेन पुथुत्तं गहेतब्बन्ति आह “**पुथुज्जनसाधारणे धम्मे समतिक्कम्मा**”ति, तेनस्स मदनिममदनादिपरियायेन पुथुत्तं परिदीपितं होति ।

एवं विसयवसेन पञ्जाय महत्तं, पुथुत्तं दस्सेत्वा इदानीं सम्पयुत्तधम्मवसेन हासभावं, पवत्तिआकारवसेन जवनभावं, किच्चवसेन तिकखादिभावं दस्सेतुं “**कतमा हासपञ्जा**”तिआदि वुत्तं। तत्थ हासबहुलोति पीतिबहुलो। सेसपदानि तस्सेव वेवचनानि। **सीलं परिपूरेतीति** हट्ठपहट्ठो उदग्गुदग्गो हुत्वा ठपेत्वा इन्द्रियसंवरं तस्स विसुं वुत्तत्ता अनवसेससीलं परिपूरेति। पीतिसोमनस्ससहगता हि पञ्जा अभिरतिवसेन आरम्मणे फुल्लितविकसिता विय पवत्तति, न एवं उपेक्खासहगता। पुन **सीलक्खन्धन्ति** अरियसीलक्खन्धमाह। “**समाधिक्खन्ध**”न्तिआदीसुपि एसेव नयो।

सब्बं तं रूपं अनिच्चतो खिप्पं जवतीति या रूपधम्मे “अनिच्चा”ति सीघवेगेन पवत्तति, पटिपक्खदूरभावेन पुब्बाभिसङ्खारस्स सातिसयत्ता इन्देन विस्सट्ठवजिरं विय लक्खणं अविरज्झन्ती अदन्धायन्ती रूपक्खन्धे अनिच्चलक्खणं वेगसा पटिविज्झति, सा जवनपञ्जा नामाति अत्थो। सेसपदेसुपि एसेव नयो। एवं लक्खणारम्मणिकविपस्सनावसेन जवनपञ्जं दस्सेत्वा बलवविपस्सनावसेन दस्सेतुं “**रूप**”न्तिआदि वुत्तं। तत्थ **खयट्ठेनाति** यत्थ यत्थ उप्पज्जति, तत्थ तत्थेव भिज्जनतो खयसभावत्ता। **भयट्ठेनाति** भयानकभावतो। **असारकट्ठेनाति** असारकभावतो अत्तसारविरहतो, निच्चसारादिविरहतो च। **तुलयित्वाति** तुलनभूताय विपस्सनापञ्जाय तुलेत्वा। **तीरयित्वाति** ताय एव तीरणभूताय तीरयित्वा। **विभावयित्वाति** याथावतो पकासेत्वा पच्चक्खं कत्वा। **विभूतं कत्वाति** पाकटं कत्वा। **रूपनिरोधेति** रूपक्खन्धनिरोधहेतुभूते **निब्बाने** निन्नपोणपब्भारभावेन। इदानीं सिखाप्पत्तविपस्सनावसेन जवनपञ्जं दस्सेतुं पुन “**रूप**”न्तिआदि वुत्तं। “वुट्ठानगामिनिविपस्सनावसेना”ति केचि।

जाणस्स तिकखभावो नाम सविसेसं पटिपक्खपहानेन वेदितब्बोति। “खिप्पं किलेसे छिन्दतीति तिकखपञ्जा”ति वत्त्वा ते पन किलेसे विभागेन दस्सेन्तो “**उप्पन्नं कामवितक्क**”न्तिआदिमाह। तिकखपञ्जो खिप्पाभिज्जो होति, पटिपदा चस्स न चलतीति आह “**एकस्मिं आसने चत्तारो अरियमग्गा...पे०... अधिगता होन्ती**”तिआदि।

“सब्बे सङ्खारा अनिच्चा दुक्खा विपरिणामधम्मा, सङ्खता पटिच्चसमुप्पन्ना खयधम्मा वयधम्मा विरागधम्मा निरोधधम्मा”ति याथावतो दस्सनेन सच्चप्पटिवेधो इज्झति, न अज्जथाति कारणमुखेन निब्बेधिकपञ्जं दस्सेतुं “**सब्बसङ्खारेसु उब्बेगबहुलो होती**”तिआदि वुत्तं। तत्थ **उब्बेगबहुलोति** वुत्तनयेन सब्बसङ्खारेसु अभिण्हपवत्तसंवेगो। **उत्तासबहुलोति** जाणुत्तासवसेन सब्बसङ्खारेसु बहुसो उत्तासमानसो, एतेन आदीनवानुपस्सनमाह। “**उक्कण्ठनबहुलो**”ति पन इमिना निब्बिदानुपस्सनमाह, “**अरतिबहुलो**”तिआदिना तस्सा एव अपरापरुप्पत्तिं। **बहिमुखोति** सब्बसङ्खारतो बहिभूतं निब्बानं उद्दिस्स पवत्तजाणमुखो, तथा वा पवत्तितविमोक्खमुखो। निब्बिज्जनं **निब्बेधो**, सो एतिस्सा अत्थि, निब्बिज्झतीति वा **निब्बेधिका**, सा एव पञ्जा **निब्बेधिकपञ्जा**। यं पनेत्थ अत्थतो अविभत्तं, तं हेट्ठा वुत्तनयत्ता, उत्तानत्थत्ता च सुविज्जेय्यमेव।

२१७. पब्बजितं उपासिताति एत्थ यादिसं पब्बजितं उपासतो पञ्जापटिलाभो होति, तं दस्सेतुं “**पण्डितं पब्बजित**”न्ति वुत्तं। **उपासन**ज्वेत्थ उपट्ठानवसेन इच्छितं, न उपनिसीदनमत्तेनाति आह “**पयिरुपासिता**”ति। अत्थन्ति हितं। **अब्भन्तरं करित्वाति** अब्भन्तरगतं कत्वा। तेनाह “**अत्थयुत्त**”न्ति। भावनपुंसकनिद्वेसो चायं, हितूपसज्झितं कत्वाति अत्थो। **अन्तर-सट्ठो** वा चित्तपरियायो “यस्सन्तरतो न सन्ति कोपा”तिआदीसु (उदा० २०) विय। तस्मा **अत्थन्तरोति** हितज्झासयोति अत्थो।

पटिलाभत्थाय गतेनाति पटिलाभत्थाय पवत्तेन, पटिलाभसंवत्तनियेनाति अत्थो। **उप्पादे च निमित्ते च छेकाति** उप्पादविधिहि चैव निमित्तविधिहि च कुसला। उप्पादनिमित्तकोविदतासीसेन चेत्य लक्खणकोसल्लमेव दस्सेति। अथ

वा सेसलक्खणानं निब्बत्तिया बुद्धानं, चक्कवत्तीनञ्च उप्पादो अनुमीयति, यानि तेहि लद्धब्बआनिसंसानि निमित्तानि, तस्मिं उप्पादे च निमित्ते च अनुमिननादिवसेन छेका निपुणाति अत्थो। जत्वा पस्सिस्सतीति जाणेन जानित्वा पस्सिस्सति, न चक्खुविज्जाणेनाति अधिप्पायो।

अत्थानुसासनीसूति अत्थानं हितानं अनुसासनीसु। यस्मा अनत्थपटिवज्जनपुब्बिका सत्तानं अत्थपटिपत्ति, तस्मा अनत्थोपि परिच्छिज्ज गहेतब्बो, जानितब्बो चाति वुत्तं “अत्थानत्थं परिग्गाहकानि जाणानी”ति, यतो “आयुपायकोसल्लं विय अपायकोसल्लम्पि इच्छितब्ब”न्ति वुत्तं।

सुवण्णवण्णलक्खणवण्णना

२१८. पटिसङ्ख्यानबलेन कोधविनयेन अवकोधनो, न भावनाबलेनाति दस्सेतुं “न अनागामिमग्गेना”तिआदि वुत्तं। एवं अवकोधवसिकत्ताति एवं मघमाणवो विय न कोधवसं गतत्ता। नाभिसज्जीति कुज्जनवसेनेव न अभिसज्जि। यज्झि कोधस्स उप्पत्तिट्ठानभूते आरम्मणे उपनाहस्स पच्चयभूतं कुज्जनवसेन अभिसज्जनं, तं इधाधिप्पेतं, न लुब्भनवसेन। तेनाह “कुटिलकण्टको विया”तिआदि। सो हि यत्थ लग्गति, तं खोभेन्तो एव लग्गति। तत्थ तत्थाति तस्मिं तस्मिं मम्मट्टाने। मम्मन्ति फुट्टमत्तेपि रुज्जनट्ठानं। पुब्बुप्पत्तिकोति पठमुप्पन्नो। ततो बलवतरो ब्यापादो लद्धासेवनताय चित्तस्स ब्यापज्जनतो। ततो बलवतरा पतित्थियनाति सातिसयं लद्धासेवनताय ततो ब्यापादावत्थायपि बलवतरा पतित्थियना पच्चत्थिकभावेन थामप्पत्तितो।

सुखुमत्थरणादीति आदि-सद्देन पणीतभोजनीयादीनम्पि सङ्गहो दट्ठब्बो भोजनदानस्सपि वण्णसम्पदानिमित्तभावतो। तेनाह भगवा “भोजनं भिक्खवे ददमानो दायको पटिग्गाहकानं...पे०... आयुं देति, वण्णं देती”ति (अ० नि० ५.३७) तथा च वक्खति “आमिसदानेन वा”ति।

२१९. ति अदासि। देवोति मेघो, पज्जुन्नो एव वा। वरतरोति उत्तमतरो। पब्बज्जाय विसदिसावत्थादि भावतो न पब्बज्जाति अपब्बज्जा, गिहिभावो। अच्चादेन्ति कोपीनं पटिच्छादेन्ति एतेहीति अच्चादनानि, निवासनानि, तेसं अच्चादनानञ्चेव सेस वत्थानञ्च कोजवादि उत्तमपावुरणानञ्च। विनासोति कतस्स कम्मस्स अविपच्चित्त्वा विनासो।

कोसोहितवत्थगुहलक्खणवण्णना

२२०. समानेताति सम्मदेव आनेता समागमेता। रज्जे पतिट्ठितेन सक्का कातुं बहुभतिकस्सेव इज्जनतो। कत्ता नाम नत्थीति वज्जं पटिच्छादेन्तीति आनेत्वा सम्बन्धो, करोन्ति वज्जपटिच्छादनकम्मन्ति वा। ननु वज्जपटिच्छादनकम्मं नाम सावज्जन्ति? सच्चं सावज्जं संकिलिड्ढचित्तेन पटिच्छादेन्तस्स, इदं पन असंकिलिड्ढचित्तेन परस्स उप्पज्जनकअनत्थं परिहरणवसेन पवत्तं अधिप्पेतं। “जातिसङ्गहं करोन्तेना”ति एतेन आतत्थचरियावसेन तं कम्मं पवत्ततीति दस्सेति।

२२१. अमित्ततापनाति अमित्तानं तपनसीला, अमित्ततापनं होतु वा मा वा एवंसभावाति अत्थो। न हि चक्कवत्तिनो पुत्तानं अमित्ता नाम केचि होन्ति, ये ते भवेय्युं, चक्कानुभावेनेव सब्बेपि खत्तियादयो अनुवत्तका तेसं भवन्ति।

पठमभाणवारवण्णना निट्ठिता।

परिमण्डलादिलक्खणवण्णना

२२२. समन्ति समानं । तेन तेन लोके विज्जातगुणेन समं समानं जानाति, यतो तत्थ पटिपज्जनविधिनाव इतरस्मिं पटिपज्जति । सयं जानातीति अपरनेय्यो हुत्वा सयमेव जानाति । पुरिसं जानातीति वा “अयं सेट्ठो, अयं मज्झिमो, अयं निहीनो”ति तं तं पुरिसं याथावतो जानाति । पुरिसविसेसं जानातीति तस्मिं तस्मिं पुरिसे विज्जमानं विसेसं जानाति, यतो तत्थ तत्थ अनुरूपदानपदानादिपटिपत्तिया युत्तपत्तकारी होति । तेनाह “अयमिदमरहती”तिआदि ।

सम्पत्तिपटिलाभट्टेनाति दिट्ठधम्मिकादिसम्पत्तीनं पटिलाभापनट्टेन । समसङ्गहकम्मन्ति समं जानित्वा तदनुरूपं तस्स तस्स सङ्गहनकम्मं ।

२२३. तुलयित्वाति तीरयित्वा । पटिविचिन्तित्वाति वीमंसित्वा । निपुणयोगतो निपुणा, अतिविय निपुणा अतिनिपुणा, सा पन तेसं निपुणता सण्हसुखुमा पज्जाति आह “सुखुमपज्जा”ति ।

सीहपुब्बद्धकायादिलक्खणवण्णना

२२४. खेमकामोति अनुपद्दवकामो । कम्मस्सकताजाणं सत्तानं वड्ढिआवहं सब्बसम्पत्तिविधायकन्ति आह “पज्जायाति कम्मस्सकतापज्जाया”ति ।

समन्तपरिपूरानीति समन्ततो सब्बभागेहि परिपुण्णानि । ततो एव अहीनानि अनूनानि । धनादीहीति धनधज्जादीहि ।

२२५. ओकप्पनसद्धा सद्धेय्यवत्थुं ओक्कन्दित्वा पक्खन्दित्वा सद्धहनसद्धा । सा एव पसादनीयवत्थुस्मिम्पि अभिप्पसीदनवसेन पवत्तिया पसादसद्धा । परियत्तिसवनेनाति सत्तानं हितसुखावहाय परियत्तिया सवनेन । धारणपरिचयादीनं तंमूलकत्ता तथा वुत्तं । एतेसन्ति सद्धादीनं । सह हानधम्मोति सहानधम्मो, न सहानधम्मोति असहानधम्मो, तस्स भावो असहानधम्मता, तं असहानधम्मत्तं, अपरिहानियसभावन्ति अत्थो ।

रसग्गसगितालक्खणवण्णना

२२६. तिलफलमत्तम्पि भोजनं । सब्बत्थ फरतीति सब्बा रसाहरणियो अनुस्सरन्तं सभावेन सब्बस्मिं काये फरति । समा हुत्वा वहन्तीति अविसमा उजुका हुत्वा पवत्तन्ति ।

आरोग्यकरणकम्मन्ति अरोगभावकरं सत्तानं अविहेठनकम्मं । मधुरादिभेदं रसं गसति हरति एतेहि, सयमेव वा तं गसन्ति गिलन्ति अन्तो पवेसेन्तीति रसग्गसा, रसग्गसानं अग्गा रसग्गसग्गा, ते एत्थ सन्तीति रसग्गसग्गी, तदेव लक्खणं । भवति हि अभिन्नेपि वत्थुस्मिं तग्गतविसेसावबोधनत्थं भिन्नं विय कत्वा वोहारो यथा “सिलापुत्तकस्स सरीर”न्ति । रसग्गसगितासङ्घातं वा लक्खणं रसग्गसगिलक्खणं ।

२२७. वध-सद्धो “अत्तानं वधित्वा वधित्वा रोदती”तिआदीसु (पाचि० ८७९) बाधनत्थोपि होतीति ततो विसेसनत्थं “मारणवधेना”ति वुत्तं, मारणसङ्घातेन वधेनाति अत्थो । बाधनत्थो एव वा वध-सद्धो, मारणेन, बाधनेन चाति अत्थो । उब्बाधनायाति बन्धनागारे पक्खिपित्वा उद्धं उद्धं बाधनेन । तेनाह “बन्धनागारप्पवेसनेना”ति ।

अभिनीलनेत्तादिलक्खणवण्णना

२२८. विसटन्ति कुज्झनवसेन विनिसटं कत्वा । तेनाह “कक्कटको विया”तिआदि । विसाचीति विरूपं साचितकं, विजिम्हन्ति अत्थो । तेनाह “वङ्कक्खिकोटिया”ति, कुटिलअक्खिकोटिपातेनाति अत्थो । विचेय्य पेक्खिताति उजुकं अनोलोकेत्वा दिट्ठिपातं विचारेत्वा ओलोकेत्वा । तेनाह “यो कुज्झित्वा”तिआदि । परोति कुज्झितो । न ओलोकेति तं सम्मुखा गच्छन्तं कुज्झित्वा न ओलोकेति, परम्मुखा । वितेय्याति विरूपं तिरियं, विज्जूनं ओलोकनक्कमं वीतिक्कमित्वाति अत्थो । जिम्हं अनोलोकेत्वा उजुकं ओलोकनं नाम कुटिलभावकरानं पापधम्मानं अभाजनउजुकतचित्ततस्सेव होतीति आह “उजुमनो हुत्वा उजुं पेक्खिता”ति । यथा च उजुं पेक्खिता होतीति आनेत्वा सम्बन्धो । पसटन्ति उम्मीलनवसेन सम्मदेव पत्थटं । विपुलं वित्थतन्ति तस्सेव वेवचनं । पियं पियायितब्बं दस्सनं ओलोकनं एतस्साति पियदस्सनो ।

काणोति अक्खीनि निम्मीलेत्वा पेक्खनको । काकक्खीति केकरक्खो । वङ्कक्खीति जिम्हपेक्खनको । आविलक्खीति आकुलदिट्ठिपातो । नीलपीतलोहितसेतकाळवण्णानं वसेन पञ्चवण्णो । तत्थ पीतलोहितवण्णा सेतमण्डलगतराजिवसेन, नीलसेतकाळवण्णा पन तंतंमण्डलवसेनेव वेदितब्बा । “पसादोति पन तेसं वण्णानं पसन्नाकारं सन्धाय वुत्त”न्ति केचि । पञ्चवण्णो पसादोति पन यथावुत्तपञ्चवण्णपरिवारो, तेहि वा पटिमण्डितो पसादोति अत्थो । नेत्तसम्पत्तिकरानीति “पञ्चवण्णपसादता तिरोहितविदूरगतदस्सनसमत्थता”ति एवमादि चक्खुसम्पदाय कारणानि । लक्खणसत्थे युत्ताति लक्खणसत्थे आयुत्ता सुकुसला ।

उण्हीससीसलक्खणवण्णना

२३०. पुब्बङ्गमोति एत्थ पुब्बङ्गमता नाम पमुखता, जेड्डसेड्डकभावो बहुजनस्स अनुवत्तनीयताति आह “गणजेड्डको”तिआदि ।

पुब्बङ्गमताति पुब्बङ्गमस्स कम्मं । यस्स हि कायसुचरितादिकम्मस्स वसेन महापुरिसो बहुजनस्स पुब्बङ्गमो अहोसि, तदस्स कम्मं “पुब्बङ्गमता”ति अधिप्पेतं, न पुब्बङ्गमभावो । तेनाह “इध कम्मं नाम पुब्बङ्गमता”ति । पीतिपामोज्जेन परिपुण्णसीसोति पीतिया, पामोज्जेन च सम्पुण्णपञ्चासीसो बहुलं सोमनस्ससहगतजाणसम्पयुत्तचित्तसमङ्गी एव हुत्वा विचरति । महापुरिसोति महापुरिसजातिको ।

२३१. बहुजनन्ति सामिअत्थे उपयोगवचनन्ति आह “बहुजनस्सा”ति । परिभुज्जनट्ठेन पटिभोगो, उपयोगवत्थु पटिभोगो, तस्स हिताति पटिभोगिया । देसकालं जत्वा तदुपकरणूपट्टानादि वेय्यावच्चकरा सत्ता । अभिहरन्तीति ब्याहरन्ति । तस्स तस्स वेय्यावच्चस्स पटिहरणतो पवत्तनकरणतो पटिहारो, वेय्यावच्चकरो, तस्स भावो पटिहारकन्ति आह “वेय्यावच्चकरभाव”न्ति । विसवनं विसवो, कामकारो वसिता, सो एतस्स अत्थीति विसवीति आह “चिण्णवसी”ति ।

एकेकलोमतादिलक्खणवण्णना

२३२. उपवत्ततीति अनुकूलभावं उपेच्च वत्तति । तेनाह “अज्झासयं अनुवत्तती”ति ।

एकेकलोमलक्खणन्ति एकेकस्मिं लोमकूपे एकेकलोमतालक्खणं । एकेकेहि लोमेहीति अज्जेसं सरीरे एकेकस्मिम्पि लोमकूपे अनेकानिपि लोमानि उट्ठहन्ति, न तथागतस्स । तेहि पुन पच्चेकं लोमकूपेसु एकेकेहेव उप्पन्नेहि कुण्डलावत्तेहि पदक्खिणावत्तकजातेहि निचितं विय सरीरं होतीति वुत्तं “एकेकलोमूपचितङ्गवा”ति ।

चत्तालीसादिलक्खणवण्णना

२३४. अभिन्दितब्बपरिसोति परेहि केनचि सङ्गहेन सङ्गहेत्वा, युत्तिकारणं दस्सेत्वा वा न भिन्दितब्बपरिसो ।

अपिसुणवाचायाति उपयोगत्थे सामिवचनं, पेसुज्जस्स पटिपक्खभूतं कुसलकम्मं । पिसुणा वाचा एतस्साति पिसुणवाचो, तस्स पिसुणवाचस्स पुग्गलस्स । अपरिपुण्णाति चत्तारीसतो ऊनभावेन न परिपुण्णा । विरळाति सविवरा ।

पहूतजिह्वादिलक्खणवण्णना

२३६. आदेय्यवाचोति आदरगारववसेन आदातब्बवचनो । “एवमेत”न्ति गहेतब्बवचनो सिरसा सम्पटिच्छितसासनो ।

बद्धजिह्वाति यथा सुखेन परिवत्तति, एवं सिरादीहि पलिबुद्धजिह्वा । गूळहजिह्वाति रसबहलताय गूळहगण्डसदिसजिह्वा । द्विजिह्वाति अग्गे कप्पभावेन द्विधाभूतजिह्वा । मम्मनाति अप्परिप्पुटतलापा । खरफरुसकक्कसादिवसेन सद्दो भिज्जति भिन्नकारो होति । विच्छिन्दित्वा पवत्तस्सरताय छिन्नस्सरा वा । अनेकाकारताय भिन्नस्सरा वा । काकस्स विय अमनुज्जस्सरताय काकस्सरा वा । मधुरोति इट्ठे, कम्मफलेन वत्थुनो सुविसुद्धत्ता । पेमनीयोति पीतिसज्जननो, पियायितब्बो वा ।

२३७. अक्कोसयुत्तत्ताति अक्कोसुपसज्जितत्ता अक्कोसवत्थुसहितत्ता । आबाधकरिन्ति घट्टनवसेन परेसं पीळावहं । बहुनो जनस्स अवमदनतो, पमद्वाभावकरणतो वा बहुजनप्पमहनं । अबाळहन्ति वा एत्थ अ-कारो वुद्धिअत्थो “असेक्खा धम्मा”तिआदीसु (ध० स० तिकमातिका ११) विय, तस्मा अतिविय बाळहं फरुसं गिरन्ति एवमेत्थ अत्थो वेदितब्बो । न भणीति चेत्थ “न अभणि न भणी”ति सरलोपेन निद्देसो । सुसंहितन्ति सुट्ठु संहितं । केन पन सुट्ठु संहितं? “मधुर”न्ति अनन्तरमेव वुत्तत्ता मधुरतायाति विज्जायति, का पनस्स मधुरताति आह “सुट्ठु पेमसंहित”न्ति । उपयोगपुत्तुत्तविसयो यं वाचा-सद्दोति आह “वाचायो”ति, सा चस्सा उपयोगपुत्तुत्तविसयता “हृदयगामिनियो”ति पदेन समानाधिकरणताय दट्ठब्बा । “कण्णसुख”न्ति पाठे भावनपुंसकनिद्देसोयन्ति दस्सेतुं “यथा”तिआदि वुत्तं । वेदयथाति कालविपल्लासेनायं निद्देसोति आह “वेदयित्था”ति । ब्रह्मस्सरतन्ति सेट्ठस्सरतं, ब्रह्मनो सरसदिसस्सरतं वा । बहूनं बहुन्ति बहूनं जनानं बहुं सुभणितन्ति योजना ।

सीहहनुलक्खणवण्णना

२३८. अप्पधंसिकोति अप्पधंसियो । य-कारस्स हि क-कारं कत्वा अयं निद्देसो यथा “निय्यानिका धम्मा”ति (ध० स० दुक्कमातिका ९७) गुणतोति अत्तना अधिगतगुणतो । ठानतोति यथाठितट्ठानन्तरतो ।

पलापकथायाति सम्फप्पलापकथाय । अन्तोपविट्ठहनुका एकतो, उभतो वा संकुचितविसुका । वट्ठहनुका

एकपस्सेन कुटिलविसुका । पब्भारहनुका पुरतो ओलम्बमानविसुका ।

२३९. विकिण्णवचना नाम सम्फप्पलापिनो, तप्पटिक्खेपेन अविकिण्णवचना महाबोधिसत्ता । वाचा एव तदत्थाधिगमुपायताय “व्याप्पथो”ति वुत्ताति आह “अविकिण्ण...पे०... वचनपथो अस्सा”ति । “द्वीहि द्वीही”ति नयिदं आमोडितवचनं असमानाधिकरणतो, अथ खो द्वीहि दिगुणतादस्सनन्ति आह “द्वीहि द्वीहीति चतूही”ति । तस्मा “द्विदुगमा”ति चतुगमा वुत्ताति आह “चतुप्पदान”न्ति । तथासभावोति यथास्स वुत्तनयेन केनचि अप्पधंसियता होति गुणेहि, तथासभावो ।

समदन्तादिलक्खणवण्णना

२४०. विसुद्धसीलाचारताय परिसुद्धा समन्ततो सब्बथा वा सुद्धा पुग्गला परिवारा एतस्साति परिसुद्धपरिवारो ।

२४१. पहासीति तदङ्गवसेन, विक्खम्भनवसेन च परिच्चजि । तिदिवं तावतिसंभवनं पुरं नगरं एतेसन्ति तिदिवपुरा, तावतिसदेवा, तेसं वरो तिदिवपुरवरो, इन्दो । तेन तिदिवपुरवरेन । तेनाह “सक्केना”ति । लपन्ति कथेन्ति एतेनाति लपनं, मुखन्ति आह “लपनजन्ति मुखज”न्ति । सुद्ध धवलताय सुक्का, ईसकम्पि असंकिलिडुताय सुचि । सुन्दरसण्ठानताय सुद्ध भावनतो, विपस्सनतो च सोभना । कामं जनानं मनुस्सानं निवासनट्टानादिभावेन पतिट्ठाभूतो देसविसेसो “जनपदो”ति वुच्चति, इध पन सपरिवारचतुमहादीपसज्जितो सब्बो पदेसो तथा वुत्तोति आह “चक्कवाळपरिच्छिन्नो जनपदो”ति । ननु च यथावुत्तो पदेसो समुद्धपरिच्छिन्नो, न चक्कवाळपब्बतपरिच्छिन्नोति? सो पदेसो चक्कवाळपरिच्छिन्नोपि होतीति तथा वुत्तं । ये वा समुद्धनिस्सिता, चक्कवाळपादनिस्सिता च सत्ता, तेसं ते ते पदेसा पतिट्ठाति तेपि सङ्गण्हन्तो “चक्कवाळपरिच्छिन्नो”ति अवोच । चक्कवाळपरिच्छिन्नोति च चक्कवाळेन परिच्छिन्नोति एवमेत्थ अत्थो दट्ठब्बो । तस्साति तस्स चक्कवत्तिनो । पुन तस्साति तस्स जनपदस्स । बहुजन सुखन्ति एत्थ पच्चत्तबहुवचनलोपेन बहुजनग्गहणन्ति आह “बहुजना”ति । यथा पन ते हितसुखं चरन्ति, तं विधिं दस्सेतुं “समानसुखदुक्खा हुत्वा”ति वुत्तं । विगतपापोति सब्बसो समुच्छिन्दनेन विनिद्धुतपापधम्मो । दरथो वुच्चति कायिको, चेतसिको च परिळाहो । तत्थ चेतसिकपरिळाहो “विगतपापो”ति इमिनाव वुत्तोति आह “विगतकायिकदरथकिलमथो”ति । रागादयो यस्मिं सन्ताने उप्पन्ना, तस्स मलीनभावकरणेन मला । कचवरभावेन खिला । सत्तानं महानत्थकरत्ता विसेसतो दोसो कलीति वुत्तं “दोसकलीनज्जा”ति । पनूदेहीति समुच्छिन्दनवसेन ससन्तानतो नीहारकेहि, पजहनकेहीति अत्थो । सेसं सुविज्जेय्यमेव ।

एत्थ च यस्मा सब्बेसम्पि लक्खणानं महापुरिससन्तानगतपुञ्जसम्भारहेतुकभावेन सब्बयेव तं पुञ्जकम्मं सब्बस्स लक्खणस्स कारणं विसिद्धरूपत्ता फलस्स । न हि अभिन्नरूपकारणं भिन्नसभावस्स फलस्स पच्चयो भवितुं सक्कोति, तस्मा यस्स यस्स लक्खणस्स यं यं पुञ्जकम्मं विसेसकारणं, तं तं विभागेन दस्सेन्ती अयं देसना पवत्ता । तत्थ यथा यादिसं कायसुचरितादिपुञ्जकम्मं सुप्पतिट्ठितपादताय कारणं वुत्तं, तादिसमेव “उण्हीससीसताय” कारणन्ति न सक्का वत्तुं दळ्हसमादानताविसिद्धस्स तस्स सुप्पतिट्ठितपादताय कारणभावेन वुत्तत्ता, इतरस्स च पुब्बङ्गमताविसिद्धस्स वुत्तत्ता, एवं यादिसं आयतपण्हिताय कारणं, न तादिसमेव दीघङ्गुलिताय, ब्रह्मजुगत्तताय च कारणं विसिद्धरूपत्ता फलस्स । न हि अभिन्नरूपकारणं भिन्नसभावस्स फलस्स पच्चयो भवितुं सक्कोति । तत्थ यथा एकेनेव कम्मुना चक्खादिनानिन्द्रियुप्पत्तियं अवत्थाभेदतो, सामत्थियभेदतो वा कम्मभेदो इच्छितब्बो । न हि यदवत्थं कम्मं चक्खुस्स कारणं, तदवत्थमेव सोतादीनं कारणं होति अभिन्नसामत्थियं वा, तस्मा पञ्चायतनिकत्तभावपत्थनाभूता पुरिमनिप्फन्ना कामतण्हा पच्चयवसेन विसिद्धसभावा कम्मस्स विसिद्धसभावफलनिब्बत्तनसमत्थतासाधनवसेन पच्चयो होतीति एकम्पि

अनेकविधफलनिब्बत्तनसमत्थतावसेन अनेकरूपतं आपन्नं विय होति, एवमिधापि “एकम्पि पाणातिपाता वेरमणिवसेन पवत्तं कुसलकम्मं आयतपण्हितादीनं तिण्णम्पि लक्खणानं निब्बत्तकं होती”ति वुच्चमानेपि न कोचि विरोधो। तेन वुत्तं “सो तस्स कम्मस्स कतत्ता...पे०... इमानि तीणि महापुरिसलक्खणानि पटिलभती”ति नानाकम्मुना पन तेसं निब्बत्तियं वत्तब्बमेव नत्थि, पाळियं पन “तस्स कम्मस्सा”ति एकवचननिद्देशो सामञ्जसवसेनाति दट्ठब्बो। एवञ्च कत्वा सतपुञ्जलक्खणवचनं समत्थितं होति। “इमानि द्वे महापुरिसलक्खणानि पटिलभती”ति आदीसुपि एसेव नयोति।

लक्खणसुत्तवण्णनाय लीनत्थप्पकासना।

८. सिङ्गलसुत्तवण्णना

निदानवण्णना

२४२. पाकारेन परिक्खित्तन्ति पदं आनेत्वा सम्बन्धो। गोपुरट्टालकयुत्तन्ति द्वारपासादेन चेव तत्थ तत्थ पाकारमत्थके पतिट्ठापितअट्टालकेहि च युत्तं। वेळूहि परिक्खित्तत्ता, अब्भन्तरे पुप्फूपगफलूपगरुक्खसञ्छन्नत्ता च नीलोभासं। छायूदकसम्पत्तिया, भूमिभागसम्पत्तिया च मनोरमं।

काळकवेसेनाति कलन्दकरूपेन। निवापन्ति भोजनं। तन्ति उय्यानं।

“खो पना”ति वचनालङ्कारमत्तमेतन्ति तेन समयेनाति अत्थवचनं युत्तं। गहपति महासालोति गहपतिभूतो महासारो, र-कारस्स ल-कारं कत्वा अयं निद्देशो। विभवसम्पत्तिया महासारप्पत्तो कुटुम्बिको। “पुत्तो पनस्स अस्सद्धो”ति आदि अट्ठप्पत्तिको यं सुत्तनिक्खेपोति तं अट्ठप्पत्तिं दस्सेतुं आरब्धं। कम्मफलसद्भाय अभावेन अस्सद्धो। रतनत्तये पसादाभावेन अप्पसन्नो। एवमाहाति एवं इदानि वुच्चमानाकारेन वदति।

यावजीवं अनुस्सरणीया होति हितेसिताय वुत्ता पच्छिमा वाचाति अधिप्पायेन। पुथुदिसाति विसुं विसुं दिसा, ता पन अनेकाति आह “बहुदिसा”ति।

२४३. “न ताव पविट्ठो”ति आदीसु वत्तब्बं हेट्ठा वुत्तमेव। न इदानेवाति न इमाय एव वेलाय। किं चरहीति आह “पच्चूससमयेपी”ति आदि। गिहिविनयन्ति गिहीनं गहट्ठानं विनयतन्तिभूतं “गिहिना एवं वत्तितब्ब”न्ति गहट्ठाचारस्स गहट्ठवत्तस्स अनवसेसतो इमस्मिं सुत्ते सविसेसं कत्वा वुत्तत्ता। तथेवाति यथा बुद्धचक्खुना दिट्ठं, तथेव पस्सि। नमस्सति वत्तवसेन कत्तब्बन्ति गहेत्वा ठितत्ता।

छदिसादिवण्णना

२४४. वचनं सुत्ताव चिन्तेसि बुद्धानुभावेन अत्तसम्मापणिधाननिमित्तेन पुञ्जबलेन च चोदियमानो। न किर ता एताति ता छ दिसा एता इदानि मया नमस्सियमाना पुरत्थिमादिका न होन्ति किराति। निपातमत्तन्ति अनत्थकभावं तस्स वदति। पुच्छापदन्ति पुच्छावचनं।

भगवा गहपतिपुत्तेन नमस्सितब्बा छ दिसा पुच्छितो देसनाकुसलताय आदितो एव ता अकथेत्वा तस्स ताव

पटिपत्तिया नं भाजनभूतं कातुं वज्जनीयवज्जनतथञ्चेव सेवितब्बसेवनतथञ्च ओवादं देन्तो “यतो खो गहपतिपुत्ता”तिआदिना देसनं आरभि। तत्थ कम्मकिलेसाति कम्मभूता संकिलेसा। किलिस्सन्तीति किलिड्डा मलीना विय ठिता, उपतापिता च होन्तीति अत्थो। तस्माति किलिस्सननिमित्तता। यदिपि सुरापानं पञ्चवेरभावेन उपासकेहि परिवज्जनीयं, तस्स पन अपायमुखभावेन परतो वत्तुकामताय पाणातिपातादिके एव सन्धाय “चत्तारो”ति वुत्तं, न “पञ्चा”ति। “विसुं अकम्मपथभावतो चा”ति अपरे। “सुरापानम्पि ‘सुरामेरयपानं, भिक्खवे, आसेवितं भावितं बहुलीकतं निरयसंवत्तनिक’न्तिआदि (अ० नि० ८.४०) वचनतो विसुं कम्मपथभावेन आगतं। तथा हि तं दुच्चरितकम्मं हुत्वा दुग्गतिगामिपिट्ठिवत्तकभावेन नियत”न्ति केचि, तेसं मतेन एकादस कम्मपथा सियुं। तस्मा यथावुत्तेस्वेव कम्मपथेसु उपकारकत्तसभागत्तवसेन अनुप्पवेसो दट्ठब्बोति “विसुं अकम्मपथभावतो चा”ति सुवुत्तमेतं। सुरापानस्स भोगापायमुखभावेन वत्तुकामताय “चत्तारो” त्वेव अवोच। तिड्ढति एत्थ फलं तदायत्तवुत्तितायाति ठानं, हेतूति आह “ठानेहीति कारणेही”ति। अपेन्ति अपगच्छन्ति, अपेति वा एतेहीति अपाया, अपायानं, अपाया एव वा मुखानि द्वारानीति अपायमुखानि। विनासमुखानीति एत्थापि एसेव नयो।

किञ्चापि “अरियसावकस्सा”ति पुब्बे साधारणतो वुत्तं, विसेसतो पन पठमाय भूमियं ठितस्सेव वक्खमाननयो युज्जतीति “सोति सो सोतापन्नो”ति वुत्तं। पापक-सद्धो निहीनपरियायोति “लामकेही”ति वुत्तं। अपायदुक्खं, वट्ठदुक्खञ्च पापेन्तीति वा पापका, तेहि पापकेहि। छ दिसा पटिच्छादेन्तोति तेन तेन भागेन दिस्सन्तीति “दिसा”ति सज्जिते छ भागे सत्ते यथा तेहि सद्धि अत्तनो छिदं न होति, एवं पटिच्छादेन्तो पटिसन्धारेन्तो। विजिननत्थायाति अभिभवनत्थाय। यो हि दिट्ठधम्मिकं, सम्परायिकञ्च अनत्थं परिवज्जनवसेन अभिभवति, ततो एव तदुभयत्थं सम्पादेति, सो उभयलोकविजयाय पटिपन्नो नाम होति पच्चत्थिकनिग्गणहनतो, सकत्थसम्पादनतो च। तेनाह “अयञ्चेव लोको”तिआदि। पाणातिपातादीनि पञ्च वेरानि वेरप्पसवनतो। आरद्धो होतीति संसाधितो होति, तयिदं संसाधनं कित्तिसद्देन इध सत्तानं चित्ततोसनेन, वेराभावापादनेन च होतीति आह “परितोसितो चेव निष्कादितो चा”ति। पुन पञ्च वेरानीति पञ्च वेरफलानि उत्तरपदलोपेन।

कतमस्साति कतमे अस्स। किलेससम्पयुत्तता किलेसोति तंयोगतो तंसदिसं वदति यथा “पीतिसुखं पठमं ज्ञानं, (दी० नि० १.२२६; म० नि० १.२७१, २८७, २९७; सं० नि० २.१५२; अ० नि० ४.१२३; ५.२८; पारा० ११; ध० स० ४९९; विभ० ५०८) नीलं वत्थ”न्ति च। सम्पयुत्तता चेत्थ तदेकट्ठताय वेदितब्बा, न एकुप्पादादिताय। एवञ्च कत्वा पाणातिपातकम्मस्स दिट्ठिमानलोभादीहिपि किलिड्डता सिद्धा होति, मिच्छाचारस्स दोसादीहि किलिड्डता। तेनाह “संकिलेसोयेवा”तिआदि। पुब्बे वुत्तअत्थवसेन पन सम्मुखेनपि नेसं किलेसपरियायो लब्भतेव। एतदत्थपरिदीपकमेवाति यो “पाणातिपातो खो”तिआदिना वुत्तो, एतस्स अत्थस्स परिदीपकमेव। यदि एवं कस्मा पुन वुत्तन्ति आह “गाथाबन्ध”न्ति, तस्स अत्थस्स सुखग्गहणत्थं भगवा गाथाबन्धं अवोचाति अधिप्पायो।

चतुठानादिवण्णना

२४६. “पापकम्मं करोती”ति कस्मा अयं उद्देसनिद्देसो पवत्तोति अन्तोलीनचोदनं सन्धाय “इदं भगवा”तिआदि वुत्तं। सुक्कपक्खवसेन हि उद्देसो कतो, कण्हपक्खवसेन च निद्देसो आरद्धो। कारकेति पापकम्मस्स कारके। अकारको पाकटो होति यथा पटिपज्जन्तो पापं करोति नाम, तथा अप्पटिपज्जनतो। संकिलेसधम्मविवज्जनपुब्बकं वोदानधम्मपटिपत्तिआचिक्खनं इध देसनाकोसल्लं। पठमतरं कारकं दस्सेन्तो आह यथा “वामं मुञ्च दक्खिणं गण्हा”ति

(ध० स० अट्ट० ४९८) तथा हि भगवा अट्टातिंस मङ्गलानि दस्सेन्तो “असेवना च बालान”न्ति (खु० पा० ५.३; सु० नि० २६२) वत्वा “पण्डितानञ्च सेवना”ति (खु० पा० ५.३; सु० नि० २६२) अवोच । **छन्दागति**न्ति एत्थ सन्धिवसेन सरलोपोति दस्सेन्तो आह “**छन्देन पेमेन अगति**”न्ति । **छन्दा**ति हेतुमिह निस्सक्कवचनन्ति आह “**छन्देना**”ति । छन्द-सद्वो चेत्थ तण्हापरियायो, न कुसलच्छन्दादिपरियायोति आह “**पेमेना**”ति । **परपदे**सूति “दोसागतिं गच्छन्तो”ति आदीसु वाक्येसु । “**एसेव नयो**”ति इमिना “दोसेन कोपेना”ति एवमादि अत्थवचनं अतिदिसति । **मित्तो**ति दळ्हमित्तो, सम्भत्तोति अत्थो । **सन्दिट्ठो**ति दिट्ठमत्तसहायो । **पकतिवेरवसेना**ति पकतिया उप्पन्नवेरवसेन, चिरकालानुबन्धविरोधवसेनाति अत्थो । तेनेवाह “**तद्धुणुप्पन्नकोधवसेन वा**”ति । **यं वा तं वा** अयुत्तं अकारणं वत्वा । विसमे चोरादिके, विसमानि वा कायदुच्चरितादीनि समादाय वत्तनेन निस्सितो **विसमनिस्सितो** ।

छन्दागतिआदीनि न गच्छति मग्गेनेव चतुन्नम्पि अगतिगमनानं पहीनत्ता, **अगतिगमनानीति** च तथापवत्ता अपायगमनीया अकुसलचित्तुप्पादा वेदितब्बा अगति गच्छति एतेहीति ।

यस्सति तेन कित्तीयतीति **यसो**, थुतिघोसो । यस्सति तेन पुरेचरानुचरभावेन परिवारीयतीति **यसो**, परिवारोति आह “**कित्तियसोपि परिवारयसोपी**”ति । **परिहायतीति** पुब्बे यो च यावतके लब्धति, ततो परितो हायति परिक्खयं गच्छति ।

छअपायमुखादिवण्णना

२४७. पूवे भाजने पक्खिपित्वा तज्जं उदकं दत्वा मद्धित्वा कता **पूवसुरा** । एवं सेससुरापि । **किण्णा**ति पन तस्सा सुराय बीजं वुच्चति, ये “सुरामोदका” तिपि वुच्चन्ति, ते पक्खिपित्वा कता **किण्णपक्खित्ता** । हरीतकीसासपादिनानासम्भारेहि संयोजिता **सम्भारसंयुत्ता** । मधुकतालनाळिकेरादिपुप्फरसो चिरपारिवासिको **पुप्फासवो** । पनसादिफलरसो **फलासवो** । मुद्दिकारसो **मध्वासवो** । उच्छुरसो **गुळासवो** । हरीतकामलककटुकभण्डादिनानासम्भारानं रसो चिरपारिवासिको **सम्भारसंयुत्तो** । **तं सब्बम्पीति** तं सब्बं दसविधम्पि । **मदकरणवसेन मज्जं** पिवन्तं मदयतीति कत्वा । सुरामेरयमज्जे पमादट्ठानं **सुरामेरयमज्जपमादट्ठानं** । **अनु अनु योगोति** पुनप्पुनं तंसमङ्गिता । तेनाह “**पुनप्पुनं करण**”न्ति, अपरापरं पवत्तनन्ति अत्थो । **उप्पन्ना चेव भोगा परिहायन्ति** पानव्यसनेन व्यसनकरणतो । **अनुप्पन्ना च नुप्पज्जन्ति** पमत्तस्स कम्मन्तेसु जायकरणाभावतो । **भोगानन्ति** भुज्जितव्वट्ठेन “**भोगा**”ति लद्धनामानं कामगुणानं । अपायमुख-सद्वस्स अत्थो हेट्ठा वुत्तो एव । **अवेलायाति** अयुत्तवेलाय । यदा विचरतो अत्थरक्खादयो न होन्ति । **विसिखासु चरियाति** रच्छासु विचरणं ।

समज्जा वुच्चति महो, यत्थ नच्चाणिपि पयोजीयन्ति, तेसं दस्सनादिअत्थं तत्थ अभिरतिवसेन चरणं उपगमनं **समज्जाभिचरणं** । **नच्चादिदस्सनवसेनाति** नच्चादीनं दस्सनादिवसेनाति आदिसद्वलोपो दट्ठब्बो, दस्सनेन वा सवनम्पि गहितं विरूपेकसेसनयेन । आलोचनसभावताय वा पञ्चविज्जाणानं सवनकिरियायपि दस्सनसङ्खेपसम्भवतो “**दस्सनवसेन**” इच्चेव वुत्तं । इध चित्तालसियता अकारणन्ति “**कायालसियता**”ति वुत्तं । **युत्तप्पयुत्तताति** तप्पसुतता अतिरेकतरताय ।

सुरामेरयस्स छआदीनवादिवण्णना

२४८. सयं दट्ठब्बन्ति **सन्दिट्ठं** । सन्दिट्ठमेव **सन्दिट्ठिकं**, धनजानिसद्दापेक्खाय पन इत्थिलिङ्गवसेन निद्वेसो,

दिदुधम्मिकाति अयमेत्थ अत्थोति आह “**इधलोकभाविनी**”ति । समं, सम्मा पस्सितब्बाति वा **सन्दिट्टिका**, पानसमकालभाविनीति अत्थो । **कलहप्पवड्डनी** मित्तस्स कलहे अनादीनवदस्सिभावतो । **खेत्तं** उप्पत्तिट्ठानभावतो । **आयतनन्ति** वा कारणं, आकरो वाति अत्थो । **परलोके अकित्तिं पापुणन्ति** अकित्तिसंवत्तनियस्स कम्मस्स पसवनतो । **कोपीनं** वा पाकटभावेन अकत्तब्बरहस्सकम्मं । सुरामदमत्ता च पुब्बे अत्तना कतं तादिसं कम्मं अमत्तकाले छादेन्ता विचरित्वा मत्तकाले पच्चत्थिकानम्पि विवरन्ति पाकटं करोन्ति, तेन तेसं सा सुरा तस्स कोपीनस्स निदंसनतो “**कोपीननिदंसनी**”ति वुच्चतीति एवमेत्थ अत्थो दट्ठब्बो । **कम्मस्सकतापज्जन्ति** निदस्सनमत्तं दट्ठब्बं । “यं किञ्चि लोकियं पज्जं दुब्बलं करोतियेवा”ति हि सक्का विज्जातुं । तथा हि ब्यतिरेकमुखेन तमत्थं पतिट्ठपेतुं “**मग्गपज्जं पना**”तिआदि वुत्तं । “**अन्तोमुखमेव न पविसती**”ति इमिना सुराय मग्गपज्जादुब्बलकरणस्स दुरसमुस्सारितभावमाह । ननु चेवं सुराय तस्सा पज्जाय दुब्बलीकरणे सामत्थियविघातो अचोदितो होति अरियानं अनुप्पयोगस्सेव चोदितत्ताति? नयिदं एवं उपयोगोपि नाम सदा तेसं नत्थि, कुतो किच्चकरणन्ति इमस्स अत्थस्स वुत्तत्ता । अथ पन अट्ठानपरिकप्पवसेनस्सा कदाचि सिया उपयोगो, तथापि सो तस्सा दुब्बलियं ईसकम्पि कातुं नालमेव सम्मदेव पटिपक्खदूरीभावेन सुप्पत्तिट्ठितभावतो । तेनाह “मग्गपज्जं पन दुब्बलं कातुं न सक्कोती”ति । मग्गसीसेन चेत्य अरियानं सब्बस्सापि लोकियलोकुत्तराय पज्जाय दुब्बलभावापादाने असमत्थता दस्सिताति दट्ठब्बं । पज्जति एतेन फलन्ति **पदं**, कारणं ।

२४९. अत्तापिस्स अकालचारिस्स **अगुत्तो** सरसतो **अरक्खितो** उपक्कमतोपि परिवज्जनीयानं अपरिवज्जनतो । तेनाह “**अवेलाय चरन्तो ही**”तिआदि । **कण्टकादीनिपीति पि-**सद्देन सोब्भादिके सङ्गण्हाति । **वेरिनोपीति पि-**सद्देन चोरादिका सङ्गहन्ति । **पुत्तदाराति** एत्थ पुत्तग्गहणेन पुत्तीपि गहिताति आह “**पुत्तधीतरो**”ति । **बहि पत्थनन्ति** कामपत्थनावसेन अन्तोगेहस्सिततो निबद्धवत्थुतो बहिद्भा पत्थनं कत्वा । **अज्जेहि कतपापकम्मेसूति** परेहि कतासु पापकिरियासु । **सङ्कितब्बो होति** अकाले तत्थ तत्थ चरणतो । **रुहति** यस्मिं पदेसे चोरिका पवत्ता, तत्थ परेहि दिट्ठत्ता । **वत्तुं न सक्काति** “एत्तकं दुक्खं, एत्तकं दोमनस्स”न्ति परिच्छिन्दित्वा वत्तुं न सक्का । **तं सब्बम्पि विकालचारिम्हि** पुग्गले **आहरितब्बं** तस्स उपरि पक्खिपितब्बं होति । कथं? **अज्जस्मिं पुग्गले** तथारूपे आसङ्कितब्बे **असति** । इतीति एवं । **सोति** विकालचारी । **पुरक्खतो** पुरतो अत्तनो उपरि आसङ्कन्ते कत्वा चरति ।

२५०. नटनाटकादिनच्चन्ति नटेहि नाटकेहि नच्चितब्बनाटकादिनच्चविधि । **आदि-**सद्देन अवसिट्ठं सब्बं सङ्गण्हाति । “तत्थ गन्तब्बं होती”ति वत्वा तत्थस्स गमनेन यथा अनुप्पन्नानं भोगानं अनुप्पादो, उप्पन्नानञ्च विनासो होति, तं दस्सेतुं “**तस्सा**”तिआदि वुत्तं । **गीतन्ति** सरगतं, पकरणगतं, ताळगतं, अपधानगतन्ति गन्धब्बसत्थविहितं अज्जम्पि सब्बं गीतं वेदितब्बं । **वादितन्ति** वीणावेणुमुदिङ्गादिवादनं । **अक्खानन्ति** भारतयुद्धसीताहरणादिअक्खानं । **पाणिस्सरन्ति** कंसताळं, “पाणिताळ”न्तिपि वदन्ति । **कुम्भथूनन्ति** चतुरस्सअम्बणकताळं । “कुटभेरिसद्दो”ति केचि । “**एसेव नयो**”ति इमिना “कस्मिं ठाने”तिआदिना नच्चे वुत्तमत्थं गीतादीसु अतिदिसति ।

२५१. जयन्ति जूतं जिनन्तो । **वेरन्ति** जितेन कीळकपुरिसेन जयनिमित्तं अत्तनो उपरि वेरं विरोधं **पसवति** उप्पादेति । तज्जिस्स वेरपसवनं दस्सेतुं “**जितं मया**”तिआदि वुत्तं । **जिनोति** जूतपराजयापन्नाय धनजानिया जिनो । तेनाह “**अज्जेन जितो समानो**”तिआदि । **वित्तं अनुसोचतीति** तं जिनं वित्तं उद्दिस्स अनुत्थुनति । **विनिच्छयट्ठानेति** यस्मिं किस्मिञ्च अट्ठविनिच्छयट्ठाने । **सक्खिपुट्टस्साति** सक्खिभावेन पुट्टस्स । **अक्खसोण्डोति** अक्खधुत्तो । **जूतकरोति** जूतपमादट्ठानानुयुत्तो । **त्वम्पि नाम कुलपुत्तोति** कुलपुत्तो नाम त्वं, न मयं तयि कोलपुत्तियं इदानी पस्सामाति अधिप्पायो ।

छिन्नभिन्नकोति छिन्नभिन्नहिरोत्तप्पो, अहिरिको अनोत्तप्पीति अत्थो। तस्स कारणाति तस्स अत्थाय।

अनिच्छितोति न इच्छितो। पोसितब्बा भविस्सति जूतपराजयेन सब्बकालं रित्ततुच्छभावतो।

पापमित्तताय छआदीनवादिवण्णना

२५२. अक्खधुत्ताति अक्खेसु धुत्ता, अक्खनिमित्तं अत्थविनासका। इत्थिसोण्डाति इत्थीसु सोण्डा, इत्थिसम्भोगनिमित्तं आतप्पनका। तथा भत्तसोण्डादयो वेदितब्बा। पिपासाति उपरूपरि सुरापिपासा। तेनाह “पानसोण्डा”ति। नेकतिकादयो हेट्ठा वुत्ता एव। मत्तिउप्पत्तिट्ठानताय मित्ता होन्ति। तस्माति पापमित्तताय।

२५३. कम्मन्तन्ति कम्मं, यथा सुत्तयेव सुत्तन्तो, एवं कम्मयेव कम्मन्तो, तं कातुं गच्छामाति वुत्तो। कम्मं वा अन्तो निट्ठानं गच्छति एत्थाति कम्मन्तो, कम्मकरणट्ठानं, तं गच्छामाति वुत्तो।

पन्नसखाति सुरं पातुं पन्ने पटिपज्जन्ते एव सखाति पन्नसखा। तेनाह “अयमेवत्थो”ति। “सम्मियसम्मियो”ति वचनमेत्थ अत्थीति सम्मियसम्मियो। तेनाह “सम्मसम्माति वदन्तो”ति। सहायो होतीति सहायो विय होति। ओतारमेव गवेसतीति रन्धमेव परियेसति अनत्थमस्स कातुकामो। वेरप्पसवोति परेहि अत्तनि वेरस्स पसवनं अनुपवत्तनं। तेनाह “वेरबहुलता”ति। परेसं करियमानो अनत्थो एत्थ अत्थीति अनत्थो, तब्भावो अनत्थताति आह “अनत्थकारिता”ति। यो हि परेसं अनत्थं करोति, सो अत्थतो अत्तनो अनत्थकारो नाम, तस्मा अनत्थताति उभयानत्थकारिता। अरियो वुच्चति सत्तो, कुच्छितो अरियो कदरियो। यस्स धम्मस्स वसेन सो “कदरियो”ति वुच्चति, सो धम्मो कदरियता, मच्छरियं। तं पन दुब्बिसज्जनीयभावे ठितं सन्धायाह “सुट्ठु कदरियता थद्धमच्छरियभा”वोति। अविपण्णसभावतो उट्ठातुं असक्कोन्तो च इणं गण्हन्तो संसीदन्तोव इणं विगाहति नाम। सूरिये अनुगते एव कम्मन्ते अनारभन्तो रत्तिं अनुट्ठानसीलो।

अत्थाति धनानि। अतिक्कमन्तीति अपगच्छन्ति। अथ वा अत्थाति किच्चानि। अतिक्कमन्तीति अतिक्कन्तकालानि होन्ति, तेसं अतिक्कमोपि अत्थतो धनानमेव अतिक्कमो। इमिना कथामग्गेनाति इमिना “यतो खो गहपतिपुत्ता”तिआदि (दी० नि० ३.२४४) नयप्पवत्तेन कथासङ्घातेन हिताधिगमूपायेन। एत्तकं कम्मन्ति चत्तारो कम्मकिलेसा, चत्तारि अगतिगमनानि, छ भोगानं अपायमुखानीति एवं वुत्तं चुट्सविधं पापकम्मं।

मित्तपतिरूपकवण्णना

२५४. अनत्थोति “भोगजानि, आयसक्यं, परिसमज्झे मङ्कुभावो, सम्मूळ्हमरण”न्ति एवं आदिको दिट्ठधम्मिको “दुग्गतिपरिकिलेसो, सुगतियज्ज अप्पायुकता, बह्वाबाधता, अतिदलिहता, अप्पन्नपानता”ति एवं आदिको च अनत्थो उप्पज्जति। यानि कानिचि भयानीति अत्तानुवादभयपरानुवादभयदण्डभयादीनि लोके लब्धमानानि यानि कानिचि भयानि। उपइवाति अन्तराया। उपसग्गाति सरीरेन संसट्ठानि विय उपरूपरि उप्पज्जनकानि ब्यसनानि। अज्जदत्थूति एकन्तेनाति एतस्मिं अत्थे निपातो “अज्जदत्थुदसो”तिआदीसु (दी० नि० १.४२) वियाति वुत्तं “एकंसेना”ति। यं किञ्चि गहणयोग्यं हरतियेव गण्हतियेव। वाचा एव परमा एतस्स कम्मन्ति वचीपरमो। तेनाह “वचनमत्तेनेवा”तिआदि। अनुप्पियन्ति तक्कनं, यं वा “रुची”ति वुच्चति येहि सुरापानादीहि भोगा अपेन्ति विगच्छन्ति, तेसु तेसं अपायेसु ब्यसनहेतूसु सहायो होति।

२५५. हारकोयेव होति, न दायको, तमस्स एकंसतो हारकभावं दस्सेतुं “सहायस्सा”तिआदि वुत्तं। यं किञ्चि अप्पकन्ति पुप्फफलादि यं किञ्चि परित्तं वत्थुं दत्त्वा, बहुं पत्थेति बहुं महग्घं वत्थयुगादिं पच्चासीसति। दासो विय हुत्वा मित्तस्स तं तं किच्चं करोन्तो कथं अमित्तो नाम जातोति आह “अय”न्तिआदि। यस्स किच्चं करोति अनत्थपरिहारत्थं, अत्तनो मित्तभावदस्सनत्थञ्च, तं सेवति। अत्थकारणाति वड्ढिनिमित्तं, अयमेतेसं भेदो।

२५६. परेति परदिवसे। न आगतो सीति आगतो नाहोसि। खीणन्ति तादिसस्स, असुकस्स च दिन्नत्ता। सस्ससङ्गहेति सस्सतो कातब्बधज्जसङ्गहे कते।

२५७. “दानादीसु यं किञ्चि करोमा”ति वुत्ते “साधु सम्म करोमा”ति अनुजानातीति इममत्थं “कल्याणेपि एसेव नयो”ति अतिदिसति। ननु एवं अनुजानन्तो अयं मित्तो एव, न अमित्तो मित्तपतिरूपकोति? अनुप्पियभाणीदस्सनमत्तमेतं। सहायेन वा देसकालं, तस्मिं वा कते उप्पज्जनकविरोधादिं असल्लक्खेत्त्वा “करोमा”ति वुत्ते यो तं जानन्तो एव “साधु सम्म करोमा”ति अनुप्पियं भणति, तं सन्धाय वुत्तं “कल्याणं पिस्स अनुजानाती”ति। तेन वुत्तं “कल्याणेपि एसेव नयो”ति।

२५९. मित्तपतिरूपका एते मित्ताति एवं जानित्वा।

सुहदमित्तवण्णना

२६०. सुन्दरहदयाति पेमस्स अत्थिवसेन भद्दचित्ता।

२६१. पमत्तं रक्खतीति एत्थ पमादवसेन किञ्चि अयुत्ते कते तादिसे काले रक्खणं “भीतस्स सरणं होती”ति इमिनाव तं गहितन्ति ततो अज्जमेव पमत्तस्स रक्खणविधिं दस्सेतुं “मज्जं पिवित्वा”तिआदि वुत्तं। गेहे आरक्खं असंविहितस्स बहिगमनम्पि पमादपक्खिकमेवाति “सहायो बहिगतो वा होती”ति वुत्तं। भयं हरन्तोति भयं पटिबाहन्तो। भोगहेतुताय फलूपचारेन धनं “भोग”न्ति वदति। किच्चकरणीयेति खुद्दके, महन्ते च कातब्बे उप्पन्ने।

२६२. निगूहितुं युत्तकथन्ति निगूहितुं छादेतुं युत्तकथं, निगूहितुं वा युत्ता कथा एतस्साति निगूहितुं युत्तकथं, अत्तनो कम्मं। रक्खतीति अनाविकरोन्तो छादेति। जीवितम्पीति पि-सद्देन किमङ्गं पन अज्जं परिग्गहितवत्थुन्ति दस्सेति।

२६३. पस्सन्तेसु पस्सन्तेसूति आमेडितवचनेन निवारियमानस्स पापस्स पुनप्पुनं करणं दीपेति। पुनप्पुनं करोन्तो हि पापतो विसेसेन निवारेतब्बो होति। सरणेसूति सरणेषु वत्तस्सु अभिन्नानि कत्त्वा पटिपज्ज, सरणेषु वा उपासकभावेन वत्तस्सु। निपुणन्ति सण्हं। कारणन्ति कम्मस्सकतादिभेदयुत्तं। इदं कम्मन्ति इमं दानादिभेदं कुसलकम्मं। “कम्म”न्ति साधारणतो वुत्तस्सापि तस्स “सग्गे निब्बत्तन्ती”ति पदन्तरसन्निधानेन सद्भाहिरोत्तप्पालोभादिगुणधम्मसमङ्गिता विय कुसलभावो जोतितो होति। सद्भादयो हि धम्मा सग्गगामिमग्गो। यथाह —

“सद्भा हिरियं कुसलञ्च दानं,
धम्मा एते सप्पुरिसानुयाता।
एतज्झि मग्गं दिवियं वदन्ति,
एतेन हि गच्छति देवलोक”न्ति॥ (अ० नि० ८.३२)।

२६४. भवनं सम्पत्तिवद्भूतं भवोति अत्थो, तप्पटिक्खेपेन अभवोति आह “अभवेन अवुद्धिया”ति। पारिजुञ्जन्ति जानि। अनत्तमनो होतीति अत्तमनो न होति अनुकम्पकभावतो। अञ्जदत्थु तं अभवं अत्तनि आपतितं विय मज्जति। इदानीं तं भवं सरूपतो दस्सेतुं “तथारूप”न्तिआदि वुत्तं। विरूपोति बीभच्छो। न पासादिकोति तस्सेव वेवचनं। सुजातोति सुन्दरजातिको जातिसम्पन्नो।

२६५. जलन्ति जलन्तो। अग्गीवाति अगिक्खन्धो विय। भासतीति विरोचति। यस्मास्स भगवता सविसेसं विरोचनं लोके पाकटभावञ्च दस्सेतुं “जलं अग्गीव भासती”ति वुत्तं, तस्मा यदा अग्गि सविसेसं विरोचति, यत्थ च ठितो दूरे ठितानम्पि पज्जायति, तं दस्सनादिवसेन तमत्थं विभावेतुं “रत्ति”न्तिआदि वुत्तं।

“भमरस्सेव इरीयतो”ति एतेनेवस्स भोगसंहरणं धम्मिकं जायोपेतन्ति दस्सेन्तो “अत्तानम्पी”तिआदिमाह। रासिं करोन्तस्साति यथास्स धनधज्जादिभोगजातं सम्पिण्डितं रासिभूतं हुत्वा तिष्ठति, एवं इरीयतो आयूहन्तस्स च। चक्कप्पमाणन्ति रथचक्कप्पमाणं। निचयन्ति वुद्धिं परिवुद्धिं। “भोगा सन्निचयं यन्ती”ति केचि पठन्ति।

समाहत्वाति संहरित्वा। अलं-सद्दो “अलमेव सब्बसङ्खारेसु निब्बिन्दितुं, अलं विरज्जितुं”न्तिआदीसु (दी० नि० २.२७२; सं० नि० २.१२४, १२९, १३४, १४३) युत्तन्ति इममत्थं जोतेति, “अलमरियजाणदस्सनविसेस”न्तिआदीसु (म० नि० १.३२८) परियत्तन्ति। यो वेठितत्तोतिआदीसु (सु० नि० २१७) विय अत्त-सद्दो सभावपरियायोति तं सब्बं दस्सेन्तो “युत्तसभावो”तिआदिमाह। सण्ठपेतुन्ति सम्मा ठपेतुं, सम्मदेव पवत्तेतुन्ति अत्थो।

एवं विभजन्तोति एवं वुत्तनयेन अत्तनो धनं चतुधा विभजन्तो विभजनहेतु मित्तानि गन्थति सोळस कल्याणमित्तानि मेत्ताय अजीरापनेन पबन्धति। तेनाह “अभेज्जमानानि ठपेती”ति। कथं पन वुत्तनयेन चतुधा भोगानं विभजनेन मित्तानि गन्थतीति आह “यस्स ही”तिआदि। तेनाह भगवा “ददं मित्तानि गन्थती”ति (सं० नि० १.२४६)। भुज्जेय्याति उपभुज्जेय्य, उपयुज्जेय्य चाति अत्थो। समणब्राह्मणकपण्डिकादीनं दानवसेन चेव अधिवत्थदेवतादीनं पेतबलिवसेन, न्हापितादीनं वेतनवसेन च विनियोगोपि उपयोगो एव। तथा हि वक्खति “इमेसु पना”तिआदि आयो नाम हेट्ठिमन्तेन वयतो चतुगुणो इच्छितब्बो, अञ्जथा वयो अविच्छेदवसेन न सन्तानेय्य, निधेय्य, भाजेय्य च असम्भतेति वुत्तं “द्वीहि कम्मं पयोजये”ति। निधेत्वाति निदहित्वा, भूमिगतं कत्वाति अत्थो। राजादिवसेनाति आदि-सद्देन अग्गिउदकचोरदुब्धिक्खादिके सङ्गण्हाति। न्हापितादीनन्ति आदि-सद्देन कुलालरजकादीनं सङ्गहो।

छद्दिसापटिच्छादनकण्डवण्णना

२६६. चतूहि कारणेहीति न छन्दगमनादीहि चतूहि कारणेहि। अकुसलं पहायाति “चत्तारो कम्मकिलेसा”ति वुत्तं अकुसलञ्चेव अगतिगमनाकुसलञ्च पजहित्वा। छहि कारणेहीति सुरापानादीसु आदीनवदस्सनसङ्घातेहि छहि कारणेहि। सुरापानानुयोगादिभेदं छब्धिधं भोगानं अपायमुखं विनासमुखं वज्जेत्वा। सोळस मित्तानीति उपकारादिवसेन चत्तारो, पमत्तरक्खणादिकिच्चविसेसवसेन पच्चेकं चत्तारो चत्तारो कत्वा सोळसविधे कल्याणमित्ते सेवन्तो भजन्तो। सत्थवाणिज्जादिमिच्छाजीवं पहाय जायेनेव वत्तनतो धम्मिकेन आजीवेन जीवति। नमस्सितब्बाति उपकारवसेन, गुणवसेन च नमस्सितब्बा सब्बदा नतेन हुत्वा वत्तितब्बा। दिसा-सद्दस्स अत्थो हेट्ठा वुत्तो एव। आगमनभयन्ति तत्थ सम्मा अप्पटिपत्तिया, मिच्छापटिपत्तिया च उप्पज्जनकअनत्थो। सो हि भायन्ति एतस्माति “भय”न्ति वुच्चति। येन कारणेन मातापितुआदयो पुरत्थिमादिभावेन अपदिट्ठा, तं दस्सेतुं “पुब्बुपकारिताया”तिआदि वुत्तं, तेन अत्थसरिक्खताय नेसं

पुरत्थिमादिभावोति दस्सेति । तथा हि मातापितरो पुत्तानं पुरत्थिमभावेन ताव उपकारिभावेन दिस्सनतो, अपदिस्सनतो च पुरत्थिमा दिसा । आचरिया अन्तेवासिकस्स दक्खिणभावेन, हिताहितं पतिकुसलभावेन दक्खिणारहताय च वुत्तनयेन दक्खिणा दिसा । इमिना नयेन “**पच्छिमा दिसा**”तिआदीसु यथारहं अत्थो वेदितब्बो । घरावासस्स दुक्खबहुलताय ते ते च किच्चविसेसा यथाउप्पतितदुक्खनित्थरणत्थाति वुत्तं “**ते ते दुक्खविसेसे उत्तरती**”ति । यस्मा दासकम्मकरा सामिकस्स पादानं पथिरुपासनवसेन चेव तदनुच्छविककिच्चसाधनवसेन च येभ्य्येन सन्तिकावचरा, तस्मा वुत्तं “**पादमूले पतिट्ठानवसेना**”ति । गुणेहीति उपरिभावावहेहि गुणेहि । **उपरि ठितभावेना**ति सग्गमग्गे मोक्खमग्गे च पतिट्ठितभावेन ।

२६७. भतोति पोसितो, तं पन भरणं जातकालतो पट्टाय सुखपच्चयूपहरणेन दुक्खपच्चयापहरणेन च तेहि पवत्तितन्ति दस्सेतुं “**थज्जं पायेत्वा**”तिआदि वुत्तं । **जग्गितो**ति पटिजग्गतो । तेति मातापितरो ।

मातापितूनं सन्तकं खेत्तादिं अविनासेत्वा रक्खितं तेसं परम्पराय ठितिया कारणं होतीति “**तं रक्खन्तो कुलवंसं सण्ठपेति नामा**”ति वुत्तं । **अधम्मिकवंसतो**ति “कुलप्पदेसादिना अत्तना सदिसं एकं पुरिसं घटेत्वा वा गीवायं वा हत्थे वा बन्धमणियं वा हारेतब्ब”न्ति एवं आदिना पवत्तअधम्मिकपवेणितो । **हारेत्वा**ति अपनेत्वा तं गाहं विस्सज्जापेत्वा । मातापितरो ततो गाहतो विवेचनेनेव हि आयतिं तेसं परम्पराहारिका सिया । **धम्मिकवंसे**ति हिंसादिविरतिया धम्मिके वंसे धम्मिकाय पवेणियं । **ठपेन्तो**ति पतिट्ठपेन्तो । **सलाकभत्तादीनि अनुपच्छिन्दित्वा**ति सलाकभत्तदानादीनि अविच्छिन्दित्वा ।

दायज्जं पटिपज्जामीति एत्थ यस्मा दायपटिलाभस्स योग्यभावेन वत्तमानोयेव दायज्जं पटिपज्जति नाम, न इतरो, तस्मा तमत्थं दस्सेतुं “**मातापितरो**”तिआदि वुत्तं । **दारके**ति पुत्ते । **विनिच्छयं पत्वा**ति “पुत्तस्स चजविस्सज्जन”न्ति एवं आगतं विनिच्छयं आगम्म । **दायज्जं पटिपज्जामी**ति वुत्तन्ति “दायज्जं पटिपज्जामी” ति इदं चतुत्थं वत्तनट्ठानं वुत्तं । तेसन्ति मातापितूनं । **ततियदिवसतो पट्टाया**ति मतदिवसतो ततियदिवसतो पट्टाय ।

पापतो निवारणं नाम अनागतविसयं । सम्पत्तवत्थुतोपि हि निवारणं वीतिक्कमे अनागते एव सिया, न वत्तमाने । निब्बत्तिता पन पापकिरिया गरहणमत्तपटिकाराति आह “**कतप्पि गरहन्ती**”ति । **निवेसेन्ती**ति पतिट्ठपेन्ति । वुत्तप्पकारा मातापितरो अनवज्जमेव सिप्पं सिक्खापेन्तीति वुत्तं “**मुद्दागणनादिसिप्प**”न्ति । **रूपादीहीति आदि-**सद्देन भोगपरिवारादिं सङ्गणहाति । **अनुरूपेना**ति अनुच्छविकेन ।

निच्चभूतो समयो अभिण्हकरणकालो । अभिण्हत्थो हि अयं निच्च-सद्दो “निच्चपहंसितो निच्चपहट्ठो”तिआदीसु विय । युत्तपत्तकालो एव समयो **कालसमयो** । “**उट्ठाय समुट्ठाय**”ति इमिनास्स निच्चमेव दाने तेसं युत्तपयुत्ततं दस्सेति । **सिखाठपनं** दारककाले । **आवाहविवाहं** पुत्तधीतूनं योब्बनप्पत्तकाले ।

तं भयं यथा नागच्छति, एवं पिहिता होति “पुरत्थिमा दिसा”ति विभत्तिं परिणामेत्वा योजना । यथा पन तं भयं आगच्छेय्य, यथा च नागच्छेय्य, तदुभयं दस्सेतुं “**सचे ही**”तिआदि वुत्तं । **विप्पटिपन्ना**ति “भतो ने भरिस्सामी”तिआदिना उत्तसम्मापटिपत्तिया अकरणेन चेव तप्पटिपक्खमिच्छापटिपत्तिया अकरणेन च विप्पटिपन्ना **पुत्ता अस्सु** । **एतं भयन्ति** एतं “**मातापितूनं अप्पतिरूपा**ति विज्जूनं गरहितब्बताभयं, परवादभय”न्ति एवमादि **आगच्छेय्य** पुत्तेसु । **पुत्तानं नानुरूपा**ति एत्थ “पुत्तान”न्ति पदं एतं भयं पुत्तानं आगच्छेय्याति एवं इधापि आनेत्वा सम्बन्धितब्बं । तादिसानज्झि मातापितूनं पुत्तानं ओवादानुसासनियो दातुं समत्थकालतो पट्टाय ता तेसं दातब्बा एवाति कत्वा तथा वुत्तं । पुत्तानज्झि वसेनायं देसना अनागता **सम्मापटिपन्नेसु** उभोसु अत्तनो, मातापितूनञ्च वसेन उप्पज्जनकताय **सब्बं भयं न होति**

सम्मापटिपन्नत्ता । एवं पटिपन्नत्ता एव **पटिच्छन्ना** होति तत्थ कातब्बपटिसन्धारस्स सम्मदेव कतत्ता । **खेमाति** अनुपदवा । यथावुत्तसम्मापटिपत्तिया अकरणेन हि उप्पज्जनकउपदवा करणेन न होन्तीति ।

“न खो ते”तिआदिना वुत्तो सङ्गीतिअनारुळ्हो भगवता तदा तस्स वुत्तो परम्परागतो अत्थो वेदितब्बो । तेनाह **“भगवा सिङ्गालकं एतदवोचा”**ति । अयञ्हीति एत्थ हि-सद्दो अवधारणे । तथा हि **“नो अज्जा”**ति अज्जदिसं निवत्तेति ।

२६८. आचरियं दूरतोव दिस्वा उट्टानवचनेनेव तस्स पच्चुग्गमनादिसामीचिकिरिया अवुत्तसिद्धाति तं दस्सेन्तो **“पच्चुग्गमनं कत्वा”**तिआदिमाह । **उपट्टानेनाति** पयिरुपासनेन । **तिक्खत्तुंउपट्टानगमनेनाति** पातो, मज्झन्हिके, सायन्ति तीसु कालेसु उपट्टानत्थं उपगमनेन । सिप्पुग्गहणत्थं पन उपगमनं उपट्टानन्तो गधं पयोजनवसेन गमनभावतोति आह **“सिप्पुग्गहण...पे०... होती”**ति । सोतुं इच्छा **सुसूसा**, सा पन आचरिये सिक्खितब्बसिक्खे च आदरगारवपुब्बिका इच्छितब्बा **“अद्वा इमिना सिप्पेन सिक्खितेन एवरूपंगुणं पटिलभिस्सामी”**ति । तथाभूतञ्च तं सवनं सद्वापुब्बङ्गमं होतीति आह **“सद्दहित्वा सवनेना”**ति । वुत्तमेवत्थं ब्यतिरेकवसेन दस्सेतुं **“असद्दहित्वा...पे०... नाधिगच्छती”**ति वुत्तं । तस्मा तस्सत्थो वुत्तपटिपक्खनयेन वेदितब्बो । यं सन्धाय **“अवसेसखुद्दकपारिचरियाया”**ति वुत्तं, तं विभजनं अनवसेसतो दस्सेतुं **“अन्तेवासिकेन ही”**तिआदि वुत्तं । **पच्चुपट्टानादीनीति आदि-**सद्देन आसनपज्जापनं बीजनन्ति एवमादिं सङ्गण्हाति । **अन्तेवासिकवत्तन्ति** अन्तेवासिकेन आचरियम्हि सम्मावत्तितब्बवत्तं । **सिप्पपटिग्गहणेनाति** सिप्पगन्थस्स सक्कच्चं उग्गहणेन । तस्स हि सुट्ठु उग्गहणेन तदनुसारेनस्स पयोगोपि सम्मदेव उग्गहितो होतीति । तेनाह **“थोकं गहेत्वा”**तिआदि ।

सुविनीतं विनेन्तीति इध आचारविनयो अधिप्पेतो । सिप्पस्मिं पन सिक्खापनविनयो **“सुग्गहितं गाहापेन्ती”**ति इमिनाव सङ्गहितोति वुत्तं **“एवं ते निसीदितब्ब”**न्तिआदि । आचरिया हि नाम अन्तेवासिके न दिट्ठधम्मिके एव विनेन्ति, अथ खो सम्परायिकेपीति आह **“पापमिता वज्जेतब्बा”**ति । सिप्पगन्थस्स उग्गहणं नाम यावदेव पयोगसम्पादनत्थन्ति आह **“पयोगं दस्सेत्वा गण्हापेन्ती”**ति । **मित्तामच्चेसूति** अत्तनो मित्तामच्चेसु । **पटियादेन्तीति** परिग्गहेत्वा नं ममत्तवसेन पटियादेन्ति । **“अयं अम्हाकं अन्तेवासिको”**तिआदिना हि अत्तनो परिग्गहितदस्सनमुखेन चेव **“बहुस्सुतो”**तिआदिना तस्स गुणपरिग्गहणमुखे च तं तेसं पटियादेन्ति । **सब्बदिसासु रक्खं करोन्ति** चातुद्दिसभावसम्पादनेनस्स सब्बत्थ सुखजीविभावसाधनतो । तेनाह **“उग्गहितसिप्पो ही”**तिआदि । सत्तानज्झि दुविधा सरीररक्खा अब्भन्तरपरिस्सयपटिघातेन, बाहिरपरिस्सयपटिघातेन च । तत्थ **अब्भन्तरपरिस्सयो** खुप्पिपासादिभेदो, सो लाभसिद्धिया पटिहज्जति ताय तज्जापरिहारसंविधानतो । **बाहिरपरिस्सयो** चोरअमनुस्सादिहेतुको, सो विज्जासिद्धिया पटिहज्जति ताय तज्जापरिहारसंविधानतो । तेन वुत्तं **“यं यं दिस”**न्तिआदि ।

पुब्बे **“उग्गहितसिप्पो ही”**तिआदिना सिप्पसिक्खापनेनेव लाभुप्पत्तिया दिसासु परित्ताणकरणं दस्सितं, इदानीं **“यं वा सो”**तिआदिना तस्स उग्गहितसिप्पस्स निष्फत्तवसेन गुणकित्तनमुखेन पग्गहणेनपि लाभुप्पत्तियाति अयमेतेसं विकप्पानं भेदो । **सेसन्ति** **“पटिच्छन्ना होती”**तिआदिकं पाळिआगतं, **“एवञ्च पन वत्वा”**तिआदिकं अट्ठकथागतञ्च । **एत्थाति** एतस्मिं दुतियदिसावारे । **पुरिमनयेनेवाति** पुब्बे पठमदिसावारे वुत्तनयेनेव ।

२६९. **सम्मानना** नाम सम्भावना, सा पन अत्थचरियालक्खणा च दानलक्खणा च चतुत्थपञ्चमट्टानेहेव सङ्गहिताति पियवचनलक्खणं तं दस्सेतुं **“सम्भावितकथाकथनेना”**ति वुत्तं । विगतमानना **विमानना**, न विमानना **अविमानना**, विमाननाय अकरणं । तेनाह **“यथा दासकम्मकरादयो”**तिआदि । सामिकेन हि विमानितानं इत्थीनं सब्बो परिजनो

विमानेतिथेव । परिचरन्तीति इन्द्रियाणि परिचरन्तो । तं अतिचरति नाम तं अत्तनो गिहिनिं अतिमज्जित्वा अगणेत्वा वत्तनतो । इस्सरियवोस्सग्गेनाति एत्थ यादिसो इस्सरियवोस्सग्गो गिहिनिया अनुच्छविको, तं दस्सेन्तो “भत्तगेहे विस्सट्ठे”ति आह । गेहे एव ठत्वा विचारेतब्बम्पि हि कसिवाणिज्जादिकम्मं कुलित्थिया भारो न होति, सामिकस्सेव भारो, ततो आगतसापतेय्यं पन ताय सुगुत्तं कत्वा ठपेतब्बं होति । “सब्बं इस्सरियं विस्सट्ठं नाम होती”ति एता मज्जन्तीति अधिप्पायो । इत्थियो नाम पुत्तलाभेन विय महग्घविपुलालङ्कारलाभेनपि न सन्तुस्सन्तेवाति तासं तोसनं अलङ्कारदानन्ति आह “अत्तनो विभवानुरूपेना”ति ।

कुलित्थिया संविहितब्बकम्मन्ता नाम आहारसम्पादनविचारप्पकाराति आह “यागुभत्तपचनकालादीनी”तिआदि । सम्माननादीहि यथारहं पियवचनेहि चेव भोजनदानादीहि च पहेणकपेसनादीहि अज्जतो, तत्थेव वा उप्पन्नस्स पण्णाकारस्स छणदिवसादीसु पेसेतब्बपियभण्डेहि च सङ्गहितपरिजना । गेहसामिनिया अन्तोगेहजनो निच्चं सङ्गहितो एवाति वुत्तं “इध परिजनो नाम...पे... जातिजनो”ति । आभतधनन्ति बाहिरतो अन्तोगेहं पवेसितधनं । गिहिनिया नाम पठमं आहारसम्पादने कोसल्लं इच्छितब्बं, तत्थ च युत्तपयुत्तता, ततो सामिकस्स इत्थिजनायत्तेसु किच्चाकिच्चेसु, ततो पुत्तानं परिजनस्स कातब्बकिच्चेसूति आह “यागुभत्तसम्पादनादीसू”तिआदि । “निक्कोसज्जा”ति वत्वा तमेव निक्कोसज्जतं व्यतिरेकतो, अन्वयतो च विभावेतुं “यथा”तिआदि वुत्तं । इधाति इमस्मिं ततियदिसावारे । पुरिमनयेनेवाति पठमदिसावारे वुत्तनयेनेव । इति भगवा “पच्छिमा दिसा पुत्तदारा”ति उद्दिसित्वापि दारवसेनेव पच्छिमं दिसं विस्सज्जेसि, न पुत्तवसेन । कस्मा? पुत्ता हि दारककाले अत्तनो मातु अनुग्गणहनेनेव अनुग्गहिता होन्ति अनुकम्पिता, विज्जुतं पत्तकाले पन यथा तेषि तदा अनुग्गहेतब्बा, स्वायं विधि “पापा निवारेन्ती”तिआदिना पठमदिसावारे दस्सितो एवाति किं पुन विस्सज्जनेनाति । दानादिसङ्गहवत्थूसु यं वत्तब्बं, तं हेट्ठा वुत्तमेवाति ।

२७०. चत्तारिपि ठानानि लङ्घित्वा पज्चममेव ठानं विवरितुं “अविसंवादनताया”तिआदि वुत्तं । तत्थ यस्स यस्स नामं गणहातीति सहायो अत्थिकभावेन यस्स यस्स वत्थुनो नामं कथेति । अविसंवादेत्वाति एत्थ दुविधं अविसंवादनं वाचाय, पयोगेन चाति तं दुविधम्पि दस्सेतुं “इदम्पी”तिआदि वुत्तं । “दानेना”ति च इदं निदस्सनमत्तं दट्ठब्बं इतरसङ्गहवत्थुवसेनेपि अविसंवादेत्वा सङ्गणहनस्स लब्धनतो, इच्छितब्बतो च । अपरा पच्छिमा पजा अपरपजा, अपरापरं उप्पन्ना वा पजा अपरपजा । पटिपूजना नाम ममायना, सक्कारकिरिया चाति तदुभयं दस्सेतुं “केलायन्ती”तिआदि वुत्तं । ममायन्तीति ममत्तं करोन्ति ।

२७१. यथाबलं कम्मन्तसंविधानेनाति दासकम्मकरानं यथाबलं बलानुरूपं तेसं तेसं कम्मन्तानं संविदहनेन विचारणेन, कारापनेनाति अत्थो । तेनाह “दहरेही”तिआदि । भत्तवेतनानुप्पदानेनाति तस्स तस्स दासकम्मकरस्स अनुरूपं भत्तस्स, वेतनस्स च पदानेन । तेनेवाह “अयं खुद्वकपुत्तो”तिआदि । भेसज्जादीनीति आदि-सद्देन सप्पायाहारवसनट्टानादिं सङ्गणहाति । सातभावो एव रसानं अच्छरियताति आह “अच्छरिये मधुररसे”ति । तेसन्ति दासकम्मकरानं । वोस्सज्जनेनाति कम्मकरणतो विस्सज्जनेन । वेलं जत्वाति “पहारावसेसो, उपट्ठपहारावसेसो वा दिवसो”ति वेलं जानित्वा । यो कोचि महस्सवो छणो नाम । कत्तिकुस्सवो, फग्गुणुस्सवोति एवं नक्खत्तसल्लक्खितो महस्सवो नक्खत्तं । पुब्बुट्ठायिता, पच्छानिपातिता च महासुदस्सने वुत्ता एवाति इध अनामट्ठा ।

दिन्नादायिनोति पुब्बपदावधारणवसेन सावधारणवचनन्ति अवधारणेन निवत्तितं दस्सेतुं “चोरिकाय किञ्चि अगगहेत्वा”ति वुत्तं । तेनाह “सामिकेहि दिन्नस्सेव आदायिनो”ति । न मयं किञ्चि लभामाति अनुज्झायित्वाति

पटिसेधद्वयेन तेहि लद्धब्बस्स लाभं दस्सेति । “किं एतस्स कम्मेन कतेनाति अनुज्झायित्वा”ति इदं तुट्ठहदयताय कारणदस्सनं पटिपक्खदूरीभावतो । तुट्ठहदयतादस्सनमि कम्मस्स सुकतकारिताय कारणदस्सनं । कित्ति एव वण्णो कित्तिवण्णो, तं कित्तिवण्णं गुणकथं हरन्ति, तं तं दिसं उपाहरन्तीति कित्तिवण्णहरा । तथा तथा कित्तेतब्बतो हि कित्ति, गुणो, तेसं वण्णनं कथनं वण्णो । तेनाह “गुणकथाहारका”ति ।

२७२. कारणभूता मेत्ता एतेसं अत्थीति मेत्तानि, कायकम्मादीनि । यानि पन तानि यथा यथा च सम्भवन्ति, तं दस्सेतुं “तत्था”तिआदि वुत्तं । “विहारगमन”न्तिआदीसु “मेत्तचित्तं पच्चुपट्ठापेत्वा”ति पदं आहरित्वा योजेतब्बं । अनावटद्वारतायाति एत्थ द्वारं नाम अलोभज्झासयता दानस्स मुखभावतो । तस्स सतो देय्यधम्मस्स दातुकामता अनावटता एवज्झि घरमावसन्तो कुलपुत्तो गेहद्वारे पिहितेपि अनावटद्वारो एव, अज्जथा अपिहितेपि घरद्वारे आवटद्वारो एवाति । तेन वुत्तं “तत्था”तिआदि । विवरित्वापि वसन्तोति वचनसेसो । पिदहित्वापीति एत्थापि एसेव नयो । “सीलवन्तेसू”ति इदं पटिग्गाहकतो दक्खिणविसुद्धिदस्सनत्थं वुत्तं । करुणाखेत्तेपि दानेन अनावटद्वारता एव । “सन्तज्जेवा”ति इमिना असन्तं नत्थिवचनं पुच्छितपटिवचनं विय इच्छितब्बं एवाति दस्सेति विज्जूनं अत्थिकानं चित्तमद्ववकरणतो । “पुरेभत्तं परिभुज्जितब्बक”न्ति इदं यावकालिके एव आमिसभावस्स निरुद्धताय वुत्तं ।

“सब्बे सत्ता”ति इदं तेसं समणब्राह्मणानं अज्झासयसम्पत्तिदस्सनं पक्खपाताभावदीपनतो, ओधिसो फरणायपि मेत्ताभावनाय लब्धनतो । याय कुसलाभिवट्ठिआकङ्काय तेसं उपट्ठाकानं, तथा नेसं गेहपविसनं, तं सन्धायाह “पविसन्तापि कल्याणेन चेतसा अनुकम्पन्ति नामा”ति । सुतस्स परियोदापनं नाम तस्स याथावतो अत्थं विभावेत्वा विचिकिच्छातमविधमनेन विसोधनन्ति आह “अत्थं कथेत्वा कङ्कं विनोदेन्ती”ति । सवनं नाम धम्मस्स यावदेव सम्मापटिपज्जनाय असति तस्मिं तस्स निरत्थकभावतो, तस्मा सुतस्स परियोदापनं नाम सम्मापटिपज्जापनन्ति आह “तथत्ताय वा पटिपज्जापेन्ती”ति ।

२७३. अलमत्तोति समत्थसभावो, सो च अत्थतो समत्थो एवाति “अगारं अज्झावसनसमत्थो”ति वुत्तं । दिसानमस्सनट्टानेति यथावुत्तदिसानं पच्चुपट्टानसज्जिते नमस्सनकारणे । पण्डितो हुत्वा कुसलो छेको लभते यसन्ति योजना । सण्हगुणयोगतो सण्हो, सण्हगुणोति पनेत्थ सुखुमनिपुणपज्जा, मुदुवाचाति दस्सेन्तो “सुखुम...पे... भणनेन वा”ति वुत्तं । दिसानमस्सनट्टानेनाति येन जाणेन यथावुत्ता छ दिसा वुत्तनयेन पटिपज्जन्तो नमस्सति नाम, तं जाणं दिसानमस्सनट्टानं, तेन पटिभानवा । तेन हि तंतंकिच्चयुत्तपत्तवसेन पटिपज्जन्तो इध “पटिभानवा”ति वुत्तो । निवातवुत्तीति पणिपातसीलो । अत्थद्धोति न थद्धो थम्भरहितोति चित्तस्स उद्धुमातलक्खणेन थम्भितभावेन विरहितो । उट्टानवीरियसम्पन्नोति कायिकेन वीरियेन समन्नागतो । निरन्तरकरणवसेनाति आरद्धस्स कम्मस्स सततकारितावसेन । ठानुप्पत्तिया पज्जायाति तस्मिं तस्मिं अत्थकिच्चे उपट्ठिते ठानसो तद्धुणे एव उप्पज्जनकपज्जाय ।

सङ्गहकरोति यथारहं सत्तानं सङ्गणहनको । मित्तकरोति मित्तभावकरो, सो पन अत्थतो मित्ते परियेसनको नाम होतीति वुत्तं “मित्तगवेसनो”ति । यथावुत्तं वदं वचनं जानातीति वदज्जूति आह “पुब्बकारिना वुत्तवचनं जानाती”ति । इदानी तमेवत्थं सङ्केपेन वुत्तं वित्थारवसेन दस्सेतुं “सहायकस्सा”तिआदि वुत्तं । पुब्बे यथापवत्ताय वाचाय जानने वदज्जुतं दस्सेत्वा इदानी आकारसल्लक्खणेन अप्पवत्ताय वाचाय जाननेपि वदज्जुतं दस्सेतुं “अपिचा”तिआदि वुत्तं । “येन येन वा पना”तिआदिना वचनीयत्थं वदज्जू-सदस्स दस्सेति । नेताति यथाधिप्पेतमत्थं पच्चक्खतो पापेता । तेनाह “तं तमत्थं दस्सेन्तो पज्जाय नेता”ति । नेति तं तमत्थन्ति आनेत्वा सम्बन्धो । पुनप्पुनं नेतीति अनु अनु नेति, तं तमत्थन्ति

आनेत्वा योजना ।

तस्मिं तस्मिन्ति तस्मिं तस्मिं दानादीहि सङ्गहेहि सङ्गहेतब्बे पुग्गले । आणियाति अक्खसीसगताय आणिया । यायतोति गच्छतो । पुत्तकारणाति पुत्तनिमित्तं । पुत्तहेतुकज्झि पुत्तेन कत्तब्बं मानं वा पूजं वा ।

उपयोगवचनेति उपयोगत्थे । वुच्चतीति वचनं, अत्थो । उपयोगवचने वा वत्तब्बे । पच्चत्तन्ति पच्चत्तवचनं । सम्मा पेक्खन्तीति सम्मदेव कातब्बे पेक्खन्ति । पसंसनीयाति पसंसितब्बा । भवन्ति एते सङ्गहेतब्बे तत्थ पुग्गले यथारहं पवत्तेन्ताति अधिप्पायो ।

२७४. “इति भगवा”तिआदि निगमनं । या दिसाति या मातापितुआदिलक्खणा पुरत्थिमादिदिसा । नमस्साति नमस्सेय्यासीति अत्थो “यथा कथं पना”तिआदिकाय गहपतिपुत्तस्स पुच्छाय वसेन देसनाय आरद्धत्ता “पुच्छाय ठत्वा”ति वुत्तं । अकथितं नत्थि गिहीहि कत्तब्बकम्मे अप्पमादपटिपत्तिया अनवसेसतो कथितत्ता । मातापितुआदीसु हि तेहि च पटिपज्जितब्बपटिपत्तिया निरवसेसतो कथनेनेव राजादीसुपि पटिपज्जितब्बविधि अत्थतो कथितो एव होतीति । गिहिनो विनीयन्ति, विनयं उपेन्ति एतेनाति गिहिविनयो । यथानुसिद्धन्ति यथा इध सत्थारा अनुसिद्धं गिहिचारित्तं, तथा तेन प्रकारेण तं अविराधेत्वा । पटिपज्जमानस्स वुद्धियेव पाटिकङ्काति दिट्ठधम्मिकसम्परायिकपरमत्थेहि वुद्धियेव इच्छितब्बा अवस्सम्भाविनीति ।

सिङ्गलसुत्तवण्णनाय लीनत्थप्पकासना ।

९. आटानाटियसुत्तवण्णना

पठमभाणवारवण्णना

२७५. “चतुद्विसं रक्खं ठपेत्वा”ति इदं द्वीसु ठानेसु चतूसु दिसासु ठपितं रक्खं सन्धाय वुत्तन्ति तदुभयं दस्सेतुं “असुरसेनाया”तिआदि वुत्तं । अत्तनो हि अधिकारे, अत्तनो रक्खाय च अप्पमज्जनेन तेसं इदं द्वीसु ठानेसु चतूसु दिसासु आरक्खट्ठपनं । यज्झि तं असुरसेनाय पटिसेधनत्थं देवपुरे चतूसु दिसासु सक्कस्स देवानमिन्दस्स आरक्खट्ठपनं, तं अत्तनो अधिकारे अप्पमज्जनं । यं पन नेसं भगवतो सन्तिकं उपसङ्गमने चतूसु दिसासु आरक्खट्ठपनं, तं अत्तनो कता रक्खाय अप्पमज्जनं । तेन वुत्तं “असुरसेनाय निवारणत्थ”न्तिआदि । पाळियं चतुद्विसन्ति भुम्मत्थे उपयोगवचनन्ति भुम्मवसेन तदत्थं दस्सेन्तो “चतूसु दिसासू”ति आह । आरक्खं ठपेत्वाति वेस्सवणादयो चत्तारो महाराजानो अत्तना अत्तना रक्खितब्बदिसासु आरक्खं ठपेत्वा गुत्तिं सम्मदेव विदहित्वा । बलगुम्बं ठपेत्वाति यक्खसेनादिसेनाबलसमूहं ठपेत्वा । ओवरणं ठपेत्वाति पटिपक्खनिसेधनसमत्थं आवरणं ठपेत्वा । इति तीहि पदेहि यथाक्कमं पच्चेकं देवनगरद्वारस्स अन्तो, द्वारसमीपे, द्वारतो बहि, दिसारक्खावसनोति तिविधाय रक्खाय ठपितभावो वा दीपितो । तेनाह “एवं सक्कस्स...पे०... कत्वा”ति । सत्त बुद्धे आरब्भाति एत्थ सत्तेव बुद्धे आरब्भ परिवन्धनकारणं महापदानटीकायं (दी० नि० टी० २.१२) वुत्तनयेनेव वेदितब्बं । धम्मआणन्ति धम्ममयं आणं, सत्थु धम्मचक्कन्ति अत्थो । “परिसतो बाहिरभावो, असम्भोगो”ति एवमादिं इदज्जिदज्ज विवज्जनकरणं करिस्सामाति । सावन्ति चतुन्नम्पि परिसानं तिक्खत्तुं परिवारेण अनुसावनं, यथा सक्को देवानमिन्दो असुरसेनाय निवारणत्थं चतूसु दिसासु आरक्खं ठपापेति, एवं महाराजानोपि तादिसे किच्चविसेसे अत्तनो आरक्खं ठपेन्ति । इमेसम्पि हि ततो सासङ्कं सप्पटिभयन्ति । तेन वुत्तं “अत्तनोपी”तिआदि ।

अभिवक्कन्ताति अतिक्कन्ता, विगताति अत्थोति आह “**खये दिस्सती**”ति । तेनेव हि “**निक्खन्तो पठमो यामो**”ति अनन्तरं वुत्तं । **अभिवक्कन्तरोति** अतिविय कन्ततरो । तादिसो च सुन्दरो भदको नाम होतीति आह “**सुन्दरे दिस्सती**”ति ।

कोति देवनागयक्खगन्धब्बादीसु को कतमो । मेति मम । **पादानीति** पादे । **इद्धियाति** इमाय एवरूपाय देविद्धिया । “**यससा**”ति इमिना एदिसेन परिवारेन, परिच्छेदेन च । **जलन्ति** विज्जोतमानो । **अभिवक्कन्तेनाति** अतिविय कन्तेन कमनीयेन अभिरूपेन । **वण्णेनाति** सरीरवण्णनिभाय । **सब्बा ओभासयं दिसाति** दसपि दिसा पभासेन्तो चन्दो विय, सूरियो विय च एकोभासं एकालोकं करोन्तोति गाथाय अत्थो । **अभिरूपेति** उळाररूपे सम्पन्नरूपे । **अब्भनुमोदनेति** सम्पहंसने । **इध पनाति** “अभिवक्कन्ताय रत्तिया”ति एतस्मिं पदे । **तेनाति** खयपरियायत्ता ।

रूपायतनादीसूति आदि-सद्देन अक्खरादीनं सङ्गहो दट्ठब्बो । **सुवण्णवण्णोति** सुवण्णच्छवीति अयमेत्थ अत्थोति आह “**छविय**”न्ति । तथा हि वुत्तं “**कञ्चनसन्निभत्तचो**”ति (दी० नि० २.३५; ३.२००, २१८; म० नि० २.३८६) **सञ्जळ्हाति** सङ्गन्थिता । **वण्णाति** गुणवण्णनाति आह “**थुतिय**”न्ति, थोमनायन्ति अत्थो । **कुलवग्गेति** खत्तियादिकुलकोट्टासे । तत्थ “**अच्छो विप्पसन्नो**”ति आदिना वण्णितब्बट्ठेन **वण्णो**, छवि । वण्णनट्ठेन **वण्णो**, थुति । अभित्थवनट्ठेन **वण्णो**, थुति, अञ्जमञ्जं असङ्करतो वण्णितब्बतो ठपेतब्बतो **वण्णो**, खत्तियादिकुलवग्गो । वण्णीयति जापीयति एतेनाति **वण्णो**, जापकं कारणं । वण्णनतो थूलरस्सादिभावेन उपट्ठानतो **वण्णो**, सण्ठानं । “**महन्तं खुद्दकं, मज्झिम**”न्ति वण्णेतब्बतो पमाणेतब्बतो **वण्णो**, पमाणं । वण्णीयति चक्खुना विवरीयतीति **वण्णो**, रूपायतनन्ति एवं तस्मिं तस्मिं अत्थे **वण्ण-**सद्दस्स पवत्ति वेदितब्बा । **सोति** वण्णसद्दो । **छवियं दट्ठब्बो** रूपायतने गद्दमानस्स छविमुखेनेव गहेतब्बतो । “छविगता पन वण्णधातु एव सुवण्णवण्णोति एत्थ वण्णगगहणेन गहिता”ति अपरे ।

केवलपरिपुण्णन्ति एकदेसम्पि असेसेत्वा निरवसेसतोव परिपुण्णन्ति अयमेत्थ अत्थोति आह “**अनवसेसता अत्थो**”ति । **केवलकप्पाति** कप्प-सद्दो निपातो पदपूरणमत्तं, केवलं इच्चेव अत्थो । **केवल-**सद्दो बहुलवाचीति आह “**येभ्य्यता अत्थो**”ति । केचि पन “ईसकं असमत्ता केवलकप्पा”ति वदन्ति । एवं सति अनवसेसत्थो एव केवल-सद्दत्थो सिया, अनत्थन्तरेन पन कप्प-सद्देन पदवट्ठनं कतं केवलमेव केवलकप्पन्ति । अथ वा कप्पनीयता, पञ्जापेतब्बता केवलकप्पा । **अब्बामिस्सता** विजातियेन असङ्करा सुद्धता । **अनतिरेकता** तंपरमता विसेसाभावो । **केवलकप्पन्ति** केवलं दळ्हं कत्वाति अत्थो । **केवलं** वुच्चति निब्बानं सब्बसङ्गतविवित्तता । तं एतस्स अधिगतं अत्थीति **केवली**, सच्छिकतनिरोधो खीणासवो ।

कप्प-सद्दो पनायं स-उपसग्गो, अनुपसग्गो चाति अधिप्पायेन ओकप्पनियपदे लब्धमानं कप्पनियसद्दमत्तं निदस्सेति, अञ्जथा कप्प-सद्दस्स अत्थुद्दारे ओकप्पनियपदं अनिदस्सनमेव सिया । **समणकप्पेहीति** विनयक्कमसिद्धेहि समणवोहारेहि । **निच्चकप्पन्ति** निच्चकालं । **पञ्जत्तीति** नामज्जेतं तस्स आयस्मतो, यदिदं कप्पोति । **कप्पितकेसमस्सूति** कत्तरिया छेदितकेसमस्सु । **द्वङ्गुलकप्पोति** मज्झन्हिकवेलाय वीतिक्कन्ताय द्वङ्गुलताविकप्पो । **लेसोति** अपदेसो । अनवसेसं फरितुं समत्थस्स ओभासस्स केनचि कारणेन एकदेसफरणम्पि सिया, अयं पन सब्बसोव फरीति दस्सेतुं समन्तत्थो कप्प-सद्दो गहितोति आह “**अनवसेसं समन्ततो**”ति ।

यस्मा देवतानं सरीरप्पभा द्वादसयोजनमत्तं ठानं, ततो भिय्योपि फरित्वा तिट्ठति, तथा वत्थाभरणादीहि समुट्ठिता पभा, तस्मा वुत्तं “**चन्दिमा विय, सूरियो विय च एकोभासं एकं पज्जोतं करित्वा**”ति । कस्मा एते महाराजानो भगवतो

सन्तिके निसीदिसु? ननु येभुय्येन देवता भगवतो सन्तिकं उपगता ठत्वाव कथेतब्बं कथेन्ता गच्छन्तीति? सच्चमेतं, इध पन निसीदने कारणं अत्थि, तं दस्सेतुं “**देवतानं**”न्तिआदि वुत्तं। “इदं परित्तं नाम सत्तबुद्धपटिसंयुत्तं गरु, तस्मा न अम्हेहि ठत्वा गहेतब्ब”न्ति चिन्तेत्वा **परित्तगारववसेन निसीदिसु**।

२७६. कस्मा पनेत्थ वेस्सवणो एव कथेसि, न इतरेसु यो कोचीति? तत्थ कारणं दस्सेतुं “**किञ्चापी**”तिआदि वुत्तं। **विस्सासिको** अभिण्हं उपसङ्कमनेन। **व्यत्तो**ति विसारदो, तच्चस्स वेय्यत्तियं सुट्ठु सिक्खितभावेनाति आह “**सुसिक्खितो**”ति। मनुस्सेसु विय हि देवेसुपि कोचिदेव पुरिमजातिपरिचयेन सुसिक्खितो होति, तत्रापि कोचिदेव यथाधिप्पेतमत्थं वत्तुं समत्थो परिपुण्णपदव्यञ्जनाय पोरिया वाचाय समन्नागतो। “**महेसक्खा**”ति इमस्स अत्थवचनं “**आनुभावसम्पन्ना**”ति, **महेसक्खा**ति वा महापरिवाराति अत्थो। पाणातिपाते आदीनवदस्सनेनेव तं विपरियायतो ततो वेरमणियं आनिसंसो पाकटो होतीति “**आदीनवं दस्सेत्वा**” इच्चेव वुत्तं। **तेसु सेनासनेसूति** यानि “**अरञ्जवनप्पत्थानी**”तिआदिना (म० नि० १.३४-४५) वुत्तानि भिक्खून् वसनट्टानभूतानि अरञ्जायतनानि, तेसु भिक्खूहि सयितब्बतो, आसितब्बतो च सेनासनसज्जितेसु। **निबद्धवासिनो**ति रुक्खपब्बतपटिबद्धेसु विमानेसु निच्चवासिताय निबद्धवासिनो। **बद्धत्ता**ति गाथाभावेन गन्थितत्ता सम्बन्धितत्ता।

“उग्गणहातु भन्ते भगवा”ति अत्तना वुच्चमानं परित्तं भगवन्तं उग्गणहापेतुकामो वेस्सवणो अवोचाति अधिप्पायेन चोदको “**किं पन भगवतो अप्पच्चक्खधम्मो नाम अत्थी**”ति चोदेसि। आचरियो सब्बत्थ अप्पटिहतजाणचारस्स भगवतो न किञ्चि अप्पच्चक्खन्ति दस्सेन्तो “**नत्थी**”ति वत्वा “उग्गणहातु भन्ते भगवा”ति वदतो वेस्सवणस्स अधिप्पायं विवरन्तो “**ओकासकरणत्थ**”न्तिआदिमाह। यथा हि पञ्चसिखो गन्धव्वदेवपुत्तो देवानं तावत्तिसानं, ब्रह्मणो च सनङ्कुमारस्स सम्मुखा अत्तनो यथासुतं धम्मं भगवतो सन्तिकं उपगन्त्वा पवेदेति, एवमयम्पि महाराजा इतरेहि सद्धिं आटानाटनगरे गाथावसेन बन्धितं परित्तं भगवतो पवेदेतुं **ओकासं कारेन्तो** “उग्गणहातु भन्ते भगवा”ति **आह**, न नं तस्स परियापुणने नियोजेन्तो। तस्मा **उग्गणहातू**ति यथिदं परित्तं मया पवेदितमत्तमेव हुत्वा चतुन्नं परिसानं चिरकालं हितावहं होति, एवं उद्धं आरक्खाय गणहातु, सम्पटिच्छतूति अत्थो। **सत्थु कथिते**ति सत्थु आरोचिते, चतुन्नं परिसानं सत्थु कथने वाति अत्थो। **सुखविहाराया**ति यक्खादीहि अविहिंसाय लद्धव्वसुखविहाराय।

२७७. **सत्तपि बुद्धा चक्खुमन्तो** पञ्चहि चक्खूहि चक्खुमभावे विसेसाभावतो। **तस्मा**ति यस्मा चक्खुमभावो विय सब्बभूतानुकम्पितादयो सब्बेपि विसेसा सत्तन्नम्पि बुद्धानं साधारणा, तस्मा, गुणनेमित्तकानेव वा यस्मा बुद्धानं नामानि नाम, न लिङ्गिकावत्थिकयादिच्छकानि, तस्मा बुद्धानं गुणविसेसदीपनानि “**चक्खुमन्तस्सा**”तिआदिना (दी० नि० ३.२७७) वुत्तानि **एतानि एकेकस्स सत्त सत्त नामानि होन्ति**। तेसं नामानं साधारणभावं अत्थवसेन योजेतब्बाति दस्सेतुं “**सब्बेपी**”तिआदि वुत्तं। **सब्बभूतानुकम्पिनो**ति अनञ्जसाधारणमहाकरुणाय सब्बसत्तानं अनुकम्पिका। **न्हातकिलेसत्ता**ति अट्टङ्गिकेन अरियमग्गजलेन सपरसन्तानेसु निरवसेसतो धोतकिलेसमलत्ता। **मारसेनापमद्दिनो**ति सपरिवारे पञ्चपि मारे पमद्दितवन्तो। **वुसितवन्तो**ति मग्गब्रह्मचरियवासं, दसविधं अरियवासञ्च वुसितवन्तो। वुसितवन्तताय एव बाहितपापता वुत्ता होतीति “**ब्राह्मणस्सा**”ति पदं अनामट्ठं। **विमुत्ता**ति अनञ्जसाधारणानं पञ्चन्नम्पि विमुत्तीनं वसेन निरवसेसतो मुत्ता। **अङ्गतो**ति सरीरङ्गतो, जाणङ्गतो च, द्वत्तिसमहापुरिसलक्खण- (दी० नि० २.३३; ३.२००; म० नि० २.३८५) असीतिअनुव्यञ्जनेहि निक्खमनप्पभा, व्यामप्पभा, केतुमालाउण्हीसप्पभा च सरीरङ्गतो निक्खमनकरस्मियो, यमकमहापाटिहारियादीसु उप्पज्जनकप्पभा जाणङ्गतो निक्खमनकरस्मियो। **न एतानेव** “**चक्खुमा**”तिआदिना (दी० नि० ३.२७७) वुत्तानि **सत्त नामानि**, अथ खो अज्जानिपि बहूनि अपरिमितानि नामानि।

कथन्ति आह “असङ्ख्येय्यानि नामानि सगुणेन महेसिनोति वुत्त”न्ति (ध० स० अट्ठ० १३१३; उदा० अट्ठ० ५३; पटि० अट्ठ० ७६)। केन वुत्तं? धम्मसेनापतिना।

यदि एवं कस्मा वेस्सवणो एतानेव गण्हीति आह “अत्तनो पाकटनामवसेना”ति। **खीणासवा जनाति अधिप्येता**। ते हि कम्मकिलेसेहि जातापि एवं न पुन जायिस्सन्तीति इमिना अत्थेन **जना**। यथाह “यो च कालघसो भूतो”ति (जा० १.२.१९०) **देसनासीसमत्तन्ति** निदस्सनमत्तन्ति अत्थो, अवयवेन वा समुदायुपलक्खणमेतं। सति च पिसुणवाचप्पहाने फरुसवाचा पहीनाव होति, पगेव च मुसावादोति “अपिसुणा” इच्चेव वुत्ता। **महत्ताति** महा अत्ता सभावो एतेसन्ति महत्ता। तेनाह “महन्तभावं पत्ता”ति। **महन्ताति** वा महा अन्ता, परिनिब्बानपरियोसानाति वुत्तं होति। महन्तेहि वा सीलादीहि समन्नागता। अयं ताव अट्ठकथायं आगतनयेन अत्थो। इतरेसं पन मतेन बुद्धादीहि अरियेहि महनीयतो पूजनीयतो **महं** नाम निब्बानं, महमन्तो एतेसन्ति **महन्ता**, निब्बानदिट्ठाति अत्थो। **निस्सारदाति** सारज्जरहिता, निब्भयाति अत्थो। तेनाह “विगतलोमहंसा”ति।

हितन्ति हितचित्तं, सत्तानं हितेसीति अत्थो। **यथाभूतं विपस्सिसुन्ति** पञ्चुपादानक्खन्धेसु समुदयादितो याथावतो विविधेनाकारेण पस्सिंसु। “ये चापी”ति पुब्बे पच्चत्तबहुवचनेन अनियमतो वुत्ते **तेसम्पीति** अत्थं सम्पदानबहुवचनवसेन नियमेत्वा “नमत्थू”ति च पदं आनेत्वा योजेति यं तं-सद्धानं अब्बभिचारितसम्बन्धभावतो। विपस्सिंसु नमस्सन्तीति वा योजना। **पठमगाथायाति** “ये चापि निब्बुता लोके”ति एवं वुत्तगाथाय। **दुतियगाथायाति** तदन्तरगाथाय। तत्थ **देसनामुखमत्तन्ति** इतरेसम्पि बुद्धानं नामग्गहणे पत्ते इमस्सेव भगवतो नामग्गहणं तथा देसनाय मुखमत्तं, तस्मा तेपि अत्थतो गहिता एवाति अधिप्पायो। तेनाह “अयम्पि ही”तिआदि। तत्थ **अयन्ति** अयं गाथा। पुरिमयोजनायं तस्साति विसेसितब्बताय अभावतो “यन्ति निपातमत्त”न्ति वुत्तं, इध पन “तस्स नमत्थू”ति एवं सम्बन्धस्स च इच्छितत्ता “य”न्ति नामपदं उपयोगेकवचनन्ति दस्सेन्तो “यं नमस्सन्ति गोतम”न्ति आह।

२७८. “यतो उग्गच्छति सूरियो”तिआदिकं कस्मा आरब्धं? यं ये यक्खादयो सत्थु धम्मआणं, अत्तनो च राजाणं नादियन्ति, तेसं “इदञ्चिदञ्च निग्गहं करिस्सामा”ति सावनं कातुकामा तत्थ तत्थ द्विसहस्सपरित्तदीपपरिवारेसु चतूसु महादीपेसु अत्तनो आणाय वत्तानं अत्तनो पुत्तानं, अट्ठवीसतिया यक्खसेनापतिआदीनञ्च सत्थरि पसादगारवबहुमानञ्च पवेदेत्वा निग्गहारहानं सन्तज्जनत्थं आरब्धं। तत्थ “यतो उग्गच्छती”तिआदीसु “**यतो ठानतो उदेती**”ति वुच्चति, कुतो पन ठानतो उदेतीति वुच्चति? पुब्बविदेहवासीनं ताव मज्झन्हिकट्टाने ठितो जम्बुदीपवासीनं उदेतीति वुच्चति, उत्तरकुरुकानं पन ओग्गच्छतीति इमिना नयेन सेसदीपेसुपि सूरियस्स उग्गच्छनोग्गच्छनपरियायो वेदितब्बो। अयञ्च अत्थो हेट्ठा **अग्गज्जसुत्तवण्णनायं** (दी० नि० अट्ठ० ३.१२१) पकासितो एव। **अदितिया पुत्तोति** लोकसमुदाचारवसेन वुत्तं। लोकिया हि देवे अदितिया पुत्ता, असुरे अतिथिया पुत्ताति वदन्ति। आदिप्पनतो पन **आदिच्चो**, एकप्पहारेनेव तीसु दीपेसु आलोकविदंसनेन समुज्जलनतोति अत्थो। **मण्डलीति** एत्थ ई-कारो भुसत्थोति आह “महन्तं मण्डलं अस्साति मण्डली”ति। महन्तं हिस्स विमानमण्डलं पज्जासयोजनायामवित्थारतो। “संवरीपि निरुज्झती”ति इमिनाव दिवसोपि जायतीति अयम्पि अत्थो वुत्तोति वेदितब्बो। **रत्ति अन्तरधायतीति** सिनेरुपच्छायालक्खणस्स अन्धकारस्स विगच्छनतो।

उदकरहदोति जलधि। “तस्मिं ठाने”ति इदं पुरत्थिमसमुद्धस्स उपरिभागेन सूरियस्स गमनं सन्धाय वुत्तं। तथा हि जम्बुदीपे ठितानं पुरत्थिमसमुद्धतो सूरियो उग्गच्छन्तो विय उपट्ठाति। तेनाह “यतो उग्गच्छति सूरियो”ति। समुद्धनट्ठेन अत्तनि पतितस्स सम्मदेव, सब्बसो च उन्दनट्ठेन किलेदनट्ठेन **समुद्धो**। समुद्धो हि किलेदनट्ठो रहदो। **सारितोदकोति**

अनेकानि योजनसहस्सानि वित्थिण्णोदको, सरिता नदियो उदके एतस्साति वा **सरितोदको**।

सिनेरुपब्बतराजा चक्कवाळस्स वेमज्झे ठितो, तं पधानं कत्वा वत्तब्बन्ति अधिप्पायेन “इतोति सिनेरुतो”ति वत्त्वा तथा पन दिसाववत्थानं अनवट्ठितन्ति “**तेसं निसिन्नट्टानतो वा**”ति वुत्तं। **तेसन्ति** चतुन्नं महाराजानं। **निसिन्नट्टानं** आटानाटनगरं। तत्थ हि निसिन्ना ते इमं परित्तं बन्धिंसु। **तेसं निसिन्नट्टानतोति** वा सत्थु सन्तिके तेसं निसिन्नट्टानतो। उभयथापि सूरियस्स उदयट्टाना पुरत्थिमा दिसा नाम होति। पुरिमपक्खंयेवेत्थ वण्णेन्ति। तेन वुत्तं “इतो सा पुरिमा दिसा”ति। सूरियो, पन चन्दनक्खत्तादयो च सिनेरुं दक्खिणतो, चक्कवाळपब्बतज्ज वामतो कत्वा परिवत्तेन्ति। यत्थ च नेसं उग्गमनं पज्जायति, सा पुरत्थिमा दिसा। यत्थ ओक्कमनं पज्जायति, सा पच्छिमा दिसा। दक्खिणपस्से उत्तरा दिसा, वामपस्से दक्खिणा दिसाति चतुमहादीपवासीनं पच्चेकं सिनेरु उत्तरादिसायमेव, तस्मा अनवट्ठिता दिसाववत्थाति आह “इति नं आचिक्खति जनो”ति। **यं दिसन्ति** यं पुरत्थिमदिसं **यसस्सीति** महापरिवारो। कोटिसतसहस्सपरिमाणा हि देवता अभिण्हं परिवारेन्ति। चन्दननागरुक्खादीसु ओसधितिणवनप्पतिसुगन्धानं अब्बनतो, तेहि दित्तभावूपगमनतो “गन्धब्बा”ति लद्धनामानं चातुमहाराजिकदेवानं अधिपति भावतो। **मे सुतन्ति** एत्थ **मेति** निपातमत्तं। **सुतन्ति** विस्सुतन्ति अत्थो। अयज्हेत्थ योजना — तस्स धतरट्ठमहाराजस्स पुत्तापि बहवो। कित्तका? असीति, दस एको च। एकनामा। कथं? इन्दनामा। “महप्फला”ति च सुतं विस्सुतमेतं लोकेति।

आदिच्चो गोतमगोत्तो, भगवापि गोतमगोत्तो, आदिच्चेन समानगोत्तताय आदिच्चो बन्धु एतस्सातिपि आदिच्चबन्धु, आदिच्चस्स वा बन्धूति आदिच्चबन्धु, तं **आदिच्चबन्धुनं**। **अनवज्जेनाति** अवज्जपटिपक्खेन ब्रह्मविहारेन। **समेक्खसि** ओधिसो, अनोधिसो च फरणेन ओलोकेसिआसयानुसयचरियाधिमुत्तिआदिविभागावबोधवसेन। **वत्त्वा वन्दन्तीति** “लोकस्स अनुकम्पको”ति कित्तेत्वा वन्दन्ति। **सुतं नेतन्ति** सुतं ननूति एतस्मिं अत्थे **नु-सद्दो**। अट्ठकथायं पन नोकारोयन्ति अधिप्पायेन **अम्हेहीति** अत्थो वुत्तो। **एतन्ति** एतं तथा परिकित्तेत्वा अमनुस्सानं देवतानं वन्दनं। **वदन्ति** धतरट्ठमहाराजस्स पुत्ता।

२७९. येन पेता पवुच्चन्तीति एत्थ वचनसेसेन अत्थो वेदितब्बो, न यथारुतवसेनेवाति दस्सेन्तो “**येन दिसाभागेन नीहरीयन्तीति वुच्चन्ती**”ति आह। **ड्यहन्तु** वाति पेते सन्धाय वदति। **छिज्जन्तु वा** हत्थपादादिके पिसुणा पिट्ठिमंसिका। **हज्जन्तु** पाणातिपातिनोतिआदिका। **पवुच्चन्तीति** वा समुच्चन्ति, “अलं तेस”न्ति समाचिनीयन्तीति अत्थो। एवज्झि वचनसेसेन विना एव अत्थो सिद्धो होति। **रहस्सङ्गन्ति** बीजं सन्धाय वदति।

२८०. यस्मिं दिसाभागे सूरियो अत्थं गच्छतीति एत्थ “यतो ठानतो उदेती”ति एत्थ वुत्तनयानुसारेण अत्थो वेदितब्बो।

२८१. येन दिसाभागेन उत्तरकुरु रम्मो अवट्ठितो, इतो सा उत्तरा दिसाति योजना। महानेरूति महन्तो, महनीयो च नेरुसङ्घातो पब्बतो। तेनाह “**महासिनेरु पब्बतराजा**”ति। **रजतमयं**। तथा हि तस्स पभाय अज्झोत्थतं तस्सं दिसायं समुद्दोदकं खीरं विय पज्जायति। **मणिमयन्ति** इन्दनीलमयं। तथा हि दक्खिणदिसाय समुद्दोदकं येभ्य्येन नीलवण्णं हुत्वा पज्जायति, तथा आकासं। **मनुस्सा जायन्ति**। कथं जायन्ति? अममा अपरिग्गहाति योजना। **ममत्तविरहिताति** “इदं मम इदं ममा”ति ममङ्कारविरहिताति अधिप्पायो। यदि तेसं “अयं मय्हं भरिया”ति परिग्गहो नत्थि, “अयं मे माता, अयं भगिनी”ति एवरूपा इध विय मरियादापि न सिया मातुआदिभावस्स अजाननतोति चोदनं सन्धायाह “**मातरं वा**”तिआदि। **छन्दरागो नुप्पज्जतीति** एत्थ “धम्मतासिद्धस्स सीलस्स आनुभावेन पुत्ते दिट्ठमत्ते एव मातु थनतो थज्जं पग्घरति, तेन

सज्जाणेन नेसं मातरि पुत्तस्स मातुसज्जा, मातु च पुत्ते पुत्तसज्जा पच्चुपट्ठिता”ति केचि ।

नङ्गलाति लिङ्गविपल्लासेन वुत्तन्ति आह “नङ्गलानिपी”ति । अकट्ठेति अकसिते अकतकसिकम्मे ।

तण्डुलाव तस्स फलन्ति सत्तानं पुज्जानुभावहेतुका थुसादिअभावेन तण्डुला एव तस्स सालिस्स फलं । तुण्डिकिरन्ति पचनभाजनस्स नामन्ति वुत्तं “उक्खलिय”न्ति । आकिरित्वाति तण्डुलानि पक्खिपित्वा । निब्भूमङ्गारेनाति धूमङ्गाररहितेन केवलेन अग्गिना । जोतिकपासाणतो अग्गिम्हि उड्डहन्ते कुतो धूमङ्गारानं सम्भवो । भोजनन्ति ओदनमेवाधिप्येत्तन्ति “भोजनमेवा”ति अवधारणं कत्वा तेन निवत्तेतब्बं दस्सेन्तो “अज्जो सूपो वा व्यज्जनं वा न होती”ति आह । यदि एवं रसविसेसयुत्तो तेसं आहारो न होतीति? नोति दस्सेन्तो “भुज्जन्तानं...पे०... रसो होती”ति आह । मच्छरियचित्तं नाम न होतीति धम्मतासिद्धस्स सीलस्स आनुभावेन । तथा हि ते कत्थचिपि अममा परिग्गहाव हुत्वा वसन्ति ।

अपिच तत्थ उत्तरकुरुकानं पुज्जानुभावसिद्धो अयम्पि विसेसो वेदितब्बो — तत्थ किर तेसु तेसु पदेसेसु घनचित्तपत्तसज्जन्नसाखापसाखा कूटागारूपमा मनोरमा रुक्खा तेसं मनुस्सानं निवेसनकिच्चं साधेन्ति, यत्थ सुखं निवसन्ति, अज्जेपि तत्थ रुक्खा सुजाता सब्बदापि पुप्फितग्गा तिड्ढन्ति, जलासयापि विकसितकमलकुवलयपुण्डरीकसोगन्धिकादिपुप्फसज्जन्ना सब्बकालं परमसुगन्धं समन्ततो पवायन्ता तिड्ढन्ति । सरीरम्पि तेसं अतिदीघतादिदोसरहितं आरोहपरिणाहसम्पन्नं जराय अनभिभूतत्ता वलिपलितादिदोसरहितं यावतायुक् अपरिक्खीणजवबलपरक्कमसोभमेव हुत्वा तिड्ढति । अनुट्ठानफलूपजीविताय न च नेसं कसिवाणिज्जादिवसेन, आहारपरियेड्ढिवसेन दुक्खं अत्थि, ततो एव न दासदासिकम्मकरादिपरिग्गहो अत्थि, न च तत्थ सीतुण्हडंसमकसवातातपसरीसपवाळादिपरिस्सयो अत्थि । यथा नामेत्य गिम्हानं पच्छिमे मासे पच्चूसवेलायं समसीतुण्हउतु होति, एवमेव सब्बकालं समसीतुण्होव उतु होति, न च तेसं कोचि उपघातो, विहेसा वा उप्पज्जति । अकट्ठपाकिममेव सालिं अकणं अथुसं सुगन्धं तण्डुलफलं परिभुज्जन्तानं नेसं कुट्ठं, गण्डो, किलासो, सोसो, कासो, सासो, अपमारो, जरोति एवमादिको न कोचि रोगो उप्पज्जति । न ते खुज्जा वा वामनका वा काणा वा कुणी वा खज्जा वा पक्खहता वा विकलङ्गा वा विकलिन्द्रिया वा होन्ति । इत्थियोपि तत्थ नातिदीघा नातिरस्सा नातिकिसा नातिथूला नातिकाळा नाच्चोदाता सोभगगप्पत्तरूपा होन्ति । तथा हि दीघङ्गुली तम्बनखी लम्बत्थना तनुमज्झा पुण्णचन्दमुखी विसालक्खी मुदुगत्ता संहितूरू ओदातदन्ता गम्भीरनाभी तनुजङ्घा दीघनीलवेल्लितकेसी पुथुलसुसोणी नातिलोमानालोमा सुभगा उतुसुखसम्फस्सा सण्हा सखिलसम्भासा नानाभरणविभूसिता विचरन्ति । सब्बदा हि सोळसवस्सुद्देसिका विय होन्ति । पुरिसा च पञ्चवीसतिवस्सुद्देसिका विय, न पुत्तदारेसु रज्जन्ति । अयं तत्थ धम्मता ।

सत्ताहिकमेव च तत्थ इत्थिपुरिसा कामरतिया विहरन्ति, ततो वीतरागा यथासकं गच्छन्ति । न तत्थ इध विय गम्भोक्कन्तिमूलकं, गम्भपरिहरणमूलकं, विजायनमूलकं वा दुक्खं होति । रत्तकञ्चुकतो कञ्चनपटिमा विय दारका मातुकुच्छितो अमक्खिता एव सेम्हादिना सुखेनेव निक्खमन्ति, अयं तत्थ धम्मता ।

माता पन पुत्तं वा धीतरं वा विजायित्वा तेसं विचरणप्पदेसे ठपेत्वा अनपेक्खा यथारुचि गच्छति । तेसं तत्थ सयितानं ये पस्सन्ति पुरिसा, इत्थियो वा, ते अत्तनो अङ्गुलियो उपनामेन्ति, तेसं कम्मबलेन ततो खीरं पवत्तति, तेन दारका यापेन्ति । एवं पन वड्ढन्ता कतिपयदिवसेहेव लद्धबला हुत्वा दारिका इत्थियो उपगच्छन्ति, दारका पुरिसे । कप्परुक्खतो एव च तेसं तत्थ तत्थ वत्थाभरणानि निप्पज्जन्ति । नानाविरागवण्णविचित्तानि हि सुखुमानि मुदुसुखसम्फस्सानि वत्थानि तत्थ तत्थ

कप्परुक्खेसु ओलम्बन्तानि इट्ठन्ति । नानाविधरंसिजालसमुज्जलविविधवण्णरतनविनद्धानि अनेकविधमालाकम्मलताकम्मभित्तिकम्मविचित्तानि सीसूपगगीवूपगहत्थूपगकटूपगपादूपगानि सोवण्णमयानि आभरणानि च कप्परुक्खतो ओलम्बन्ति । तथा वीणामुदिङ्गपणवसम्मताळसङ्खवंसवेताळपरिवानिवल्लकीपभुतिका तूरियभण्डापि ततो ततो ओलम्बन्ति । तत्थ च बहू फलरुक्खा कुम्भमत्तानि फलानि फलन्ति मधुररसानि, यानि परिभुज्जित्वा ते सत्ताहम्पि खुप्पिपासाहि न बाधीयन्ति । नज्जोपि तत्थ सुविसुद्धजला सुपतित्था रमणीया अकहमा वालुकतला नातिसीता नाच्चुण्हा सुरभिगन्धीहि जलजपुप्फेहि सञ्छन्ना सब्बकालं सुरभिं वायन्तियो सन्दन्ति । न तत्थ कण्टकतिणकक्खळगच्छलता होन्ति, अकण्टका पुप्फफलसम्पन्ना एव होन्ति । चन्दननागरुक्खा सयमेव रसं पगघरन्ति । न्हायितुकामा च नदीतित्थे एकज्झं वत्थाभरणानि ठपेत्वा नदिं ओतरित्वा न्हत्वा उत्तिण्णुत्तिण्णा उपरिट्ठिमं वत्थाभरणं गण्हन्ति, न तेसं एवं होति “इदं मम, इदं परस्सा”ति, ततो एव न तेसं कोचि विग्गहो वा विवादो वा । सत्ताहिका एव च नेसं कामरतिकीळा होति, ततो वीतरागा विय विचरन्ति । यत्थ च रुक्खे सयितुकामा होन्ति, तत्थेव सयनं उपलभन्ति । मते च सत्ते दिस्वा न रोदन्ति, न सोचन्ति, तज्ज मण्डयित्वा निक्खिपन्ति । तावदेव च नेसं तथारूपा सकुणा उपगन्त्वा मतं दीपन्तरं नेन्ति । तस्मा सुसानं वा असुचिट्ठानं वा तत्थ नत्थि । न च ततो मता निरयं वा तिरच्छानयोनिं वा पेत्तिविसयं वा उपपज्जन्ति । “धम्मतासिद्धस्स पञ्चसीलस्स आनुभावेन ते देवल्लोके निब्बत्तन्ती”ति वदन्ति । वस्ससहस्समेव च नेसं सब्बकालं आयुप्पमाणं । सब्बमेतं तेसं पञ्चसीलं विय धम्मतासिद्धं एवाति वेदितब्बं । तत्थाति तस्मिं उत्तरकुरुदीपे ।

एकखुरं कत्वाति अनेकसफम्पि एकसफं विय कत्वा, अस्सं विय कत्वाति अत्थो । “गावि”न्ति वत्वा पुन “पसु”न्ति वुत्तत्ता गावितो इतरो सब्बो चतुप्पदो इध “पसू”ति अधिप्पेतोति आह “ठपेत्वा गावि”न्ति ।

तस्साति गब्भिनित्थिया । **पिट्ठि ओनमितुं सहती**ति कुच्छिया गरुभारताय तेसं आरुळ्हकाले पिट्ठि ओनमति, तेसं निसज्जं सहति पल्लङ्के निसिन्ना विय होन्ति । **सम्मादिट्ठिके**ति कम्मपथसम्मादिट्ठिया सम्मादिट्ठिके । **एत्था**ति जम्बुदीपे । एत्थ हि जनपदवोहारो, न उत्तरकुरुम्हि । तथा हि “**पच्चन्तिममिलक्खुवासिके**”ति च वुत्तं ।

तस्स रज्जोति वेस्सवणमहाराजस्स । इति सो अत्तानमेव परं विय कत्वा वदति । एसेव नयो परतोपि । **बहुविधं** नानारतनविचित्तं नानासण्ठानं रथादि दिब्बयानं **उपट्ठितमेव होति** सुदन्तवाहनयुत्तं, न नेसं यानानं उपट्ठापने उस्सुक्कं आपज्जितब्बं अत्थि । **एतानी**ति हत्थियानादीनि । **नेसन्ति** वेस्सवणपरिचारिकानं । कप्पितानि हुत्वा उट्ठितानि आरुहितुं **उपकप्पनयानानि । निपन्नापि निसिन्नापि विचरन्ति** चन्दिमसूरिया विय यथासकं विमानेसु ।

नगरा अहूति लिङ्गविपल्लासेन वुत्तन्ति आह “**नगरानि भविसूति अत्थो**”ति । **आटानाटा** नामाति इत्थिलिङ्गवसेन लद्धनामं **नगरं आसि** ।

तस्मिं ठत्वाति तस्मिं पदेसे परकुसिटनाटानामके नगरे ठत्वा । ततो **उजुं उत्तरदिसायं । एतस्साति** कसिवन्तनगरस्स । **अपरभागे** अपरकोट्टासे, परतो इच्चेव अत्थो ।

कुवेरोति तस्स पुरिमजातिसमुदागतं नामन्ति तेनेव पसङ्गेन येनायं सम्पत्ति अधिगता, तदस्स पुब्बकम्मं आचिक्खितुं “**अयं किरा**”तिआदि वुत्तं । **उच्छुवप्पन्ति** उच्छुसस्सं । **अवसेससालाही**ति अवसेसयन्तसालाहि, निस्सक्कवचनज्चेतं । तत्थेवाति पुज्जत्थं दिन्नसालायमेव ।

पटिएसन्तोति पति पति अत्थे एसन्तो वीमंसन्तो । न केवलं ते वीमंसन्ति एव, अथ खो तमत्थं पतिट्ठापेन्तीति आह
 “विसुं विसुं अत्थे उपपरिक्खमाना अनुसासमाना”ति । यक्खरट्ठिकाति यक्खरट्ठाधिपतिनो । यक्खा च वेस्सवणस्स
 रज्जो निवेसनद्वारे नियुत्ता चाति यक्खदोवारिका, तेसं यक्खदोवारिकानं ।

यस्मा धरणीपोरक्खणितो पुराणोदकं भस्सयन्तं हेट्ठा वुट्ठि हुत्वा निक्खमति, तस्मा तं ततो गहेत्वा मेघेहि पवुट्ठं विय
 होतीति वुत्तं “यतो पोक्खरणितो उदकं गहेत्वा मेघा पवस्सन्ती”ति । यतोति यतो धरणीपोक्खरणितो । सभाति
 यक्खानं उपट्ठानसभा ।

तस्मिं ठानेति तस्सा पोक्खरणिआ तीरे यक्खानं वसनवने । सदा फलिताति निच्चकालं सज्जातफला ।
 निच्चपुप्फिताति निच्चं सज्जातपुप्फा । नानादिजगणायुताति नानाविधेहि दिजगणेहि युत्ता । तेहि पन सकुणसङ्घेहि इतो
 चितो च सम्पतन्तेहि परिभमन्तेहि यस्मा सा पोक्खरणी आकुला विय होती, तस्मा वुत्तं
 “विविधपक्खिसङ्घसमाकुला”ति । कोञ्चसकुणेहीति सारससकुन्तेहि ।

“एवं विरवन्तान”न्ति इमिना तथा वस्सितवसेन “जीवज्जीवका”ति अयं तेसं समज्जाति दस्सेति । उट्ठवचित्तकाति
 एत्थापि एसेव नयो । तेनाह “एवं वस्समाना”ति । पोक्खरसातकाति पोक्खरसण्ठानताय “पोक्खरसातका”ति एवं
 लद्धनामा ।

सब्बकालं सोभतीति सब्बउतूसु सोभति, न तस्सा हेमन्तादिवसेन सोभाविरतो अत्थि । एवंभूता च निच्चं
 पुप्फितजलजथलजपुप्फताय, फलभारभरितरुक्खपरिवारितताय, अट्ठङ्गसमन्नागतसलिलताय च निरन्तरं सोभति ।

२८२. परिकम्मन्ति पुब्बुपचारं । परिसोधेत्वाति एकक्खरस्सापि अविराधनवसेन आचरियसन्तिके सब्बं सोधेत्वा ।
 सुट्ठु उग्गहिताति परिमण्डलपदव्यञ्जनाय पोरिया वाचाय विस्सट्ठाय अनेलगळाय अत्थस्स विज्जापनीया सम्मदेव
 उग्गहिता । तथा हि “अत्थञ्च व्यञ्जनञ्च परिसोधेत्वा”ति वुत्तं । अत्थं जानतो एव हि व्यञ्जनं परिसुज्झति, नो
 अजानतो । पदव्यञ्जनातीति पदञ्चेव व्यञ्जनञ्च अहापेत्वा । एवञ्हि परिपुण्णा नाम होतीति । विसंवादेत्वाति अज्जथा
 कत्वा । तेजवन्तं न होति विरज्जनतो चेव विमहयत्थभावतो च । सब्बसोति अनवसेसतो आदिमज्झपरियोसानतो ।
 तेजवन्तं होतीति सभावनिरुत्तिं अविराधेत्वा सुप्पवत्तिभावेन साधनतो । एवं पयोगविपत्तिं पहाय पयोगसम्पत्तिया सति
 परित्तस्स अत्थसाधकत्वं दस्सेत्वा इदानीं अज्झासयविपत्तिं पहाय अज्झासयसम्पत्तिया अत्थसाधकत्वं दस्सेतुं
 “लाभहेतू”तिआदि वुत्तं । इदं परित्तभणनं सत्तानं अनत्थपटिबाहनहेतूति तस्स जाणकरुणापुब्बकता निस्सरणपक्खो ।
 मेत्तं पुरेचारिकं कत्वाति मेत्तामनसिकारेण सत्तेसु हितफरणं पुरक्खत्वा ।

“वत्थुं वा”तिआदि पुब्बे चतुपरिसमज्झे कताय साधनाय भगवतो पवेदनं । घरवत्थुन्ति वसनगेहं । निबद्धवासन्ति
 परगेहेपि नेवासिकभावेन वासं न लभेय्य, यं पन महाराजानं, यक्खसेनापतीनञ्च अजानन्तानयेव कदाचि वसित्वा गमनं, तं
 अप्पमाणन्ति अधिप्पायो । समितिन्ति यक्खादिसमागमं । कामं पाळियं “न मे सो”ति आगतं, इतरेसम्पि पन
 महाराजानमत्तना एकज्झासयताय तेसम्पि अज्झासयं हृदये ठपेत्वा वेस्सवणो तथा अवोच । कज्जं अनु अनु वहितुं अयुत्तो
 अनावहो, सब्बकालं कज्जं लद्धुं अयुत्तोति अत्थो, तं अनावहं । तेनाह “न आवाहयुत्त”न्ति । न विवहन्ति अविवहं,
 कज्जं गहेतुमयुत्तन्ति अत्थो । तेनाह “न विवाहयुत्त”न्ति । आहितो अहंमानो एत्थाति अत्ता, अत्तभावो । अत्ता विसयभूतो
 एतासं अत्थीति अत्ता, परिभासा, ताहि । परियत्तं कत्वा वचनेन परिपुण्णाहि । यथा यक्खा अक्कोसितब्बा, एवं पवत्ता

अक्कोसा यक्खअक्कोसा नाम, तेहि । ते पन “कळारक्खि कळारदन्ता काळवण्णा”ति एवं आदयो ।

विरुद्धाति विरुज्जनका परेहि विरोधिनो । रभसाति सारम्भकाति अधिप्पायो । तेनाह “करणुत्तरिया”ति । रभसाति वा साहसिका । सामिनो मनसो अस्सवाति मनस्सा, किङ्करा । ये हि “किं करोमि भदन्ते”ति सामिकस्स वसे वत्तन्ति, ते एवं वुच्चन्ति । तेन वुत्तं “यक्खसेनापतीनं ये मनस्सा, तेस”न्ति । आणाय अवरोधितुपचारा अवरुद्धा, ते पन आणावतो पच्चत्थिका नाम होन्तीति “पच्चामित्ता वेरिनो”ति वुत्तं । उज्झापेतब्बन्ति हेट्ठा कत्वा चिन्तापेतब्बं, तं पन उज्झापनं तेसं नीचकिरियाय जानापनं होतीति आह “जानापेतब्बा”ति ।

परित्तपरिकम्मकथावण्णना

परित्तस्स परिकम्मं कथेतब्बन्ति आटानाटियपरित्तस्स परिकम्मं पुब्बुपचारट्टानियं मेत्तसुत्तादि कथेतब्बं । एवञ्चि तं लब्धासेवनं हुत्वा तेजवन्तं होति । तेनाह “पठममेव ही”तिआदि । पिट्ठं वा मंसं वाति वा-सद्धो अनियमत्थो, तेन मच्छघतसूपादिं सङ्गण्हाति । ओतारं लभन्ति अत्तना पियायितब्बआहारवसेन पियायितब्बट्टानवसेन च । “परित्त...पे०... निसीदितब्ब”न्ति इमिनाव परित्तकारकस्स भिक्खुनो परिसुद्धिपि इच्छितब्बाति दस्सेति ।

“परित्तकारको...पे०... सम्परिवारितेना”ति इदं परित्तकरणे बाहिररक्खासंविधानं । “मेत्तचित्तं ...पे०... कातब्ब”न्ति इदं अब्भन्तररक्खा उभयतो रक्खासंविधानं । एवञ्चि अमनुस्सा परित्तकरणस्स अन्तरायं कातुं न विसहन्ति । मङ्गलकथा वत्तब्बा पुब्बुपचारवसेन । सब्बसन्निपातोति तस्मिं विहारे, तस्मिं वा गामखेत्ते सब्बेसं भिक्खून् सन्निपातो । घोसेतब्बो, “चेतियङ्गणे सब्बेहि सन्निपतितब्ब”न्ति । अनागन्तुं नाम न लब्धति अमनुस्सेन बुद्धाणाभयेन, राजाणाभयेन च । गहितकापदेसेन अमनुस्सोव पुच्छितो होतीति आह “अमनुस्सगहितको ‘त्वं को नामा’ति पुच्छितब्बो”ति । मालागन्धादीसु पूजनत्थं विनियुज्जियमानेसु । पत्तीति तुहं पत्तिदानं । पिण्डपाते पत्तीति पिण्डपाते दिव्यमाने पत्तिदानं । देवतानन्ति यक्खसेनापतीनं । परित्तं भणितब्बन्ति एत्थापि “मेत्तचित्तं पुरेचारिकं कत्वा”ति च “मङ्गलकथा वत्तब्बा”ति च “विहारस्स उपवने”ति एवमादि च सब्बं गिहीनं परित्तकरणे वुत्तं परिकम्मं कातब्बमेव ।

सरीरे अधिमुच्चतीति सरीरं अनुपविसित्वा विय आविसन्तो यथा गहितकस्स वसेन न वत्तति, अत्तनो एव वसेन वत्तति, एवं अधिमुच्चति अधिद्वुहित्वा तिद्वुति । तेनाह “आविसतीति तस्सेव वेवचन”न्ति । लग्गतीति तत्थेव लग्गो अल्लीनो होति । तेनाह “न अपेती”ति । रोगं वट्ठेन्तोति धातूनं समभावेन वत्तितुं अप्पदानवसेन उप्पन्नं रोगं वट्ठेन्तो । धातूनं विसमभावापत्तिया च आहारस्स च अरुच्चनेन गहितकस्स सरीरे लोहितं सुस्सति, मंसं मिलायति, तं पनस्स यक्खो धातुक्खोभनिमित्तताय करोन्तो विय होतीति वुत्तं “अप्पमंसलोहितं करोन्तो”ति ।

२८३. तेसं नामानि इन्दादिनामभावेन वोहरितब्बतो । ततोति ततो आरोचनतो परं । तेति यक्खसेनापतयो । ओकासो न भविस्सतीति भिक्खुभिक्खुनियो, उपासकउपासिकायो विहेठेतुं अवसरो न भविस्सति सम्मदेव आरक्खाय विहितत्ताति ।

आटानाटियसुत्तवण्णनाय लीनत्थप्पकासना ।

१०. सङ्गीतिसुत्तवण्णना

२९६. दससहस्सचक्कवाळेति बुद्धखेत्तभूते दससहस्सपरिमाणे चक्कवाळे । तत्थ हि इमस्मिं चक्कवाळे देवमनुस्सायेव कताधिकारा, इतरेसु देवा विसेसभागिनो । तेन वुत्तं “दससहस्सचक्कवाळे जाणजालं पत्थरित्वा”ति । जाणजालपत्थरणन्ति च तेसं तेसं सत्तानं आसयादिविभावनवसेन जाणस्स पवत्तनमेव । तेनाह “लोकं वोलोकयमानो”ति, सत्तलोकं व्यवलोकयमानो आसयानुसयचरिताधिमुत्तिआदिके विसेसतो ओगाहेत्वा पस्सन्तोति अत्थो । मङ्गलं भणापेस्सन्ति “तं तेसं आरयति विसेसाधिगमस्स विज्जाट्टानं हुत्वा दीघरत्तं हिताय सुखाय भविस्सा”ति । तीहि पिटकेहि सम्मसित्वाति तिपिटकतो एककदुकादिना सङ्गहेतब्बस्स सङ्गणहनवसेन सम्मसित्वा वीमंसित्वा । जातुं इच्छिता अत्था पज्हा, ते पन इमस्मिं सुत्ते एककादिवसेन आगता सहस्सं, चुद्दस चाति आह “चुद्दसपज्हाधिकेन पज्हसहस्सेन पटिमण्डेत्वा”ति । एवमिध सम्पिण्डेत्वा दस्सिते पज्हे परतो सुत्तपरियोसाने “एककवसेन द्वे पज्हा कथिता”तिआदिना (दी० नि० अट्ठ० ३.३४९) विभागेन परिगणेत्वा सयमेव दस्सेस्सति ।

उब्भतकनवसन्धागारवण्णना

२९७. उच्चाधिष्ठानताय तं सन्धागारं भूमितो उब्भतं वियाति “उब्भतक”न्ति नामं लभति । तेनाह “उच्चत्ता वा एवं वुत्त”न्ति । सन्धागारसालाति एका महासाला । उय्योगकरणादीसु हि राजानो तत्थ ठत्वा “एत्तका पुरतो गच्छन्तु, एत्तका पच्छा”तिआदिना तत्थ निसीदित्वा सन्धं करोन्ति मरियादं बन्धन्ति, तस्मा तं ठानं “सन्धागार”न्ति वुच्चति । उय्योगट्टानतो च आगन्त्वा याव गेहं गोमयपरिभण्डादिवसेन पटिजग्नं करोन्ति, ताव एकं द्वे दिवसे ते राजानो तत्थ सन्धम्भन्तीतिपि सन्धागारं, तेसं राजूनं सह अत्थानुसासनअगारन्तिपि सन्धागारन्ति । यस्मा वा ते तत्थ सन्निपतित्वा “इमस्मिं काले कसितुं वट्ठति, इमस्मिं कालेवपितु”न्तिआदिना घरावासकिच्चं सन्धरन्ति, तस्मा छिद्दावछिद्दं घरावासं तत्थ सन्धरन्तीतिपि सन्धागारं, सा एव सालाति सन्धागारसाला । देवताति घरदेवता । निवासवसेन अनज्झावुत्थत्ता “केनचि वा मनुस्सभूतेना”ति वुत्तं । कम्मकरणवसेन पन मनुस्सा तत्थ निसज्जादीनि कप्पेसुमेव । “सयमेव पन सत्थु इधागमनं अम्हाकं पुज्जवसेनेव, अहो मयं पुज्जवन्तो”ति हट्ठतुट्ठा एवं सम्मा चिन्तेसुन्ति दस्सेन्तो “अम्हेही”तिआदिमाह ।

२९८. अट्टकाति चित्तकम्मकरणत्थं बद्धा मज्जका । मुत्तमत्ताति तावदेव सन्धागारे नवकम्मस्स निट्ठापितभावमाह, तेन “अचिरकारित”न्तिआदिना वुत्तमेवत्थं विभावेति । अरज्जं आरामो आरमितब्बट्टानं एतेसन्ति अरज्जारामा । सन्थरणं सन्थरि, सब्बो सकलो सन्थरि एत्थाति सब्बसन्थरि, भावनपुंसकनिद्देसोयं । तेनाह “यथा सब्बं सन्थतं होति, एव”न्ति ।

२९९. समन्तपासादिकोति समन्ततो सब्बभागेन पसादावहो चातुरियसो । “असीतिहत्थं ठानं गण्हाती”ति इदं बुद्धानं कायप्पभाय पकतिया असीतिहत्थे ठाने अभिब्यापनतो वुत्तं । इद्धानुभावेन पन अनन्तं अपरिमाणं ठानं विज्जोततेव । नीलपीतलोहितोदातमज्जट्टपभस्सरवसेन छब्बण्णा । सब्बे दिसाभागाति सरीरप्पभाय बाहुल्लतो वुत्तं ।

अब्भमहिकादीहि उपक्विलिट्ठं सुज्जं न सोभति, तारकाचितं पन अन्तलिक्खं तासं पभाहि समन्ततो विज्जोतमानं विरोचतीति आह “समुगगततारकं विय गगनतल”न्ति । सब्बपालिफुल्लोति मूलतो पट्टाय याव साखग्गा फुल्लो । “पटिपाटियाठपितान”न्तिआदि परिकप्पूमा । तथा हि विय-सद्दग्गहणं कतं । सिरिया सिरिं अभिभवमानं वियाति अत्तनो सोभाय तेसं सोभन्ति अत्थो । “भिकखूपि सब्बेवा”ति इदं नेसं “अप्पिच्छा”तिआदिना वुत्तगुणेषु लोकिगुणानं वसेन योजेतब्बं । न हि ते सब्बेव दसकथावत्थुलाभिनो । तेन वुत्तं “सुत्तन्तं आवज्जेत्वा...पे०... अरहत्तं पापुणिस्सन्ती”ति (दी० नि० अट्ठ० ३.२९६) । तस्मा ये तत्थ अरिया, ते सब्बेसम्पि पदानं वसेन बोधिता होन्ति । ये पन पुथुज्जना, ते लोकिगुणदीपकेहि पदेहीति न तथा हेट्ठा “असीतिमहाथेरा”तिआदि वुत्तं । पुब्बे अरहत्तभागिनो गहिता ।

रूपकायस्स असीतिअनुब्यञ्जन-पटिमण्डित-द्वित्तिसमहापुरिसलक्खणकायप्पभाब्यामप्पभाकेतुमालाविचित्तताव (दी० नि० २.३३; ३.२००; म० नि० २.३८५) **बुद्धवेसो**। छब्बण्णा बुद्धरस्मियो विस्सज्जेन्तस्स भगवतो कायस्स आलोकितविलोकितादीसु परमुक्कंसगतो बुद्धावेणिको अच्चन्तुपसमो **बुद्धविलासो**। अस्सन्ति तस्सं।

सन्धागारानुमोदनपटिसंयुत्ताति “सीतं उण्हं पटिहन्ती”तिआदिना (चूळव० २९५, ३१५) नयेन सन्धागारगुणूपसज्जिता सन्धागारकरणपुञ्जानिसंसभाविनी। **पकिण्णककथाति** सङ्गीतिअनारुळ्हा सुणन्तानं अज्झासयानुरूपताय विविधविपुलहेतूपमासमालङ्कता नानानयविचित्ता वित्थारकथा। तेनाह “तदा ही”तिआदि। **आकासगङ्गं ओतारेन्तो विय** निरुपक्किलेसताय सुविसुद्धेन, विपुलोदारताय अपरिमेय्येन च अत्थेन सुणन्तानं कायचित्तपरिळाहवूपसमनतो। **पथवोजं आकट्टन्तो विय** अज्जेसं सुदुक्करताय, महासारताय वा अत्थस्स। **महाजम्बु मत्थके गहेत्वा चालेन्तो विय** चालनपच्चयट्टानवसेन पुब्बेनापरं अनुसन्धानतो। **योजनिय...पे०... पायमानो विय** देसनं चतुसच्चयन्ते पक्खिपित्वा अत्थवेदधम्मवेदस्सेव लभापनेन सातमधुरधम्मामतरसूपसंहरणतो। **मधुगण्डन्ति** मधुपटलं।

३००. “**तुण्हीभूतं तुण्हीभूतं**”न्ति ब्यापनिच्छायं इदं आमोडितवचनन्ति दस्सेतुं “**यं यन्दिसं**”न्तिआदि वुत्तं। **अनुविलोकेत्वाति** एत्थ अनु-सद्दो “परी”ति इमिना समानत्थो, **विलोकनञ्चेत्थ** सत्थु चक्खुद्वयेनपि इच्छितव्वन्ति “मंसचक्खुना...पे०... ततो ततो विलोकेत्वा”ति सङ्खेपतो वत्वा तमत्थं वित्थारतो दस्सेतुं “**मंसचक्खुना ही**”तिआदि वुत्तं। हत्थेन कुच्छितं कतं **हत्थकुक्कुच्चं** कुकतमेव कुक्कुच्चन्ति कत्वा। एवं **पादकुक्कुच्चं** दट्ठव्वं। **निच्चला निसीदिंसु** अत्तनो सुविनीतभावेन, बुद्धगारवेन च। “**आलोकं पन वड्डयित्वा**”तिआदि कदाचि भगवा एवम्पि करोतीति अधिप्पायेन वुत्तं। न हि सत्थु सावकानं विय एवं पयोगसम्पादनीयमेतं आणं। तिरोहितविदूरवत्तनिपि रूपगते मंसचक्खुनो पवत्तिया इच्छितत्ता वीमंसितव्वं। **अरहत्तुपगं** अरहत्तपदट्टानं। **चक्खुतलेसु निमित्तं ठपेत्वाति** भावनानुयोगसम्पत्तिया सव्वेसं तेसं भिक्खून् चक्खुतलेसु लब्धमानं सन्तिन्द्रियविगतथिनमिद्धताकारसङ्घातं निमित्तं अत्तनो हृदये ठपेत्वा सल्लक्खेत्वा। **कस्मा आगिलायति** कोटिसतसहस्सहत्थिनागानं बलं धारेन्तस्साति चोदकस्स अधिप्पायो। आचरियो एस सङ्खारानं सभावो, यदिदं अनिच्चता। ये पन अनिच्चा, ते एकन्तेनेव उदयवयपटिपीळितताय दुक्खा एव, दुक्खसभावेसु तेसु सत्थु काये दुक्खुप्पत्तिया अयं पच्चयोति दस्सेतुं “**भगवतो ही**”तिआदि वुत्तं। **पिट्ठिवातो उप्पज्जि**, सो च खो पुब्बे कतकम्मपच्चया। स्वायमत्थो परमत्थदीपनियं **उदानट्टकथायं** आगतनयेनेव वेदितव्वो।

भिन्ननिगण्ठवत्थुवण्णना

३०१. **हेट्ठा वुत्तमेव** पासादिकसुत्तवण्णनायं (दी० नि० अट्ठ० ३.१६४)।

३०२. **स्वाख्यातं धम्मं देसेतुकामोति** स्वाख्यातं कत्वा धम्मं कथेतुकामो, सत्थारा वा स्वाख्यातं धम्मं सयं भिक्खून् कथेतुकामो। सत्थारा देसितधम्ममेव हि ततो ततो गहेत्वा सावका सब्रह्मचारीनं कथेन्ति।

एकवण्णना

३०३. **समग्गेहि भासितव्वन्ति** अज्जमज्जं समग्गेहि हुत्वा भासितव्वं, सज्झायितव्वञ्चेव वण्णेतव्वञ्चाति अत्थो। यथा पन समग्गेहि सङ्गायनं होति, तम्पि दस्सेतुं “**एकवचनेही**”तिआदि वुत्तं। **एकवचनेहीति** विरोधाभावेन समानवचनेहि। तेनाह “**अविरुद्धवचनेही**”तिआदि। **सामगिरसं दस्सेतुकामोति** यस्मिं धम्मे सङ्गायने

सामगिरसानुभवनं इच्छितं देसनाकुसलताय, तत्थ एककदुकतिकदिवासेन बहुधा सामगिरसं दस्सेतुकामो । **सब्बे सत्ता**ति अनवसेसा सत्ता, ते पन भवभेदतो सङ्खेपेनेव भिन्दित्वा दस्सेन्तो “**कामभवादीसू**”ति आदिमाह । ब्यधिकरणानम्पि बाहिरत्थसमासो होति यथा “उरसिलोमो”ति आह “**आहारतो ठिति एतेसन्ति आहारट्टितिका**”ति । तिट्ठति एतेनाति ठिति, आहारो ठिति एतेसन्ति **आहारट्टितिका**ति एवं वा एत्थ समासविगगहो दट्ठब्बो । **आहारट्टितिका**ति पच्चयट्टितिका, पच्चयायत्तवुत्तिकति अत्थो । पच्चयत्थो हेत्थ आहार-सद्दो “अयं आहारो अनुप्पन्नस्स वा कामच्छन्दस्सउप्पादाया”ति आदीसु (सं० नि० ५.१८३, २३२) विय । एवञ्चि “**सब्बे सत्ता**”ति इमिना असज्जसत्तापि परिगगहिता होन्ति । सा पनायं आहारट्टितिकता निप्परियायतो सङ्खारधम्मो, न सत्तधम्मो । तेनेवाहु **अट्ठकथाचरिया** “सब्बे सत्ता आहारट्टितिकाति आगतट्ठाने सङ्खारलोको वेदितब्बो”ति (विसुद्धि० १.१३६; पारा० अट्ठ० वेरज्जकण्डवण्णना; उदा० अट्ठ० ३०; चूळनि० अट्ठ० ६५; उदा० अट्ठ० १८६) यदि एवं “सब्बे सत्ता”ति इदं कथन्ति? पुग्गलाधिट्ठाना देसनाति नायं दोसो । यथाह भगवा “एकधम्मे भिक्खवे भिक्खु सम्मा निब्बिन्दमानो सम्मा विरज्जमानो सम्मा विमुच्चमानो सम्मा परियन्तदस्सावी सम्मत्तं अभिसमेच्च दिट्ठेव धम्मे दुक्खस्सन्तकरो होति, कतमस्मिं एकधम्मे? सब्बे सत्ता आहारट्टितिका”ति (अ० नि० १०.२७) **एको धम्मो**ति “सब्बे सत्ता आहारट्टितिका”ति ख्यायं पुग्गलाधिट्ठानाय कथाय सब्बेसं सङ्खारानं पच्चयायत्तवुत्तिताय आहारपरियायेन सामज्जतो पच्चयधम्मो वुत्तो, अयं आहारो नाम एको धम्मो । **याथावतो जत्वा**ति यथासभावतो अभिसम्बुज्झित्वा । **सम्मदक्खातो**ति तेनेव अभिसम्बुद्धाकारेण सम्मदेव देसितो ।

चोदको वुत्तम्पि अत्थं याथावतो अप्पटिपज्जमानो नेय्यत्थं सुत्तपदं नीतत्थतो दहन्तो “सब्बे सत्ता”ति वचनमत्ते ठत्वा “**ननु चा**”ति आदिना चोदेति । आचरियो अविपरीतं तत्थ यथाधिप्पेतमत्थं पवेदेन्तो “न विरुज्झती”ति वत्वा “**तेसज्झि ज्ञानं आहारो होती**”ति आह । **ज्ञान**न्ति एकवोकारभवावहं सज्जाय विरज्जनवसेन पवत्तं रूपावचरचतुत्थज्ज्ञानं । पाळियं पन “अनाहारा”ति वचनं असज्जभवे चतुन्नं आहारानं अभावं सन्धाय वुत्तं, न पच्चयाहारस्स अभावतो । “**एवं सन्तेपी**”ति इदं सासने येसु धम्मेसु विसेसतो आहार-सद्दो निरुळ्ळहो, “आहारट्टितिका”ति एत्थ यदि ते एव गय्हन्ति, अब्यापितदोसो आपन्नो । अथ सब्बोपि पच्चयधम्मो आहारोति अधिप्पेतो, इमाय आहारपाळिया विरोधो आपन्नोति दस्सेतुं आरब्धं । “न विरुज्झती”ति येनाधिप्पायेन वुत्तं, तं विवरन्तो “**एतस्मिज्झि सुत्ते**”ति आदिमाह । कबळीकाराहारादीनं ओजट्ठमकरूपाहरणादि निप्परियायेन आहारभावो । यथा हि कबळीकाराहारो ओजट्ठमकरूपाहरणेन रूपकायं उपत्थम्भेति, एवं फस्सादयो च वेदनादिआहरणेन नामकायं उपत्थम्भेन्ति, तस्मा सतिपि जनकभावे उपत्थम्भकभावो ओजादीसु सातिसयो लब्धमानो मुख्यो आहारट्ठोति ते एव निप्परियायेन आहारलक्खणा धम्मा वुत्ता । **इधा**ति इमस्मिं सङ्गीतिसुत्ते । **परियायेन पच्चयो आहारोति वुत्तो** सब्बो पच्चयो धम्मो अत्तनो फलं आहरतीति इमं परियायं लभतीति । तेनाह “**सब्बधम्मानज्ही**”ति आदि । तत्थ **सब्बधम्मान**न्ति सब्बेसं सङ्खतधम्मानं । इदानि यथावुत्तमत्थं सुत्तेन (अ० नि० १०.६१) समत्थेतुं “**तेनेवाहा**”ति आदि वुत्तं । अयन्ति पच्चयाहारो ।

निप्परियायाहारोपि गहितोव होति, यावता सोपि पच्चयभावेनेव जनको, उपत्थम्भको च हुत्वा तं तं फलं आहरतीति वत्तब्बतं लभतीति । **तत्था**ति परियायाहारो, निप्परियायाहारोति द्वीसु आहारेसु । असज्जभवे यदिपि निप्परियायाहारो न लब्धति, **पच्चयाहारो** पन **लब्धति** परियायाहारलक्खणो । इदानि इममेवत्थं वित्थारेण दस्सेतुं “**अनुप्पन्ने हि बुद्धे**”ति आदि वुत्तं । उप्पन्ने बुद्धे तित्थकरमतनिस्सितानं ज्ञानभावनाय असिज्जनतो “**अनुप्पन्ने बुद्धे**”ति वुत्तं । सासनिका तादिसं ज्ञानं न निब्बत्तेतीति “**तित्थायतने पब्बजिता**”ति वुत्तं । तित्थिया हि उपत्तिविसेसे विमुत्तिसज्जनो, अज्जाविरागाविरागोसु आदीनवानिसंसदस्सिनो वा हुत्वा असज्जसमापत्तिं निब्बत्तेत्वा अक्खणभूमियं उपज्जन्ति, न सासनिका । **वायोकसिणे परिकम्पं कत्वा**ति वायोकसिणे पठमादीनि तीणि ज्ञानानि निब्बत्तेत्वा

ततियज्ज्ञाने चिण्णवसी हुत्वा ततो वुट्ठाय चतुत्थज्ज्ञानाधिगमाय परिकम्मं कत्वा । तेनाह “**चतुत्थज्ज्ञानं निब्बत्तेत्वा**”ति । कस्मा पनेत्थ वायोकसिणयेव परिकम्मं वुत्तन्ति? यदेत्थ वत्तब्बं, तं ब्रह्मजालटीकायं (दी० नि० टी० १.४१) वित्थारितमेव । धीति जिगुच्छन्त्ये निपातो, तस्मा धी चित्तन्ति चित्तं जिगुच्छामीति अत्थो । **धिब्बत्तेतं चित्तन्ति** एतं मम चित्तं जिगुच्छितं वत होतु । **वत्ताति** सम्भावने, तेन जिगुच्छं सम्भावेन्तो वदति । **नामाति** च सम्भावने एव, तेन चित्तस्स अभावं सम्भावेति । चित्तस्स भावाभावेसु आदीनवानिसंसे दस्सेतुं “**चित्तज्ही**”तिआदि वुत्तं । **खन्तिं रुचिं उप्पादेत्वाति** “चित्तस्स अभावो एव साधु सुट्ठु”ति इमं दिट्ठिनिज्ज्ञानकखन्तिं, तत्थ च अभिरुचिं उप्पादेत्वा ।

तथा भावितस्स ज्ञानस्स ठितिभागियभावप्पत्तिया अपरिहीनज्ज्ञानस्स तित्थायतने पब्बजितस्सेव तथा ज्ञानभावना होतीति आह “**मनुस्सलोके**”ति । **पणिहितो अहोसीति** मरणस्स आसन्नकाले ठपितो अहोसि । यदि ठानादिना आकारेन निब्बत्तेय्य, कम्मबलेन याव भेदा तेनेवाकारेन तिट्ठेय्य वाति आह “**सो तेन इरियापथेना**”तिआदि ।

एव रूपानम्पीति एवं अचेतनानम्पि । **पि-**सद्देन पगेव सचेतनानन्ति दस्सेति । कथं पन अचेतनानं नेसं पच्चयाहारस्स उपकप्पन्ति चोदनं सन्धाय तत्थ निदस्सनं दस्सेन्तो “**यथा**”तिआदिमाह ।

ये उट्ठानवीरियेनेव दिवसं वीतिनामेत्वा तस्स निस्सन्दफलमत्तं किञ्चिदेव लभित्वा जीविकं कप्पेन्ति, ते **उट्ठानफलूपजीविनो** । ये पन अत्तनो पुञ्जफलमेव उपजीवेन्ति, ते **पुञ्जफलूपजीविनो** । नेरयिकानं पन नेव उट्ठानवीरियवसेन जीविकाकप्पनं, पुञ्जफलस्स पन लेसोपि नत्थीति वुत्तं “**ये पन ते नेरयिका...पे०... न पुञ्जफलूपजीवीति वुत्ता**”ति । पटिसन्धिविज्जाणस्स आहरणेन मनोसञ्चेतनाहारोति वुत्ता, न यस्स कस्सचि फलस्साति अधिप्पायेन “**किं पञ्च आहारा अत्थी**”ति चोदेति । आचरियो निप्परियायाहारे अधिप्पेते सिया तव चोदनायावसरो, सा पन एत्थ अनवसराति दस्सेतुं “**पञ्च न पञ्चाति इदं न वत्तब्ब**”न्ति वत्वा परियायाहारस्सेव पनेत्थ अधिप्पेतभावं दस्सेन्तो “**ननु पच्चयो आहारोति वुत्तमेत**”न्ति आह । **तस्माति** यस्स कस्सचि पच्चयस्स “**आहारो**”ति इच्छितत्ता । इदानी वुत्तमेवत्थं पाळिया समत्थेन्तो “**यं सन्धाया**”तिआदिमाह ।

मुख्याहारवसेनपि नेरयिकानं आहारट्टितिकतं दस्सेतुं “**कबळीकारं आहारं...पे०... साधेती**”ति वुत्तं । यदि एवं नेरयिका सुखपटिसंवेदिनोपि होन्तीति? नोति दस्सेतुं “**खेळोपि ही**”तिआदि वुत्तं । **तयोति** तयो अरूपाहारा कबळीकाराहारस्स अभावतो । **अवसेसानन्ति** असज्जसत्तेहि अवसेसानं । कामभवादीसु निब्बत्तसत्तानं पच्चयाहारो हि सब्बेसं साधारणोति । **एतं पज्जन्ति** “**कतमो एको धम्मो**”ति एवं चोदितमेतं पज्जं । **कथेत्वाति** विस्सज्जेत्वा ।

“**तत्थ तत्थ...पे०... दुक्खं होती**”ति एतेन यथा इध पठमस्स पज्जस्स निर्यातनं, दुतियस्स उद्धरणं न कतं, एवं इमिना एव अधिप्पायेन इतो परेसु दुक्तिकादिपज्जेसु तत्थ तत्थ आदिपरियोसानेसु एव उद्धरणनिर्यातनानि कत्वा सेसेसु न कतन्ति दस्सेति । पटिच्च एतस्मा फलं एतीति **पच्चयो**, कारणं, तदेव अत्तनो फलं सङ्करोतीति **सङ्कारोति** आह “**इमस्मिम्पि...पे०... सङ्कारोति वुत्तो**”ति । **आहारपच्चयोति** आहरणट्टिविसिट्ठो पच्चयो । **आहरणज्वेत्थ** उप्पादकत्तप्पधानं, **सङ्करणं** उपत्थम्भकत्तप्पधानन्ति अयमेतेसं विसेसो । तेनाह “**अयमेत्थ हेट्ठिमतो विसेसो**”ति । निप्परियायाहारे गहिते “**सब्बे सत्ता**”ति वुत्तेपि असज्जसत्ता न गहिता एव भविस्सन्तीति पदेसविसयो सब्ब-सदो होति यथा “**सब्बे तसन्तिदण्डस्सा**”तिआदीसु (ध० प० १३०) । न हेत्थ खीणासवादीनं गहणं होति । **पाकटो भवेय्य** विसेससामज्जस्स विसयत्ता पज्जानं । **नो च गण्हिसु** अट्ठकथाचरिया । **धम्मो नाम नत्थि** सङ्कतोति अधिप्पायो । इध दुतियपज्जे “**सङ्कारो**”ति पच्चयो एव कथितोति सम्बन्धो ।

यदा सम्मासम्बोधिसमधिगतो, तदा एव सब्बजेय्यं सच्छिकतं जातन्ति आह “महाबोधिमण्डे निसीदित्वा”ति । सयन्ति सामंयेव । अद्धनियन्ति अद्धानक्खमं चिरकालावद्वायि पारम्परियवसेन । तेनाह “एकेन ही”तिआदि । परम्परकथानियमेनाति परम्परकथाकथननियमेन, नियमितत्थब्यञ्जनानुपुब्बिया कथायाति अत्थो । एककवसेनाति एकं एकं परिमाणं एतस्साति एकको, पज्जो । तस्स एककस्स वसेन । एककं निद्रितं विस्सज्जनन्ति अधिप्पायोति ।

एककवण्णना निद्रिता ।

दुकवण्णना

३०४. चत्तारो खन्धाति तेसं ताव नामनट्ठेन नामभावं पठमं वत्त्वा पच्छा निब्बानस्स वत्तुकामो आह । तस्सापि हि तथा नामभावं परतो वक्खति । “नामं करोति नामयती”ति एत्थ यं नामकरणं, तं नामन्ति आह “नामनट्ठेनाति नामकरणट्ठेना”ति, अत्तनोवाति अधिप्पायो । एवज्झि सातिसयमिदं तेसं नामकरणं होति । तेनाह “अत्तनो नामं करोन्ताव उप्पज्जन्ती”तिआदि । इदानि तमत्थं व्यतिरेकमुखेन विभावेतुं “यथा ही”तिआदि वुत्तं । यस्स नामस्स करणेनेव ते “नाम”न्ति वुच्चन्ति, तं सामञ्जनामं, कित्तिमनामं, गुणनामं वा न होति, अथ खो ओपपातिकनामन्ति पुरिमानि तीणि नामानि उदाहरणवसेन दस्सेत्वा “न एवं वेदनादीन”न्ति ते पटिक्खिपित्वा इतरनाममेव नामकरणट्ठेन नामन्ति दस्सेन्तो “वेदनादयो ही”तिआदिमाह । “महापथविआदयो”ति कस्मा वुत्तं, ननु पथविआपादयो इध नामन्ति अनधिप्पेता, रूपन्ति पन अधिप्पेताति? सच्चमेतं, फस्सवेदनादीनं विय पन पथविआदीनं ओपपातिकनामतासामञ्जेन “पथविआदयो विया”ति निदस्सनं कतं, न अरूपधम्मा विय रूपधम्मानं नामसभावत्ता । फस्सवेदनादीनज्झि अरूपधम्मानं सब्बदापि फस्सादिनामकत्ता, पथविआदीनं केसकुम्भादिनामन्तरापत्ति विय नामन्तरानापज्जनतो च सदा अत्तनाव कतनामताय चतुक्खन्धनिब्बानानि नामकरणट्ठेन नामं । अथ वा अधिवचनसम्फस्सो विय अधिवचननाममन्तरेन ये अनुपचितसम्भारानं गहणं न गच्छन्ति, ते नामायत्तगहणा नामं । रूपं पन विनापि नामसाधनं अत्तनो रूपनसभावेन गहणं उपयातीति रूपं । तेनाह “तेसु उप्पन्नेसू”तिआदि । इधापि “यथापथविया”तिआदीसु वुत्तनयेनेव अत्थो वेदितब्बो निदस्सनवसेन आगतत्ता । “अतीतेपी”तिआदिना वेदनादीसु नामसञ्जा निरुल्लाहा, अनादिकालिका चाति दस्सेति ।

इति अतीतादिविभागवन्तानम्पि वेदनादीनं नामकरणट्ठेन नामभावो एकन्तिको, तब्बिभागरहिते पन एकसभावे निच्चे निब्बाने वत्तब्बमेव नत्थीति दस्सेन्तो “निब्बानं पन...पे०... नामनट्ठेन नाम”न्ति आह । नामनट्ठेनाति नामकरणट्ठेन । नमन्तीति एकन्ततो सारम्मणत्ता तन्निन्ना होन्ति, तेहि विना नप्पवत्तन्तीति अत्थो । सब्बन्ति खन्धचतुक्कं, निब्बानञ्च । यस्मिं आरम्मणेयेव वेदनाक्खन्धो पवत्तति, तंसम्पयुत्तताय सञ्जाक्खन्धादयोपि तत्थ पवत्तन्तीति सो ने तत्थ नामेन्तो विय होति विना अप्पवत्तनतो । एस नयो सञ्जाक्खन्धादीसुपीति वुत्तं “आरम्मणे अज्जमज्जं नामेन्ती”ति । अनवज्जधम्मे मग्गफलादिके । कामं केसुचि रूपधम्मेसुपि आरम्मणाधिपतिभावो लब्भतेव, निब्बाने पनेस सातिसयो तस्स अच्चन्तसन्तपणीतताक्पभावतोति तदेव आरम्मणाधिपतिपच्चयताय “अत्तनि नामेती”ति वुत्तं । तथा हि अरिया सकलम्पि दिवसभागं तं आरब्ध वीतिनामेन्तापि तित्तिं न गच्छन्ति ।

“रूपनट्ठेना”ति एतेन रूप्यतीति रूपन्ति दस्सेति । तत्थ सीतादिविरोधिपच्चयसन्निपाते विसदिसुप्पत्ति रूप्यनं । ननु च अरूपधम्मानम्पि विरोधिपच्चयसमागमे विसदिसुप्पत्ति लब्भतीति? सच्चं लब्भति, न पन विभूततरं । विभूततरज्जेत्थ रूप्यनं अधिप्पेतं सीतादिगहणतो । वुत्तज्जेतं “रूप्यतीति खो भिक्खवे तस्मा ‘रूप’न्ति वुच्चति । केन रूप्यति? सीतेनपि रूप्यति, उण्हेनपि रूप्यती”तिआदि (सं० नि० ३.७९) । यदि एवं कथं ब्रह्मलोके रूपसमञ्जाति? तत्थापि

तंसभावानतिवत्तनतो होतियेव रूपसमञ्जा । अनुग्राहकपच्चयवसेन वा विसदिसपच्चयसन्निपातेति एवमत्थो वेदितब्बो । “यो अत्तनो सन्ताने विज्जमानस्सयेव विसदिसुप्पत्तिहेतुभावो, तं **रुप्पनं**”न्ति अज्जे । इमस्मिं पक्खे रूपयति विकारमापादेतीति **रूपं** । “सङ्खट्टेनेन विकारापत्तियं **रुप्पन**-सद्दो निरुळ्हो”ति केचि । एतस्मिं पक्खे अरूपधम्मेषु रूपसमञ्जाय पसङ्गो एव नत्थि सङ्खट्टेनाभावतो । “पटिघतो **रुप्पनं**”न्ति अपरे । “तस्साति रूपस्सा”ति वदन्ति, नामरूपस्साति पन युत्तं । यथा हि रूपस्स, एवं नामस्सापि वेदनाक्खन्धादिवसेन, मदनिममदनादिवसेन च वित्थारकथा **विसुद्धिमग्गे** (विसुद्धि० २.४५६) वुत्ता एवाति । इति अयं दुको कुसलत्तिकेन सङ्गहिते सभावधम्मे परिगगहेत्वा पवत्तोति ।

अविज्जाति अविन्दियं “अत्ता, जीवो, इत्थी, पुरिसो”ति एवमादिकं विन्दतीति **अविज्जा** । विन्दियं “दुक्खं, समुदयो”ति एवमादिकं न विन्दतीति **अविज्जा** । सब्बम्पि धम्मजातं अविदितकरणट्टेन **अविज्जा** । अन्तरहिते संसारे सत्ते जवापेतीति **अविज्जा** । अत्थतो पन सा दुक्खादीनं चतुन्नं सच्चानं सभावच्छादको सम्मोहो होतीति आह “**दुक्खादीसु अज्जाणं**”न्ति । **भवपत्थना** नाम कामभावादीनं पत्थनावसेन पवत्ततण्हा । तेनाह “**यो भवेसु भवच्छन्दो**”तिआदि । इति “अयं दुको वट्टमूलसमुदाचारदस्सनत्थं गहितो ।

भवदिट्ठीति खन्धपञ्चकं “अत्ता च लोको चा”ति गाहेत्वा तं “भविस्सती”ति गणहनवसेन निविट्ठा सस्सतदिट्ठीति अत्थो । तेनाह “**भवो वुच्चती**”तिआदि । भविस्सतीति **भवो**, तिट्ठति सब्बकालं अत्थीति अत्थो । **सस्सतन्ति** सस्सतभावो । **विभवदिट्ठी**ति खन्धपञ्चकमेव “अत्ता”ति च “लोको”ति च गहेत्वा तं “न भविस्सती”ति गणहनवसेन निविट्ठा उच्छेददिट्ठीति अत्थो । तेनाह “**विभवो वुच्चती**”तिआदि । विभविस्सति विनस्सति उच्छिज्जतीति **विभवो**, उच्छेदो ।

यं न हिरीयतीति येन धम्मेन तंसम्पयुत्तधम्मसमूहो, पुगलो वा न हिरीयति न लज्जति, लिङ्गविपल्लासं वा कत्वा यो धम्मोति अत्थो वेदितब्बो । **हिरीयितब्बेना**ति उपयोगत्थे करणवचनं, हिरीयितब्बयुत्तकं कायदुच्चरितादिधम्मं न जिगुच्छतीति अत्थो । **निल्लज्जता**ति पापस्स अजिगुच्छना । **यं न ओत्तप्पती**ति एत्थापि वुत्तनयेनेव अत्थो वेदितब्बो । **ओत्तप्पितब्बेना**ति पन हेतुअत्थे करणवचनं, ओत्तप्पितब्बयुत्तकेन ओत्तप्पस्स हेतुभूतेन कायदुच्चरितादिनाति अत्थो । **हिरीयितब्बेना**ति एत्थापि वा एवमेव अत्थो वेदितब्बो । **अभायनकआकारो**ति पापतो अनुत्तासनाकारो ।

“**यं हिरीयती**”तिआदीसु अनन्तरदुके वुत्तनयेन अत्थो वेदितब्बो । नियकज्झत्तं जातिआदिसमुद्धानं एतिस्साति **अज्झत्तसमुद्धाना** । नियकज्झत्ततो बहिभावतो बहिद्भा परसन्ताने समुद्धानं एतिस्साति **बहिद्भा समुद्धाना** । अत्ता एव अधिपति **अत्ताधिपति**, अज्झत्तसमुद्धानत्ता एव अत्ताधिपतितो आगमनतो **अत्ताधिपतेय्या** । **लोकाधिपतेय्यन्ति** एत्थापि एसेव नयो । **लज्जासभावसण्ठिता**ति पापतो जिगुच्छनरूपेन अवट्ठिता । **भयसभावसण्ठितन्ति** ततो उत्तासनरूपेन अवट्ठितं । अज्झत्तसमुद्धानादिता च हिरोत्तप्पानं तत्थ तत्थ पाकटभावेन वुत्ता, न पन तेसं कदाचिपि अज्जमज्जविप्पयोगतो । न हि लज्जनं निब्भयं, पापभयं वा अलज्जनं अत्थीति ।

दुक्खन्ति किच्छं, अनिट्ठन्ति वा अत्थो । **विप्पटिकूलगाहिम्ही**ति धम्मानुधम्मपटिपत्तिया विलोमगाहके । तस्सा एव विपच्चनीकं दुप्पटिपत्ति सातं इट्ठं एतस्साति विपच्चनीकसातो, तस्मिं **विपच्चनीकसाते** । एवंभूतो च ओवादभूते सासनक्कमे ओवादके च आदरभावरहितो होतीति आह “**अनादरे**”ति । **तस्स कम्मन्ति** तस्स दुब्बचस्स पुगलस्स अनादरियवसेन पवत्तचेतना **दोवचस्सं** । **तस्स भावो**ति तस्स यथावुत्तस्स दोवचस्सस्स अत्थिभावो **दोवचस्सता**, अत्थतो दोवचस्समेव । तेनेवाह “**सा अत्थतो सङ्गारक्खन्धो होती**”ति । चेतनाप्पधानताय हि सङ्गारक्खन्धस्स एवं वुत्तं ।

एतेनाकारेनाति अप्पदक्खिणग्गाहिताकारेन । अस्सद्धियदुस्सील्यादिपापधम्मयोगतो पुग्गला पापा नाम होन्तीति दस्सेतुं “ये ते पुग्गला अस्सद्धा”तिआदि वुत्तं । याय चेतनाय पुग्गलो पापसम्पवङ्को नाम होति, सा चेतना पापमित्तता, चत्तारोपि वा अरूपिनो खन्धा तदाकारप्पवत्ता पापमित्तताति दस्सेन्तो “सापि अत्थतो दोवचस्सता विय दट्ठब्बा”ति आह ।

“सुखं वचो एतस्मिं पदक्खिणग्गाहिम्हि अनुलोमसाते सादरे पुग्गलेति सुब्बचोतिआदिना, “कल्याणा सद्धादयो पुग्गला एतस्स मित्ताति कल्याणमित्तो”तिआदिना च अनन्तरदुकस्स अत्थो इच्छितोति आह सोवचस्सता... पे०... वुत्तपटिपक्खनयेन वेदितब्बा”ति । उभोति सोवचस्सता, कल्याणमित्तता च । तेसं खन्धानं पवत्तिआकारविसेसा “सोवचस्सता, कल्याणमित्तता”ति च वुच्चन्ति, ते लोकियापि होन्ति लोकुत्तरापीति आह “लोकियलोकुत्तरमिस्सका कथिता”ति ।

वत्थुभेदादिना अनेकभेदभिन्ना तंतंजातिवसेन एकज्झं कत्वा रासितो गहमाणा आपत्तियोव आपत्तिक्खन्धा । ता पन अन्तरापत्तीनं अग्गहणे पज्चपि आपत्तिक्खन्धा आपत्तियो, तासं पन गहणे सत्तपि आपत्तिक्खन्धा आपत्तियो । “इमा आपत्तियो, एत्तका आपत्तियो, एवज्च तेसं आपज्जनं होती”ति जाननपज्जा आपत्तिकुसलताति आह “या तास”न्तिआदि । तासं आपत्तीनन्ति तासु आपत्तीसु । तत्थ यं सम्भिन्नवत्थुकासु विय ठितासु, दुविज्जेय्यविभागासु च आपत्तीसु असङ्करतो ववत्थान, अयं विसेसतो आपत्तिकुसलताति दस्सेतुं दुतियं आपत्तिग्गहणं कतं । सह कम्मवाचायाति कम्मवाचाय सहेव । आपत्तितो वुट्ठापनपयोगताय कम्मभूता वाचा कम्मवाचा, तथाभूता अनुसावनवाचा चेव “पस्सिस्सामी”ति एवं पवत्तवाचा च । ताय कम्मवाचाय सद्धिं समकालमेव “इमाय कम्मवाचाय इतो आपत्तितो वुट्ठानं होति, होन्तज्च पठमे वा ततिये वा अनुसावनेय्यकारप्पत्ते, “संवरिस्सामी”ति वा पदे परियोसिते होती”ति एवं तं तं आपत्तीहि वुट्ठानपरिच्छेदपरिजाननपज्जा आपत्तिवुट्ठानकुसलता । वुट्ठानन्ति च यथापन्नाय आपत्तिया यथा तथा अनन्तरायतापादनं, एवं वुट्ठानग्गहणेनेव देसनायपि सङ्गहो सिद्धो होति ।

“इतो पुब्बे परिकम्मं पवत्तं, इतो परं भवङ्ग मज्झे समापत्ती”ति एवं समापत्तीनं अप्पनापरिच्छेदजाननपज्जा समापत्तिकुसलता । वुट्ठाने कुसलभावो वुट्ठानकुसलता, पगेव वुट्ठान परिच्छेदकरं जाणं । तेनाह “यथापरिच्छिन्नसमयवसेनेवा”तिआदि । वुट्ठानसमत्थाति वुट्ठापने समत्था ।

“धातुकुसलता”ति एत्थ पथवीधातुआदयो, सुखधातुआदयो, कामधातुआदयो च धातुयो एतास्वेव अन्तोगधाति एतासु कोसल्ले दस्सिते तासुपि कोसल्लं दस्सितमेव होतीति “अट्ठारस धातुयो चक्खुधातु... पे०... मनोविज्जाणधातू”ति वत्वा “अट्ठारसन्नं धातूनं सभावपरिच्छेदका”ति वुत्तं । तत्थ सभावपरिच्छेदकाति यथाभूतसभावावबोधिनी । “सवनपज्जा धारणपज्जा”तिआदिना पच्चेकं पज्जा-सद्धो योजेतब्बो । धातूनं सवनधारणपज्जा सुतमया, इतरा भावनामया । तत्थापि सम्मसनपज्जा लोकिया । विपस्सना पज्जा हि सा, इतरा लोकुत्तरा । लक्खणादिवसेन, अनिच्चादिवसेन च मनसिकरणं मनसिकारो, तत्थ कोसल्लं मनसिकारकुसलता । तं पन आदिमज्झपरियोसानवसेन तिधा भिन्दित्वा दस्सेन्तो “सम्मसनपटिवेधपच्चवेक्खणपज्जा”ति आह । सम्मसनपज्जा हि तस्सा आदि, पटिवेधपज्जा मज्झे, पच्चवेक्खणपज्जा परियोसानं ।

आयतनानं गन्थतो च अत्थतो च उग्गणहनवसेन तेसं धातुलक्खणादिविभागस्स जाननपज्जा उग्गहजाननपज्जा । सम्मसनपटिवेधपच्चवेक्खणविधिनो जाननपज्जा मनसिकारजाननपज्जा । यस्मा आयतनानिपि अत्थतो धातुयोव

मनसिकारो च उग्गण्हनादिवसेन तेसमेव मनसिकारविधि, तस्मा धातुकुसलतादिका तिस्सोपि कुसलता एकदेसे कत्वा दस्सेतुं “अपिचा”तिआदि वुत्तं। सवनं विय उग्गण्हनपच्चवेक्खणानिपि परित्तजाणकत्तुकानीति आह “सवन उग्गण्हनपच्चवेक्खणा लोकिया”ति। अरियमग्गक्खणे सम्मसनमनसिकारानं निप्फत्ति परिनिट्ठानन्ति तेसं लोकुत्तरतापरियायोपि लब्भतीति वुत्तं “सम्मसनमनसिकारा लोकियलोकुत्तरमिस्सका”ति। पच्चयधम्मानं हेतुआदीनं अत्तनो पच्चयुप्पन्नानं हेतुपच्चयादिभावेन पच्चयभावो पच्चयाकारो, सो पन अविज्जादीनं द्वादसन्नं पटिच्चसमुप्पादङ्गानं वसेन द्वादसविधोति आह “द्वादसन्नं पच्चयाकारान”न्ति। उग्गहादिवसेनाति उग्गहमनसिकारसवनसम्मसनपटिवेधपच्चवेक्खणवसेन।

ठानञ्चेव तिड्ढति फलं तदायत्तवुत्तितायाति कारणञ्च हेतुपच्चयभावेन करणतो निप्फादनतो। तेसं सोतविज्जाणादीनं। एतस्मिं दुके अत्थो वेदितब्बोति सम्बन्धो। ये धम्मा यस्स धम्मस्स कारणभावतो ठानं, तेव धम्मा तंविधुरस्स धम्मस्स अकारणभावतो अट्ठानन्ति पठमनये फलभेदेन तस्सेव धम्मस्स ठानाट्ठानता दीपिता; दुतियनये पन अभिन्नेपि फले पच्चयधम्मभेदेन तेसं ठानाट्ठानता दीपिताति अयमेतेसं विसेसो। न हि कदाचि अरिया दिट्ठिसम्पदा निच्चग्गाहस्स कारणं होति, अकिरियता पन सिया तस्स कारणन्ति।

उजुनो भावो अज्जवं, अजिम्हता अकुटिलता अवङ्कताति अत्थोति तमत्थं अनज्जवपटिक्खेपमुखेन दस्सेतुं “गोमुत्तवङ्कता”तिआदि वुत्तं। स्वायं अनज्जवो भिक्खूनं येभ्य्येन अनेसनाय, अगोचरचारिताय च होतीति आह “एकच्चो हि...पे०... चरती”ति। अयं गोमुत्तवङ्कता नाम आदितो पट्टाय याव परियोसाना पटिपत्तिया वङ्कभावतो। पुरिमसदिसोति पठमं वुत्तभिक्खुसदिसो। चन्दवङ्कता नाम पटिपत्तिया मज्झट्टाने वङ्कभावापत्तितो। नङ्गलकोटिवङ्कता नाम परियोसाने वङ्कभावापत्तितो। इदं अज्जवं नाम सब्बत्थकमेव उजुभावसिद्धितो। अज्जवताति आकारनिद्देशो, येनाकारेनस्स अज्जवो पवत्ति, तदाकारनिद्देशोति अत्थो। लज्जतीति लज्जी, हिरिमा, तस्स भावो लज्जवं, हिरीति अत्थो। लज्जा एतस्स अत्थीति लज्जी यथा “माली, मायी”ति च, तस्स भावो लज्जीभावो, सा एव लज्जा।

परापराधादीनं अधिवासनक्खमं अधिवासनखन्ति। सुचिसीलता सोरच्चं। सा हि सोभनकम्मरतता, सुट्ठु वा पापतो ओरतभावो विरतता सोरच्चं। तेनाह “सुरतभावो”ति।

“नामञ्च रूपञ्चा”तिआदीसु अयं अपरो नयो – नामकरणट्ठेनाति अज्जं अनपेक्खित्वा सयमेव अत्तनो नामकरणसभावतोति अत्थो। यज्झि परस्स नामं करोति, तस्स च तदपेक्खत्ता अज्जापेक्खं नामकरणन्ति नामकरणसभावता न होति, तस्मा महाजनस्स जातीनं, गुणानञ्च सामज्जनामादिकारकानं नामभावो नापज्जति। यस्स च अज्जेहि नामं करीयति, तस्स च नामकरणसभावता नत्थीति, नत्थियेव नामभावो। वेदनादीनं पन सभावसिद्धत्ता वेदनादिनामस्स नामकरणसभावतो नामता वुत्ता। पथवीआदि निदस्सनेन नामस्स सभावसिद्धतंयेव निदस्सेति, न नामभावसामज्जं, निरुल्लहत्ता पन नाम-सद्दो अरूपधम्मेषु एव वत्ति, न पथवीआदीसूति न तेसं नामभावो। न हि पथवीआदिनामं विजहित्वा केसादिनामेहि रूपधम्मानं विय वेदनादिनामं विजहित्वा अज्जेन नामेन अरूपधम्मानं वोहरितब्बेन पिण्डाकारेन पवत्ति अत्थीति।

अथ वा रूपधम्मा चक्खादयो रूपादयो च, तेसं पकासकपकासितब्बभावतो विनापि नामेन पाकटा होन्ति, न एवं अरूपधम्माति ते अधिवचनसम्फस्सो विय नामायत्तगहणीयभावेन “नाम”न्ति वुत्ता। पटिघसम्फस्सो च न चक्खादीनि विय नामेन विना पाकटोति “नाम”न्ति वुत्तो, अरूपताय वा अज्जनामसभागत्ता सङ्गहितोयं, अज्जफस्ससभागत्ता वा।

वचनत्थोपि हि रूपयतीति **रूपं**, नामयतीति **नामन्ति** इध पच्छिमपुरिमानं सम्भवति । **रूपयतीति** विनापि नामेन अत्तानं पकासेतीति अत्थो । **नामयतीति** नामेन विना अपाकटभावतो अत्तनो पकासकं नामं करोतीति अत्थो ।
आरम्मणाधिपतिपच्चयतायाति सतिपि रूपस्स आरम्मणाधिपतिपच्चयभावे न तं परमस्सासभूतं निब्बानं विय सातिसयं नामनभावेन पच्चयोति निब्बानमेव “नाम”न्ति वुत्तं ।

“**अविज्जा च भवतण्हा चा**”ति अयं दुको सत्तानं वट्टमूलसमुदाचारदस्सनत्थो । समुदाचरतीति हि **समुदाचारो**, वट्टमूलमेव समुदाचारो **वट्टमूलसमुदाचारो**, वट्टमूलदस्सनेन वा वट्टमूलानं पवत्ति दस्सिता होतीति वट्टमूलानं समुदाचारो **वट्टमूलसमुदाचारो**, तंदस्सनत्थोति अत्थो ।

एकेकस्मिञ्च “अत्ता”ति च “लोको”ति च गहणविसेसं उपादाय “अत्ता च लोको चा”ति वुत्तं, एकं वा खन्धं “अत्ता”ति गहेत्वा अज्जं अत्तनो उपभोगभूतं “लोको”ति गणहन्तस्स, अत्तनो अत्तानं “अत्ता”ति गहेत्वा परस्स अत्तानं “लोको”ति गणहन्तस्स वा वसेन “अत्ता च लोको चा”ति वुत्तं ।

सह सिक्खितब्बो धम्मो **सहधम्मो**, तत्थ भवं सहधम्मिकं, तस्मिं **सहधम्मिके** । दोवचस्स-सद्वतो आय-सद्वं अनज्जत्तं कत्वा “**दोवचस्साय**”न्ति वुत्तं, दोवचस्सस्स वा अयनं पवत्ति **दोवचस्सायं** । आसेवन्तस्सापि अनुसिक्खना अज्झासयेन भजनाति आह “**सेवना...पे०... भजना**”ति । सब्बतोभागेन भत्ति **सम्भत्ति** ।

सह कम्मवाचायाति अब्भानतिणवत्थारककम्मवाचाय, “अहं भन्ते इत्थन्नामं आपत्तिं आपज्जि”न्ति आदिकाय च सहेव । सहेव हि कम्मवाचाय आपत्तिवुट्ठानञ्च परिच्छिज्जति, “पज्जत्तिलक्खणाय आपत्तिया वा कारणं वीतिक्कमलक्खणं कायकम्मं, वचीकम्मं वा, वुट्ठानस्स कारणं कम्मवाचा”ति कारणेन सह फलस्स जाननवसेन “सह कम्मवाचाया”ति वुत्तं । “सह कम्मवाचाया”ति । इमिना नयेन **सह परिकम्मेनाति** एत्थापि अत्थो वेदितब्बो ।

धातुविसया सब्बापि पज्जा **धातुकुसलता** । तदेकदेसा **मनसिकारकुसलता**ति अधिप्पायेन पुरिमपदेपि सम्मसनपटिवेधपज्जा वुत्ता । यस्मा पन निप्परियायतो विपस्सनादिपज्जा एव मनसिकारकोसल्लं, तस्मा “**तासंयेव धातूनं सम्मसनपटिवेधपच्चवेक्खणपज्जा**”ति वुत्तं ।

आयतनविसया सब्बापि पज्जा **आयतनकुसलता**ति दस्सेन्तो “द्वादसन्नं आयतनानं उग्गहमनसिकारजाननपज्जा”ति वत्वा पुन “**अपिचा**”ति आदि वुत्तं । द्वीसुपि वा पदेसु वाचुग्गताय आयतनपाळिया, धातुपाळिया च मनसिकरणं **मनसिकारो** । तथा उग्गहन्ती, मनसि करोन्ती, तदत्थं सुणन्ती, गन्थतो च अत्थतो च धारेन्ती, “इदं चक्खायतनं नाम, अयं चक्खुधातु नामा”ति आदिना सभावतो, गणनतो च परिच्छेदं जानन्ती च पज्जा **उग्गहपज्जादिका** वुत्ता । मनसिकारपदे पन चतुब्बिधापि पज्जा उग्गहोति ततो पवत्तो अनिच्चादिमनसिकारो “उग्गहमनसिकारो”ति वुत्तो । तस्स जाननं पवत्तनमेव, “यथा पवत्तं वा उग्गहं, एवमेव पवत्तो उग्गहो”ति जाननं **उग्गहजाननं** । “मनसिकारो एवं पवत्तेतब्बो, एवञ्च पवत्तो”ति जाननं **मनसिकारजाननं** । तदुभयमपि “मनसिकारकोसल्लं”न्ति वुत्तं । उग्गहोपि हि मनसिकारसम्पयोगतो मनसिकारनिरुत्तिं लब्धुं अरहति । यो च मनसिकातब्बो, यो च मनसिकरणूपायो, सब्बो सो “मनसिकारो”ति वत्तुं वट्टति, तत्थ कोसल्लं **मनसिकारकुसलता**ति । **सम्मसनं** पज्जा, सा मग्गसम्पयुत्ता अनिच्चादिसम्मसनकिच्चं साधेति निच्चसज्जादिपजहनतो । **मनसिकारो** सम्मसनसम्पयुत्तो, सो तत्थेव अनिच्चादिमनसिकारकिच्चं मग्गसम्पयुत्तो साधेतीति आह “**सम्मसनमनसिकारा**

लोकियलोकुत्तरमिस्सका”ति । “इमिना पच्चयेनिदं होती”ति एवं अविज्जादीनं सङ्गारादिपच्चयुप्पन्नस्स पच्चयभावजाननं पटिच्चसमुप्पादकुसलता ।

अधिवासनं खमनं । तज्झि परेसं दुक्कटं दुरुत्तञ्च पटिविरोधाकरणेन अत्तनो उपरि आरोपेत्वा वासनं “अधिवासनं”न्ति वुच्चति । अचण्डिक्कन्ति अकुञ्जनं । दोमनस्सवसेन परेसं अक्खीसु अस्सूनं अनुप्पादना अनस्सुरोपो । अत्तमनताति सकमनता । चित्तस्स अब्यापन्नो सको मनोभावो अत्तमनता । चित्तन्ति वा चित्तप्पबन्धं एकत्तेन गहेत्वा तस्स अन्तरा उप्पन्नेन पीतिसहगतमनेन सकमनता । अत्तमनो वा पुग्गलो, तस्स भावो अत्तमनता, सा न सत्तस्साति पुग्गलदिट्ठिनिवारणत्थं “चित्तस्सा”ति वुत्तं । अधिवासनलक्खणा खन्ति अधिवासनखन्ति । सुचिसीलता सोरच्चं । सा हि सोभनकम्मरतता । सुट्ठु पापतो ओरतभावो विरतता सोरच्चं । तेनाह “सुरतभावो”ति ।

साखिलो वुच्चति सण्हावाचो, तस्स भावो साखल्यं, सण्हावाचता । तं पन ब्यतिरेकमुखेन विभावेन्ती या पाळि पवत्ता, तं दस्सेन्तो “तत्थ कतमं साखल्यं”न्तिआदिमाह । तत्थ अण्डकाति सदोसवणे रुक्खे निव्यासपिण्डियो, अहिच्छत्तकादीनि वा उट्ठितानि “अण्डकानी”ति वदन्ति । फेग्गुरुक्खस्स पन कुथितस्स अण्डानि विय उट्ठिता चुण्णपिण्डियो, गण्ठियो वा अण्डका । इध पन ब्यापज्जनकक्कसादिभावतो अण्डकपकतिभावेन वाचा “अण्डका”ति वुत्ता । पदुमनाळं विय सोतं घंसयमाना पविसन्ती कक्कसा दट्ठब्बा । कोधेन निब्बत्तता तस्स परिवारभूता कोधसामन्ता । पुरे संवद्धनारी पोरी, सा विय सुकुमारा मुदुका वाचा पोरी वियाति पोरी । तत्थाति “भासिता होती”ति वुत्ताय किरियायातिपि योजना सम्भवति, तत्थ वाचायाति वा । “सण्हावाचता”तिआदिना तं वाचं पवत्तयमानं चेतनं दस्सेति । सम्मोदकस्स पुग्गलस्स मुदुकभावो मद्दवं सम्मोदकमुदुकभावो । आमिसेन अलब्भमानेन, तथा धम्मेन चाति द्वीहि छिद्दो । आमिसस्स, धम्मस्स च अलाभेन अत्तनो परस्स च अन्तरे सम्भवन्तस्स हि छिद्दस्स विवरस्स भेदस्स पटिसन्थरणं पिदहनं सङ्गणहनं पटिसन्थारो । तं सरूपतो, पटिपत्तितो च पाळिदस्सनमुखेन विभावेतुं “अभिधम्मेपी”तिआदिमाह । अग्गं अग्गहेत्वाति अग्गं अत्तनो अग्गहेत्वा । उद्देसदानन्ति पाळिया, अट्ठकथाय च उद्दिसनं । पाळिवण्णनाति पाळिया अत्थवण्णना । धम्मकथाकथनन्ति सरभज्जसरभणनादिवसेन धम्मकथनं ।

करुणाति करुणाब्रह्मविहारमाह । करुणापुब्बभागोति तस्स पुब्बभागउपचारज्ज्ञानं वदति । पाळिपदे पन या काचि करुणा “करुणा”ति वुत्ता, करुणाचेतोविमुत्तीति पन अप्पनाप्पत्ताव । मेत्तायपि एसेव नयो । सुचि-सद्धतो भावे य्य-कारं, इ-कारस्स च ए-कारादेसं कत्वा अयं निद्देसोति आह “सोचेय्यन्ति सुचिभावो”ति । होतु ताव सुचिभावो सोचेय्यं, तस्स पन मेत्तापुब्बभागता कथन्ति आह “वुत्तम्पि चेत”न्तिआदि ।

मुट्ठा सति एतस्साति मुट्ठस्सति, तस्स भावो मुट्ठस्सच्चं, सतिपटिपक्खो धम्मो, न सतिया अभावमत्तं । यस्मा पटिपक्खे सति तस्स वसेन सतिविगता विप्पवुत्था नाम होति, तस्मा वुत्तं “सतिविप्पवासो”ति । “अस्सती”तिआदीसु अ-कारो पटिपक्खे दट्ठब्बो, न सत्तपटिसेधे । उदके लाबु विय येन चित्तं आरम्मणे पिलवन्ता विय तिट्ठति, न ओगाहति, सा पिलापनता । येन गहितम्पि आरम्मणं सम्मुस्सति न सरति, सा सम्मुस्सनता । यथा विज्जापटिपक्खा अविज्जा विज्जाय पहातब्बतो, एवं सम्पज्जपटिपक्खं असम्पज्जं, अविज्जायेव ।

इन्द्रियसंवरभेदोति इन्द्रियसंवरविनासो । अप्पटिसङ्गाति अपच्चवेक्खित्वा अयोनिस्सो च आहारपरिभोगे आदीनवानिसंसे अवीमंसित्वा ।

अप्पटिसङ्घायाति इतिकत्तब्बतासु अप्पच्चवेक्खणाय नामं । अज्जाणं अप्पटिसङ्घात निमित्तं । **अकम्पनजाणन्ति** ताय अनभिभवनीयं जाणं, तत्थ तत्थ पच्चवेक्खणाजाणञ्चेव पच्चवेक्खणाय मुद्धभूतं लोकुत्तरजाणञ्च । निप्परियायतो मग्गभावना **भावना** नाम, या च तदत्था, तदुभयञ्च भावेन्तस्सेव इच्छितब्बं, न भावितभावनस्साति वुत्तं “**भावेन्तस्स उप्पन्नं बलं**”न्ति । तेनाह “**या कुसलानं धम्मानं आसेवना भावना बहुलीकम्म**”न्ति ।

कामं सम्पयुत्तधम्मेसु थिरभावोपि बलद्वो एव, पटिपक्खेहि पन अकम्पनीयता सातिसयं बलद्वोति वुत्तं “**अस्सतिया अकम्पनवसेना**”ति । पच्चनीकधम्मसमनतो **समथो समाधि** । अनिच्चादिना विविधेनाकारेण दस्सनतो **विपस्सना पज्जा** । तं **आकारं गहेत्वा**ति समाधानाकारं गहेत्वा । येनाकारेण पुब्बे अलीनं अनुद्धतं मज्झिमं भावनावीथिपटिपन्नं हुत्वा चित्तं समाहितं होति, तं आकारं गहेत्वा सल्लक्खेत्वा । **निमित्तवसेना**ति कारणवसेन । “**एसेव नयो**”ति इमिना पग्गाहोव तं आकारं गहेत्वा पुन पवत्तेतब्बस्स पग्गाहस्स निमित्तवसेन पग्गाहनिमित्तन्ति इममत्थं अतिदिसति, तस्सत्थो समथे वुत्तनयानुसारेण वेदितब्बो । **पग्गाहो वीरियं** कोसज्जपक्खतो चित्तस्स पतितुं अदत्वा पग्गणहनतो । **अविक्खेपो एकग्गता** विक्खेपस्स उद्धच्चस्स पटिपक्खभावतो । पटिसङ्घानकिच्चनिब्बत्तिभावतो लोकुत्तरधम्मानं पटिसङ्घानबलभावो, तथा पुब्बे पवत्ताकारसल्लक्खणवसेन समथपग्गाहानं उपरि पवत्तिसब्भावतो समथनिमित्तदुकस्सपि मिस्सकता वुत्ता ।

यथासमादिन्नस्स सीलस्स भेदकरो **वीतिक्कमो** । सीलविनासको **असंवरो** । **सम्मादिट्ठिविनासिका**ति “अत्थि दिन्न”न्तिआदि (म० नि० १.४४१; २.९४; विभ० ७९३) नयप्पवत्ताय सम्मादिट्ठिया दूसिका ।

सीलस्स सम्पादनं नाम सब्बभागतो तस्स अनूनतापादनन्ति आह “**सम्पादनतो परिपूरणतो**”ति । पारिपूरत्थो हि सम्पदा-सद्दोति । **मानसिकसीलं** नाम सीलविसोधनवसेन अभिज्झादिप्पहानं । **दिट्ठिपारिपूरिभूतं जाणन्ति** अत्थिकदिट्ठिआदिसम्मादिट्ठिया पारिपूरिभावेन पवत्तं जाणं ।

विसुद्धिं पापेतुं समत्थन्ति चित्तविसुद्धिआदिउपरिविसुद्धिया पच्चयो भवितुं समत्थं । सुविसुद्धमेव हि सीलं तस्सा पदद्वानं होतीति । **विसुद्धिं पापेतुं समत्थं दस्सनन्ति** जाणदस्सनविसुद्धिं, परमत्थविसुद्धिनिब्बानञ्च पापेतुं उपनेतुं समत्थं कम्मस्सकताजाणादिसम्मादस्सनं । तेनाह “**अभिधम्मे**”तिआदि । एत्थ च “इदं अकुसलं कम्मं नो सकं, इदं पन कम्मं सकं”न्ति एवं ब्यतिरेकतो अन्वयतो च कम्मस्सकताजाननजाणं **कम्मस्सकताजाणं** । तेनाह “**एत्थ चा**”तिआदि । “**परेण कतम्पी**”ति इदं निदस्सनवसेन वुत्तं यथा परेण कतं, एवं अत्तना कतम्पि सककम्मं नाम न होतीति । अत्तना वा उस्साहितेन परेण कतंपीति एवं वा अत्थो दट्ठब्बो । यज्झि तं परस्स उस्साहनवसेन कतं, तम्पि सककम्मं नाम होतीति अयज्हेत्थ अधिप्पायो । **अत्थभज्जनतो**ति दिट्ठधम्मिकादिसब्बअत्थविनासनतो । **अत्थजननतो**ति इधलोकत्थपरलोकत्थपरमत्थानं उप्पादनतो । आरब्भकाले “अनिच्चं दुक्खं अनत्ता”ति पवत्तम्पि **वचीसच्चञ्च** लक्खणानि पटिविज्झन्तं **विपस्सनाजाणं अनुलोमे**ति तत्थेव पटिविज्झनतो । **परमत्थसच्चञ्च** निब्बानं न **विलोमे**ति न विरोधेति एकन्तेनेव सम्पापनतो ।

जाणदस्सनन्ति जाणभूतं दस्सनं, तेन मग्गं वदति । **तंसम्पयुत्तमेव वीरियन्ति** पठममग्गसम्पयुत्तं वीरियमाह । सब्बापि मग्गपज्जा दिट्ठिविसुद्धियेवाति दस्सेतुं “**अपिचा**”तिआदि वुत्तं । अयमेव च नयो अभिधम्मपाळिया (ध० स० ५५०) समेतीति दस्सेन्तो “**अभिधम्मे पना**”ति आदि अवोच ।

यस्मा संवेगो नाम सहोत्तप्पजाणं, तस्मा संवेगवत्थुं भयतो भायितब्बतो दस्सनवसेन पवत्तजाणं । तेनाह “**जातिभय**”न्तिआदि । भायन्ति एतस्माति **भयं**, जाति एव भयं **जातिभयं** । **संवेजनीयन्ति** संविज्जितब्बं भायितब्बं

उत्तासितब्बं । ठानन्ति कारणं, वत्थूति अत्थो । संवेगजातस्साति उप्पन्नसंवेगस्स । उपायपधानन्ति उपायेन पवत्तेतब्बं वीरियं ।

कुसलानं धम्मन्ति सीलादीनं अनवज्जधम्मानं । भावनायाति उप्पादनेन वड्डनेन च । असन्तुट्ठस्साति “अलं एत्तावता, कथं एत्तावता”ति सङ्कोचापत्तिवसेन न सन्तुट्ठस्स । भिय्योकम्यताति भिय्यो भिय्यो उप्पादनिच्छा । वोसानन्ति सङ्कोचं असमत्थन्ति । तुस्सनं तुट्ठि सन्तुट्ठि, नत्थि एतस्स सन्तुट्ठीति असन्तुट्ठि, तस्स भावो असन्तुट्ठिता । वीरियप्पवाहे वत्तमाने अन्तरा एव पटिगमनं निवत्तनं पटिवानं, तं तस्स अत्थीति पटिवानी, न पटिवानी अप्पटिवानी, तस्स भावो अप्पटिवानिता । सक्कच्चकिरियताति कुसलानं करणे सक्कच्चकिरियता आदरकिरियता । सातच्चकिरियताति सततमेव करणं । अट्ठितकिरियताति अन्तरा अट्ठपेत्वा खण्डं अकत्वा करणं । अनोलीनवुत्तिताति न लीनप्पवत्तिता । अनिक्खित्तच्छन्दताति कुसलच्छन्दस्स अनिक्खपनं । अनिक्खित्तधुरताति कुसलकरणे वीरियधुरस्स अनिक्खपनं । आसेवनाति आदरेन सेवना । भावनाति वड्डना ब्रूहना । बहुलीकम्मन्ति पुनप्पुनं करणं ।

तिस्सो विज्जाति पुब्बेनिवासानुस्सतिजाणं, दिब्बचक्खुजाणं आसवक्खयजाणन्ति इमा तिस्सो विज्जा । पटिपक्खविज्झनट्ठेन पुब्बे निवुत्थक्खन्धादीनं विदितकरणट्ठेन विसिद्धा मुत्तीति विमुत्ति । स्वायं विसेसो पटिपक्खविगमनेन, पटियोगिविगमनेन च इच्छितब्बोति तदुभयं दस्सेतुं “एत्थ चा”तिआदि वुत्तं । तत्थ येन विसेसेन समापत्तियो पच्चनीकधम्महेहि सुट्ठु मुत्ता, ततो निरासङ्कताय आरम्मणे च अभिरता, तं विसेसं उपादाय ता अधिकं मुच्चनतो, आरम्मणे अधिमुच्चनतो च अधिमुत्तियो नामाति वुत्तं “चित्तस्स च अधिमुत्ती”ति । मुत्तताति सब्बसङ्खारेहि विसेसेन निस्सट्ठा विमुत्ति ।

खये जाणन्ति समुच्छेदवसेन किलेसे खेपेतीति खयो, अरियमग्गो, तप्परियापन्नं जाणं खये जाणं । पटिसन्धिवसेनाति किलेसानं तंतंमग्गवज्झानं उप्पन्नमग्गे खन्धसन्ताने पुन सन्दहनवसेन । अनुप्पादभूतेति तंतंफले । अनुप्पादपरियोसानेति अनुप्पादकरो मग्गो अनुप्पादो, तस्स परियोसाने, किलेसानं वा अनुप्पज्जनसङ्घाते परियोसाने, भङ्गेति अत्थोति ।

दुकवण्णना निट्ठिता ।

तिकवण्णना

३०५. धम्मतो अज्जो कत्ता नत्थीति दस्सेतुं कत्तुसाधनवसेन “लुब्भतीति लोभो”ति वुत्तं । लुब्भति तेन, लुब्भनमत्तमेतन्ति करणभावसाधनवसेनपि अत्थो युज्जतेव । दुस्सति मुह्यतीति एत्थापि एसेव नयो । अकुसलज्च तं अकोसल्लसम्भूतट्ठेन एकन्ताकुसलभावतो मूलज्च अत्तना सम्पयुत्तधम्मानं सुप्पतिट्ठितभावसाधनतो, न अकुसलभावसाधनतो । न हि मूलकतो अकुसलानं अकुसलभावो, कुसलादीनज्च कुसलादिभावो । तथा सति मोमूहचित्तद्वये मोहस्स अकुसलभावो न सिया । तेसन्ति लोभादीनं । “न लुब्भतीति अलोभो”तिआदिना पटिपक्खनयेन ।

दुट्ठु चरितानीति पच्चयतो, सम्पयुत्तधम्मतो, पवत्तिआकारतो च न सुट्ठु असम्मा पवत्तितानि । विरूपानीति बीभच्छानि सम्पति, आयतिज्च अनिट्ठरूपत्ता । कायेनाति कायद्वारेन करणभूतेन । कायतोति कायद्वारतो । “सुट्ठु चरितानी”तिआदीसु वुत्तविपरियायेन अत्थो वेदितब्बो । यस्स सिक्खापदस्स वीतिक्कमे कायसमुट्ठाना आपत्ति होति, तं

कायद्वारे पञ्चत्तसिक्खापदं। अवीतिक्कमो कायसुचरितन्ति वारित्तसीलस्स वसेन वदति, चारित्तसीलस्सपि वा, यस्स अकरणे आपत्ति होति। वचीदुच्चरितसुचरितनिद्वारणम्मि वुत्तनयानुसारेण वेदितब्बं। उभयत्थ पञ्चत्तस्साति कायद्वारे, वचीद्वारे च पञ्चत्तस्स। सिक्खापदस्स वीतिक्कमोव मनोदुच्चरितं मनोद्वारे पञ्चत्तस्स सिक्खापदस्स अभावतो, तयिदं द्वारद्वये अकिरियसमुद्धानाय आपत्तिया वसेन वेदितब्बं। अवीतिक्कमोति यथावुत्ताय आपत्तिया अवीतिक्कमो मनोसुचरितं। “सब्बस्सापि सिक्खापदस्स अवीतिक्कमो मनोसुचरितं”न्ति केचि। तदुभयज्झि चारित्तसीलं उद्दिस्सपञ्चत्तं सिक्खापदं, तस्स अवीतिक्कमो सिया कायसुचरितं, सिया वचीसुचरितन्ति।

पाणो अतिपातीयति एतायाति पाणातिपातो, तथापवत्ता चेतना, एवं अदिन्नादानादयोपीति आह “पाणातिपातादयो पन तिस्सो चेतना”ति। वचीद्वारेपि उप्पन्ना कायदुच्चरितं द्वारन्तरे उप्पन्नस्सापि कम्मस्स सनामापरिच्चागतो येभुय्यवुत्तिया, तब्बहुलवुत्तिया च। तेनाहु अट्ठकथाचरिया —

“द्वारे चरन्ति कम्मनि, न द्वारा द्वारचारिनो।

तस्मा द्वारेहि कम्मनि, अज्जमज्जं ववत्थिता”ति॥ (ध० स० अट्ठ० कामावचरकुसलद्वारकथा)।

वचीदुच्चरितं कायद्वारेपि वचीद्वारेपि उप्पन्नाति आनेत्वा सम्बन्धितब्बं। चेतनासम्पयुत्तधम्माति मनोकम्मभूताय चेतनाय सम्पयुत्तधम्मा। कायवचीकम्मभूताय पन चेतनाय सम्पयुत्ता अभिज्झादयो तं तं पक्खिका वा होन्ति अब्बोहारिका वाति। चेतनासम्पयुत्तधम्मा मनोसुचरितन्ति एत्थापि एसेव नयो। तिविधस्स दुच्चरितस्स अकरणवसेन पवत्ता तिस्सो चेतनापि विरतियोपि कायसुचरितं कायिकस्स वीतिक्कमस्स अकरणवसेन पवत्तनतो, कायेन पन सिक्खापदानं समादियेन सीलस्स कायसुचरितभावे वत्तब्बमेव नत्थि। एसेव नयो वचीसुचरिते।

कामपटिसंयुत्तोति एत्थ द्वे कामा वत्थुकामो च किलेसकामो च। तत्थ वत्थुकामपक्खे आरम्मणकरणवसेन कामेहि पटिसंयुत्तो वितक्को कामवितक्को। किलेसकामपक्खे पन सम्पयोगवसेन कामेन पटिसंयुत्तोति योजेतब्बं। “ब्यापादपटिसंयुत्तो”तिआदीसु सम्पयोगवसेनेव अत्थो वेदितब्बो। ब्यापादवत्थुपटिसंयुत्तोपि ब्यापादपटिसंयुत्तोति गृह्णमाने उभयथापि योजना लब्धतेव। विहिंसापटिसंयुत्तोति एत्थापि एसेव नयो। विहिंसन्ति एताय सत्ते, विहिंसनं वा एसा सत्तानन्ति विहिंसा, ताय पटिसंयुत्तो विहिंसापटिसंयुत्तोति एवं सद्वत्थो वेदितब्बो। अप्पिये अमनापे सङ्खारे आरब्ध ब्यापादवितक्कप्पवत्ति अट्ठानाघातवसेन दीपेतब्बा। ब्यापादवितक्कस्स अवधिं दस्सेतुं “याव विनासना”ति वुत्तं। विनासनं पन पाणातिपातो एवाति। “सङ्खारो” हि दुक्खापेतब्बो नाम नत्थी”ति कस्मा वुत्तं, ननु ये “दुक्खापेतब्बा”ति इच्छिता सत्तसज्जिता, तेपि अत्थतो सङ्खारा एवाति? सच्चमेतं, ये पन इन्द्रियबद्धा सविज्जाणकताय दुक्खं पटिसंवेदेन्ति, तस्मा ते विहिंसावितक्कस्स विसया इच्छिता सत्तसज्जिता। ये पन न दुक्खं पटिसंवेदेन्ति वुत्तलक्खणायोगतो, ते सन्धाय “विहिंसावितक्को सङ्खारेसु नुप्पज्जती”ति वुत्तं। यत्थ पन उप्पज्जति, यथा च उप्पज्जति, तं दस्सेतुं “इमे सत्ता”तिआदि वुत्तं।

नेक्खम्मं वुच्चति लोभतो निक्खन्तत्ता अलोभो, नीवरणेहि निक्खन्तत्तापि पठमज्झानं, सब्बाकुसलेहि निक्खन्तत्ता सब्बो कुसलो धम्मो, सब्बसङ्खतेहि पन निक्खन्तत्ता, निब्बानं। उपनिस्सयतो, सम्पयोगतो, आरम्मणकरणतो च नेक्खम्मेन पटिसंयुत्तोति नेक्खम्मपटिसंयुत्तो। नेक्खम्मवितक्को सम्मासङ्कप्पो। इदानि तं भूमिविभागेन दस्सेतुं “सो”तिआदि वुत्तं। असुभपुब्बभागेति असुभज्झानस्स पुब्बभागे। असुभगगहणज्चेत्थ कामवितक्कस्स उजुविपच्चनीकदस्सनत्थं कतं। कामवितक्कपटिपक्खो हि नेक्खम्मवितक्कोति। एवज्ज कत्वा उपरिवितक्कद्वयस्स भूमिं दस्सेन्तेन सपुब्बभागानि

मेत्ताकरुणाझानादीनि उद्धटानि । असुभज्झानेति असुभारम्मणे पठमज्झाने । अवयवे हि समुदायवोहारं कत्वा निदिसति यथा “रुक्खे साखा”ति । **ज्ञानं पादकं कत्वा**ति निदस्सनमत्तं । तं ज्ञानं सम्मसित्वा उप्पन्नमगगफलकालेपि हि सो लोकोत्तरोति । ब्यापादस्स पटिपक्खो, किञ्चिपि न ब्यापादेति एतेनाति वा **अब्यापादो**, मेत्ता, ताय पटिसंयुत्तो **अब्यापादपटिसंयुत्तो** । **मेत्ताझाने**ति मेत्ताभावनावसेन अधिगते पठमज्झाने । **करुणाझाने**ति एत्थापि एसेव नयो । विहिंसाय पटिपक्खो, न विहिंसन्ति वा एताय सत्तेति **अविहिंसा**, करुणा ।

ननु च अलोभादोसानं अज्जमज्जाविरहतो तेसं वसेन उप्पज्जनकानं इमेसं नेक्खम्मवितक्कादीनं अज्जमज्जं असङ्करणतो ववत्थानं न होतीति? नोति दस्सेतुं “यदा”तिआदि आरब्धं । **अलोभो सीसं होतीति** अलोभो पधानो होति । नियमितपरिणतसमुदाचारादिवसेन यदा अलोभपधानो नेक्खम्मगरुको चित्तुप्पादो होति, तदा लब्धावसरो नेक्खम्मवितक्को पतिट्ठहति । तंसम्पयुत्तस्स पन अदोसलक्खणस्स अब्यापादस्स वसेन यो तस्सेव अब्यापादवितक्कभावो सम्भवेय्य, सति च अब्यापादवितक्कभावे कस्सचिपि अविहेठनजातिकताय अविहिंसावितक्कभावो च सम्भवेय्य, ते **इतरे द्वे** । **तदन्वयिका**ति तस्सेव नेक्खम्मवितक्कस्स अनुगामिनो, सरूपतो अदिस्सनतो “तस्मिं सति होन्ति, असति न होन्ती”ति तदनुमाननेय्या भवन्ति । सेसद्वयेपि इमिना नयेन अत्थो वेदितब्बो । **वुत्तनयेनेवा**ति “कामपटिसंयुत्तो सङ्कप्पो **कामसङ्कप्पो**”तिआदिना **वितक्कत्तिके** वुत्तनयेनेव (दी० नि० ३.२८८) **वेदितब्बो** अत्थतो अभिन्नत्ता । यदि एवं कस्मा पुन देसना कताति? तथा देसनाय बुज्जनकानं अज्झासयवसेन देसनामत्तमेवेतं ।

कामवितक्कादीनं विय उप्पज्जनाकारो वेदितब्बो “तासु द्वे सत्तेसुपि सङ्गारेसुपि उप्पज्जन्ती”तिआदिना । तत्थ कारणमाह “तंसम्पयुत्तायेव हि एता”ति । तथेवाति यथा नेक्खम्मवितक्कादीनं “**असुभपुब्बभागे कामावचरो होती**”तिआदिना कामावचरादिभावो वुत्तो, तथेव **तासम्पि** नेक्खम्मसज्जादीनम्पि **कामावचरादिभावो वेदितब्बो** ।

कामपटिसंयुत्तोति सम्पयोगवसेन कामेन पटिसंयुत्तो । तक्कनवसेन **तक्को** । विसेसतो तक्कनवसेन **वितक्को** । सङ्कप्पनपरिकप्पनवसेन **सङ्कप्पो** । अज्जेसुपि कामपटिसंयुत्तेसु धम्मेषु विज्जमानेसु वितक्के एव कामोपपदो धातु-सद्वो निरुळ्हो वेदितब्बो वितक्कस्स कामसङ्कप्पवत्तिया सातिसयत्ता । एस नयो **ब्यापादधातु**आदीसु । **सब्बेपि अकुसला धम्मा कामधातू** हीनज्झासयेहि कामितब्बधातुभावतो किलेसकामस्स आरम्मणसभावत्ताति अत्थो । **विहेठेतीति** विबाधति । **तत्थाति** तस्मिं यथावुत्ते कामधातुत्तिके । सब्बाकुसलसङ्गाहिकाय कामधातुया इतरा द्वे सङ्गहेत्वा कथनं **सब्बसङ्गाहिका कथा** । तिस्सो धातुयो अज्जमज्जं असङ्करतो कथा **असम्भिन्ना** । **इतरा द्वे गहिताव होन्तीति** इतरा द्वे धातुयो गहिता एव होन्ति सब्बेपि अकुसला धम्मा कामधातू”ति वुत्तत्ता सामज्जजोतनाय सविसयस्स अतिब्यापनेन । **ततोति** इतरधातुद्वयसङ्गाहिकाय कामधातुया । **नीहरित्वा**ति निद्धारेत्वा । **दस्सेतीति** एवं भगवा दस्सेतीति वत्तुं वट्टति । **ब्यापादधातुं...पे०... कथेसि** । कस्मा? पगेव अपवादा अभिनिविसन्ति, ततो परं उस्सग्गो पवत्तति, ठपेत्वा वा अपवादविसयं तं परिहरन्तोव उस्सग्गो पवत्ततीति, जायो हेस लोके निरुळ्होति ।

द्वे कथाति “सब्बसङ्गाहिका, असम्भिन्ना चा”ति (दी० नि० अट्ठ० ३.३०५) अनन्तरत्तिके वुत्ता द्वे कथा । तत्थ **वुत्तनयेन** आनेत्वा कथनवसेन **वेदितब्बा** । तस्मा तत्थ वुत्तअत्थो इधापि आहरित्वा वेदितब्बो “नेक्खम्मधातुया गहिताय इतरा द्वे गहिताव होन्ती”तिआदिना ।

सुज्जतट्टेनाति अत्तसुज्जताय । कामभवो कामो उत्तरपदलोपेन सुज्जतट्टेन धातु चाति **कामधातु** । **ब्रह्मलोकन्ति** पठमज्झानभूमिसज्जितं ब्रह्मलोकं । **धातुया आगतट्टानम्हीति** “कामधातु रूपधातू”तिआदिना धातुगगहणे कते । **भवेन**

परिच्छिन्दितब्बाति “कामभवो रूपभवो”ति आदिना भववसेन तदत्थो परिच्छिन्दितब्बो, न याय कायचि धातुया वसेन। यदग्गेन च धातुया आगतट्ठाने भवेन परिच्छेदो कातब्बो, तदग्गेन भवस्स आगतट्ठाने धातुया परिच्छेदो कातब्बो भववसेन धातुया परिच्छिज्जनतो। निरुज्झति किलेसवट्ठेमेत्थाति निरोधो, सा एव सुज्जतट्ठेन धातूति निरोधधातु, निब्बानं। निरुद्धे च किलेसवट्ठे कम्मविपाकवट्ठा निरुद्धा एव होन्ति।

हीनधातुत्तिको अभिधम्मे (ध० स० तिकमातिका १४) हीनत्तिकेन परिच्छिन्दितब्बोति वुत्तं “हीना धातूति द्वादस अकुसलचित्तुप्पादा”ति। ते हि लामकट्ठेन हीनधातु। हीनपणीतानं मज्झे भवाति मज्झिमधातु, अवसेसा तेभूमकधम्मा। उत्तमट्ठेन अतप्पकट्ठेन च पणीतधातु, नवलोकुत्तरधम्मा।

पञ्चकामगुणा विसयभूता एतस्स सन्तीति पञ्चकामगुणिको, कामरागो। रूपारूपभवेसूति रूपारूपपत्तिभवेसु यथाधिगतेसु। अनधिगतेसु पन सो पत्थना नाम न होतीति भववसेन पत्थनाति इमिनाव गहितो। ज्ञाननिकन्तीति रूपारूपज्ज्ञानेसु निकन्ति। भववसेन पत्थनाति भवेसु पत्थनाति। एवं चतूहिपि पदेहि यथाक्कमं महग्गतूपपत्तिभवविसया, महग्गतकम्मभवविसया, भवदिट्ठिसहगता, भवपत्थनाभूता च तण्हा “भवतण्हा”ति वुत्ता। विभवदिट्ठि विभवो उत्तरपदलोपेन, विभवसहगता तण्हा विभवतण्हा। रूपादिपञ्चवत्थु कामविसया बलवरागभूता तण्हा कामतण्हाति पठमनयो, “सब्बेपि तेभूमकधम्मा कामनीयट्ठेन कामा”ति (महानि० १) वचनतो ते आरब्भ पवत्ता दिट्ठिविप्पयुत्ता सब्बापि तण्हा कामतण्हाति दुतियनयोति अयमेतेसं विसेसो।

अभिधम्मे पनाति पन-सद्दो विसेसत्थजोतनो, तेन पञ्चकामगुणिकरागतो अज्जोपि कामावचरधम्मविसयो लोभो अभिधम्मे (विभ० ११५) “कामतण्हा”ति आगतोति इमं विसेसं जोतेति। तिकन्तरम्पि समानं तण्हयेव निस्साय पवत्तितदेसनानन्तरताय तं “वारो”ति वत्तब्बतं अरहतीति “इमिना वारेना”ति वुत्तं। इमिना वारेनाति इमिना परियायेनाति अत्थो। रजनीयट्ठेनाति कामनीयट्ठेन। परियादियित्वाति परिग्गहेत्वा। ततोति कामतण्हाय। नीहरित्वाति निद्धारेत्वा। इतरा द्वे तण्हाति रूपतण्हं, अरूपतण्हञ्च दस्सेति। एतेन “कामतण्हा”ति साधारणवचनमेतं सब्बस्सपि लोभस्स, तस्स पन “रूपतण्हा अरूपतण्हा”ति विसेसवचनं यथा कामगुणिकरागो रूपरागो अरूपरागोति दस्सेति। निरोधतण्हाति भवनिरोधे भवसमुच्छेदे तण्हा। यस्मा हि उच्छेददिट्ठि मनुस्सत्तभावे, कामावचरदेवत्तभावे, रूपावचरअरूपावचरत्तभावे ठितस्स अत्तनो सम्मा समुच्छेदो होतीति भवनिरोधं आरब्भ पवत्तति, तस्मा तंसहगतापि तण्हा तमेव आरब्भ पवत्ततीति।

वट्ठस्मिन्ति तिविधेपि वट्ठे। यथा ते हि निस्सरितुं अप्पदानवसेन कम्मविपाकवट्ठे तंसमङ्गिसत्तं तेसं परापुरुप्पत्तिया पच्चयभावेन संयोजेन्ति, एवं किलेसवट्ठेपीति। सतीति परमत्थतो विज्जमाने। रूपादिभेदेति रूपवेदनादिविभागे। कायेति खन्धसमूहे। विज्जमानाति सती परमत्थतो उपलब्धमाना। दिट्ठिया परिकप्पितो हि अत्तादि परमत्थतो नत्थि, दिट्ठि पन अयं अत्थेवाति। विचिनन्तोति धम्मसभावं वीमंसन्तो। किच्छतीति किलमति। परामसतीति परतो आमसति। “सीलेन सुद्धि, वतेन सुद्धी”ति गण्हन्तो हि विसुद्धिमग्गं अतिक्कमित्वा तस्स परतो आमसति नाम। वीसतिवत्थुका दिट्ठीति रूपादि-धम्मे, पच्चेकं ते वा निस्सितं, तेसं वा निस्सयभूतं, सामिभूतं वा कत्वा परिकप्पनवसेन पवत्तिया वीसतिवत्थुका अत्तदिट्ठि वीसति। विमतीति धम्मेसु सम्मा, मिच्छा वा मननाभावतो संसयितट्ठेन अमति, अप्पटिपज्जनन्ति अत्थो। विपरियासग्गाहोति असुद्धिमग्गे “सुद्धिमग्गे”ति विपरीतग्गाहो।

चिरपारिवासियट्ठेनाति चिरपरिवुत्थताय पुराणभावेन। आसवनट्ठेनाति सन्दनट्ठेन, पवत्तनट्ठेनाति अत्थो। सवतीति

पवत्तति। अवधिअत्थो आ-कारो, अवधि च मरियादाभिविधिभेदतो दुविधो। तत्थ मरियादो किरियं बहि कत्वा पवत्तति यथा “आ पाटलिपुत्ता वुड्ढो देवो”ति। अभिविधि किरियं ब्यापेत्वा पवत्तति यथा “आ भवग्गा भगवतो यसो पवत्तो”ति। अभिविधिअत्थो अयं आ-कारो वेदितब्बो।

कत्थचि द्वे आसवा आगताति विनयपाळिं (पारा० ३९) सन्धायाह। तत्थ हि “दिट्ठधम्मिकानं आसवानं संवराय, सम्परायिकानं आसवानं पटिघाताया”ति (पारा० ३९) द्विधा आसवा आगताति। **कत्थचीति** तिकनिपाते आसवसुत्ते, (इतिवु० ५६; सं० नि० ५.१६३) अज्जेसु च सळायतनसुत्तादीसु (सं० नि० ४.३२१)। सळायतनसुत्तेसुपि हि “तयोमे आवुसो आसवा कामासवो भवासवो अविज्जासवो”ति तयो एव आगताति। निरयं गमेन्तीति **निरयगामिनीया**। यस्मा इध सासवं कुसलाकुसलं कम्मं आसवपरियायेन देसितं, तस्मा पच्चगतिसंवत्तनीयभावेन आसवा आगता। **इमस्मिं सङ्गीतिसुत्ते तयो** आगताति। एत्थ यस्मा अज्जेसु च आ भवग्गं आ गोत्रभुं पवत्तन्तेसु मानादीसु विज्जमानेसु अत्तत्तनियादिग्गाहवसेन, अभिव्यापनमदकरणवसेन आसवसदिसता च एतेसंयेव, न अज्जेसं, तस्मा एतेस्वेव आसव-सद्दो निरुळ्ळो दट्ठब्बो। न चेत्थ “दिट्ठासवो नागतो”ति चिन्तेतब्बं भवतण्हाय, भवदिट्ठियापि भवासवग्गहणेनेव गहितत्ता। **कामासवो नाम** कामनट्ठेन, आसवनट्ठेन च। **वुत्तायेव अत्थतो निन्नानाकरणतो**।

कामे एसति गवेसति एतायाति **कामेसना**, कामानं अभिपत्थनावसेन, परियेड्ठिवसेन, परिभुज्जनवसेन वा पवत्तरागो। **भवेसना** पन भवपत्थना, भवाभिरतिभवज्झोसानवसेन पवत्तरागो। **दिट्ठिगतिकसम्मतस्साति** अज्जतित्थियेहि परिकप्पितस्स, सम्भावितस्स च। **ब्रह्मचरियस्साति** तपोपक्कमस्स। **तदेकट्ठन्ति** ताहि रागदिट्ठीहि सहजेकट्ठं। **कम्मन्ति** अकुसलकम्मं। तम्पि हि कामादिके निब्बत्तनाधिट्ठानादिवसेन पवत्तं “एसती”ति वुच्चति। **अन्तग्गाहिका दिट्ठीति** निदस्सनमत्तमेतं। या काचि पन मिच्छादिट्ठि तपोपक्कमहेतुका **ब्रह्मचरियेसना** एव।

आकारसण्ठानन्ति विसिद्धाकारावट्ठानं **कथंविधन्ति** हि केन पकारेन सण्ठितं, समवट्ठितन्ति अत्थो। सद्दत्थतो पन विदहनं विसिद्धाकारेन अवट्ठानं **विधा**, विधीयति विसदिसाकारेन ठपीयतीति **विधा**, कोट्ठासो। विदहनतो हीनादिवसेन विविधेनाकारेन दहनतो उपधारणतो **विधा**, मानोव। **सेय्यसदिसहीनानं वसेनाति** सेय्यसदिसहीनभावानं याथावा याथावभूतानं वसेन। **तयो माना वुत्ता** सेय्यस्सेव उप्पज्जनका। एस नयो सदिसहीनेसुपि। तेनाह “अयज्झि मानो”तिआदि। इदानि यथाउट्ठिडे नवविधेपि माने वत्थुविभागेन दस्सेतुं “तत्था”तिआदि वुत्तं। **राजूनज्जेव पब्बजितानज्ज उप्पज्जति** कस्मा? ते विसेसतो अत्तानं सेय्यतो दहन्तीति। इदानि तमत्थं वित्थारतो दस्सेन्तो “राजा ही”तिआदिमाह। **को मया सदिसो अत्थीति** को-सद्दो पटिक्खेपत्थो, अज्जो सदिसो नत्थीति अधिप्पायो। **एतेसंयेवाति** राजूनं, पब्बजितानज्ज। **उप्पज्जति** सेट्ठवत्थुकत्ता तस्स। “हीनोहमस्मी”ति मानेपि एसेव नयो।

“को मया सदिसो अज्जो राजपुरिसो अत्थी”ति वा “मय्हं अज्जेहि सद्धिं किं नानाकरण”न्ति वा “अमच्चो ति नामामेव...पे०... नामाह”न्ति वाति सदिसस्स सेय्यमानादीनं तिण्णं पवत्तिआकारदस्सनं।

दासादीनन्ति आदि-सद्देन भतिक कम्मकरादीनं पराधीनवुत्तिकानं गहणं। **आदि-**सद्देन वा गहिते एव “पुक्कुसचण्डालादयोपी”ति सयमेव दस्सेति। ननु च मानो नामायं संपग्गहरसो, सो कथं ओमाने सम्भवतीति? सोपि अवकरणमुखेन विधानवत्थुना पग्गणहनवसेनेव पवत्ततीति नायं विरोधो। तेनेवाह “किं दासो नाम अहन्ति एते माने करोती”ति। तथा हिस्स याथावमानता वुत्ता।

याथावमाना भवनिकन्ति विय, अत्तदिट्ठि विय च न महासावज्जा, तस्मा ते न अपायगमनीया । यथाभूतवत्थुकताय हि ते याथावमाना । “अरहत्तमग्गवज्झा”ति च तस्स अनवसेसप्पहायिताय वुत्तं । दुतियततियमग्गेहि च ते यथाक्कमं पहीयन्ति, ये ओळारिकतरा, ओळारिकतमा च । मानो हि “अहं अस्मी”ति पवत्तिया उपरिमग्गेसु सम्मादिट्ठिया उज्जुविपच्चनीको हुत्वा पहीयति । अयाथावमाना नाम अयथाभूतवत्थुकताय, तेनेव ते महासावज्जभावेन पठममग्गवज्झा वुत्ता ।

अतति सततं गच्छति पवत्ततीति अद्धा, कालोति आह “तयो अद्धाति तयो काला”ति । सुत्तन्तपरियायेनाति भद्देकरत्तसुत्तादीसु (म० नि० ३.२८३) आगतनयेन । तत्थ हि “यो चावुसो मनो, ये च धम्मा, उभयमेतं पच्चुप्पन्नं, तस्मिं चे पच्चुप्पन्ने छन्दरागपटिबद्धं होति विज्जाणं, छन्दरागपटिबद्धत्ता विज्जाणस्स तदभिनन्दति, तदभिनन्दन्तो पच्चुप्पन्नेसु धम्मसु संहरीती”ति (म० नि० ३.२८४) अद्धापच्चुप्पन्नं सन्धाय एवं वुत्तं । तेनाह “पटिसन्धितो पुब्बे”तिआदि । तदन्तरन्ति तेसं चुतिपटिसन्धीनं वेमज्झं पच्चुप्पन्नो अद्धा, यो पुब्बन्तापरन्तानं वेमज्झताय “पुब्बन्तापरन्ते कद्धति, (ध० स० ११२३) पुब्बन्तापरन्ते अज्जाण”न्ति (ध० स० १०६७, ११०६, ११२८) एवमादीसु “पुब्बन्तापरन्तो”ति च वुच्चति । भङ्गो धम्मो अतीतंसेन सङ्गहितोति आह “भङ्गतो उद्धं अतीतो अद्धा नामा”ति । तथा अनुप्पन्नो धम्मो अनागतंसेन सङ्गहितोति आह “उप्पादतो पुब्बे अनागतो अद्धा नामा”ति । खणत्तयेति उप्पादो, ठिति, भङ्गोति तीसु खणेषु । यदा हि धम्मो हेतुपच्चयस्स समवाये उप्पज्जति, यदा च वेति, इति द्वीसुपि खणेषु ठितिकखणे विय पच्चुप्पन्नोति । धम्मानज्झि पाकभावूपाधिकं पत्तब्बं उदयो, विद्धंसभावूपाधिकं वयो, तदुभयवेमज्झं ठिति । यदि एवं अद्धा नामायं धम्मो एव आपन्नोति? न धम्मो, धम्मस्स पन अवत्थाभेदो, तच्च उपादाय लोके कालसमज्जाति दस्सेतुं “अतीतादिभेदो च नाम अय”न्तिआदि वुत्तं । इधाति इमस्मिं लोके । तेनेव वोहारेनाति तं तं अवत्थाविसेसं उपादाय धम्मो “अतीतो अनागतो पच्चुप्पन्नो”ति येन वोहारेन वोहरीयति, धम्मपवत्तिमत्तताय हि परमत्थतो अविज्जमानोपि कालो तस्सेव धम्मस्स पवत्तिअवत्थाविसेसं उपादाय तेनेव वोहारेन “अतीतो अद्धा”तिआदिना वुत्तो ।

अन्त-सद्दो लोके परियोसाने, कोटियं निरुळ्होति तदत्थं दस्सेन्तो “अन्तोयेव अन्तो”ति आह, कोटि अन्तोति अत्थो । परभागोति पारिमन्तो । अमति गच्छति भवप्पबन्धो निट्ठानं एत्थाति अन्तो, कोटि । अमनं निट्ठानगमनन्ति अन्तो, ओसानं । सो पन “एसेवन्तो दुक्खस्सा”ति (म० नि० ३.३९३; सं० नि० २.५१) वुत्तत्ता दुक्खणवस्स पारिमन्तोति आह “परभागो”ति । अम्मति परिभुय्यति हीळीयतीति अन्तो, लामको । अम्मति भागसो जायतीति अन्तो, अंसोति आह “कोट्टासो अन्तो”ति । सन्तो परमत्थतो विज्जमानो कायो धम्मसमूहोति सक्कायो, खन्धा, ते पन अरियसच्चभूता इधाधिप्पेताति वुत्तं “पच्चुपादानक्खन्धा”ति । पुरिमत्तणहाति येसं निब्बत्तिका, तन्निब्बत्तितो पगेव सिद्धा तण्हा । अप्पवत्तिभूतन्ति नप्पवत्तति तदुभयं एत्थाति तेसं अप्पवत्तिट्ठानभूतं । यदि “सक्कायो अन्तो”तिआदिना अज्जमज्जं विभत्तिताय दुक्खसच्चादयो गहिता, अथ कस्मा मग्गो न गहितोति आह “मग्गो पना”तिआदि । तत्थ उपायत्ताति उपायभावतो, सम्पापकहेतुभावतोति अत्थो ।

यदि पन हेतुमन्तग्गहणेनेव हेतु गहितो होति, ननु एवं सक्कायग्गहणेनेव तस्स हेतुभूतो सक्कायसमुदयो गहितो होतीति? तस्स गहणे सङ्कतदुको विय, सप्पच्चयदुको विय च दुकोवायं आपज्जति, न तिको । यथा पन सक्कायं गहेत्वा सक्कायसमुदयोपि गहितो, एवं सक्कायनिरोधं गहेत्वा सक्कायनिरोधुपायो गद्देय्य, एवं सति चतुक्को अयं आपज्जेय्य, न तिको, तस्मा हेतुमन्तग्गहणेन हेतुग्गहणं न चिन्तेतब्बं । अयं पनेत्थ अधिप्पायो युत्तो सिया — इध सक्कायसक्कायसमुदया अनादिकालिका, असति मग्गभावनायं पच्चयानुपरमेन अपरियन्ता च, निब्बानं पन अप्पच्चयत्ता अत्तनो निच्चताय एव

सब्बदाभावीति अनादिकालिको, अपरियन्तो च । इति इमानि तीणि सच्चानि महाथेरो इमाय सभागताय “तयो अन्ता”ति तिकं कत्वा दस्सेति । अरियमग्गो पन कदाचि करहचि लब्भमानो न तथाति तस्स अतिविय दुल्लभपातुभावतं दीपेतुं तिकतो बहिकतोति अयमेत्थ अत्तनोमति ।

दुक्खताति दुक्खभावो, दुक्खंयेव वा यथा देवो एव देवता । दुक्ख-सद्दो चायं अदुक्खसभावेसुपि सुखुपेक्खासु कञ्चि अनिट्ठताविसेसं उपादाय पवत्ततीति ततो निवत्तेन्तो सभावदुक्खवाचिना एकेन दुक्ख-सद्देन विसेसेत्वा “**दुक्खदुक्खता**”ति आह । भवति हि एकन्ततो तंसभावेपि अत्थे अज्जस्स धम्मस्स येन केनचि सदिसतालेसेन ब्यभिचारासङ्काति विसेसितब्बता यथा “रूपरूपं तिलतेल”न्ति (विभ० अट्ठ० पकिण्णकथा) च । **सङ्खारभावेनाति** सङ्खतभावेन । पच्चयेहि सङ्खरीयन्तीति **सङ्खारा**, अदुक्खमसुखवेदना । सङ्खरियमानत्ता एव हि असारकताय परिदुब्बलभावेन भङ्गभङ्गाभिमुखकवणेसु विय अत्तलाभकवणेपि विबाधप्पत्ता एव हुत्वा सङ्खारा पवत्तन्तीति आह “**सङ्खतत्ता उप्पादजराभङ्गपीळिता**”ति । **तस्माति** यथावुत्तकारणतो । **अज्जदुक्खसभावविरहतोति** दुक्खदुक्खताविपरिणामदुक्खतासङ्खातस्स अज्जस्स दुक्खसभावस्स अभावतो । **विपरिणामेति** परिणामे, विगमेति अत्थो । तेनाह **पपञ्चसूदनियं** “विपरिणामदुक्खाति नत्थिभावो दुक्ख”न्ति । अपरिज्जातवत्थुकानज्हि सुखवेदनुपरमो दुक्खतो उपट्ठाति, स्वायमत्थो पियविप्पयोगेन दीपेतब्बो । तेनाह “**सुखस्स ही**”तिआदि । पुब्बे वुत्तनयो पदेसनिस्सितो वेदनाविसेसमत्तविसयत्ताति अनवसेसतो सङ्खारदुक्खतं दस्सेतुं “**अपिचा**”ति दुतियनयो वुत्तो । ननु च “सब्बे सङ्खारा दुक्खा”ति (ध० प० २७८) वचनतो सुखदुक्खवेदनानम्पि सङ्खारदुक्खता आपन्नाति? सच्चमेतं, सा पन सामज्जजोतनाअपवादभूतेन इतरदुक्खतावचनेन निवत्तीयतीति नायं विरोधो । तेनेवाह “**ठपेत्वा दुक्खवेदनं सुखवेदनञ्चा**”ति ।

मिच्छासभावोति “हितसुखावहो मे भविस्सती”ति एवं आसीसितोपि तथा अभावतो, असुभादीसुयेव “सुभ”न्तिआदिविपरीतप्पवत्तितो च मिच्छासभावो, मुसासभावोति अत्थो । मातुघातकादीसु पवत्तमानापि हि हितसुखं इच्छन्ताव पवत्तन्तीति ते धम्मा “हितसुखावहा मे भविस्सन्ती”ति आसीसिता होन्ति । तथा असुभासुखानिच्चानत्तेसु सुभादिविपरियासदळ्हाताय आनन्तरियकम्मनियतमिच्छादिट्ठीसु पवत्ति होतीति ते धम्मा असुभादीसु सुभादिविपरीतप्पवत्तिका होन्ति । विपाकदाने सति खन्धभेदानन्तरमेव विपाकदानतो **नियतो**, मिच्छत्तो च सो नियतो चाति **मिच्छत्तनियतो** । अनेकेसु आनन्तरियेसु कतेसु यं तत्थ बलवं, तं विपच्चति, न इतरानीति एकन्तविपाकजनकताय नियतता न सक्का वत्तुन्ति “**विपाकदाने सती**”ति वुत्तं । **खन्धभेदानन्तरन्ति** चुतिअनन्तरन्ति अत्थो । चुति हि मरणनिद्देसे “खन्धानं भेदो”ति (दी० नि० २.३९०; म० नि० १.१२३; ३.३७३; विभ० १९३) वुत्ता, एतेन वचनेन सति फलदाने चुतिअनन्तरो एव एतेसं फलकालो, न अज्जोति फलकालनियमेन नियतता वुत्ता होति, न फलदाननियमेनाति नियतफलकालानं अज्जेसम्पि उपपज्जवेदनीयानं, दिट्ठधम्मवेदनीयानम्पि नियतता आपज्जति, तस्मा विपाकधम्मधम्मानं पच्चयन्तरविकलतादीहि अविपच्चमानानम्पि अत्तनो सभावेन विपाकधम्मता विय बलवता आनन्तरियेन विपाके दिन्ने अविपच्चमानानम्पि आनन्तरियानं फलदाने नियतसभावा, आनन्तरियसभावा च पवत्तीति अत्तनो सभावेन फलदाननियमेनेव नियतता, आनन्तरियता च वेदितब्बा । अवस्सज्ज नियतसभावा, आनन्तरियसभावा च तेसं पवत्तीति सम्पटिच्छितब्बमेतं अज्जस्स बलवतो आनन्तरियस्स अभावे चुतिअनन्तरं एकन्तेन फलदानतो ।

ननु एवं अज्जेसम्पि उपपज्जवेदनीयानं अज्जस्मिं विपाकदायके असति चुतिअनन्तरमेव एकन्तेन फलदानतो आनन्तरियसभावा, नियतसभावा च पवत्ति आपज्जतीति? नापज्जति असमानजातिकेन चेतोपणिधिवसेन, उपघातकेन च

निवत्तेतब्बविपाकत्ता अनन्तरेकन्तफलदायकत्ताभावा, न पन आनन्तरियानं पठमज्झानादीनं दुतियज्झानादीनि विय असमानजातिकं फलनिवत्तकं अत्थि सब्बानन्तरियानं अवीचिफलत्ता, न च हेटूपपत्तिं इच्छतो सीलवतो चेतोपणिधि विय उपरूपपत्तिजनककम्मबलं आनन्तरियबलं निवत्तेतुं समत्थो चेतोपणिधि अत्थि अनिच्छन्तस्सेव अवीचिपातनतो, न च आनन्तरियुपघातकं किञ्चि कम्मं अत्थि । तस्मा तेसंयेव अनन्तरेकन्तविपाकजनकसभावा पवत्तीति । अनेकानि च आनन्तरियानि कतानि एकन्ते विपाके नियतत्ता उपरताविपच्चनसभावासङ्कत्ता निच्छित्तानि सभावतो नियतानेव । चुतिअनन्तरं पन फलं **अनन्तरं** नाम, तस्मिं अनन्तरे नियुत्तानि, तन्निब्वत्तनेन अनन्तरकरणसीलानि अनन्तरपयोजनानि चाति सभावतो **आनन्तरियानेव** च होन्ति । तेसु पन समानसभावेसु एकेन विपाके दिन्ने इतरानि अत्तना कातब्बकिच्चस्स तेनेव कतत्ता न दुतियं ततियञ्च पटिसन्धिं करोन्ति, न समत्थताविघातत्ताति नत्थि तेसं नियतानन्तरियतानिवत्तीति । न हि समानसभावं समानसभावस्स समत्थतं विहनतीति । एकस्स पन अज्जानिपि उपत्थम्भकानि होन्तीति दट्ठब्बानीति । **सम्मासभावेति** सच्चसभावे । नियतो एकन्तिको अनन्तरमेव फलदानेनाति **सम्मत्तनियमतो** । न नियतोति उभयथापि न नियतो । **अवसेसानं धम्मानन्ति** किलेसानन्तरियकम्मनिय्यानिकधम्मेहि अज्जेसं धम्मानं ।

तमन्धकारोति तमो अन्धकारोति पदविभागो । **अविज्जा तमो नाम** आरम्भणस्स छादनट्टेन । तेनेवाह “तमो विहतो, आलोको उप्पन्नो (म० नि० १.३८५; पारा० १२), तमोक्खन्धो पदालितो”ति (सं० नि० १.१६४) च आदि । **अविज्जासीसेन विचिकिच्छा वुत्ता** महता सम्मोहेन सब्बकालं अवियुज्जनतो । **आगम्माति** पत्वा । **कङ्कतीति** “अहोसिं नु खो अहं अतीतमद्धान”न्तिआदिना (म० नि० १.१८; सं० नि० २.२०) कङ्कं उप्पादेति संसयं आपज्जति । **अधिमुच्चितुं न सक्कोतीति** पसादाधिमोक्खवसेन अधिमुच्चितुं न सक्कोति । तेनाह “**न सम्पसीदती**”ति । यावत्तकञ्चि यस्मिं वत्थुस्मिं विचिकिच्छा न विगच्छति, ताव तत्थ सद्भाधिमोक्खो अनवसरोव । न केवलं सद्भाधिमोक्खो, निच्छयाधिमोक्खोपि तत्थ न पतिट्ठति एव ।

न रक्खितब्बानीति “इमानि मया रक्खितब्बानी”ति एवं कत्थचि रक्खाकिच्चं नत्थि परतो रक्खितब्बस्सेव अभावतो । **सतिया एव रक्खितानीति** मुट्ठस्सच्चस्स बोधिमूले एव सवासनं समुच्छिन्नत्ता सतिया रक्खितब्बानि नाम सब्बदापि रक्खितानि एव । **नत्थि तथागतस्स कायदुच्चरितन्ति** तथागतस्स कायदुच्चरितं नाम नत्थेव, यतो सुपरिसुद्धो कायसमाचारो भगवतो । **नो अपरिसुद्धा**, परिसुद्धा एव अपरिसुद्धिहेतूनं किलेसानं पहीनत्ता । तथापि विनये अपकतज्जुतावसेन सिया तेसं अपारिसुद्धिलेसो, न भगवतोति दस्सेतुं “**न पना**”तिआदि वुत्तं । तत्थ **विहारकारं** आपत्तिन्ति एकवचनवसेन “आपत्तियो”ति एत्थ आपत्ति-सद्वं आनेत्वा योजेतब्बं । अभिधेय्यानुरूपज्झि लिङ्गवचनानि होन्ति । एस नयो सेसेसुपि । “**मनोद्वारे**”ति इदं तस्सा आपत्तिया अकिरियसमुद्धानताय वुत्तं । न हि मनोद्वारे पज्जत्ता आपत्ति अत्थीति । **सउपारम्भवसेनाति** सवत्तब्बतावसेन, न पन दुच्चरितलक्खणापत्तिवसेन, यतो नं भगवा पटिक्खपति । यथा आयस्मतो महाकप्पिनस्सापि “गच्छेय्यं वाहं उपोसथं, न वा गच्छेय्यं । गच्छेय्यं वाहं सङ्गकम्मं, न वा गच्छेय्य”न्ति (महाव० १३७) परिवितक्कितं । **मनोदुच्चरितन्ति** मनोद्वारिकं अप्पसत्थं चरितं । सत्थारा अप्पसत्थताय हि तं दुच्चरितं नाम जातं, न सभावतो ।

यस्मा महाकारुणिको भगवा सदेवकस्स लोकस्स हितसुखाय एव पटिपज्जमानो अच्चन्तविवेकज्झासयताय तब्बिधुरं धम्मसेनापतिनो चित्तुप्पादं पटिक्खपन्तो “न खो ते...पे०... उप्पादेतब्ब”न्ति अवोच, तस्मा सो थेरस्स चित्तुप्पादो भगवतो न पासंसोति कत्वा **मनोदुच्चरितं** नाम जातो, तस्स च पटिक्खेपो उपारम्भोति आह “**तस्मिं मनोदुच्चरिते उपारम्भं आरोपेन्तो**”ति । **भगवतो पन एत्तकम्पि नत्थि**, यतो पवारणासुते “हन्द दानि, भिक्खवे, पवारेमि वो, न च मे

किञ्चि गरहथ कायिकं वा वाचसिकं वा’ति (सं० नि० १.२१५) वुत्तो भिक्खुसङ्घो “न खो मयं भन्ते भगवतो किञ्चि गरहाम कायिकं वा वाचसिकं वा’ति सत्थु परिसुद्धकायसमाचारादिकं सिरसा सम्पटिच्छि। अयञ्हि लोकनाथस्स दुच्चरिताभावो बोधिसत्तभूमियम्पि चरियाचिरानुगतो अहोसि, पगेव बुद्धभूमियन्ति दस्सेन्तो “अनच्छरियञ्चेत”न्तिआदिमाह।

बुद्धानंयेव धम्मा गुणा, न अञ्जेसन्ति **बुद्धधम्मा**। तथा हि ते बुद्धानं आवेणिकधम्माति वुच्चन्ति। तत्थ “**नत्थि तथागतस्स कायदुच्चरित**”न्तिआदिना कायवचीमनोदुच्चरिताभाववचनं यथाधिकारं कायकम्मादीनं जाणानुपरिवत्तिताय लद्धगुणकित्तनं, न आवेणिकधम्मन्तरदस्सनं। सब्बस्मिञ्हि कायकम्मादिके जाणानुपरिवत्तिनि कुतो कायदुच्चरितादीनं सम्भवो। “**बुद्धस्स अप्पटिहतजाण**”न्तिआदिना वुत्तानि सब्बञ्जुतञ्जाणतो विसुंयेव तीणि जाणानि चतुर्योनिपञ्चगतिपरिच्छेदकजाणानि विया’ति वदन्ति। एकंयेव हुत्वा तीसु कालेसु अप्पटिहतजाणं नाम सब्बञ्जुतञ्जाणमेव। **नत्थि छन्दस्स हानीति** सत्तेसु हितछन्दस्स हानि नत्थि। **नत्थि वीरियस्स हानीति** खेमपविवेकवितक्कानुगतस्स वीरियस्स हानि नत्थि। “**नत्थि दवाति** खिड्ढाधिप्पायेन किरिया नत्थि। **नत्थि रवाति** सहसा किरिया नत्थी’ति वदन्ति, सहसा पन किरिया **दवा** “अञ्जं करिस्सामी’ति अञ्जकरणं **रवा**। **खलितन्ति** विरज्झनं जाणेन अप्फुटं। **सहसाति** वेगायितत्तं तुरितकिरिया। **अब्बावटो मनोति** निरत्थको चित्तसमुदाचारो। **अकुसलचित्तन्ति** अञ्जाणुपेक्खाहाह, अयञ्च दीघभाणकानं पाठो आकुलो विय। अयं पन पाठो अनाकुलो —

अतीतंसे बुद्धस्स भगवतो अप्पटिहतजाणं, अनागतंसे, पच्चुप्पन्नंसे। इमेहि तीहि धम्मेहि समन्नागतस्स बुद्धस्स भगवतो सब्बं कायकम्मं जाणपुब्बङ्गमं जाणानुपरिवत्ति, सब्बं वचीकम्मं, सब्बं मनोकम्मं। इमेहि छहि धम्मेहि समन्नागतस्स बुद्धस्स भगवतो नत्थि छन्दस्स हानि, नत्थि धम्मदेसनाय, नत्थि वीरियस्स, नत्थि समाधिस्स, नत्थि पञ्जाय, नत्थि विमुत्तिया। इमेहि द्वादसहि धम्मेहि समन्नागतस्स बुद्धस्स भगवतो नत्थि दवा, नत्थि रवा, नत्थि अप्फुटं, नत्थि वेगायितत्तं, नत्थि अब्बावटमनो, नत्थि अप्पटिसङ्खानुपेक्खाति।

तत्थ **अप्पटिसङ्खानुपेक्खाति** अञ्जाणुपेक्खा। सेसं वुत्तनयमेव। एत्थ च तथागतस्स आजीवपारिसुद्धिं कायवचीमनोसमाचारपारिसुद्धियाव सङ्गहेत्वा समाचारत्तयवसेन महाथेरेन तिको देसितो।

किञ्चनाति किञ्चिक्खा। इमे पन रागादयो पलिबुन्धनद्वेन किञ्चना वियाति **किञ्चना**। तेनाह “**किञ्चनाति पलिबोधा**”ति।

अनुदहनद्वेनाति अनु अनु दहनद्वेन। रागादयो अरूपधम्मा इत्तरक्खणा कथं अनुदहन्तीति आसङ्कं निवत्तेतुं “**तत्थ वत्थूनी**”ति वुत्तं, दट्ठब्बानीति वचनसेसो। **तत्थाति** तस्मिं रागादीनं अनुदहनद्वे। **वत्थूनीति** सासने, लोके च पाकटत्ता पच्चक्खभूतानि कारणानि। **रागो उप्पन्नो** तिखिणकरो हुत्वा। तस्मा तंसमुद्धाना तेजोधातु अतिविय तिखिणभावेन सद्धिं अत्तना सहजातधम्मेहि हृदयप्पदेसं झापेसि यथा तं बाहिरा तेजोधातु सनिस्सयं। तेन सा भिक्खुनी सुपतो विय व्याधि झायित्वा मता। तेनाह “**तेनेव झायित्वा कालमकासी**”ति। दोसस्स निस्सयानं दहनता पाकटा एवाति इतरं दस्सेतुं “**मोहवसेन ही**”तिआदि वुत्तं। **अतिवत्तित्वाति** अतिक्कमित्वा।

कामं आहुनेय्यगिआदयो तयो अग्गी ब्राह्मणेहि इच्छिता सन्ति, ते पन तेहि इच्छितमत्ता, न सत्तानं तादिसा अत्थसाधका। ये पन सत्तानं अत्थसाधका, ते दस्सेतुं “**आहुनं वुच्चती**”तिआदि वुत्तं। तत्थ आदरेन हुननं पूजनं

आहुनन्ति सक्कारो “आहुन”न्ति वुच्चति, तं आहुनं अरहन्ति। तेनाह भगवा “आहुनेय्याति भिक्खवे मातापितूनमेतं अधिवचन”न्ति (इतिवु० १०६)। यदग्गेन च ते पुत्तानं बहुकारताय आहुनेय्याति तेसु सम्मापटिपत्ति नेसं हितसुखावहा, तदग्गेन तेसु मिच्छापटिपत्ति अहितदुखावहाति आह “तेसु...पे०... निब्बत्तन्ती”ति। स्वायमत्थोति यो मातापितूनं अत्तनो उपरि विप्पटिपन्नानं पुत्तानं अनुदहनस्स पच्चयभावेन अनुदहनद्धो, सो अयमत्थो। मित्तविन्दकवत्थुनाति मित्तविन्दकस्स नाम मातरि विप्पटिपन्नस्स पुरिसस्स ताय एव विप्पटिपत्तिया चिरतरं कालं आपायिकदुक्खानुभवनदीपनेन वत्थुना वेदितब्बो।

इदानी तमत्थं कस्सपस्स भगवतो काले पवत्तं विभावेतुं “मित्तविन्दको ही”तिआदि वुत्तं। धनलोभेन, न धम्मच्छन्देनाति अधिप्पायो। अकुतोभयं केनचि अनुट्ठापनीयताय। निवारेसि समुद्वपयाता नाम बहन्तरायाति अधिप्पायेन। अन्तरं कत्वाति अतिक्कमनवसेन द्विन्नं पादानं अन्तरे कत्वा।

नावा अट्टासि तस्स पापकम्मबलेन वातस्स अवायनतो। एकदिवसं रक्खितउपोसथकम्मानुभावेन सम्पत्तिं अनुभवन्तो। यथा पुरिमाहि परतो मा अगमासीति वुत्तो, एवं अपरापराहिपीति आह “ताहि परतो परतो मा अगमासी”ति वुच्चमानो”ति। खुरचक्कधरन्ति खुरधारूपमचक्कधरं एकं पुरिसं। उपट्टासि पापकम्मस्स बलेन।

चतुब्धीति चतूहि अच्छरासदिसीहि विमानपेतीहि, सम्पत्तिं अनुभवित्वाति वचनसेसो। अट्टज्झगमाति रूपादिकामगुणेहि ततो विसिद्धतरा अट्ट विमानपेतियो अधिगच्छि। अत्रिच्छन्ति अत्रिच्छासङ्गातेन अतिलोभेन समन्नागतत्ता अत्र अत्र कामगुणे इच्छन्तो। चक्कन्ति खुरचक्कं। आसदोति अनत्थावहभावेन आसादेति।

सोति गेहसामिको भत्ता। पुरिमनयेनेवाति अनुदहनस्स पच्चयताय।

अतिचारिनीति सामिकं अतिक्कमित्वा चारिनी मिच्छाचारिनी। रत्तिं दुक्खन्ति अत्तनो पापकम्मानुभावसमुपट्टितेन सुनखेन खादितब्बतादुक्खं। वज्जेत्वाति तं अजानापेत्वाव कारणट्ठानगमनं सन्धाय वुत्तं। पटपटन्तीति पटपटा कत्वा। अनुरवदस्सनज्हेतं। मुट्ठियोगो किरायं तस्स सुनखन्तरधानस्स, यदिदं खेळपिण्डं भूमियं निट्ठुभित्वा पादेन घंसनं। तेन वुत्तं “सो तथा अकासि। सुनखा अन्तरथायिसू”ति।

दक्खिणाति चत्तारो पच्चया दिव्यमाना दक्खन्ति एतेहि हितसुखानीति। तं दक्खिणं अरहतीति दक्खिणेय्यो, भिक्खुसङ्घो। रेवतीवत्थु विमानवत्थुपेतवत्थूसु (वि० व० ८६१ आदयो) तेसं अट्टकथायज्ज (वि० व० ९७७-९८०; पे० व० अट्ट० ७१४-७३६) आगतनयेन वेदितब्बं।

“तिविधेन रूपसङ्गहो”ति एत्थ ननु सङ्गहो एकविधोव, सो कस्मा “चतुब्बिधो”ति वुत्तोति? “सङ्गहो”ति अत्थं अवत्वा अनिद्धारितत्थस्स सदस्सेव वुत्तत्ता। “तिविधेन रूपसङ्गहो”तिआदीसु (ध० स० रूपकण्ड-तिके) पदेसु सङ्गह-सद्वो ताव अत्तनो अत्थवसेन चतुब्बिधोति अयज्जेत्थ अत्थो। अत्थोपि वा अनिद्धारितविसेसो सामज्जेन गहेतब्बतं पत्तो “तिविधेन रूपसङ्गहो”तिआदीसु (ध० स० रूपकण्ड-तिके) “सङ्गहो”ति वुत्तोति न कोचि दोसो। निद्धारिते हि विसेसे तस्स एकविधता सिया, न ततो पुब्बेति। “जातिसङ्गहो”ति वुत्तेपि जाति-सदस्स सापेक्खसदत्ता अत्तनो जातिया सङ्गहोति अयमत्थो विज्जायतेव सम्बन्धारहस्स अज्जस्स अवुत्तत्ता यथा “मातापितु उपट्ठान”न्ति (खु० पा० ५.६; सु० नि० २६५)। अट्टकथायं पन यथाधिप्पेतमत्थं अपरिपुण्णं कत्वा दस्सेतुं “जातिसङ्गहो” इच्चेव वुत्तं। समानजातिकानं सङ्गहो,

समानजातिया वा सङ्गहो सजातिसङ्गहो । सज्जायति एत्थाति **सज्जाति**, सज्जातिया सङ्गहो **सज्जातिसङ्गहो**, सज्जातिदेसेन सङ्गहोति अत्थो । किरियाय एवरूपाय सङ्गहो **किरियासङ्गहो** । **रूपकखन्धगणनन्ति** “रूपकखन्धो”ति गणनं सङ्ख्यं **गच्छति** रूपनसभावत्ता । **तीहि कोट्टासेहि रूपगणनाति** वक्खमानेहि तीहि भागेहि रूपस्स सङ्गहो, गणेत्तब्बताति अत्थो ।

रूपायतनं निपस्सति पच्चक्खतो विजानातीति **निदस्सनं**, चक्खुविज्जाणं, निदस्सतीति वा **निदस्सनं**, दट्ठब्बभावो, चक्खुविज्जाणस्स गोचरभावो, तस्स च रूपायतनतो अनज्जत्तेपि अज्जेहि धम्मेहि रूपायतनं विसेसेतुं अज्जं विय कत्वा “**सह निदस्सनेनाति सनिदस्सनं**”न्ति एवमेत्थ अत्थो वेदितब्बो । धम्मसभावसामज्जेन हि एकीभूतेसु धम्मेसु यो नानत्तकरो सभावो, सो अज्जो विय कत्वा उपचरितुं युत्तो । एवज्झि अत्थविसेसावबोधो होतीति ।
चक्खुपटिहननसमत्थतोति चक्खुनो घट्टनसमत्थताय । घट्टनं विय च **घट्टनं** दट्ठब्बं । दुतियेन अत्थविकप्पेन दट्ठब्बभावसङ्घातं नास्स निदस्सनन्ति अनिदस्सनन्ति योजना । एत्थ च दसन्नं आयतनानं यथारहं सयं, निस्सयवसेन च सम्पत्तानं, असम्पत्तानज्च पटिमुखभावो अज्जमज्जपतनं **पटिहननं**, येन ब्यापारादिविकारपच्चयन्तरसन्निधाने चक्खादीनं विसयेसु विकारुप्पति । तत्थ **ब्यापारो** चक्खादीनं सविसयेसु आविच्छन्नं, रूपादीनं इट्ठानिट्ठता, तत्थ च चित्तस्स आभुजनन्ति इमे आदिसद्वसङ्गहिता । तेहि विकारप्पत्तिया पच्चयन्तरब्यापारतो अज्जन्ति कत्वा अनुगाहूपघातो **विकारो** । उपनिस्सयो पन अप्पधानस्स पच्चयो इध गहितो । कारणकारणम्पि कारणमेवाति गय्हमाने सिया तस्सापि सङ्गहोति ।
वुत्तप्पकारन्ति “चक्खुविज्जाणसङ्घात”न्ति वुत्तप्पकारं । **नास्स पटिघोति** एत्थापि “वुत्तप्पकार”न्ति आनेत्वा सम्बन्धो । **अवसेसं** सोळसविधं **सुखमरूपं** ।

सङ्खरोन्तीति सम्पिण्डेन्ति । चेतना हि आयूहनरसताय यथा सम्पयुत्तधम्मे यथासकं किच्चेसु संविदहन्ती विय अभिसन्दहन्ती वत्तमाना तेनेव किच्चविसेसेन ते सम्पिण्डेन्ती विय होति, एवं अत्तनो विपाकधम्मेपि पच्चयसमवाये सङ्खरोन्ती सम्पिण्डेन्ती विय होति । तेनाह “**सहजात...पे०... रासी करोन्ती**”ति । **अभिसङ्खरोतीति** अभिविसिद्धं कत्वा सङ्खरोति । पुज्जाभिसङ्खारो हि अत्तनो फलं इतरस्स फलतो अतिविय विसिद्धं भिन्नं कत्वा सङ्खरोति पच्चयतो, सभावतो, पवत्तिआकारतो च सयं इतरेहि विसिद्धसभावत्ता । एस नयो इतरेहिपि । पुज्जभवफलनिब्बत्तनतो, अत्तनो सन्तानस्स पुननतो च **पुज्जो** ।

महाचित्तचेतनानन्ति असङ्ख्येय्यायुनिष्फादनादिमहानुभावताय महाचित्तेसु पवत्तचेतनानं । **अट्टेव चेतना होन्ति**, या कामावचरा कुसला । “तेरसपी”ति कस्मा वुत्तं, ननु “नवा”ति वत्तब्बं । न हि भावना जाणरहिता युत्ताति अनुयोगं सन्धायाह “**यथा ही**”तिआदि । **कसिणपरिकम्मं करोन्तस्साति** कसिणेसु ज्ञानपरिकम्मं करोन्तस्स । “पथवी पथवी”तिआदि भावना हि कसिणपरिकम्मं । तस्स हि परिकम्मस्स सुपगुणभावतो अनुयुत्तस्स तत्थ आदराकरणेन सिया जाणरहितचित्तं । ज्ञानपच्चवेक्खणायपि एसेव नयो । केचि मण्डलकरणम्पि भावनं भजापेन्ति ।

दानवसेन पवत्तचित्तचेतसिकधम्मा **दानं**, तत्थ ब्यापारभूता आयूहनचेतना दानं आरब्ध, दानज्च अधिकिच्च उप्पज्जतीति वुत्ता । एवं इतरेसुपि । **अयं सङ्खेपदेसनाति** अयं पुज्जाभिसङ्खारे सङ्खेपतो अत्थदेसना, अत्थवण्णनाति अत्थो ।

सोमनस्सचित्तेनाति अनुमोदनापवत्तिदस्सनमत्तमेतं दट्ठब्बं । उपेक्खासहगतेनापि हि अनुस्सरति एवाति । कामं निच्चसीलं, उपोसथसीलं, नियमसीलम्पि सीलमेव, परिपुण्णं पन सब्बङ्गसम्पन्नं सीलं दस्सेतुं “**सीलपूरणत्थाया**”तिआदि वुत्तं । नयदस्सनं वा एतं, तस्मा “निच्चसीलं, उपोसथसीलं, नियमसीलं समादियिस्सामी”ति विहारं गच्छन्तस्स,

समादित्वा समादिन्नसीले च तस्मिं, “साधु सुद्धं”ति आवज्जन्तस्स, तं सीलं सोधेन्तस्स च पवत्ता चेतना सीलमयाति एवमेत्थ योजना वेदितब्बा ।

पुब्बे समथवसेन भावनानयो गहितोति इदानीं सम्मसननयेन तं दस्सेतुं “पटिसम्भिदायं वुत्तेना”तिआदि वुत्तं । तत्थ अनिच्चतोति अनिच्चभावतो । दुक्खतो, अनत्ततोति एत्थापि एसेव नयो ।

तत्थ ये पञ्चुपादानक्खन्धा नामरूपभावेन परिगगहिता, ते यस्मा द्वारारम्मणेहि सद्धिं द्वारप्पवत्तधम्मवसेन विभागं लभन्ति, तस्मा द्वारछक्कादिवसेन छ छक्का गहिता । यस्मा पन लक्खणेसु अनत्तलक्खणं दुब्बिभावं, तस्मा तस्स विभावनाय छ धातुयो गहिता । ततो येसु कसिणेसु इतो बाहिरकानं अत्ताभिनिवेसो, तानि इमेसं ज्ञानानं आरम्मणभावेन उपट्टानाकारमत्तानि, इमानि पन तानि ज्ञानानीति दस्सनत्थं दस कसिणानि गहितानि । ततो दुक्खानुपस्सनाय परिवारभावेन पटिक्कूलाकारवसेन द्वत्तिस कोट्टासा गहिता । पुब्बे खन्धवसेन सङ्खेपतो इमे धम्मा गहिता, इदानीं नातिसङ्खेपवित्थारनयेन च मनसि कातब्बाति दस्सनत्थं द्वादसायतनानि, अट्टारस धातुयो च गहिता । तेसु इमे धम्मा सतिपि सुज्जानिरीहअब्बापारभावे धम्मसभावतो आधिपच्चभावेन पवत्तन्तीति अनत्तभावविभावनत्थं इन्द्रियाणि गहितानि । एवं अनेकभेदभिन्नापि इमे धम्मा भूमित्तयपरियापन्नताय तिविधाव होन्तीति दस्सनत्थं तिस्सो धातुयो गहिता । एत्तावता निमित्तं दस्सेत्वा पवत्तं दस्सेतुं कामभवादयो नव भवा गहिता । एत्तके अभिज्जेय्यविसेसे पवत्तमनसिकारकोसल्लेन सण्हसुखुमेसु निब्बत्तितमहग्गतधम्मेसु मनसिकारो पवत्तेतब्बोति दस्सनत्थं ज्ञानअप्पमज्जारूपानि गहितानि । तत्थ ज्ञानानि नाम वुत्तावसेसारम्मणानि रूपावचरज्ज्ञानानि । पुन पच्चयपच्चयुप्पन्नविभागतो इमे धम्मा विभज्ज मनसिकातब्बाति दस्सनत्थं पटिच्चसमुप्पादज्ञानि गहितानि । पच्चयाकारमनसिकारो हि सुखेन, सुद्धतरज्ज लक्खणत्तयं विभावेति, तस्मा सो पच्छतो गहितो । एवं एते सम्मसनीयभावेन गहिता खन्धादिवसेन कोट्टासतो पच्चवीसतिविधा, पभेदतो पन अतीतादिभेदं अनामसित्वा गह्यमाना द्वीहि ऊनानि द्वेसतानि होन्ति । इदं तावेत्थ पाळिववत्थानं, अत्थविचारं पन इच्छन्तेहि परमत्थमज्जूसायं विसुद्धिमग्गसंवण्णनायं वुत्तनयेनेव वेदितब्बं ।

न पुज्जोति अपुज्जो । तस्स पुज्ज-सद्धे वुत्तविपरियायेन अत्थो वेदितब्बो । सन्तानस्स इज्जनहेतूनं नीवरणादीनं सुविक्रम्भनतो रूपतण्हासङ्घातस्स इज्जितस्स अभावतो अनिज्जं, अनिज्जमेव “आनेज्ज”न्ति वुत्तं । तथा हि रूपारम्मणं रूपनिमित्तारम्मणं सब्बमि चतुत्थज्ज्ञानं निप्परियायेन “आनेज्ज”न्ति वुच्चति ।

चत्तारो मग्गट्ठा, हेट्ठिमा तयो फलट्ठाति एवं सत्तविधो । तिस्सो सिक्खाति अधिसीलादिका तिस्सो सिक्खा । तासु जातोति वा सेक्खो, अरियपुग्गलो हि अरियाय जातिया जायमानो सिक्खासु जायति, न योनियं । सिक्खनसीलोति वा सेक्खो । पुग्गलाधिष्ठानाय वा कथाय सेक्खस्स अयन्ति अज्जासाधारणमग्गफलत्तयधम्मा सेक्खपरियायेन वुत्ता । असेक्खोति च यत्थ सेक्खभावासङ्का अत्थि, तत्थायं पटिसेधोति लोकियनिब्बानेसु असेक्खभावनापत्ति दट्ठब्बा । सीलसमाधिपज्जासङ्घाता हि सिक्खा अत्तनो पटिपक्खकिलेसेहि विप्पमुत्ता परिसुद्धा उपक्किलेसानं आरम्मणभावमि अनुपगमनतो एता “सिक्खा”ति वत्तुं युत्ता अट्ठसुपि मग्गफलेसु विज्जन्ति, तस्मा चतुमग्गहेट्ठिमफलत्तयसमङ्गिनो विय अरहत्तफलसमङ्गीपि तासु सिक्खासु जातोति च तंसमङ्गिनो अरहतो इतरेसं विय सेक्खत्ते सति सेक्खस्स अयन्ति च सिक्खा सीलं एतस्साति च “सेक्खो”ति वत्तब्बो सियाति तन्निवत्तनत्थं असेक्खोति यथावुत्तसेक्खभावपटिसेधो कतो । अरहत्तफले हि पवत्तमाना सिक्खा परिनिट्ठितसिक्खाकिच्चत्ता न सिक्खाकिच्चं करोन्ति, केवलं सिक्खाफलभावेनेव पवत्तन्ति, तस्मा न ता सिक्खावचनं अरहन्ति, नापि तंसमङ्गी सेक्खवचनं, न च “सिक्खनसीलो, सिक्खासु जातो”ति च

वत्तब्बतं अरहति । हेट्ठिमफलेसु पन सिक्खा सकदागामिमग्गविपस्सनादीनं उपनिस्सयभावतो सिक्खाकिच्चं करोन्तीति सिक्खावचनं अरहन्ति, तंसमङ्गिनो च सेक्खवचनं, “सिक्खनसीला, सिक्खासु जाता”ति च वत्तब्बतं अरहन्ति ।

“सिक्खतीति सेक्खो”ति च अपरियोसितसिक्खो दस्सितोति । अनन्तरमेव “खीणासवो”ति आदिं वत्त्वा “न सिक्खतीति असेक्खो”ति वुत्तत्ता परियोसितसिक्खो दस्सितो, न सिक्खारहितो तस्स ततियपुग्गलभावेन गहितत्ता । वुद्धिप्पत्तिसिक्खो वा असेक्खोति एतस्मिं अत्थे सेक्खधम्मेषु एव ठितस्स कस्सचि अरियस्स असेक्खभावापत्तीति अरहत्तमग्गधम्मा वुद्धिप्पत्ता, यथावुत्तेहि च अत्थेहि सेक्खोति कत्त्वा तंसमङ्गिनो अग्गमग्गट्ठस्स असेक्खभावो आपन्नोति? न तंसदिसेसु तब्बोहारतो । अरहत्तमग्गतो हि निन्नानाकरणं अरहत्तफलं ठपेत्वा परिज्जादिकिच्चकरणं, विपाकभावञ्च, तस्मा ते एव सेक्खधम्मा “अग्गफलधम्मभावं आपन्ना”ति सक्का वत्तुं, कुसलसुखतो च विपाकसुखं सन्ततरताय पणीततरन्ति, वुद्धिप्पत्ता च ते धम्मा होन्तीति तंसमङ्गी “असेक्खो”ति वुच्चतीति ।

जातिमहल्लकोति जातिया वुड्ढतरो अद्धगतो वयोअनुप्पत्तो । सो हि रत्तञ्जुताय येभुय्येन जातिधम्मकुलधम्मपदेसु थावरियप्पत्तिया **जातिथेरो नाम । थेरकरणा धम्मा**ति सासने थिरभावकरा गुणा पटिपक्खनिम्मदनका । **थेरो**ति वक्खमानेसु धम्मेसु थिरभावप्पत्तो । **सीलवा**ति पासंसेन सातिसयेन सीलेन समन्नागतो, सीलसम्पन्नोति अत्थो, एतेन दुस्सील्यसङ्घातस्स बाल्यस्स अभावमाह । सुत्तगेय्यादि बहु सुतं एतेनाति **बहुस्सुतो**, एतेनास्स सुतविरहसङ्घातस्स बाल्यस्स अभावं, पटिसङ्घानबलेन च पतिट्ठितभावं वदति । “**चतुन्नं ज्ञानानं लाभी**”ति इमिना नीवरणादिसङ्घातस्स बाल्यस्स अभावं, भावनाबलेन च पतिट्ठितभावं कथेति । “**आसवानं खया**”तिआदिना अविज्जासङ्घातस्स बाल्यस्स सब्बसो अभावं, खीणासवत्थेरभावेन पतिट्ठितभावञ्चस्स दस्सेति । न चेत्थ समुदाये वाक्यपरिसमापनं, अथ खो पच्चेकं वाक्यपरिसमापनन्ति दस्सेन्तो “**एवं वुत्तेसु धम्मेषू**”तिआदिमाह । **थेरनामको वा** “थेरो”ति एवं नामको वा ।

अनुग्गहवसेन, पूजावसेन वा अत्तनो सन्तकं परस्स दीयति एतेनाति **दानं**, परिच्चागचेतना । दानमेव **दानमयं** । पदपूरणमत्तं मय-सद्धो । पुज्जञ्च तं यथावुत्तेनत्थेन किरिया च कम्मभावतोति **पुज्जकिरिया** । परेसं पियमनापतासेवनीयतादीनं **आनिसंसानं** । **पुब्बे...पे०... वसेनेवा**ति सङ्खारत्तिके (दी० नि० ३.३०५; दी० नि० अट्ठ० ३.३०५) वुत्तदानमयसीलमयभावनामयचेतनावसेनेव । इमानि वेदितब्बानीति सम्बन्धो । **एत्था**ति एतेसु पुज्जकिरियवत्थूसु । **कायेन करोन्तस्सा**ति अत्तनो कायेन परिच्चागपयोगं पवत्तेन्तस्स । **तदत्थन्ति** दानत्थं । “इमं देय्यधम्मं देही”ति **वाचं निच्छारेन्तस्स** । **दानपारमिं आवज्जेत्वा वा**ति यथा केवलं “अन्नदानादीनि देमी”ति दानकाले तं दानमयं पुज्जकिरियवत्थु होति, एवं “इमं दानमयं सम्मासम्बोधिआ पच्चयो होतू”ति दानपारमिं आवज्जेत्वा **दानकालेपि** दानसीसेनेव पवत्तितत्ता । **वत्तसीसे ठत्वा**ति “एतं दानं नाम मय्हं कुलवंसो कुलतन्ति कुलपवेणी कुलचारित्तं”न्ति चारित्तसीले ठत्वा **ददतो चारित्तसीलमयं** । यथा देय्यधम्मपरिच्चागवसेन पवत्तमानापि दानचेतना वत्तसीसे ठत्वा ददतो सीलमयं पुज्जकिरियवत्थु होति पुब्बाभिसङ्खारस्स, अपरभागचेतनाय च तथा पवत्तत्ता, एवं देय्यधम्म **खयतो, वयतो सम्मसनं पट्टपेत्वा ददतो भावनामयं पुज्जकिरियवत्थु** होति पुब्बभागचेतनाय, देय्यधम्म अपरभागचेतनाय च तथा पवत्तत्ता ।

अपचीतिचेतना **अपचितिसहगतं** अपचीयति एतायाति यथा नन्दीरागो एव नन्दीरागसहगता, यथावुत्ताय वा अपचितिया सहगतं सहपवत्तन्ति **अपचितिसहगतं** । अपचायनवसेन पवत्तं **पुज्जकिरियवत्थु** । वयसा गुणेहि च वुड्ढतरानं वत्तपटिपत्तीसु ब्यावटो होति याय चेतनाय, सा **वेय्यावच्चं**, वेय्यावच्चमेव **वेय्यावच्चसहगतं** । वेय्यावच्चसङ्घाताय वा

वत्तपटिपत्तिया समुट्ठापनवसेनेव सहगतं पवत्तन्ति वेय्यावच्चसहगतं, तथापवत्तं पुज्जकिरियवत्थु। अत्तनो सन्ताने पत्तं पुज्जं अनुप्पदीयति एतेनाति पत्तानुप्पदानं। तथा परेन अनुप्पदिन्नताय पत्तं अब्भनुमोदति एतेनाति पत्तब्भनुमोदनं। अननुप्पदिन्नं पन केवलं अब्भनुमोदीयति एतेनाति अब्भनुमोदनं। धम्मं देसेति एतायाति देसना, देसनाव देसनामयं। सुणाति एतेनाति सवनं, सवनमेव सवनमयं। दिट्ठिया जाणस्स उजुगमनं दिट्ठिजुगतं। सब्बत्थ “पुज्जकिरियवत्थू”ति पदं अपेक्खित्वा नपुंसकलिङ्गता।

पूजावसेन सामीचिकिरिया अपचायनं अपचिति। वयसा गुणेहि च जेट्ठानं गिलानानञ्च तंतंकिच्चकरणं वेय्यावच्चं। अयमेतेसं विसेसोति आह “तत्था”तिआदि। चत्तारो पच्चये दत्त्वा सब्बसत्तानन्ति च एकदेसतो उक्कट्टिनिद्देसो, यं किञ्चि देय्यधम्मं दत्त्वा, पुज्जं वा कत्त्वा “कतिपयानं, एकस्सेव वा पत्ति होतू”ति परिणामनम्पि पत्तानुप्पदानमेव। तं न महप्फलं तण्हाय परामट्ठता। परेसं देसेति हितफरणेन मुदुचित्तेनाति आनेत्वा सम्बन्धितब्बं। एवन्ति एवं इमं धम्मं सुत्वा बहुस्सुतो हुत्वा परे धम्मदेसनाय अनुगगण्हिस्सामीति हितफरणेन मुदुचित्तेन धम्मं सुणाति। एवज्झिस्स सवनं अत्तनो, परेसञ्च सम्मापटिपत्तिया पच्चयभावतो महप्फलं भविस्सतीति। सब्बेसन्ति सब्बेसम्पि दसन्नं पुज्जकिरियवत्थूनं। नियमलक्खणन्ति महप्फलभावस्स नियामकसभावं। दिट्ठिया उजुभावेनेवाति “अत्थि, नत्थी”ति अन्तद्वयस्स दुरसमुस्सारितताय “अत्थि दिन्न”न्तिआदि (म० नि० २.९४; ३.१३६; विभ० ७९३) नयप्पवत्ताय सम्मादिट्ठिया उजुकमेव पवत्तिया। दानादीसु हि यं किञ्चि इमाय एव सम्मादिट्ठिया परिसोधितं महाजुतिकं महाविष्कारं भवति।

पुरिमेहेव तीहीति पाळियं आगतेहेव तीहि। सीलमये पुज्जकिरियवत्थुमिह सङ्गहं गच्छन्ति चारित्तसीलभावतो। दानमये सङ्गहं गच्छन्ति दानसभावत्ता, दानविसयत्ता च। कामं देसना धम्मदानसभावतो दानमये सङ्गहं गच्छतीति वत्तुं युत्ता, कुसलधम्मासेवनभावतो पन विमुत्तायतनसीसे ठत्वा पवत्तिता विय सवनेन सङ्गि भावनामये सङ्गहं गच्छन्तीति वुत्तं। “दिट्ठिजुगतं भावनामये”ति केचि। दिट्ठिजुगते एव च अत्तना कतस्स पुज्जस्स अनुस्सरणं, तस्स च परेसं अत्थाय परिणामनं, गुणपसंसा, अज्जेहि करियमानाय पुज्जकिरियाय, सम्मापटिपत्तिया च अनुमोदनं सरणगमनन्ति एवं आदयो पुज्जविसेसा सङ्गहं गच्छन्ति दिट्ठिजुकम्मवसेनेव तेसं इज्झनतो।

परस्स पटिपत्तिया सोधनत्थो अनुयोगो चोदना, सा यानि निस्साय पवत्तति, तानि चोदनावत्थूनि दिट्ठसुतपरिसङ्कितानि। तेनाह “चोदनाकारणानी”ति। दिट्ठेनाति च हेतुमिह करणवचनं, दिट्ठेन हेतुनाति अत्थो। किं पन तं दिट्ठन्ति आह “वीतिक्कम”न्ति। दिस्वाति च दस्सनहेतूति अयमेत्थ अत्थो यथा “पज्जाय चस्स दिस्वा”ति। “सुतेना”तिआदीसुपि इमिना नयेन अत्थो वेदितब्बो। परस्साति परतो, परस्स वा वचनं सुत्वा। दिट्ठपरिसङ्कितेनाति दिट्ठानुगतेन परिसङ्कितेन, तथा परिसङ्कितेन वा वीतिक्कमेन। सेसपदद्वयेपि एसेव नयो। चोदेति वत्थुसन्दस्सनेन वा संवासप्पटिक्खेपेन वा सामीचिप्पटिक्खेपेन वा। इमस्मिं पन अत्थे वित्थारियमाने अतिप्पपज्जो होतीति आह “अयमेत्थ सङ्केपो”ति। वित्थारं पन इच्छन्तानं तस्स अधिगमुपायं दस्सेन्तो “वित्थारो पन...पे०... वेदितब्बो”ति आह।

कामूपपत्तियोति कामेहि उपपन्नता, समन्नागतताति अत्थो। समन्नागमो च तेसं पटिसेवनं, समधिगमो चाति आह “कामूपसेवना कामपटिलाभा वा”ति। पच्चुपट्ठितकामाति दुतियततियरासीनं विय सयं, परेहि च अनिम्मिता। उट्ठानकम्मफलूपजीविभावतो पन तदुभयवसेन पच्चुपट्ठिता कामा एतेसन्ति पच्चुपट्ठितकामा। ते पन तेसं येभ्य्येन निबद्धानि होन्तीति “निबद्धकामा”ति वुत्तं। चतुदेवलोकवासिनोति चातुमहाराजिकतो पट्ठाय याव तुसिता देवा। विनिपातिकाति आपायिका। परनिम्मिता कामा एतेसन्ति परनिम्मितकामा।

पकतिसेवनवसेनाति अनुमानतो जाननं वदति, न पच्चक्खतो । वसं वत्तेन्तीति यथारुचि पातब्यतं आपज्जन्ति । “मेथुनं पटिसेवन्ती”ति इदं पन केचिवादपटिसेधनत्थं वुत्तं । तेनाह “केचि पना”तिआदि । ते “यामानं अज्जमज्जं आलिङ्गितमत्तेन, तुसितानं हत्थामसनमत्तेन, निम्मानरतीनं हसितमत्तेन, परनिम्मितवसवत्तीनं ओलोकितमत्तेन कामकिच्चं इज्झती”ति वदन्ति । “इतरेसं द्विन्नं द्वयंद्वयसमापत्तिया वा”ति वदन्ति तादिसस्स कामेसु विरज्जनस्स तेसु अभावतो, कामानञ्च उत्तरुत्तरि पणीतपणीततरपणीततमभावतो । केवलं पन निस्सन्दाभावो तेसं वत्तब्बो । कामकिच्चन्ति तद्धुणिकपरिळाहूपसमावहं फस्ससुखं । कामाति कामूपभोगा । पाकतिका एवाति हेट्ठिमेहि एकसदिसा एव । एकसङ्घातन्ति एकरूपं समानरूपन्ति, समज्जातं समानभावन्ति वा अत्थो ।

सुखपटिलाभाति सुखसमधिगमा । हेट्ठाति पठमज्झानभूमितो हेट्ठा मनुस्सेसु, देवेसु वा । पठमज्झानसुखन्ति कुसलपठमज्झानं । भूमिवसेनपि हेट्ठुपरिभावो लब्भतेव ब्रह्मकायिकेसु, ब्रह्मपुरोहितेसु वा कुसलज्झानं निब्बत्तेत्वा ब्रह्मपुरोहितेसु, महाब्रह्मेसु वा विपाकसुखानुभवनस्स लब्भनतो । एत्थ च दुतियततियज्झानभूमिवसेन दुतियततियसुखूपपत्तीनं वुच्चमानत्ता पठमज्झानभूमिवसेनेव पठमज्झानसुखूपपत्ति वुत्ता । तिन्ताति तेमिता, ज्ञानसुखेन चैव ज्ञानसमुद्धानपणीतरूपफुट्टकायेन च पणीता वित्ताति अत्थो । तेनेवाह “समन्ततो तिन्ता”तिआदि । यस्मा कुसलसुखतो विपाकसुखं सन्ततरताय पणीततरं बहुलञ्च पवत्तति, तस्मा वुत्तं “इदमपि विपाकज्झानसुखं एव सन्धाय वुत्त”न्ति । तेसन्ति आभस्सरानं । सप्पीतिकस्स सुखस्स अतिविय उळारभावतो तेन अज्झोत्थतचित्तानं भवलोभो महा उप्पज्जति । सन्तमेवाति वितक्कविचारसङ्खोभपीतिउब्बिलाविविगमेन अतिविय उपसन्तंयेव । तथा सन्तभावेनेव हि तं अत्तनो पच्चयेहि पधानभावं नीतताय “पणीत”न्ति वुच्चति । तेनाह “पणीतमेवा”ति । अतप्पकेन सुखपारमिप्पत्तेन सुखेन संयुत्ताय तुसाय पीतिया इता पवत्ताति तुसिता । यस्मा ते ततो उत्तरि सुखस्स अभावतो एव न पत्थेन्ति, तस्मा वुत्तं “ततो... पे०... सन्तुट्ठा हुत्वा”ति । ततियज्झानसुखन्ति ततियज्झानविपाकसुखं ।

सत्त अरियपज्जाति अट्टमकतो पट्टाय सत्तन्नं अरियानं तेसं तेसं आवेणिकपज्जा । ठपेत्वा लोकुत्तरं पज्जं अवसेसा पज्जा नाम । सब्बापि तेभूमिका पज्जा “सेक्खा”तिपि न वत्तब्बा, “असेक्खा”तिपि न वत्तब्बाति नेवसेक्खानासेक्खा, पृथुज्जनपज्जा ।

योगविहितेसूति पज्जाविहितेसु पज्जापरिणामितेसु उपायपज्जाय सम्पादितेसु । कम्मायतनेसूति एत्थ कम्ममेव कम्मायतनं, कम्मञ्च तं आयतनञ्च आजीवादीनन्ति वा कम्मायतनं । एस नयो सिप्पायतनेसुपि । तत्थ च दुविधं कम्मं हीनञ्च वट्ठिककम्मादि, उक्कट्टञ्च कसिवाणिज्जादि । सिप्पमि दुविधं हीनञ्च नळकारसिप्पादि, उक्कट्टञ्च मुद्दगणनादि । विज्जाव विज्जाट्ठानं, तं धम्मिकमेव नागमण्डलपरित्तफुधमनकमन्तसदिसं वेदितब्बं । तानि पनेतानि एकच्चे पण्डिता बोधिसत्तसदिसा मनुस्सानं फासुविहारं आकङ्खन्ता नेव अज्जेहि करियमानानि पस्सन्ति, न वा कतानि उग्गणहन्ति । न करोन्तानं सुणन्ति, अथ खो अत्तनो धम्मताय चिन्ताय करोन्ति । पज्जवन्तेहि अत्तनो धम्मताय चिन्ताय कतानिपि अज्जेहि उग्गणित्वा करोन्तेहि कतसदिसानेव होन्ति । कम्मस्सकतन्ति “इदं कम्मं सत्तानं सकं, इदं नो सक”न्ति एवं जाननजाणं । सच्चानुलोमिकन्ति विपस्सनाजाणं । तज्हि सच्चपटिवेधस्स अनुलोमनतो “सच्चानुलोमिक”न्ति वुच्चति । इदानीस्स पवत्तनाकारं दस्सेतुं “रूपं अनिच्चन्ति वा”तिआदि वुत्तं । तत्थ वा-सदेन अनियमत्थेन दुक्खानत्तलक्खणानिपि गहितानेवाति दट्ठब्बं नानन्तरियकभावतो । यज्हि अनिच्चं, तं दुक्खं । यं दुक्खं, तदनत्ताति [(सिज्जनतो) अधिकपाठो विय दिस्सति] । यं एवरूपन्ति यं एवं हेट्ठा निद्विडुसभावं । “अनुलोमिकं खन्ति”न्तिआदीनि पज्जावेवचनानि । सा हि हेट्ठा वुत्तानं कम्मायतनादीनं पज्जन्नं कारणानं अपच्चनीकदस्सनेन अनुलोमनतो, तथा सत्तानं हितचरियाय मग्गसच्चस्स,

परमत्थसच्चस्स च निब्बानस्स अविलोमनतो अनुलोमेतीति च **अनुलोमिका**। सब्बानिपि एतानि कारणानि खमति सहति ददुं सक्कोतीति **खन्ति**। पस्सतीति **दिट्ठि**। रोचेतीति **रुचि**। मुनातीति **मुति**। पेक्खतीति **पेक्खा**। ते च कम्मायतनादयो धम्मा निज्झायमाना एताय निज्झानं खमन्तीति **धम्मनिज्झानक्खन्ति**। परतो असुत्वा पटिलभतीति अज्जस्स उपदेसवचनं असुत्वा सयमेव चिन्तेन्तो पटिलभति। **अयं वुच्चतीति** अयं चिन्तामया पज्जा नाम वुच्चति। सा पनेसा अभिज्जातानं बोधिसत्तानमेव उप्पज्जति। तत्थापि सच्चानुलोमिकजाणं द्विन्नमेव बोधिसत्तानं अन्तिमभविकानं, सेसपज्जा सब्बेसम्पि पूरितपारमीनं महापज्जानं उप्पज्जति।

परतो सुत्वा पटिलभतीति कम्मायतनादीनि परेन करियमानानि, परेन कतानि वा दिस्वापि परस्स कथयमानस्स वचनं सुत्वापि आचरियसन्तिके उग्गहेत्वापि पटिलद्धा सब्बा परतो सुत्वा पटिलद्धनामाति वेदितब्बा। **समापन्नस्साति** समापत्तिसमङ्गिस्स, निदस्सनमत्तमेतं। विपस्सनामगपज्जा हि इध “भावनापज्जा”ति विसेसतो इच्छिताति।

आवुधं नाम पटिपक्खविमथनत्थं इच्छितब्बं, रागादिसदिसो च पटिपक्खो नत्थि, तस्स च विमथनं बुद्धवचनमेवाति “सुतमेव आवुधं”न्ति वत्वा “**तं अत्थतो तेपिटकं बुद्धवचनं**”न्ति आह। इदानीं तमत्थं विवरन्तो “तं ही”ति आदिं वत्वा “**सुतावुधो**”तिआदिना (अ० नि० ७.६७) सुत्तपदेन समत्थेति। तत्थ **अकुसलं पजहतीति** तदङ्गादिवसेन अकुसलं परिच्चजति। **कुसलं भावेतीति** समथविपस्सनादिकुसलं धम्मं उप्पादेति वड्ढेति च। **सुद्धं अत्तानं परिहरतीति** तेन अकुसलप्पहानेन, ताय च कुसलभावनाय रागादिसंकिलेसतो विसुद्धं अत्तभावं पवत्तेति।

विवेकटुकायानन्ति गणसङ्गणिकं वज्जेत्वा ततो अपकट्टितकायानं। स्वायं कायविवेको न केवलं एकाकीभावो, अथ खो पठमज्झानादि नेक्खम्मयोगतोति आह “**नेक्खम्माभिरतानं**”न्ति। **चित्तविवेकोति** किलेससङ्गणिकं पहाय ततो चित्तस्स विवित्तता। सा पन ज्ञानविमोक्खादीनं वसेन होतीति आह “**परिसुद्धचित्तानं परमवोदानप्पत्तानं**”न्ति। **उपधिविवेकोति** निब्बानं। तदधिगमेन हि पुगलस्स निरुपधिता। तेनाह “**निरुपधीनं पुगलानं**”न्ति, विसङ्खारगतानं अधिगतनिब्बानानं, फलसमापत्तिसमङ्गीनज्जाति अत्थो। सुतम्पि अवस्सयट्ठेनेव आवुधं वुत्तन्ति आह “**अयम्पी**”ति। तथा हि वुत्तं “**तज्हि निस्साया**”ति। कामज्चेत्थ सुतपविवेकापि पज्जावसेनेव यथाधिप्पेतआवुधत्तसाधका, पज्जा पन सुतेन, एकच्चपविवेकेन वा विनापि इधाधिप्पेतआवुधत्तसाधनीति ततो पज्जा सामत्थियदस्सनत्थं विसुं आवुधभावेन वुत्ता। तेनाह “**यस्स सा अत्थि, सो न कुतोची**”तिआदि।

नाज्जातं अविदितं धम्मन्ति अनमतगगे संसारवट्टे न अज्जातं अविदितं अमतधम्मं, चतुसच्चधम्ममेव वा जानिस्सामीति **पटिपन्नस्स** इमिना पुब्बाभोगेन **उप्पन्नं इन्द्रियं**। यं पाळियं सङ्गहवारे “नव इन्द्रियानि होन्ती”ति वुत्तं, तं पुब्बाभोगसिद्धं पवत्तिआकारविसेसं दीपेतुं वुत्तं, अत्थतो पन मग्गसम्मादिट्ठि एव साति आह “**सोतापत्तिमग्गजाणस्सेतं अधिवचनं**”न्ति। **अज्जिन्द्रियन्ति** आजाननकइन्द्रियं, पठममग्गेन जातमरियादं अनतिक्कमित्वा तेसंयेव तेन मग्गेन जातानं चतुसच्चधम्मानं जाननकइन्द्रियन्ति वुत्तं होति। तेनाह “**अज्जाभूतं आजाननभूतं इन्द्रियं**”न्ति। आजानातीति **अज्जो**, अज्जस्स भूतं, आजाननवसेन वा भूतन्ति **अज्जभूतं**। **अज्जातावीसूति** जानितब्बं चतुअरियसच्चं आजानित्वा ठितेसु। तेनाह “**जाननकिच्चपरियोसानप्पत्तेसू**”ति, परिज्जादिभेदस्स जाननकिच्चस्स परिनिट्ठानप्पत्तेसु।

मंसचक्खु चक्खुपसादोति मंसचक्खु नाम चतस्सो धातुयो, वण्णो, गन्धो, रसो, ओजा, सम्भवो, सण्ठानं, जीवितं, भावो, कायप्पसादो, चक्खुपसादोति एवं चुद्दससम्भारो मंसपिण्डो।

कसिणालोकं वट्टेत्वा तत्थ रूपदस्सनतो “दिब्बचक्खु आलोकनिस्सितं जाण”न्ति वुत्तं।
दिब्बचक्खुपञ्जाविनिमुत्ता एव लोकिपञ्जा पञ्जाचक्खूति अयमत्थो अवुत्तसिद्धो दिब्बचक्खुस्स विसुं गहितत्ताति वुत्तं
“पञ्जाचक्खु लोकिपञ्जा लोकिपञ्जा”ति।

अधिकं विसिट्ठं सीलन्ति अधिसीलं। सिक्खितब्बतोति आसेवितब्बतो। अधिसीलं नाम
अनवसेसकायिकवाचसिकसंवरभावतो, मग्गसीलस्स पदद्वानभावतो च। अधिचित्तं मग्गसमाधिस्स अधिद्वानभावतो।
अधिपञ्जा मग्गपञ्जाय अधिद्वानभावतो। इदानीं नेसं अधिसीलादिभावं कारणेन पटिपादेतुं “अनुप्पन्नेपि ही”तिआदि
वुत्तं। तत्थ अनुप्पन्नेति अप्पवत्ते। अधिसीलमेव निब्बानाधिगमस्स पच्चयभावतो। समापन्नाति एत्थ “निब्बानं
पत्थयन्तेना”ति पदं आनेत्वा सम्बन्धितब्बं।

“कल्याणकारी कल्याणं, पापकारी च पापकं।
अनुभोति द्वयम्पेतुं, अनुबन्धहि कारक”न्ति॥ (सं० नि० १.२५६)।

एवं अतीते, अनागते च वट्टमूलकदुक्खसल्लखणवसेन संवेगवत्थुताय विमुत्तिआकङ्खाय पच्चयभूता
कम्मस्सकतापञ्जा अधिपञ्जा”ति वदन्ति। लोकिपञ्जादीनं अधिसीलादिभावो परियायेनाति निप्परियायमेव तं दस्सेतुं
“सब्बं वा”तिआदि वुत्तं।

पञ्चद्वारिकायाति पञ्चद्वारेसु कायो फस्सादिधम्मसमूहो। कायो च सो भावितभावेन भावना चाति कायभावना
नाम। यस्मा खीणासवानं अग्गमग्गाधिगमनेन सब्बसंकिलेसा पहीनाति पहीनकालतो पट्टाय सब्बसो आसेवनाभावतो
नत्थि तेसं भाविनयापि चक्खुसोतविज्जेय्या धम्मा, पगेव काळका, तस्मा पञ्चद्वारिकाया सुभाविता एव होति। तेन वुत्तं
“खीणासवस्स हि... पे०... सुभाविता होती”ति। न अज्जेसं विय दुब्बला दुब्बलभावकरानं किलेसानं सब्बसो
पहीनत्ता।

विपस्सना दस्सनानुत्तरियं अनिच्चानुपस्सनादिवसेन सङ्खारानं सम्मदेव दस्सनतो। मग्गो पटिपदानुत्तरियं
तदुत्तरिपटिपदाय अभावतो। फलं विमुत्तानुत्तरियं अकुप्पभावतो। फलं वा दस्सनानुत्तरियं दिवसम्पि निब्बानं
पच्चक्खतो दिस्वा पवत्तनतो। निब्बानं विमुत्तानुत्तरियं सब्बसङ्गतविनिस्सटत्ता। दस्सन-सद्वं कम्मसाधनं गहेत्वा
निब्बानस्स दस्सनानुत्तरियता वुत्ताति दस्सेन्तो “ततो उत्तरहि दट्ठब्बं नाम नत्थी”ति आह। नत्थि इतो उत्तरन्ति
अनुत्तरं, अनुत्तरमेव अनुत्तरियन्ति आह “उत्तमं जेट्ठक”न्ति।

सेसोति वुत्तावसेसो पञ्चकनयेन, चतुक्कनयेन च तिविधो समाधि, इमिना एव च समाधित्तयापदेसेन सुत्तन्तेसुपि
पञ्चकनयो आगतो एवाति वेदितब्बं। तत्थ यं वत्तब्बं, तं परमत्थमज्जूसायं विसुद्धिमग्गसंवण्णनायं (विसुद्धि० टी०
१.३८) वुत्तमेव, तस्मा तत्थ वुत्तनयेनेव वेदितब्बं।

आगच्छति नामं एतस्माति आगमनं, ततो आगमनतो। सगुणतोति सरसतो। आरम्मणतोति आरम्मणधम्मतो।
अनत्ततो अभिनिविसित्वाति “सब्बे सङ्खारा अनत्ता”ति विपस्सनं पट्टपेत्वा। अनत्ततो दिस्वाति पठमं सङ्खारानं
“अनत्ता”ति अनत्तलक्खणं पटिविज्झित्वा। अनत्ततो वुट्ठातीति वुट्ठानगामिनिविपस्सनाय अनत्ताकारतो पवत्ताय
मग्गवुट्ठानं पापुणाति। असुज्जतत्तकारकानं किलेसानं अभावाति अत्ताभिनिवेसपच्चयानं दिट्ठेकद्वानं किलेसानं

विक्खम्भनतो विपस्सना सुज्जता नाम अत्तसुज्जताय याथावतो गहणतो । ननु एवं विपस्सनाय सगुणतो सुज्जता, न आगमनतोति निप्परियायतो नत्थीति? सच्चमेतं नामलाभे, न पन नामदानेति नायं दोसो । अथ वा सुत्तन्तकथा नाम परियायकथा, न अभिधम्मकथा विय निप्परियायाति भिय्योपि न कोचि दोसो ।

यस्मा सगुणतो, आरम्मणतो च नामलाभे सङ्करो होति एकस्सेव नामन्तरलाभसम्भवतो । आगमनतो पन नामलाभे सङ्करो नत्थि नामन्तरलाभाभावतो, असम्भवतो च, तस्मा “अपरो”ति आदि वुत्तं । निमित्तकारककिलेसाभावाति निच्चनिमित्तादिगाहकपच्चयानं किलेसानं विक्खम्भनतो । कामज्जायं विपस्सना निच्चनिमित्तादिं उग्घाटेन्ती पवत्तति, सङ्खारनिमित्तस्स पन अविस्सज्जनतो न निप्परियायतो अनिमित्तनामं लभतीति । परियायेन पनेतं वुत्तं । तथा हि निप्परियायदेसनत्ता अभिधम्मे मग्गस्स अनिमित्तनामं उद्धटं । सुत्ते च —

“अनिमित्तञ्च भावेहि, मानानुसयमुज्जह ।

ततो मानाभिसमया, उपसन्तो चरिस्ससी”ति ॥ (सु० नि० ३४४; सं० नि० १.२१२) ।

अनिमित्तपरियायो आगतो । पणिधिकारककिलेसाभावाति सुखपणिधिआदिपच्चयानं किलेसानं विक्खम्भनतो ।

रागादीहि सुज्जत्ताति समुच्छेदवसेन पजहनतो रागादीहि विवित्तता । रागादयो एव रागनिमित्तादीनि । पुरिमुप्पन्ना हि रागादयो परतो उप्पज्जनकरागादीनं कारणं होति । रागादयो एव तथा पणिधानस्स पच्चयभावतो रागपणिधिआदयो । निब्बानं विसङ्खारभावेनेव सब्बसङ्खारविनिस्सट्ता रागादीहि सुज्जं, रागादिनिमित्तपणिधिविरहितज्जाति दट्टुब्बं । एत्थ च सङ्खारुपेक्खा सानुलोमा वुट्ठानगामिनिविपस्सना, सा सुज्जतो विपस्सन्ती “सुज्जता”ति वुच्चति, दुक्खतो पस्सन्ती तण्हापणिधिसोसनतो “अप्पणिहिता”ति । सा मग्गाधिगमाय आगमनपटिपदाठाने ठत्वा मग्गस्स “सुज्जतं अनिमित्तं अप्पणिहित”न्ति नामं देति । आगमनतो च नामे लब्धे सगुणतो च आरम्मणतो च नामं सिद्धमेव होति, न पन सगुणारम्मणेहि नामलाभे सब्बत्थ आगमनतो नामं सिद्धं होतीति परिपुण्णनामसिद्धिहेतुत्ता, “सगुणारम्मणेहि सब्बेसम्पि नामत्तययोगो, न आगमनतो”ति ववत्थानकरत्ता च निप्परियायतो आगमनतोव नामलाभो पधानं, न इतरेहि, परियायतो पन तिधा नामलाभो इच्छितब्बोति अट्टकथायं “तिविधा कथा”ति आदिना अयं विचारो कतोति दट्टुब्बं ।

सुचिभावोति किलेसासुचिविगमेन सुद्धभावो असंकिलिडुभावो । तेनाह “तिण्णं सुचरितानं वसेन वेदितब्बो”ति ।

मुनिनो एतानीति मोनेय्यानि । येहि धम्मोहि उभयहितमुननतो मुनि नाम होति, ते एवं वुत्ताति आह “मुनिभावकरा मोनेय्यपटिपदा धम्मा”ति । तत्थ यस्मा कायेन अकत्तब्बस्स अकरणं, कत्तब्बस्स च करणं, “अत्थि इमस्मिं काये केसा”ति आदिना (दी० नि० २.३७७; म० नि० १.११०; ३.१५३; अ० नि० ६.२९; १०.६०; विभ० ३५६; खु० पा० ३.१; नेत्ति० ४७) कायसङ्खातस्स आरम्मणस्स जाननं, कायस्स च समुदयतो अत्थङ्गमतो अस्सादतो आदीनवतो निस्सरणतो च याथावतो परिजाननं, तथा परिजाननवसेन पवत्तो विपस्सनामग्गो, तेन च काये छन्दरागस्स पजहनं, कायसङ्खारं निरोधेत्वा पत्तब्बसमापत्ति चाति सब्बे एते कायमुखेन पवत्ता मोनेय्यपटिपदा धम्मा कायमोनेय्यं नाम । तस्मा तमत्थं दस्सेतुं “तिविधकायदुच्चरितस्स पहान”न्ति आदिना पाळि आगता । सेसद्वयेपि एसेव नयो । तत्थ चोपनवाचज्जेव सद्ववाचज्ज आरब्ध पवत्ता पज्जा वाचारम्मणे जाणं । तस्स वाचाय समुदयादितो परिजाननं वाचापरिज्जा । एकासीतिविधं लोकियचित्तं आरब्ध पवत्ताजाणं मनारम्मणे जाणं । तस्स समुदयादितो परिजाननं मनोपरिज्जाति अयमेव विसेसो ।

अयन्ति इतो सम्पत्तियोति आयो, कुसलानं धम्मानं अभिबुद्धीति आह “आयोति वुड्ढी”ति । अपेन्ति सम्पत्तियो एतेनाति अपायो, कुसलानं धम्मानं हानीति आह “अपायोति अवुड्ढी”ति । तस्स तस्साति आयस्स च अपायस्स च । कारणं उपायो उपेति उपगच्छति एतेन आयो, अपायो चाति । तत्थ दुविधा वुड्ढि अनत्थहानितो, अत्थुप्पत्तितो च, तथा अवुड्ढि अत्थहानितो, अनत्थुप्पत्तितो च । तेसं पजाननाति तेसं आयापायसज्जितानं यथावुत्तप्पभेदानं वुड्ढिअवुड्ढीनं याथावतो पजानना । कोसल्लं कुसलता निपुणता । तदुभयम्पि पाळिवसेनेव दस्सेतुं “वुत्तञ्हेत”न्तिआदि वुत्तं ।

तत्थ इदं वुच्चतीति या इमेसं अकुसलधम्मानं अनुप्पत्तिनिरोधेसु, कुसलधम्मानञ्च उप्पत्तिभिय्योभावेसु पज्जा, इदं आयकोसल्लं नाम वुच्चति । इदानी अपायकोसल्लम्पि पाळिवसेनेव दस्सेतुं “तत्थ कतम”न्तिआदि वुत्तं । तत्थ इदं वुच्चतीति या इमेसं कुसलधम्मानं अनुप्पज्जननिरुज्झनेसु, अकुसलधम्मानञ्च उप्पत्तिभिय्योभावेसु पज्जा, इदं अपायकोसल्लं नाम वुच्चतीति । एत्थाह आयकोसल्लं ताव पज्जा होतु, अपायकोसल्लं कथं पज्जा नाम जाताति एवं मज्जति “अपायुप्पादनसमत्थता अपायकोसल्लं नामा”ति, तं पन तस्स मतिमत्तं । पज्जवा एव हि “मय्हं एवं मनसि करोतो अनुप्पन्ना कुसला धम्मा नुप्पज्जन्ति, उप्पन्ना निरुज्झन्ति । अनुप्पन्ना अकुसला धम्मा उप्पज्जन्ति, उप्पन्ना वड्ढन्ती”ति पजानाति, सो एवं जत्वा अनुप्पन्ने अकुसले धम्मे न उप्पादेति, उप्पन्ने पजहति । अनुप्पन्ने कुसले धम्मे उप्पादेति, उप्पन्ने भावनापारिपूरिं पापेति । एवं अपायकोसल्लम्पि पज्जा एवाति । सब्बापीति आयकोसल्लपक्खिकापि अपायकोसल्लपक्खिकापि । तत्तुपायाति तत्र तत्र करणीये उपायभूता ।

तस्स तिकिच्छनत्थन्ति अच्चायिकस्स किच्चस्स, भयस्स वा परिहरणत्थं ठानुप्पत्तियकारणजाननवसेनेवाति ठाने तङ्घणे एव उप्पत्ति एतस्स अत्थीति ठानुप्पत्तिकं, ठानसो उप्पज्जनककारणं, तस्स जाननवसेनेव ।

मज्जनाकारवसेन पवत्तमानाति अत्तनो वत्थुनो मदनीयताय मदस्स आपज्जनाकारेन पवत्तमाना उण्णतियो । निरोगोति अरोगो । मानकरणन्ति मानस्स उप्पादनं । योब्बने ठत्वाति योब्बने पतिट्ठाया, योब्बनं अपस्सायाति अत्थो । सब्बेसम्पि जीवितं नाम मरणपभङ्गुरं दुक्खानुबन्धञ्च, तदुभयं अनोलोकेत्वा, पबन्धट्ठितपच्चया सुलभतञ्च निस्साय उप्पज्जनकमदो जीवितमदोति दस्सेतुं “चिरं जीवि”न्तिआदि वुत्तं ।

अधिपति वुच्चति जेट्ठको, इस्सररोति अत्थो । ततो अधिपतितो आगतं आधिपतेय्यं । किं तं? पापस्स अकरणं । तेनाह “एत्तकोम्ही”तिआदि । तत्थ सीलादयो लोकिया एव दट्ठब्बा, तस्मा विमुत्तियाति लोकियविमुत्तिया । जेट्ठकन्ति इस्सरं, गरुन्ति अत्थो । एत्थ च अत्तानं, धम्मञ्च अधिपतिं कत्वा पापस्स अकरणं हिरिया वसेन वेदितब्बं । लोकं अधिपतिं कत्वा अकरणं ओत्तप्पस्स वसेन ।

कथावत्थूनीति कथाय पवत्तिट्ठानानि । यस्मा तेहि विना कथा नप्पवत्तति, तस्मा “कथाकारणानी”ति वुत्तं । अब्धान-सदस्स अत्थो हेट्ठा वुत्तो एव, सो पनत्थतो धम्मप्पवत्तिमत्तं । धम्मा चेत्थ खन्धा एव, तब्बिनिमुत्ता च तेसं गति नत्थीति आह “अतीतं धम्मं, अतीतक्खन्धेति अत्थो”ति । अयञ्च अब्धा नाम दिसादि विय अत्थतो धम्मप्पवत्तिं उपादाय पज्जत्तिमत्तं, न उपादा न भूतधम्मोति तमत्थं दस्सेतुं “अपिचा”तिआदि वुत्तं ।

“तमविज्जनट्ठेन विदितकरणट्ठेना”ति सङ्खेपतो वुत्तमत्थं विवरितुं “पुब्बेनिवासा”तिआदि वुत्तं । पुब्बेनिवासन्ति पुब्बे निवुत्थक्खन्धे । तमन्ति मोहतमं । विज्झतीति विहनति, पजहतीति अत्थो । तेनेव च पटिच्छादकतमविज्जनेन पुब्बेनिवासञ्च विदितं पाकटं करोतीति विज्जाति । तन्ति चुतूपपातं ।

उपपत्तिदेवविसेसभावावहो विहारोति कत्वा दिब्बो विहारो। ननु एवं अञ्जमञ्जानम्पि दिब्बविहारभावो आपज्जतीति? न तासं सत्तेसु हितूपसंहारादिवसेन पवत्तिया सविसेसं निदोसट्ठेन, सेट्ठेन च ब्रह्मविहारसमञ्जाय निरुद्धभावतो। सुविसुद्धितो पटिपक्खसमुच्छिन्दनवसेन अरणीयतो पत्तब्बतो, अरियभावप्पत्तिया वा अनन्तरं अरियो। अरियानं अयन्ति वा अरियो विहारो।

सेसं हेट्ठा वुत्तनयमेव।

तिकवण्णना निट्ठिता।

चतुक्कवण्णना

३०६. पुब्बेति हेट्ठा महासतिपट्ठानवण्णनायं।

यो छन्दोति यो छन्दियनवसेन छन्दो। छन्दिकताति छन्दभावो, छन्दिकरणाकारो वा। कत्तुकम्यताति कत्तुकामता। कुसलोति छेको कोसल्लसम्भूतो। धम्मच्छन्दोति सभावच्छन्दो। अयज्हि छन्दो नाम तण्हाछन्दो, दिट्ठिछन्दो, वीरियछन्दो, धम्मच्छन्दोति बहुविधो। इध कत्तुकम्यताकुसलधम्मच्छन्दो अधिप्पेतो। छन्दं जनेतीति तं छन्दं उप्पादेति। तं पवत्तेन्तो हि जनेति नाम। वायामं करोतीति पयोगं परक्कमं करोति। वीरियं आरभतीति कायिकचेतसिकवीरियं पवत्तेति। चित्तं उपत्थम्भेतीति तेनेव सहजातवीरियेन चित्तं उक्खिपति। पदहतीति पधानं वीरियं करोति। पटिपाटिया पनेतानि पदानि उप्पादनासेवनाभावनाबहुलीकम्मसातच्चकिरियाहि योजेतब्बानि। वित्थारं परिहरन्तो “अयमेत्थ सङ्खेपो”तिआदिमाह।

छन्दं निस्सायाति “छन्दवतो चेतोसमाधि होति, मय्हं एवं होती”ति एवं छन्दं निस्साय छन्दं धुरं जेट्ठकं पुब्बङ्गमं कत्वा पवत्तो समाधि छन्दसमाधि। पधानभूताति पधानजाता, पधानभावं वा पत्ता। सङ्खाराति चतुकिच्चसाधकं सम्मप्यधानवीरियं वदति। तेहि धम्मेहीति यथावुत्तसमाधिवीरियेहि उपेतं सम्पयुत्तं। इद्धिया पादन्ति निष्फत्तिपरियायेन इज्झनट्ठेन, इज्झन्ति एताय सत्ता इद्धा वुद्धा उक्कंसगता होन्तीति इमिना वा परियायेन “इद्धी”ति सङ्ख्यं गतानं उपचारज्झानादिकुसलचित्तसम्पयुत्तानं छन्दसमाधिपधानसङ्खारानं अधिट्ठानट्ठेन पादभूतं। यस्मा पुरिमा इद्धि पच्छिमाय इद्धिया पादो पादकं पदट्ठानं होति, तस्मा “इद्धिभूतं वा पाद”न्ति च वुत्तं। सेसेसुपीति दुतियइद्धिपादादीसु। कामज्जेत्थ जनवसभसुत्तेपि इद्धिपादविचारो आगतो, सोपि सङ्खेपतो एवाति आह “वित्थारो पन...पे०... दीपितो”ति।

३०७. दिट्ठधम्मो वुच्चति पच्चक्खभूतो अत्तभावोति आह “इमस्मियेव अत्तभावे”ति। सुखविहारत्थायाति निक्किलेसताय निरामिसेन सुखेन विहरणत्थाय। फलसमापत्तिज्ञानानीति चत्तारिपि फलसमापत्तिज्ञानानि। अपरभागेति आसवक्खयाधिगमतो अपरभागे। निब्बत्तितज्झानानीति अधिगतरूपारूपज्झानानि।

सूरियचन्दपज्जोतमणिआदीनन्ति पज्जोतग्गहणेन पदीपं वदति। आदि-सट्ठेन उक्काविज्जुलतादीनं सङ्गहो। आलोकोति मनसि करोतीति सूरियचन्दालोकादिं दिवा, रत्तिञ्च उपलब्धं यथालब्धवसेनेव मनसि करोति चित्ते ठपेति। तथाव नं मनसि करोति, यथास्स सुभावितालोककसिणस्स विय कसिणालोको यदिच्छकं यावदिच्छकं। सो आलोको रत्तियं उपतिट्ठति, येन तत्थ दिवासज्जं ठपेति दिवा विय विगतथिनमिद्धो होति। तेनाह “यथा दिवा तथा रत्ति”न्ति। यथा रत्तिं आलोको दिट्ठोति यथा रत्तिया चन्दालोकादिआलोको दिट्ठो उपलब्धो। एवमेव दिवा मनसि करोतीति रत्तिं दिट्ठाकारेनेव दिवा तं आलोकं मनसि करोति चित्ते ठपेति। अपिहितेनाति थिनमिद्धपिधानेन न पिहितेन। अनद्धेनाति

असञ्छादितेन । सओभासन्ति सजाणोभासं । थिनमिद्धविनोदनआलोकोपि वा होतु कसिणालोकोपि वा परिकम्मालोकोपि वा, उपक्किलेसालोको विय सब्बायं आलोको जाणसमुद्धानो वाति । जाणदस्सनपटिलाभत्थायाति दिब्बचक्खुजाणपटिलाभत्थाय । दिब्बचक्खुजाणहि रूपगतस्स दिब्बस्स, इतरस्स च दस्सनट्टेन इध “जाणदस्सन”न्ति अधिप्पेतं । “आलोकसज्जं मनसि करोती”ति एत्थ वुत्तआलोको थिनमिद्धविनोदनआलोको । परिकम्मआलोकोति दिब्बचक्खुजाणाय परिकम्मकरणवसेन पवत्तितआलोको । तत्थ पुरिमस्स वसेन “खीणासवस्सा”ति विसेसेत्वा वुत्तं । तस्स हि थिनमिद्धं सुप्पहीनं होति, न अज्जेसं । दुतियस्स वसेन “तस्मिं वा आगतेपी”तिआदि वुत्तं । तत्थ तस्मिन्ति दिब्बचक्खुजाणे । आगतेपीति पटिलद्धेपि । अनागतेपीति अप्पटिलद्धेपि । यस्मा तथारूपस्स पादकज्झानस्सेव वसेन परिकम्मआलोकस्स सम्भवो, यतो तं परिसुद्धपरियोदाततादिगुणविसेसुपसंहितं, तस्मा आह “पादक...पे... भावेतीति वुत्त”न्ति ।

सत्तट्टानिकस्साति “अभिवक्कन्ते पटिक्कन्ते सम्पजानकारी होती”तिआदिना (दी० नि० १.२१४; २.६९; म० नि० १.१०२) वुत्तस्स सत्तट्टानिकस्स । सतिपि सेक्खानं परिज्जातभावे एकन्ततो परिज्जातवत्थुका नाम अरहन्तो एवाति वुत्तं “खीणासवस्स वत्थु विदितं होती”तिआदि । वत्थारम्मणविदिततायाति वत्थुनो, आरम्मणस्स च याथावतो विदितभावेन । यथा हि सप्पपरियेसनं चरन्तेन तस्स आसये विदिते सोपि विदितो एव च होति मन्तागदबलेन तस्स गहणस्स सुकरत्ता, एवं वेदनाय आसयभूते वत्थुम्हि, आरम्मणे च विदिते आदिकम्मिकस्सपि वेदना विदिता एव होति सलक्खणतो, सामज्जलक्खणतो च तस्सा गहणस्स सुकरत्ता, पगेव परिज्जातवत्थुकस्स खीणासवस्स । तस्स हि उप्पादक्खणेपि ठितिक्खणेपि भङ्गक्खणेपि वेदना विदिता पाकटा होन्ति । तेनाह “एवं वेदना उप्पज्जन्ती”तिआदि । निदस्सनमत्तज्जेतं, यदिदं पाळियं वेदनासज्जावितक्कगहणन्ति दस्सेन्तो “न केवल”न्तिआदिमाह, तेन अवसेसतो सब्बधम्मानम्पि उप्पादादितो विदितभावं दस्सेति ।

इदानीं न केवलं खणतो एव, अथ खो पच्चयतोपि अनिच्चादितोपि न केवलं खीणासवानंयेव वसेन, अथ खो एकच्चानं सेक्खानम्पि वसेन वेदनादीनं विदितभावं दस्सेतुं “अपिचा”तिआदि वुत्तं । तत्थ अविज्जासमुदयाति अविज्जाय उप्पादा, अत्थिभावाति अत्थो । निरोधविरोधी हि उप्पादो अत्थिभाववाचकोपि होतीति तस्मा पुरिमभवसिद्धाय अविज्जाय सति इमस्मिं भवे वेदनाय उप्पादो होतीति अत्थो । अविज्जादीहि अतीतकालिकादीहि तेसं सहकारणभूतानि उप्पादादीनिपि गहितानेवाति वेदितब्बं । वेदनाय पवत्तिपच्चयेसु फस्सस्स बलवभावतो सो एव गहितो “फस्ससमुदया”ति । तस्मिं पन गहिते पवत्तिपच्चयतासामज्जेन वत्थारम्मणादीनिपि गहितानेव होन्तीति सब्बस्सापि वेदनाय अनवसेसतो पच्चयतो उदयदस्सनं विभावितन्ति दट्टब्बं । “निब्बत्तिलक्खण”न्तिआदिना खणवसेन उदयदस्सनमाह । उप्पज्जति एतस्माति उप्पादो, उप्पज्जनं उप्पादोति पच्चयलक्खणं, खणलक्खणज्ज उभयं एकज्झं गहेत्वा आह “एवं वेदनाय उप्पादो विदितो होती”ति ।

अनिच्चतो मनसि करोतीति वेदना नामायं अनच्चन्तिकताय आदिअन्तवती उदयब्बयपरिच्छिन्ना खणभङ्गुरा तावकालिका, तस्मा “अनिच्चा”ति अनिच्चतो मनसि करोतो । तस्सा खयतो, वयतो च उपट्टानं विदितं पाकटं होति । दुक्खतो मनसि करोतीति अनिच्चत्ता एव वेदना उदयब्बयपटिपीळितताय, दुक्खमताय, दुक्खवत्थुताय च “दुक्खा”ति मनसि करोतो भयतो भायितब्बतो तस्सा उपट्टानं विदितं पाकटं होतीति । तथा अनिच्चत्ता, दुक्खत्ता एव च वेदना अत्तरहिता असारा निस्सारा अवसवत्तिनी तुच्छाति वेदनं अनत्ततो मनसि करोतो सुज्जतो रिक्ततो असामिकतो उपट्टानं विदितं पाकटं होति । “खयतो”तिआदि वुत्तस्सेव अत्थस्स निगमनं । तस्मा वेदनं खयतो भयतो सुज्जतो जानातीति

अथवसेन विभक्तिपरिणामो वेदितव्यो । अविज्जानिरोधा वेदनानिरोधोति अगमगगेन अविज्जाय अनुप्पादनरोधतो वेदनाय अनुप्पादनरोधो होति पच्चयाभावे अभावतो । सेसं समुदयवारे वुत्तनयानुसारेन वेदितव्यं । इध समाधिभावनाति सिखाप्पत्ता अरियानं विपस्सनासमाधिभावना । तस्सा पादकभूता ज्ञानसमापत्ति वेदितव्या ।

वुत्तनयमेव महापदाने (दी० नि० २.६२) ।

३०८. पमाणं अगगहेत्वाति असुभभावना विय पदेसं अगगहेत्वा । एकस्मिम्पि सत्ते पमाणागगहणेन अनवसेसफरणेन । नत्थि एतासं गहेतव्यं पमाणन्ति हि **अप्पमाणा**, अप्पमाणा एव **अप्पमज्जा** ।

अपस्सयितव्वट्टेन **अपस्सेनानि**, इध भिक्खु यानि अपस्साय तिस्सो सिक्खा सिक्खितुं समत्थो होति, तेसमेव अधिवचनं । तानि पनेतानि पच्चयानं सङ्घाय सेविता अधिवासनक्खन्ति, वज्जनीयवज्जनं, विनोदेतव्वविनोदनञ्च । तेनाह “सङ्घायेकं अधिवासेती”ति आदि । तत्थ सम्मदेव खायति उपट्ठाति पटिभातीति **सङ्घा**, जाणन्ति आह “**सङ्घायाति जाणेना**”ति । सङ्घाय सेविता नाम यं सेवतो अकुसला धम्मा परिहायन्ति, कुसला धम्मा अभिवट्ठन्ति, तस्स सेवनाति आह “**सेवितव्वयुत्तकमेव सेवती**”ति । **अधिवासना**दीसुपि एसेव नयो । अन्तो पविसितुन्ति अब्भन्तरे अत्तनो चित्ते पवत्तितुं न देति ।

अरियवंसचतुक्कवण्णना

३०९. वंस-सद्वो “पिट्ठिवंसं अतिक्कमित्वा निसीदती”ति आदीसु द्विन्नं द्विन्नं गोपानसीनं सन्धानद्वाने ठपेतव्वदण्डके आगतो ।

“वंसो विसालोव यथा विसत्तो,
पुत्तेसु दारेसु च या अपेक्खा ।
वंसे कळीरोव असज्जमानो,
एको चरे खग्गविसाणकप्पो”ति आदीसु ॥ (अप० १.१.९४) ।

अकण्डके । “भेरिसद्वो मुदिङ्गसद्वो वंससद्वो कंसताळसद्वो”ति आदीसु तूरियविसेसे, यो “वेणू” तिपि वुच्चति । “अभिन्नेन पिट्ठिवंसेन मतो हत्थी”ति आदीसु हत्थिआदीनं पिट्ठिवेमज्जे पदेसे । “कुलवंसं ठपेस्सामी”ति आदीसु (दी० नि० ३.२६७) कुलवंसे । “वंसानुरक्खको पवेणीपालको”ति आदीसु (विसुद्धि० १.४२) गुणानुपुब्बियं गुणानं पबन्धप्पवत्तियं । इध पन चतुपच्चयसन्तोसभावनारामतासङ्घातगुणानं पबन्धे दट्ठव्वो । तस्स पन वंसस्स कुलन्वयं, गुणन्वयञ्च निदस्सनवसेन दस्सेतुं “**यथा ही**”ति आदि वुत्तं । तत्थ **खत्तियवंसो**ति खत्तियकुलन्वयो । एसेव नयो सेसपदेसुपि । **समणवंसो** पन समणतन्ति समणपवेणी । **मूलगन्धादीनन्ति आदि-**सद्वेन यथा सारगन्धादीनं सङ्गहो, एवमेत्थ गोरसादीनम्पि सङ्गहो दट्ठव्वो । दुतियेन पन **आदि-**सद्वेन कासिकवत्थसप्पिमण्डादीनं । **अरिय-**सद्वो अमिलक्खूसुपि मनुस्सेसु वत्तति, येसं पन निवासनद्वानं “अरियं आयतनं”न्ति वुच्चति । यथाह “यावता, आनन्द, अरियं आयतनं”न्ति (दी० नि० २.१५२; उदा० ७६) लोकियसाधुजनेसुपि “ये हि वो अरिया परिसुद्धकायकम्मन्ता... पे... तेसं अहं अज्जतरो”ति आदीसु (म० नि० १.३५) । इध पन ये “आरका किलेसेही”ति आदिना लद्धनिब्वचना पटिविद्धअरियसच्चा, ते एव अधिप्पेताति दस्सेतुं “के पन ते अरिया”ति पुच्छं कत्वा “**अरिया वुच्चन्ती**”ति आदि वुत्तं ।

तत्थ ये महापणिधानकप्पतो पट्टाय यावायं कप्पो, एत्थन्तरे उप्पन्ना सम्मासम्बुद्धा, ते ताव सरूपतो दस्सेत्वा तदञ्जेपि सम्मासम्बुद्धे, पच्चेकबुद्धे, बुद्धसावके च सङ्गहेत्वा अनवसेसतो अरिये दस्सेतुं “अपिचा”तिआदि वुत्तं। तत्थ याव सासनं न अन्तरधायति, ताव सत्था धरति एव नामाति इममेव भगवन्तं, ये चेतरोहि बुद्धसावका, ते च सन्धाय पच्चुप्पन्नगगहणं। तस्मिं तस्मिं वा काले ते ते पच्चुप्पन्नाति चे, अतीतानागतगगहणं न कत्तब्बं सिया। इदानी यथा भगवा “धम्मं वो, भिक्खवे, देसेस्सामि आदिकल्याणं मज्जेकल्याणं परियोसानकल्याणं सात्थं सब्बज्जनं केवलपरिपुण्णं परिसुद्धं ब्रह्मचरियं पकासेस्सामि, यदिदं छच्छकानी”ति छक्कदेसनाय (म० नि० ३.४२०) अट्ठहि पदेहि वण्णं अभासि, एवं महाअरियवंसदेसनाय अरियानं वंसानं “चत्तारोमे, भिक्खवे, अरियवंसा अगगज्जा रत्तज्जा वंसज्जा पोराणा असंकिण्णा असंकिण्णपुब्बा न सङ्कीयन्ति न सङ्कीयिस्सन्ति अप्पटिकुट्टा समणेहि ब्राह्मणेहि विज्जूही”ति (अ० नि० ४.२८) येहि नवहि पदेहि वण्णं अभासि, तानि ताव आनेत्वा थोमनावसेनेव वण्णेन्तो “ते खो पनेते”तिआदिमाह। अग्गाति जानितब्बा सब्बवंसेहि सेट्टुभावतो, सेट्टुभावसाधनतो च। दीधरत्तं पवत्ताति जानितब्बा रत्तज्जूहि, बुद्धादीहि तेहि च तथा अनुट्ठितत्ता। वंसाति जानितब्बा बुद्धादीनं अरियानं वंसाति जानितब्बा। पोराणाति पुरातना। न अधुनुप्पत्तिकाति न अधुनातना। असंकिण्णाति न खित्ता न छट्ठिता। तेनाह “अनपनीता”ति। न अपनीतपुब्बाति न छट्ठितपुब्बा तिस्सन्नं सिक्खानं परिपूरणूपायभावतो न परिचत्तपुब्बा। ततो एव इदानीपि न अपनीयन्ति, अनागतेपि न अपनीयिस्सन्ति। ये धम्मसभावस्स विजाननेव विज्जू समितपापसमणा चेव बाहितपापब्राह्मणा च, तेहि अप्पटिकुट्टा अप्पटिक्खित्ता। ये हि न पटिक्कोसितब्बा, ते अनिन्दितब्बा अगरहितब्बा। अपरिचजितब्बताय अप्पटिक्खित्ता होन्तीति।

सन्तुट्ठोति एत्थ यथाधिप्पेतसन्तोसमेव दस्सेन्तो “पच्चयसन्तोसवसेन सन्तुट्ठो”ति वुत्तं। ज्ञानविपस्सनादिवसेनपि इध भिक्खुनो सन्तुट्ठता होतीति। इतरीतरेनाति इतरेन इतरेन। इतर-सद्दोयं अनियमवचनो, द्विक्खत्तुं वुच्चमानो यंकिञ्चि-सद्देहि समानत्थो होतीति वुत्तं “येन केनची”ति। स्वायं अनियमवाचिताय एव यथा थूलादीनं अज्जतरवचनो, एवं यथालब्धादीनमपि अज्जतरवचनोति तत्थ दुतियपक्खस्सेव इध इच्छितभावं दस्सेन्तो “अथ खो”तिआदिमाह। ननु च यथालब्धादयोपि थूलादयो एव? सच्चमेतं, तथापि अत्थि विसेसो। यो हि यथालब्धेसु थूलादीसु सन्तोसो, सो यथालाभसन्तोसो एव, न इतरो। न हि सो पच्चयमत्तसन्निस्सयो इच्छितो, अथ खो अत्तनो कायबलसारूप्यभावसन्निस्सयोपि। थूलदुकादयो च तयोपि चीवरे लब्धन्ति। मज्झिमो चतुपच्चयसाधारणो, पच्छिमो पन चीवरे, सेनासने च लब्धन्तीति दट्ठब्बं। “इमे तयो सन्तोसे”ति इदं सब्बसङ्गाहिकवसेन वुत्तं। ये हि परतो गिलानपच्चयं पिण्डपाते एव पक्खित्त्वा चीवरे वीसति, पिण्डपाते पन्नरस, सेनासने पन्नरसाति समपण्णाससन्तोसा वुच्चन्ति, ते सब्बेपि यथारहं इमेसु एव तीसु सन्तोसेसु सङ्गहं समोसरणं गच्छन्तीति।

चीवरं जानितब्बन्ति “इदं नाम चीवरं कप्पिय”न्ति जातितो चीवरं जानितब्बं। चीवरक्खेत्तन्ति चीवरस्स उप्पत्तिक्खेत्तं। पंसुकूलन्ति पंसुकूलचीवरं, पंसुकूललक्खणप्पत्तं चीवरं जानितब्बन्ति अत्थो। चीवरसन्तोसोति चीवरे लब्धमानो सब्बो सन्तोसो जानितब्बो। चीवरपटिसंयुत्तानि धुतङ्गानि जानितब्बानि, यानि तोसन्तो चीवरसन्तोसेन सम्मदेव सन्तुट्ठो होतीति। खोमकप्पासिककोसेय्यकम्बलसाणभङ्गानि खोमादीनि। तत्थ खोमं नाम खोमसुत्तेहि वायितं खोमपटचीवरं, तथा सेसानिपि। साणन्ति साणवाकसुत्तेहि कतचीवरं। भङ्गन्ति पन खोमसुत्तादीनि सब्बानि एकच्चानि वोमिस्सेत्वा कतचीवरं। “भङ्गमि वाकमयमेवा”ति केचि। छाति गणनपरिच्छेदो। यदि एवं इतो अज्जा वत्थजाति नत्थीति? नो नत्थि, सा पन एतेसं अनुलोमाति दस्सेतुं “दुकूलादीनी”तिआदि वुत्तं। आदि-सद्देन पट्टण्णं, सोमारपट्टं, चीनपट्टं, इद्धिजं, देवदिन्नन्ति एतेसं सङ्गहो। तत्थ दुकूलं साणस्स अनुलोमं वाकमयत्ता। पट्टण्णदेसे सज्जातवत्थं पट्टण्णं। “पट्टण्णं कोसेय्यविसेसो”ति हि अमरकोसे वुत्तं। सोमारदेसे, चीनदेसे च जातवत्थानि सोमारचीनपट्टानि। पट्टण्णादीनि

तीणि कोसेय्यस्स अनुलोमानि पाणकेहि कतसुत्तमयत्ता । इद्धिजं एहिभिक्षुनं पुज्जिद्धिया निब्बत्तं चीवरं, तं खोमादीनं अज्जरं होतीति तेसमेव अनुलोमज्ज । देवताहि दिन्नं चीवरं **देवदिन्नं**, तं कप्परुक्खे निब्बत्तं जालिनिया देवकज्जाय अनुरुद्धत्थेरस्स दिन्नवत्थसदिसं, तम्मि खोमादीनंयेव अनुलोमं होति तेसु अज्जरभावतो । **इमानीति** अन्तोगधावधारणवचनं, इमानि एवाति अत्थो । बुद्धादीनं परिभोगयोग्यताय **कप्पियचीवरानि** ।

इदानी अवधारणेन निवर्त्तितानि एकदेसेन दस्सेतुं “**कुसचीर**”न्तिआदि वुत्तं । तत्थ कुसतिणेहि, अज्जेहि वा तादिसेहि तिणेहि कतचीवरं **कुसचीरं** । पोतकीवाकादीहि वाकेहि कतचीवरं **वाकचीरं** । चतुक्कोणेहि, तिकोणेहि वा फलकेहि कतचीवरं **फलकचीरं** । मनुस्सानं केसेहि कतकम्बलं **केसकम्बलं** । चामरीवालअस्सवालादीहि कतं **वालकम्बलं** । मकचित्तन्तूहि वायितो **पोत्थको** । चम्मन्ति मिगचम्मादि यं किञ्चि चम्मं । उलूकपक्खेहि गन्थेत्वा कतचीवरं **उलूकपक्खं** । भुजतचादिमयं **रुक्खदुस्सं**, तिरीटकन्ति अत्थो । सुखुमतराहि लतावाकेहि वायितं **लतादुस्सं** । एकवाकेहि कतं **एकदुस्सं** । तथा **कदलिदुस्सं** । सुखुमेहि वेळुविलीवेहि कतं **वेळुदुस्सं** । **आदि-**सद्देन वक्कलादीनं सङ्गहो । **अकप्पियचीवरानि** तिथियद्धजभावतो ।

अटुन्नज्ज मातिकानं वसेनाति “सीमाय देति, कतिकाय देती”तिआदिना (महाव० ३७९) आगतानं अटुन्नं चीवरुप्पत्तिमातिकानं वसेन । चीवरानं पटिलाभक्खेत्तदस्सनत्थज्झि भगवता “अट्टिमा, भिक्खवे, मातिका”तिआदिना मातिका ठपिता । **मातिकाति** हि मातरो चीवरुप्पत्तिजनिकाति । **सोसानिकन्ति** सुसाने पतितकं । **पापणिकन्ति** आपणद्वारे पतितकं । **रथियन्ति** पुज्जत्थिकेहि वातपानन्तरेन रथिकाय छड्डितचोळकं । **सङ्कारकूटकन्ति** सङ्कारद्वारे छड्डितचोळकं । **सिनानन्ति** न्हाणचोळं, यं भूतवेज्जेहि सीसं न्हापेत्वा “काळकण्णीचोळक”न्ति छड्डेत्वा गच्छन्ति । **तिथ्यन्ति** तित्थचोळकं सिनानतित्थे छड्डितपिलोतिका । **अग्गिदड्डन्ति** अग्गिना दड्डप्पदेसं । तज्झि मनुस्सा छड्डेन्ति । **गोखायितकादीनि** पाकटानेव । तानिपि हि मनुस्सा छड्डेन्ति ।

धजं उस्सापेत्वाति नावं आरोहन्तेहि वा युद्धं पविसन्तेहि वा धजयट्ठिं उस्सापेत्वा तत्थ बद्धं पारुतचीवरं, तेहि छड्डितन्ति अधिप्पायो ।

सादकभिक्षुनाति गहपतिचीवरस्स सादियनभिक्षुना । **एकमासमत्तन्ति** चीवरमाससज्जितं एकमासमत्तं । **वितक्केतुं वट्ठति**, न ततो परन्ति अधिप्पायो । सब्बस्सापि हि तण्हानिग्गहत्थाय सासने पटिपत्तीति । **पंसुकूलिको** **अद्धमासेनेव करोतीति** अपरपटिबद्धत्ता पटिलाभस्स । इतरस्स पन परपटिबद्धत्ता मासमत्तं अनुज्जातं । **इति मासद्ध...** **पे०...** **वितक्कसन्तोसो** वितक्कनस्स परिमितकालिकत्ता ।

महाथेरं तत्थ अत्तनो सहायं इच्छन्तोपि गरुगारवेन गामद्वारं “**भन्ते गमिस्सामि**” इच्चेवमाह । महाथेरोपिस्स अज्झासयं जत्वा “**अहं पावुसो गमिस्सामी**”ति आह । “इमस्स भिक्षुनो वितक्कस्स अवसरो मा होतू”ति **पज्झं पुच्छमानो गामं पाविसि** । **उच्चारपलिबुद्धोति** उच्चारं पीळितो । तदा भगवतो दुक्करकिरियानुस्सरणमुखेन तथागते उप्पन्नपीतिसोमनस्सवेगस्स बलवभावेन किलेसानं विक्खम्भितत्ता **तस्मिंयेव...पे०...** **तीणि फलानि पत्तो** ।

“कत्थ लभिस्सामी”ति चिन्तनापि लाभासापुब्बिकाति तथा “**अचिन्तेत्वा**”ति वुत्तं, “सुन्दरं लभिस्सामि, मनापं लभिस्सामी”ति एवमादिचिन्तनाय का नाम कथा । कथं पन वत्तब्बन्ति आह “**कम्मट्ठानसीसेनेव गमन**”न्ति, तेन चीवरं पटिच्च किञ्चिपि न चिन्तेतब्बं एवाति दस्सेति ।

अपेसलो अप्पतिरूपायपि परियेसनाय पच्चयो भवेय्याति “पेसलं भिक्खुं गहेत्वा”ति वुत्तं ।

आहरियमानन्ति सुसानादीसु पतितकं वत्थं “इमे भिक्खू पंसुकूलपरियेसनं चरन्ती”ति जत्वा केनचि पुरिसेन ततो आनीयमानं ।

एवं लब्धं गणहन्तस्सापीति एवं पटिलाभसन्तोसं अकोपेत्वाव लब्धं गणहन्तस्सापि । अत्तनो पहोनकमत्तेनेवाति यथालब्धानं पंसुकूलवत्थानं एकपट्टदुपट्टानं अत्थाय अत्तनो पहोनकपमाणेनेव, अवधारणेन उपरिपच्चासं निवत्तेति ।

गामे भिक्खाय आहिण्डन्तेन सपदानचारिना विय द्वारपटिपाटिया चरणं लोलुप्पविवज्जनं नाम चीवरलोलुप्पस्स दूरसमुस्सारितत्ता ।

यापेतुन्ति अत्तभावं पवत्तेतुं ।

धोवनुपगेनाति धोवनयोगेन ।

पण्णानीति अम्बजम्बादिपण्णानि ।

अकोपेत्वाति सन्तोसं अकोपेत्वा । पहोनकनीहारेनेवाति अन्तरवासकादीसु यं कातुकामो, तस्स पहोनकनियामेनेव यथालब्धं थूलसुखुमादिं गहेत्वा करणं ।

तिमण्डलपटिच्छादनमत्तस्सेवाति “निवासनं चे नाभिमण्डलं; जाणुमण्डलं, इतरं चे गलवाटमण्डलं, जाणुमण्डल”न्ति एवं तिमण्डलपटिच्छादनमत्तस्सेव करणं; तं पन अत्थतो तिण्णं चीवरानं हेट्ठिमन्तेन वुत्तपरिमाणमेव होति ।

अविचारेत्वाति न विचारेत्वा ।

कुसिबन्धनकालेति मण्डलानि योजेत्वा सिब्बनकाले । सत्तवारेति सत्तसिब्बनवारे ।

कप्पबिन्दुअपदेसेन कस्सचि विकारस्स अकरणं कप्पसन्तोसो ।

सीतपटिघातादि अत्थापत्तितो सिज्झतीति मुख्यमेव चीवरपरिभोगे पयोजनं दस्सेतुं “हिरिकोपीनपटिच्छादनमत्तवसेना”ति वुत्तं । तेनाह भगवा “यावदेव हिरिकोपीनपटिच्छादनत्थ”न्ति (म० नि० १.२३; अ० नि० ६.६८; महानि० १६२) ।

वट्टति, न तावता सन्तोसो कुप्पति सम्भारानं, दक्खिण्येय्यानञ्च अलाभतो ।

सारणीयधम्मे ठत्वाति सीलवन्तेहि भिक्खूहि साधारणतो परिभोगे ठत्वा ।

“इती”तिआदिना पठमस्स अरियवंसस्स पंसुकूलिकङ्गतेचीवरिकङ्गानं, तेसञ्च तस्स पच्चयतं दस्सेन्तो इति इमे

धम्मा अज्जमज्जस्स समुद्वापका, उपत्थम्भका चाति दीपेति । एस नयो इतो परतोपि ।

“सन्तुट्ठो होति वण्णवादी”ति एत्थ चतुक्कोटिकं सम्भवति, तत्थ चतुत्थोयेव पक्खो सत्थारा वण्णितो थोमितोति महाथेरेन तथा देसना कता । **एको सन्तुट्ठो होति, सन्तोसस्स वण्णं न कथेति** सेय्यथापि थेरो नालको (सुत्तनिपाते नालकसुत्ते वित्थारो) **एको न सन्तुट्ठो होति, सन्तोसस्स वण्णवादी** सेय्यथापि उपनन्दो सक्कपुत्तो (पारा० ५१५, ५२७, ५३२, ५३७ वाक्यखन्धेसु वित्थारो) । **एको नेव सन्तुट्ठो होति, न सन्तोसस्स वण्णं कथेति** । सेय्यथापि थेरो लाळुदायी (थेरगा० अट्ठ० २.उदायित्थेरगाथावण्णना) **एको सन्तुट्ठो चेव होति, सन्तोसस्स च वण्णवादी** सेय्यथापि थेरो महाकस्सपो ।

अनेसनन्ति अयुत्तं एसनं । तेनाह “अप्पतिरूप”न्ति, सासने ठितानं न पतिरूपं असारूपं अयोग्यं । **कोहज्जं करोन्तोति** चीवररूपादनिमित्तं परेसं कुहनं विम्हापनं करोन्तो । **उत्तसतीति** तण्हासन्तासेन उपरूपरि तसति । **परितसतीति** परितो तसति । यथा सब्बे कायवचीपयोगा तदत्था एव जायन्ति, एवं सब्बभागेहि तसति । **गधितं** वुच्चति गद्धो, सो चेत्थ अभिज्झालकखणो अधिप्पेतो । गधितं एतस्स नत्थीति **अगधितोति** आह “अगधितो...पे०... लोभगिद्धो”ति । **मुच्छन्ति** तण्हावसेन मुह्नं, तस्स वा समुस्सयं अधिगतं । **अनापन्नो** अनुपगतो । **अनोत्थतोति** अनज्झोत्थतो । **अपरियोनद्धोति** तण्हाछदनेन अच्छादितो । **आदीनवं पस्समानोति** दिट्ठधम्मिकं, सम्परायिकञ्च दोसं पस्सन्तो । गधितपरिभोगतो निस्सरति एतेनाति **निस्सरणं**, इदमत्थिकता, तं पजानातीति **निस्सरणपज्जो** । तेनाह “यावदेव...पे०... पजानन्तो”ति ।

नेवत्तानुक्कंसेतीति अत्तानं नेव उक्कंसेति न उक्खिपति न उक्कट्ठतो दहति । “अह”न्तिआदि उक्कंसनाकारदस्सनं । **न वम्भेतीति** न हीळयति निहीनतो न दहति । **तस्मिं चीवरसन्तोसेति** तस्मिं यथावुत्ते वीसतिविधे चीवरसन्तोसे । कामज्चेत्थ वुत्तप्पकारसन्तोसगहणेन चीवरहेतु अनेसनापज्जनादिपि गहितमेव तस्मिं सति तस्स भावतो, असति च अभावतो, वण्णवादितानत्तुक्कंसना परवम्भनानि पन गहितानि न होन्तीति “**वण्णवादितादीसु वा**”ति विकप्पो वुत्तो । एत्थ च “**दक्खो**”तिआदि येसं धम्मानं वसेनस्स यथावुत्तसन्तोसादि इज्झति, तं दस्सनं । तत्थ “**दक्खो**”ति इमिना तेसं समुद्वापनपज्जं दस्सेति, “**अनलसो**”ति इमिना पग्गणहनवीरियं, “**सम्पजानो**”ति इमिना पाटिहारियपज्जं “**पटिस्सतो**”ति इमिना तत्थ असम्मोसवुत्तिं दस्सेति ।

पिण्डपातो जानितब्बोति पभेदतो पिण्डपातो जानितब्बो । **पिण्डपातक्खेत्तन्ति** पिण्डपातस्स उप्पत्तिट्ठानं । **पिण्डपातसन्तोसो जानितब्बोति** पिण्डपाते सन्तोसो पभेदतो जानितब्बो । इध भेसज्जम्पि पिण्डपातगतिकमेव । आहरितब्बतो हि सप्पिआदीनम्पि गहणं कतं ।

पिण्डपातक्खेत्तं पिण्डपातस्स उप्पत्तिट्ठानं । खेत्तं विय **खेत्तं** । उप्पज्जति एत्थ, एतेनाति च **उप्पत्तिट्ठानं** । सङ्गतो वा हि भिक्खुनो पिण्डपातो उप्पज्जति उद्देसादिवसेन वा । तत्थ सकलस्स सङ्गस्स दातब्बं भत्तं **सङ्गभत्तं** । कतिपये भिक्खू उद्दिसित्वा उद्देसेन दातब्बं भत्तं **उद्देसभत्तं** । निमन्तेत्वा दातब्बं भत्तं **निमन्तनं** । सलाकदानवसेन दातब्बं भत्तं **सलाकभत्तं** । एकस्मिं पक्खे एकदिवसं दातब्बं भत्तं **पक्खिकं** । उपोसथे दातब्बं भत्तं **उपोसथिकं** । पाटिपददिवसे दातब्बं भत्तं **पाटिपदिकं** । आगन्तुकानं दातब्बं भत्तं **आगन्तुकभत्तं** । धुरगेहे एव ठपेत्वा दातब्बं भत्तं **धुरभत्तं** । कुटिं उद्दिस्स दातब्बं भत्तं **कुटिभत्तं** । गामवासीआदीहि वारेन दातब्बं भत्तं **वारभत्तं** । विहारं उद्दिस्स दातब्बं भत्तं **विहारभत्तं** । सेसानि पाकटानेव ।

वितक्केति “कत्थ नु खो अहं अज्ज पिण्डाय चरिस्सामी”ति । “कत्थ पिण्डाय चरिस्सामा”ति थेरेन वुत्ते

“असुकगामे भन्ते”ति काममेतं पटिवचनदानं, येन पन चित्तेन “चिन्तेत्वा”ति वुत्तं, तं सन्धायाह “एत्तकं चिन्तेत्वा”ति । ततो पट्टायाति वितक्कमाळके ठत्वा वितक्कितकालतो पट्टाय । “ततो परं वितक्केन्तो अरियवंसा चुतो होती”ति इदं तिण्णम्पि अरियवंसिकानं वसेन गहेतब्बं, न एकचारिकस्सेव । सब्बोपि हि अरियवंसिको एकवारमेव वितक्केतुं लभति, न ततो परं । परिबाहिरोति अरियवंसिकभावतो बहिभूतो । स्वायं वितक्कसन्तोसो कम्मट्टानमनसिकारेन न कुप्पति, विसुज्झति च । इतो परेसुपि एसेव नयो । तेनेवाह “कम्मट्टानसीसेन गन्तब्ब”न्ति ।

गहेतब्बमेवाति अट्टानप्पयुत्तो एव-सद्धो । यापनमत्तमेव गहेतब्बन्ति योजेतब्बं ।

एत्थाति एतस्मिं पिण्डपातपटिगहणे । अप्पन्ति अत्तनो यापनपमाणतोपि अप्पं । गहेतब्बं दायकस्स चित्ताराधनत्थं । पमाणेनेवाति अत्तनो यापनपमाणेनेव अप्पं गहेतब्बं । “पमाणेन गहेतब्ब”न्ति एत्थ कारणं दस्सेतुं “पटिगहणस्मिञ्ही”तिआदि वुत्तं । मक्खेतीति विट्ठंसेति अपनेति । विनिपातेतीति विनासेति अट्टानविनियोगेन । सासनन्ति सत्थु सासनं अनुसिद्धिं । न करोति नप्पटिपज्जति ।

सपदानचारिनो विय द्वारपटिपाटिया चरणं लोलुप्पविवज्जनसन्तोसोति आह “द्वारपटिपाटिया गन्तब्ब”न्ति ।

हरापेत्वाति अधिकं अपनेत्वा ।

आहारगेधतो निस्सरति एतेनाति निस्सरणं । जिघच्छाय पटिविनोदनत्थं कथा, कायस्सठितिआदिपयोजनं पन अत्थापत्तितो आगतं एवाति आह “जिघच्छाय...पे०... सन्तोसो नामा”ति ।

निदहित्वा न परिभुज्जितब्बं तदहुपीति अधिप्पायो । इतरत्था पन सिक्खापदेनेव वारितं । सारणीयधम्मे ठितेनाति सीलवन्तेहि भिक्खूहि साधारणभोगिभावे ठितेन ।

सेनासनेनाति सयनेन, आसनेन च । यत्थ यत्थ हि मज्जादिके, विहारादिके च सेति, तं सेनं । यत्थ यत्थ पीठादिके आसति, तं आसनं । तदुभयं एकतो कत्वा “सेनासन”न्ति वुत्तं । तेनाह “मज्जो”तिआदि । तत्थ मज्जो मसारकादि, तथा पीठं । मज्जभिसि, पीठभिसीति दुविधा भिसि । विहारो पाकारपरिच्छिन्नो सकलो आवासो । “दीघमुखपासादो”ति केचि । अट्टयोगोति दीघपासादो । “एकपस्सच्छदनकसेनासन”न्ति केचि । पासादोति चतुरस्सपासादो । “आयतचतुरस्सपासादो”ति केचि । हम्मियं मुण्डच्छदनपासादो । गुहाति केवला पब्बतगुहा । लेणं द्वारबन्धं । अट्टो बहलभित्तिकं गेहं, यस्स गोपानसियो अग्गहेत्वा इट्ठकाहि एव छदनं होति । “अट्टालकाकारेन करियती”तिपि वदन्ति । माळो एककूटसङ्गहितो अनेककोणो पतिस्सयविसेसो “वट्टाकारेन कतसेनासन”न्ति केचि ।

पिण्डपाते वुत्तनयेनेवाति “सादको भिक्खु ‘अज्ज कत्थ वसिस्सामी’ति वितक्केती”तिआदिना यथारहं पिण्डपाते वुत्तनयेन वेदितब्बा, “ततो परं वितक्केन्तो अरियवंसा चुतो होति परिबाहिरो”ति, “सेनासनं गवेसन्तेनापि”कुहिं लभिस्सामी”ति अचिन्तेत्वा कम्मट्टानसीसेनेव गन्तब्ब”न्ति च एवमादि सब्बं पुरिमनयेनेव ।

कस्मा पनेत्थ पच्चयसन्तोसं दस्सेन्तेन महाथरेन गिलानपच्चयसन्तोसो न गहितोति? न खो पनेतं एवं दट्ठब्बन्ति दस्सेन्तो “गिलानपच्चयो पन पिण्डपाते एव पविट्ठो”ति आह, आहरितब्बतासामज्जेनाति अधिप्पायो । यदि एवं तत्थ पिण्डपाते विय वितक्कसन्तोसादयोपि पन्नरस सन्तोसा इच्छितब्बाति? नोति दस्सेन्तो आह “तत्था”तिआदि । ननु चेत्थ

द्वादसेव धुतङ्गानि विनियोगं गतानि, एकं पन नेसज्जिकङ्गं न कत्थचि विनियुत्तन्ति आह “**नेसज्जिकङ्गं भावनारामअरियवंसं भजती**”ति । अयञ्च अत्थो अट्ठकथारुळ्हो एवाति दस्सेन्तो “**वुत्तम्मि चेत**”न्ति आदिमाह ।

“**पथविं पत्थरमानो विया**”ति आदि अरियवंसदेसनाय सुदुक्करभावदस्सनं महाविसयताय तस्सा देसनाय । यस्मा नयसहस्सपटिमण्डिता होति अरियमग्गाधिगमाय वित्थारतो पवत्तियमाना देसना यथा तं चित्तुप्पादकण्डे, अयञ्च भावनारामअरियवंसकथा अरियमग्गाधिगमाय वित्थारतो पवत्तियमाना एवं होतीति वुत्तं “**सहस्सनयप्पटिमण्डितं... पे०... देसनं आरभी**”ति । पटिपक्खविधमनतो अभिमुखभावेन रमणं **आरमणं आरामो**ति आह “**अभिरतीति अत्थो**”ति । व्यधिकरणानम्मि पदानं वसेन भवति बाहिरत्थसमासो यथा “उरसिलोमो, कण्ठेकाळोति आह “**पहाने आरामो अस्साति पहानारामो**”ति । आरमितब्बट्टेन वा **आरामो**, पहानं आरामो अस्साति **पहानारामो**ति एवमेत्थ समासयोजना वेदितब्बा । “**पजहन्तो रमती**”ति एतेन पहानारामसद्धानं कत्तुसाधनत्वं, कम्मधारयसमासञ्च दस्सेति । “भावेन्तो रमती”ति वुत्तत्ता **भावनारामो**ति एत्थापि एसेव नयो ।

कामं “नेसज्जिकङ्गं भावनारामअरियवंसं भजती”ति वुत्तं भावनानुयोगस्स अनुच्छविकत्ता, नेसज्जिकङ्गवसेन पन नेसज्जिकस्स भिक्खुनो एकच्चाहि आपत्तीहि अनापत्तिभावोति तम्मि सङ्गणहन्तो “तेरसन्नं धुतङ्गान”न्ति वत्त्वा “विनयं पत्त्वा गरुके ठातब्ब”न्ति इच्छितत्ता सल्लेखस्स अपरिचचनवसेन पटिपत्ति नाम विनये ठितस्सेवाति आह “**तेरसन्नं... पे०... कथितं होती**”ति । कामं सुत्ताभिधम्मपिटकेसुपि (दी० नि० १.७.१९४; विभ० ५०८) तत्थ तत्थ सीलकथा आगता एव, येहि पन गुणेहि सीलस्स वोदानं होति, तेसु कथितेसु यथा सीलकथाबाहुल्लं विनयपिटकं कथितं होति, एवं भावनाकथाबाहुल्लं सुत्तन्तपिटकं, अभिधम्मपिटकञ्च चतुत्थेन अरियवंसेन कथितमेव होतीति वुत्तं “**भावनारामेन अवसेसं पिटकद्वयं कथितं होती**”ति । “सो नेक्खम्मं भावेन्तो रमती”ति नेक्खम्मपदं आदिं कत्त्वा तत्थ देसनाय पवत्तत्ता, सब्बेसम्मि वा समथविपस्सनामग्गधम्मानं यथासकंपटिपक्खतो निक्खमनेन नेक्खम्मसज्जितानं तत्थ आगतत्ता सो पाठो “**नेक्खम्मपाळी**”ति वुच्चतीति आह “**नेक्खम्मपाळिया कथेतब्बो**”ति । तेनाह अट्ठकथायं “सब्बेपि कुसला धम्मा नेक्खम्मन्ति पवुच्चरे”ति (इतिवु० अट्ठ० १०९) । **दसुत्तरसुत्तन्त परियायेना**ति दसुत्तरसुत्तन्तधम्मेन, दसुत्तरसुत्तन्ते (दी० नि० ३.३५०) आगतनयेनाति वा अत्थो । सेसद्वयेपि एसेव नयो ।

सोति जागरियं अनुयुत्तो भिक्खु । **नेक्खम्मन्ति** कामेहि निक्खन्तभावतो नेक्खम्मसज्जितं पठमज्झानूपचारं । “सो अभिज्झं लोके पहाया”ति आदिना (विभ० ५०८, ५३८) आगता पठमज्झानस्स पुब्बभागभावनाति इधाधिप्पेता, तस्मा “**अव्यापाद**”न्ति आदीसुपि एवमेव अत्थो वेदितब्बो । यं पनेत्थ वत्तब्बं, तं **ब्रह्मजालटीकायं** वुत्तनयेन वेदितब्बं । सउपायासानज्हि अट्ठन्नं समापत्तीनं, अट्ठारसन्नं महाविपस्सनानं, चतुन्नं अरियमग्गानञ्च वसेनेत्थ देसना पवत्ताति ।

“**एकं धम्मं भावेन्तो रमति, एकं धम्मं पजहन्तो रमती**”ति च न इदं दसुत्तरसुत्ते आगतनियामेन वुत्तं, तत्थ पन “एको धम्मो भावेतब्बो, एको धम्मो पहातब्बो”ति (दी० नि० ३.३५१) च देसना आगता । एवं सन्तेपि यस्मा अत्थतो भेदो नत्थि, तस्मा पटिसम्भिदामग्गे नेक्खम्मपाळियं (पटि० म० १.२४, ३.४१) आगतनीहारेनेव “एकं धम्मं भावेन्तो रमति, एकं धम्मं पजहन्तो रमती”ति वुत्तं । एस नयो सेसवारेसुपि । यस्मा चायं अरियवंसदेसना नाम सत्थु पञ्चत्ताव सत्थारा हि देसितं देसनं आयस्मा धम्मसेनापति सारिपुत्तत्थेरो सङ्गायनवसेन इधानेसि, तस्मा महाअरियवंससुत्ते सत्थुदेसनानीहारेन निगमनं दस्सेन्तो “**एवं खो, भिक्खवे, भिक्खु भावनारामो होती**”ति आह । एसेव नयो इतो परेसु **सतिपट्टानपरियायअभिधम्मनिद्देसपरियायेसुपि** । कामञ्चेत्थ कायानुपस्सनावसेनेव सङ्घिपित्वा योजना कता,

एकवीसतिया पन ठानानं वसेन वित्थारतो योजना वेदितब्बा । “अनिच्चतो” (विसुद्धि० टी० २.६९८) तिआदीसु यं वत्तब्बं, तं विसुद्धिमगगसंवण्णनासु वुत्तनयेन वेदितब्बं ।

३१०. संवरादीनं साधनवसेन पदहति एत्थ, एतेहीति च पधानानि । उत्तमवीरियानीति सेट्टुवीरियानि विसिद्धस्स अत्थस्स साधनतो । संवरन्तस्स उप्पन्नवीरियन्ति यथा अभिज्झादयो न उप्पज्जन्ति, एवं सतिया उपट्ठापने चक्खादीनं पिदहने अनलसस्स उप्पन्नवीरियं । पजहन्तस्साति विनोदेन्तस्स । उप्पन्नवीरियन्ति तस्सेव पजहनस्स साधनवसेन पवत्तवीरियं । भावेन्तस्स उप्पन्नवीरियन्ति एत्थापि एसेव नयो । समाधिनिमित्तन्ति समाधि एव । पुरिमुप्पन्नसमाधि हि परतो उप्पज्जनकसमाधिपविवेकस्स कारणं होतीति “समाधिनिमित्त”न्ति वुत्तं ।

उपधिविवेकत्ताति खन्धूपधिआदिउपधीहि विवित्तत्ता विनिस्सटत्ता । तं आगम्माति तं निब्बानं मग्गेन अधिगमहेतु । रागादयो विरज्जन्ति एत्थ, एतेनाति वा विरागो । एवं निरोधोपि दट्ठब्बो । यस्मा इध बोज्झङ्गा मिस्सकवसेन इच्छिता, तस्मा “आरम्मणवसेन अधिगन्तब्बवसेन वा”ति वुत्तं । तत्थ अधिगन्तब्बवसेनाति तंनिन्नतावसेन । वोस्सग्गपरिणामिन्ति वोस्सज्जनवसेन परिणामितं परिच्चजनवसेन चैव पक्खन्दनवसेन च परिणमनसीलं । तेनाह “द्वे वोस्सग्गा”तिआदि । खन्धानं परिच्चजनं नाम तप्पटिबद्धकिलेसप्पहानवसेनाति येनाकारेण विपस्सना किलेसे पजहति, तेनेवाकारेण तंनिमित्तके, खन्धे च “पजहती”ति वत्तब्बतं अरहतीति आह “विपस्सना...पे०... परिच्चजती”ति । यस्मा विपस्सना वुट्ठानगामिनिभावं पापुणन्ती निन्नपोणपब्भारभावेन एकंसतो निब्बानं “पक्खन्दती”ति वत्तब्बतं लभति, मग्गो च समुच्छेदवसेन किलेसे, खन्धे च परिच्चजति, तस्मा यथाक्कमं विपस्सनामग्गानं वसेन पक्खन्दनपरिच्चागवोस्सग्गापि वेदितब्बा । वोस्सग्गत्थायाति परिच्चागवोस्सग्गत्थाय चैव पक्खन्दनवोस्सग्गत्थाय च । परिणमतीति परिपच्यति । तं परिणमनं वुट्ठानगामिनिभावप्पत्तिया चैव अरियमग्गभावप्पत्तिया च इच्छितन्ति आह “विपस्सनाभावज्जेव मग्गभावज्ज पापुणाती”ति । सेसपदेसूति “धम्मविचयसम्बोज्झङ्गं भावेती”तिआदीसु सेससम्बोज्झङ्गकोट्टासेसु ।

भद्दकन्ति अभद्दकानं नीवरणादिपापधम्मानं विक्खम्भनेन रागविधमनेन एकन्तहितत्ता, दुल्लभत्ता च भद्दकं सुन्दरं । न हि अज्जं समाधिनिमित्तं एवंदुल्लभं, रागस्स च उज्जुविपच्चनीकभूतं अत्थि । अनुरक्खतीति एत्थ अनुरक्खना नाम अधिगतसमाधितो यथा न परिहानि होति, एवं पटिपत्ति, सा पन तप्पटिपक्खविधमनेनाति आह “समाधी”तिआदि । अट्ठिकसज्जादिकाति अट्ठिकज्झानादिका । सज्जासीसेन हि ज्ञानं वदति ।

एकपटिवेधवसेन चतुसच्चधम्मे जाणन्ति चतूसु अरियसच्चेसु एकाभिसमयवसेन पवत्तजाणं, मग्गजाणन्ति अत्थो । चतुसच्चन्तो गधत्ता चतुसच्चधम्भन्तरे निरोधधम्मे निब्बाने जाणं, तेन फलजाणं वदति । यस्मा मग्गानन्तरस्स फलस्स मग्गानुगुणा पवत्ति, यतो तंसमुदयपक्खियेसु धम्मेसु पटिप्पस्सद्धिप्पहानवसेन पवत्तति, तस्मा निरोधसच्चेपि यो मग्गस्स सच्छिकिरियाभिसमयो, तदनुगुणा पवत्तीति फलजाणस्सेव धम्मे जाणता वुत्ता, न यस्स कस्सचि निब्बानारम्मणस्स जाणस्स । तेन वुत्तं “यथाहा”तिआदि । एत्थ च मग्गपज्जा ताव चतुसच्चधम्मस्स पटिविज्जनतो धम्मेजाणं नाम होतु, फलपज्जा पन कथन्ति चोदना सोधिता होति निरोधधम्मं आरब्ध पवत्तनतो । दुविधापि हि पज्जा अपरप्पच्चयताय अत्तपच्चक्खतो अरियसच्चधम्मे किच्चतो च आरम्मणतो च पवत्तत्ता “धम्मेजाण”न्ति वेदितब्बा । अरियसच्चेसु हि अयं धम्म-सद्दो तेसं अविपरीतसभावत्ता, सङ्खतप्पवरो वा अरियमग्गो, तस्स च फलधम्मो । तत्थ पज्जा तंसहगता धम्मेजाणं ।

अन्वयेजाणन्ति अनुगमनजाणं । पच्चक्खतो दिस्वाति चत्तारि सच्चानि मग्गजाणेन पच्चक्खतो पटिविज्जित्वा ।

यथा इदानीति यथा एतरहि पञ्चुपादानकखन्धा दुक्खसच्चं, एवं अतीतेपि अनागतेपि पञ्चुपादानकखन्धा दुक्खसच्चमेवाति च सरिक्खट्टेन वुत्तं। एस नयो समुदयसच्चे, मग्गसच्चे च। अयमेवाति अवधारणे। निरोधसच्चे पन सरिक्खट्टो नत्थि तस्स निच्चत्ता, एकसभावत्ता च। एवं तस्स जाणस्स अनुगतियं जाणन्ति तस्स धम्मेजाणस्स “एवं अतीतेपी”तिआदिना अनुगतियं अनुगमने अन्वये जाणं। इदं अन्वये जाणन्ति योजना। “तेनाहा”तिआदिना यथावुत्तमत्थं पाळिया विभावेति। सोति धम्मजाणं पत्वा ठितो भिक्खु। इमिना धम्मेनाति धम्मगोचरत्ता गोचरवोहारेन “धम्मो”ति वुत्तेनमग्गजाणेन, उपयोगत्थे वा करणवचनं, इमिना धम्मेन जातेनाति इमं चतुसच्चधम्मं जाणेन जानित्वा ठितेन मग्गजाणेनाति अत्थो। दिट्ठेनाति दस्सनेन सच्चधम्मं पस्सित्वा ठितेन। पत्तेनाति सच्चानं पत्वा ठितेन। विदितेनाति सच्चानि विदित्वा ठितेन। परियोगाळेहेनाति चतुसच्चधम्मं परियोगाहेत्वा ठितेनाति एवं तावेत्थ अभिधम्मडुकथायं (विभ० अट्ठ० ७९६) अत्थो वुत्तो। दुविधम्मि पन मग्गफलजाणं धम्मेजाणं। पच्चवेक्खणाय च मूलं, कारणञ्च नयनयनस्साति दुविधेनापि तेन धम्मेनाति न न युज्जति। तथा चतुसच्चधम्मस्स जातत्ता, मग्गफलसङ्घातस्स वा धम्मस्स सच्चपटिवेधसम्पयोगं गतत्ता नयनयनं होतीति तेन इमिना धम्मेन जाणविसयभावेन, जाणसम्पयोगेन वा जातेनाति च अत्थो न न युज्जतीति। अतीतानागते नयं नेतीति अतीते, अनागते च नयं नेति हरति पेसेति। इदं पन न मग्गजाणस्स किच्चं, पच्चवेक्खणजाणकिच्चं, सत्थारा पन मग्गजाणं अतीतानागते नयनयनसदिसं कतं मग्गमूलकत्ता। भावितमग्गस्स हि पच्चवेक्खणा नाम होति। नयिदं अज्जं जाणुप्पादनं नयनयनं, जाणस्सेव पन पवत्तिविसेसोति।

परेसं चेतसो परितो अयनं परिच्छिन्दनं परियो, तस्मिं परिये। तेनाह “परेसं चित्तपरिच्छेदे”ति। अवसेसं सम्मुतिमहिजाणं नाम “जाण”न्ति सम्मतत्ता। वचनत्थतो पन सम्मुतिमहि जाणन्ति सम्मुतिमहिजाणं। धम्मेजाणादीनं विय हि सातिसयस्स पटिवेधकिच्चस्स अभावा विसयोभासनसङ्घातजाननसामज्जेन “जाण”न्ति सम्मतेसु अन्तोगधन्ति अत्थो। सम्मुतिवसेन वा पवत्तं सम्मुतिमहिजाणं सम्मुतिद्वारेन अत्थस्स गहणतो। अवसेसं वा इतरजाणत्तयविसभागं जाणं तब्बिसभागसामज्जेन सम्मुतिमहिजाणमहि पविट्ठत्ता सम्मुतिमहिजाणं नाम होतीति।

कामं सोतापत्तिमग्गजाणादीनि दुक्खजाणादीनियेव, उक्कट्टनिद्वेसेन पनेवमाह “अरहत्तं पापेत्वा”ति। वट्टतो निग्गच्छति एतेनाति निग्गमनं, चतुसच्चकम्मट्टानं। पुरिमानि द्वे सच्चानि वट्ठं पवत्तिपवत्तिहेतुभावतो। इतरानि पन द्वे विवट्ठं निवत्तिनिवत्तिहेतुभावतो। अभिनिवेसोति विपस्सनाभिनिवेसो होति लोकियस्स जाणस्स विसभागूपगमनतो। नो विवट्ठेति विवट्ठे अभिनिवेसो नो होति अविसयभावतो। परियत्तीति कम्मट्टानतन्ति। उग्गहेत्वाति वाचुगगतं कत्वा। उग्गहेत्वाति वा पाळितो, अत्थतो च यथारहं सवनधारणपरिपुच्छनमनसानुपेक्खनादिवसेन चित्तेन उद्धं उद्धं गणित्वा। कम्मं करोतीति नामरूपपरिग्गहादिकमेन योगकम्मं करोति।

यदि पुरिमेसु द्वीसु एव विपस्सनाभिनिवेसो, तेसु एव उग्गहादि, कथमिदं चतुसच्चकम्मट्टानं जातन्ति आह “द्वीसू”तिआदि। कामं पच्छिमानिपि द्वे सच्चानि अभिज्जेय्यानि, परिज्जेय्यता पन तत्थ नत्थीति न विपस्सनाब्धापारो। केवलं पन अनुस्सवमत्ते ठत्वा अच्चन्तपणीतभावतो इट्ठं, आतप्पकनिरामिसपीतिसज्जननतो कन्तं, उपरूपरि अभिरुचिजननेन मनस्स वट्टनतो मनापन्ति मनसिकारं पवत्तेति। तेनाह “निरोधसच्चं नामा”तिआदि। द्वीसु सच्चेसूति द्वीसु सच्चेसु विसयभूतेसु, तानि च उद्दिस्स असम्मोहपटिवेधवसेन पवत्तमानो हि मग्गो ते उद्दिस्स पवत्तो नाम होतीति। तीणि दुक्खसमुदयमग्गसच्चानि। किच्चवसेनाति असम्मूह्नवसेन। एकन्ति निरोधसच्चं। आरम्मणवसेनाति आरम्मणकरणवसेनपि असम्मूह्नकिच्चवसेनपि तत्थ पटिवेधो लब्धतेव। द्वे सच्चानीति दुक्खसमुदयसच्चानि। दुद्वसत्ताति दट्ठं असक्कुण्येय्यत्ता। ओळारिका हि दुक्खसमुदया, तिरच्छानगतानम्पि दुक्खं, आहारादीसु च अभिलासो

पाकटो । पीळनादिआयूहनादिवसेनपि “इदं दुक्खं, इदं अस्स कारणं”न्ति याथावतो जाणेन ओगाहितुं असक्कुण्येयत्ता तानि **गम्भीरानि** । द्वेति निरोधमगगसच्चानि । तानि सण्हसुखुमभावतो सभावेनेव गम्भीरताय याथावतो जाणेन दुरोगाहत्ता “**दुइसानी**”ति ।

सोतापत्तियङ्गादिचतुक्कवण्णना

३११. सोतो नाम अरियसोतो पुरिमपदलोपेन, तस्स आदितो सब्बपठमं पज्जनं **सोतापत्ति**, पठममगगपटिलाभो । तस्स अङ्गानि अधिगमूपायभूतानि कारणानि **सोतापत्तियङ्गानि** । तेनाह “**सोता...पे०... अत्थो**”ति । सन्तकायकम्मादिताय सन्तधम्मसमन्नागमतो, सन्तधम्मपवेदनतो च सन्तो पुरिसाति **सप्पुरिसा** । तत्थ येसं वसेन चतुसच्चसम्पटिवेधावहं सद्धम्मस्सवनं लब्धति, ते एव दस्सेन्तो “**बुद्धादीनं सप्पुरिसान**”न्ति आह । सन्तो सतं वा धम्मोति **सद्धम्मो** । सो हि यथानुसिद्धं पटिपज्जमाने अपायदुक्खे, संसारदुक्खे च अपतन्ते धारेतीति एवमादि गुणातिसययोगवसेन **सन्तो** संविज्जमानो, पसत्थो, सुन्दरो वा धम्मो, सतं वा अरियानं धम्मो, तेसं वा तब्भावसाधको धम्मोति **सद्धम्मो**, “इध भिक्खु धम्मं परियापुणाती”तिआदिना (अ० नि० ५.७३) वुत्ता परियत्ति । सा पन महाविसयताय न सब्बा सब्बस्स विसेसावहाति तस्स तस्स अनुच्छविकमेव दस्सेन्तो आह “**सप्पायस्स तेपिटकधम्मस्स सवन**”न्ति । **योनि**सोमनसिकारो हेट्ठा वुत्तो एव । **पुब्बभागपटिपत्तिया**ति विपस्सनानुयोगस्स ।

अवेच्चप्पसादेनाति सच्चसम्पटिवेधवसेन बुद्धादीनं गुणे जत्वा उप्पन्नप्पसादेन, सो पन पसादो देवादीसु केनचिपि अकम्पियताय निच्चलोति आह “**अचलप्पसादेना**”ति । **एत्था**ति एतस्मिं चतुक्कत्तये आहारचतुक्के । **लूखपणीतवत्थुवसेना**ति ओदनकुम्मासादिकस्स लूखस्स चैव पणीतस्स च वत्थुनो वसेन । सा पनायं आहारस्स ओळारिकसुखुमता “**कुम्भिलानं आहारं उपादाय मोरानं आहारो सुखुमो**”तिआदिना (सं० नि० अट्ठ० २.२.११) अट्ठकथायं वित्थारतो आगता एव ।

आरम्मणट्ठितिवसेनाति आरम्मणसङ्घातस्स पवत्तिपच्चयट्ठानस्स वसेन । तिट्ठति एत्थाति **ठिति**, आरम्मणमेव ठिति **आरम्मणट्ठिति** । तेनेवाह “**रूपारम्मण**”न्तिआदि । **आरम्मणत्थो** चेत्य उपत्थम्भनत्थो वेदितब्बो, न विसयलक्खणोव । उपत्थम्भनभूतं रूपं उपेतीति रूपूपायं । तेनाह “**रूपं उपगतं हुत्वा**”तिआदि । **रूपक्खन्धं निस्साय तिट्ठति** तेन विना अप्पवत्तनतो । तन्ति रूपक्खन्धं निस्साय ठानप्पवत्तनं । एतन्ति “**रूपूपाय**”न्ति एतं वचनं । रूपक्खन्धो गोचरो पवत्तिट्ठानं पच्चयो एतस्साति **रूपक्खन्धगोचरं** रूपं सहकारीकारणभावेन पतिट्ठा एतस्साति **रूपप्पतिट्ठं** । इति तीहि पदेहि अभिसङ्खारविज्जाणं पति रूपक्खन्धस्स सहकारीकारणभावोयेवेत्थ वुत्तो । उपसित्तं विय **उपसित्तं**, यथा ब्यज्जनेहि उपसित्तं सिनेहितं ओदनं रुचितं, परिणामयोग्यञ्च, एवं नन्दिया उपसित्तं सिनेहितं कम्मविज्जाणं अभिरुचितं हुत्वा विपाकयोग्यं होतीति । **इतरन्ति** दोससहगतादिअकुसलं, कुसलञ्च **उपनिस्सयकोटिया** उपसित्तं हुत्वाति योजना । एवं **पवत्तमानन्ति** एवं रूपूपायन्ति देसनाभावेन पवत्तमानं । विपाकधम्मताय **वुद्धि...पे०... आपज्जति** । तत्थापि निप्परियायफलनिब्बत्तनवसेन **वुद्धि**, परियायफलनिब्बत्तनवसेन **विरुळिह**, निस्सन्दफलनिब्बत्तनवसेन **वेपुल्लं** । दिट्ठधम्मवेदनीयफलनिब्बत्तनेन वा **वुद्धि**, उपपज्जवेदनीयफलनिब्बत्तनवसेन **विरुळिह**, अपरापरियायफलनिब्बत्तनवसेन **वेपुल्लं आपज्जतीति** योजना । एकन्ततो वेदनुपायादिवसेन पत्ति नाम अरूपभवे येवाति आह “**इमेहि पना**”तिआदि । एवञ्च कत्वा पाळियं कतं वा-सद्दगगहणञ्च समत्थितं होति । “**रूपूपाय**”न्तिआदिना यथा अभिसङ्खारविज्जाणस्स उपनिस्सयभूता रूपादयो गय्हन्ति, एवं तेन निब्बत्तेतब्बापि ते गय्हन्तीति अधिप्पायेन “**चतुक्कवसेन...पे०... न वुत्त**”न्ति

आह । विपाकोपि हि धम्मो विपाकधम्मविज्जाणं उपगतं नाम होति तथा नन्दिया उपसित्तता । तेनाह “नन्दूपसेचन”न्ति । **वित्थारितानेव** सिङ्गालसुत्ते ।

भवति एतेन आरोग्यन्ति **भवो**, गिलानपच्चयो । परिवुद्धो भवो **अभवो** । वुद्धिअत्थो हि अयं अकारो यथा “संवरासंवरो, (पारा० पठममहासङ्गीतिकथा; दी० नि० अट्ठ० १.पठममहासङ्गीतिकथावण्णना; ध० स० अट्ठ० निदानकथा) फलाफलं”ति च । **तेलमधुफाणितादीनीति आदि-**सद्देन सप्पिनवनीतानं गहणं, तेलादीनं गहणज्वेत्य निदस्सनमत्तं । सब्बस्सापि गिलानपच्चयस्स सङ्गहो दट्ठब्बो । अथ वा **भवाभवो**ति खुद्दको चेव महन्तो च उपपत्तिभवो वेदितब्बो । एवञ्च सति “इमेसं पना”तिआदिवचनं समत्थितं होति । भवूपपत्तिपहानत्थो हि विसेसतो चतुत्थअरियवंसो । **तण्हुप्पादानन्ति** तण्हुप्पत्तीनं, चीवरादिहेतु उपपज्जनकतण्हानन्ति अत्थो । **पधानकरणकाले**ति भावनानुयोगकखणे । **सीतादीनि न खमतीति** भावनाय पुब्बभागकालं सन्धाय वुत्तं । **खमतीति** सहति अभिभवति । **वितक्कसमनन्ति** निदस्सनमत्तं । सब्बेसम्पि किलेसानं समनवसेन पवत्ता पटिपदा ।

समाधिज्ञानादिभेदो धम्मो पज्जति पटिपज्जीयति एतेनाति **धम्मपदं** । अनभिज्झाव धम्मपदं **अनभिज्झाधम्मपदं** । अयं ताव अलोभपक्खे नयो, इतरपक्खे पन अनभिज्झापधानो धम्मकोट्टासो **अनभिज्झाधम्मपदं** । **अकोपो**ति अदोसो, मेत्ताति अत्थो । **सुप्पट्टितसतीति** कायादीसु सम्मदेव उपट्टिता सति । **सतिसीसेना**ति सतिपधानमुखेन । समाधिपधानत्ता ज्ञानानं “**समापत्ति वा**”ति वुत्तं । कामं सविज्जाणकअसुभेपि ज्ञानभावना अलोभपधाना होति कायस्स जिगुच्छनेन, पटिक्कूलाकारगहणवसेन च पवत्तनतो, सत्तविधउग्गहकोसल्लादिवसेन पनस्सा पवत्ति सतिपधानाति ततियधम्मपदेनेव नं सङ्गण्हितुकामो “**दस असुभवसेन वा**”ति आह । हितूपसंहारादिवसेन पवत्तनतो ब्रह्मविहारभावना ब्यापादविरोधिनी अब्यापादपधानाति आह “**चतुब्रह्म...पे०... धम्मपद**”न्ति । तत्थ अधिगतानि ज्ञानादीनीति योजना । गमनादितो आहारस्स पटिक्कूलभावसल्लकखणं सज्जाय थिरभावेनेव होति तस्सा थिरसज्जापदट्टानत्ताति आहारे पटिक्कूलसज्जापि ततियधम्मपदे एव सङ्गहं गता । आरुप्पसमाधिअभिज्ज्ञानं अधिट्टानभावतो कसिणभावना, सत्तविधबोज्झङ्गविज्जाविमुत्तिपारिपूरिहेतुतो आनापानेसु पठमआनापानभावना विसेसतो समाधिपधानाति सा चतुत्थधम्मपदेन सङ्गहिता । चतुधातुववत्थानवसेन अधिगतानिपि एत्थेव सङ्गहेतब्बानि सियुं, पज्जापधानताय पन न सङ्गहितानि ।

धम्मसमादानेसु पठमं अचेलकपटिपदा एतरहि च दुक्खभावतो, अनागतेपि अपायदुक्खवट्टदुक्खावहतो । **अचेलकपटिपदा**ति च निदस्सनमत्तं दट्ठब्बं छन्नपरिब्बाजकानम्पि उभयदुक्खावहपटिपत्तिदस्सनतो । **दुतियं...पे०...** **ब्रह्मचरियचरणं** एतरहि सतिपि दुक्खे आर्यति सुखावहत्ता । **कामेसु पातब्बता** यथाकामं कामपरिभोगो । **अलभमानस्सापीति पि-**सद्देन को पन वादो लभमानस्साति दस्सेति ।

दुस्सील्यादिपापधम्मानं खम्भनं पटिबन्धनं **खन्धट्ठो**, सो पन सीलादि एवाति आह “**गुणट्ठो खन्धट्ठो**”ति । गुणविसयताय **खन्ध-**सद्दस्स गुणत्थता वेदितब्बा । **विमुत्तिक्खन्धो**ति पटिपक्खतो सुट्ठु विमुत्ता गुणधम्मा अधिप्पेता, न अविमुत्ता, नापि विमुच्चमानाति तेहि सह देसनं आरुळ्हा सीलक्खन्धादयोपि तयोति आह “**फलसीलं अधिप्पेतं, चतूसुपि ठानेसु फलमेव वुत्तं**”न्ति च । एतेनेव चेत्थ **विमुत्तिक्खन्धो**ति फलपरियापन्ना सम्मासङ्कप्पवायामसतियो अधिप्पेताति वेदितब्बं ।

उपत्थम्भनट्टेन सम्पयुत्तधम्मानं तत्थ थिरभावेन पवत्तनतो, एतेनेव अहिरिकअनोत्तप्पानम्पि सविसये बलट्ठो सिद्धो

वेदितब्बो । न हि तेसं पटिपक्खेहि अकम्पियट्ठो एकन्तिको । हिरौत्तप्पानज्झि अकम्पियट्ठो सातिसयो कुसलधम्मानं महाबलभावतो, अकुसलानञ्च दुब्बलभावतो । तेनाह भगवा “अबला नं बलीयन्ति, मद्दन्ते नं परिस्सया”ति (सु० नि० ७७६; महानि० ५; नेत्ति० पटिनिद्देसवारे ५) बोधिपक्खियधम्मवसेनायं देसनाति “समथविपस्सनामग्गवसेना”ति वुत्तं ।

अधीति उपसग्गमत्तं, न “अधिचित्त”न्तिआदीसु (ध० प० १८५) विय अधिकारादिअत्थं । करणाधिकरणभावसाधनवसेन अधिद्वान-सदस्स अत्थं दस्सेन्तो “तेन वा”तिआदिमाह । तेन अधिद्वानेन तिद्वन्ति अत्तनो सम्मापटिपत्तियं गुणाधिका पुरिसा, ते एव तत्थ अधिद्वाने तिद्वन्ति सम्मापत्तिया, ठानमेव अधिद्वानमेव सम्मापटिपत्तियन्ति योजना । पठमेन अधिद्वानेन । अग्गफलपज्जाति उक्कट्टुनिद्देसोयं । किलेसूपसमोति किलेसानं अच्चन्तवूपसमो । पठमेन नयेन अधिद्वानानि एकदेसतोव गहितानि, न निप्पदेसतोति निप्पदेसतोव तानि दस्सेतुं “पठमेन चा”तिआदि वुत्तं । “आदिं कत्वा”ति एतेन ज्ञानाभिज्जापज्जञ्चेव मग्गपज्जञ्च सङ्गण्हाति । वचीसच्चं आदिं कत्वाति आदि-सद्देन विरतिसच्चं सङ्गण्हाति । ततियेन आदि-सद्देन किलेसानं वीतिक्कमपरिच्चागं, परियुद्वानपरिच्चागं, हेट्ठिममग्गेहि अनुसयपरिच्चागञ्च सङ्गण्हाति । “विक्खम्भिते किलेसे”ति एतेन समापत्तीहि किलेसानं विक्खम्भनवसेन वूपसमं वत्वा आदि-सद्देन हेट्ठिममग्गेहि कातब्बं तेसं समुच्छेदवसेन वूपसमं सङ्गण्हाति । अरहत्तफलपज्जा कथिता उक्कट्टुनिद्देसतोव, अज्जथा वचीसच्चादीनम्पि गहणं सिया । निब्बानञ्च असम्मोसधम्मताय उत्तमद्वेन सच्चं, सब्बसंकिलेसपरिच्चागनिमित्तताय चागो, सब्बसङ्खारूपसमभावतो उपसमोति च विसेसतो वत्तब्बतं अरहतीति थेरस्स अधिप्पायो । पकट्टुजाननफलताय पज्जा, अनवसेसतो किलेसानञ्चजन्ते च वूपसन्ते च उप्पन्नता चागो, उपसमोति च विसेसतो अग्गफलज्जाणं वुच्चतीति थेरो आह “सेसेहि अरहत्तफलपज्जा कथिता”ति ।

पज्जह्याकरणादिचतुक्कवण्णना

३१२. काळकन्ति मलीनं, चित्तस्स अपभस्सरभावकरणन्ति अत्थो । तं पनेत्थ कम्मपथप्पत्तमेव अधिप्पेतन्ति आह “दसअकुसलकम्मपथकम्म”न्ति । कण्हाभिजातिहेतुतो वा कण्हं । तेनाह “कण्हविपाक”न्ति । अपायूपत्ति, मनुस्सेसु च दोभगियं कण्हविपाको । अयं तस्स तमभावो वुत्तो । निब्बत्तनतोति निब्बत्तापनतो । पण्डरन्ति ओदातं, चित्तस्स पभस्सरभावकरणन्ति अत्थो । सुक्काभिजातिहेतुतो वा सुक्कं । तेनाह “सुक्कविपाक”न्ति । सग्गूपत्ति, मनुस्सेसु सोभगियञ्च सुक्कविपाको । अयं तस्स जोतिभावो वुत्तो । उक्कट्टुनिद्देसेन पन “सग्गे निब्बत्तनतो”ति वुत्तं, निब्बत्तापनतोति अत्थो । मिस्सककम्मन्ति कालेन कण्हं, कालेन सुक्कन्ति एवं मिस्सकवसेन कतकम्मं । “सुखदुक्खविपाक”न्ति वत्वा तत्थ सुखदुक्खानं पवत्तिआकारं दस्सेतुं “मिस्सककम्मज्ही”तिआदि वुत्तं । कम्मस्स कण्हसुक्कसमज्जा कण्हसुक्काभिजातिहेतुतायाति अपचयगामिताय तदुभयविद्धंसकस्स कम्मक्खयकरकम्मस्स इध सुक्कपरियायोपि न इच्छितोति आह “उभय...पे०... अयमेत्थ अत्थो”ति । तत्थ उभयविपाकस्साति यथाधिगतस्स उभयविपाकस्स । सम्पत्तिभवपरियापन्नो हि विपाको इध “सुक्कविपाको”ति अधिप्पेतो, न अच्चन्तपरिसुद्धो अरियफलविपाको ।

पुब्बेनिवासो सत्तानं चुतूपपातो च पच्चक्खकरणेन सच्छिकातब्बा; इतरे पटिलाभेन असम्मोहपटिवेधवसेन पच्चक्खकरणेन च सच्छिकातब्बा । ननु च पच्चवेक्खणापेत्य पच्चक्खतो पवत्ततीति? सच्चं पच्चक्खतो पवत्तति सरूपदस्सनतो, न पन पच्चक्खकरणवसेन पवत्तति पच्चक्खकारीनं पिड्ढिवत्तनतो । तेनाह “कायेना”तिआदि ।

ओहनन्तीति हेट्ठा कत्वा हनन्ति गमेन्ति । तथाभूता च अधो सीदेन्ति नामाति आह “ओसीदापेन्ती”ति । कामनद्वेन

कामो च सो यथावुत्तेनत्थेन ओघो चाति, कामेसु ओघोति वा **कामोघो**। भवोघो नाम भवरागोति दस्सेतुं “**रूपारूपभवेसू**”तिआदि वुत्तं। तत्थ पठमो उपपत्तिभवेसु रागो, दुतियो कम्मभवेसु, ततियो भवदिट्ठिसहगतो। यथा रञ्जनट्टेन रागो, एवं ओहनट्टेन “ओघो”ति वुत्तो।

योजेन्तीति कम्मं विपाकेन, भवादिं भवन्तरादीहि दुक्खे सत्ते योजेन्ति घट्टेन्तीति **योगा**। **ओघा विय वेदितब्बा** अत्थतो कामयोगादिभावतो।

विसंयोजेन्तीति पटिपन्नं पुगलं कामयोगादितो वियोजेन्ति। संकिलेसकरणं योजनं **योगो**, गन्थिकरणं (गन्थकरणं ध० स० मूलटी० २०-२५), सङ्खलिकचक्कलिकानं विय पटिबद्धताकरणं वा गन्थनं गन्थो, अयं एतेसं विसेसो। **पलिबुन्धतीति** निस्सरितुं अप्पदानवसेन न मुञ्चेति विबन्धति। **इदमेवाति** अत्तनो यथाउपट्ठितं सस्सतवादादिकं वदति। **सच्चन्ति** भूतं।

भुसं, दळ्ळच्च आरम्मणं आदीयति एतेहीति **उपादानानि**। यं पन तेसं तथागहणं, तम्पि अत्थतो आदानमेवाति आह “**उपादानानीति आदानग्गहणानी**”ति। **गहणट्टेनाति** कामनवसेन दळ्ळं गहणट्टेन। पुन **गहणट्टेनाति** मिच्छाभिनिविसनवसेन दळ्ळं गहणट्टेन। **इमिनाति** इमिना सीलवतादिना। **सुद्धीति** संसारसुद्धि। **एतेनाति** एतेन दिट्ठिगाहेन। “**अत्ता**”ति पज्जापेत्तो **वदति चेव** अभिनिवेसनवसेन **उपादियति च**।

यवन्ति ताहि सत्ता अमिस्सितापि समानजातिताय मिस्सिता विय होन्तीति **योनियो**, ता पन अत्थतो अण्डादिउप्पत्तिट्ठानविसिट्ठा खन्धानं भागसो पवत्तिविसेसाति आह “**योनियोति कोट्टासा**”ति। **सयनस्मिन्ति** पुप्फसन्थरादिसयनस्मिं। तत्थ वा ते सयिता जायन्तीति **सयनग्गहणं**। तयिदं मनुस्सानं, भुम्मदेवानच्च वसेन गहेतब्बं। पूतिमच्छादीसु किमयो निब्बत्तन्ति। **उपपतिता वियाति** उपपज्जवसेन पतिता विय। बाहिरपच्चयनिरपेक्खताय वा उपपतने साधुकारिनो **ओपपातिनो**, ते एव इध “**ओपपातिका**”ति वुत्ता। **देवमनुस्सेसूति** एत्थ ये देवे सन्थाय देवग्गहणं, ते दस्सेन्तो “**भुम्मदेवेसू**”ति आह।

अत्तनो सतिसम्मोसेन आहारप्पयोगेन मरणतो “**पठमो खिड्डापदोसिकवसेना**”ति वुत्तं। अत्तनो परस्स च मनोपदोसवसेन मरणतो “**ततियो मनोपदोसिकवसेना**”ति वुत्तं। नेव अत्तसज्जेतनाय मरन्ति, न परसज्जेतनाय केवलं पुज्जक्खयेनेव मरणतो, तस्मा **चतुत्थो...पे०... वेदितब्बो**।

दक्खिणाविसुद्धादिचतुक्कवण्णना

३१३. दानसङ्घाता **दक्खिणा**, न देय्यधम्मसङ्घाता। **विसुज्झना** महाजुतिकता, सा पन महाफलताय वेदितब्बाति आह “**महप्फला होन्ती**”ति।

अनरियानन्ति असाधूनं। ते पन निहीनाचारा होन्तीति आह “**लामकान**”न्ति। **वोहाराति** सब्बोहारा अभिलापा वा, अत्थतो तथापवत्ता चेतना। तेनाह “**एत्थ चा**”तिआदि।

अत्तन्तपादिचतुक्कवण्णना

३१४. तेसु अचेलकोति निदस्सनमत्तं छन्नपरिब्बाजकानम्पि अत्तकिलमथं अनुयुत्तानं लब्धनतो ।

न सीलादिसम्पन्नोति सीलादीहि गुणेहि अपरिपुण्णो ।

तमोति अप्पकासभावेन तमोभूतो । तेनाह “अन्धकारभूतो”ति, अन्धकारं विय भूतो जातो अप्पकासभावेन, अन्धकारत्तं वा पत्तोति अत्थो । तममेवाति वुत्तलक्खणं तममेव । परं परतो अयनं गति निट्ठाति अत्थो । “नीचे...पे... निब्बत्तित्वा”ति एतेन तस्स तमभावं दस्सेति, “तीणि दुच्चरितानि परिपूरेती”ति एतेन तमपरायनभावं अप्पकासभावापत्तितो । तथाविधो हुत्वाति नीचे...पे... निब्बत्तेत्वा । “तीणि सुच्चरितानि परिपूरेती”ति एतेन तस्स जोतिपरायनभावं दस्सेति पकासभावापत्तितो । इतरद्वये वुत्तनयानुसारेण अत्थो वेदितब्बो ।

म-कारो पदसन्धिमत्तं “अज्जमज्ज”न्तिआदीसु (सु० नि० ६०५) विय । चतूहि वातेहीति चतूहि दिसाहि उट्ठितवातेहि । परप्पवादेहीति परेसं दिट्ठिगतिकानं वादेहि । “अकम्पियो”ति वत्वा तत्थ कारणमाह “अचलसद्धाया”ति, मग्गेनागतसद्धाया । पतनुभूतत्ताति एत्थ द्वीहि कारणेहि पतनुभावो वेदितब्बो अधिच्चुप्पत्तिया, परियुट्ठानमन्दताय च । सकदागामिस्स हि वट्टानुसारिमहाजनस्स विय किलेसा अभिण्हं न उप्पज्जन्ति, कदाचि करहचि उप्पज्जन्ति । उप्पज्जमाना च वट्टानुसारिमहाजनस्स विय मद्दन्ता अभिभवन्ता न उप्पज्जन्ति, द्वीहि पन मग्गेहि पहीनत्ता मन्दा मन्दा तनुकाकारा उप्पज्जन्ति । इति किलेसानं पतनुभावेन गुणसोभाय गुणसोरच्चेन सकदागामी समणपदुमो नाम । रागदोसानं अभावाति गुणविकासविबन्धानं सब्बसो रागदोसानं अभावेन । खिप्पमेव पुप्फिस्सतीति अग्गमग्गविकसनेन नचिरस्सेव अनवसेसगुणसोभापरिपूरिया पुप्फिस्सति । तस्मा अनागामी समणपुण्डरीको नाम । “पुण्डरीक”न्ति हि रत्तकमलं वुच्चति । तं किर ल्हं पुप्फिस्सति । “पदुम”न्ति सेतकमलं, तं चिरेण पुप्फिस्सती”ति वदन्ति । गन्थकारकिलेसानन्ति चित्तस्स बद्धभावकरानं उद्धम्भागियकिलेसानं सब्बसो अभावा समणसुखुमालो नाम समणभावेन परमसुखुमालभावप्पत्तितो ।

चतुक्कवण्णना निट्ठिता ।

निट्ठिता च पठमभाणवारवण्णना ।

पञ्चकवण्णना

३१५. सच्चेसु विय अरियसच्चानि खन्धेसु उपादानक्खन्धा अन्तोगधाति खन्धेसु लोकियलोकुत्तरवसेन विभागं दस्सेत्वा इतरेसु तदभावतो “उपादानक्खन्धा लोकिया वा”ति आह ।

गन्तब्बाति उपपज्जितब्बा । यथा हि कम्मभवो परमत्थतो असतिपि कारके पच्चयसामगिया सिद्धो “तंसमङ्गिना सन्तानलक्खणेन सत्तेन कतो”ति वोहरीयति, एवं उपपत्तिभवलक्खणा गतियो परमत्थतो असतिपि गमके तंतंकम्मवसेन येहि तानि कम्मानी “कतानी”ति वुच्चन्ति, तेहि “गन्तब्बा”ति वोहरीयन्ति । यस्स उप्पज्जति, तं ब्रूहन्तो एव उप्पज्जतीति अयो, सुखं । नत्थि एत्थ अयोति निरयो । ततो एव अस्सादेतब्बमेत्थ नत्थीति “निरस्सादो”ति आह । अवीचिआदिओकासेपि निरयसद्धो निरुळ्होति आह “सहोकासेन खन्धा कथिता”ति । सूरियविमानादि ओकासविसेसेपि लोके देव-सद्धो निरुळ्होति आह “चतुत्थे ओकासोपी”ति ।

आवासेति विसये भुम्भं। पेतो वा अजगरो वा हुत्वा निब्बत्तति लग्गचित्ताय, हीनज्झासयताय च। तेहि तेहि कारणेहि आदीनवं दस्सेत्वा यथा अज्जे न लभन्ति, एवं करोति अत्तनो विसमनिस्सितताय, बलवनिस्सितताय च। वण्णमच्छरियेन अत्तनो एव वण्णं वण्णेति, परेसं वण्णो “किं वण्णो एसो”ति तं तं दोसं वदति। पटिवेधधम्मो अरियानंयेव होति, ते च तं न मच्छरायन्ति मच्छरियस्स सब्बसो पहीनत्ताति तस्स असम्भवो एवाति आह “परियत्तिधम्मे”तिआदि। “अयं इमं धम्मं उग्गहेत्वा अज्जथा अत्थं विपरिवत्तेत्वा नस्सेस्सती”ति धम्मानुग्गहेन न देति। “अयं इमं धम्मं उग्गहेत्वा उद्धतो उन्नळो अवूपसन्तचित्तो अपुज्जं पसविस्सती”ति पुग्गलानुग्गहेन न देति। न तं अदानं मच्छरियं मच्छरियलक्खणस्सेव अभावतो।

चित्तं निवारेन्तीति ज्ञानादिवसेन उपपज्जनकं कुसलचित्तं निसेधेन्ति तथास्स उपपज्जितुं न देन्ति। नीवरणप्पत्तोति नीवरणावत्थो। “अरहत्तमग्गवज्झो”ति एतेन भवरागानुसयस्सपि नीवरणभावं अनुजानाति, तं विचारेतब्बं। किमेत्थ विचारेतब्बं? “आरूपे कामच्छन्दनीवरणं पटिच्च थिनमिद्धनीवरण”न्ति (पट्ठा० ३.नीवरणगोच्छके ८) आदिवचनतो न यिदं “परियायेन वुत्त”न्ति सक्का वत्तुं, सब्बेसम्पि तेभूमकधम्मानं कामनीयत्वेन कामभावतो भवरागस्सपि कामच्छन्दभावस्स इच्छितत्ता। तस्मा “कामच्छन्दो नीवरणप्पत्तो”ति भवरागानुसयमाह। सो हि अरहत्तमग्गवज्झो। “या तस्मिं समये चित्तस्स अकल्यता”ति (ध० स० ११६२) आदिवचनतो थिनं चित्तगेलज्जं। तथा “या तस्मिं समये वेदनाक्खन्धस्सा”ति (ध० स० ४४) आदिवचनतो मिद्धं खन्धत्तयगेलज्जं। एत्थ च चित्तगेलज्जेन चित्तस्सेव अकल्यता, खन्धत्तयगेलज्जेन पन रूपकायस्सपि थिनमिद्धस्स निद्दाहेतुत्ता। तथा उद्धच्चन्ति उद्धच्चस्स अरहत्तमग्गवज्झतं उपसंहरति तथा-सद्देन, न उभयतं। न हि तस्स तादिसी उभयता अत्थि। यं पन केचि वदन्ति “पुथुज्जनसन्तानवुत्ति सेक्खसन्तानवुत्ती”ति, तं इध अनुपयोगि सेक्खसन्तानवुत्तिनो एव चेत्थ अधिप्पेतत्ता।

तेहीति संयोजनेहि। “ओरम्भागियानि उद्धम्भागियानी”ति विसेसं अनामसित्वा “संयोजनानी”ति साधारणतो पदुद्धारो इदानि वुच्चमानचतुक्कानुच्छविकतावसेन, कस्सचिपि किलेसस्स अविक्खम्भितत्ता कथञ्चिपि अविनिपातेय्यतामुत्तो कामभवो अज्झत्तग्गहणस्स विसेसपच्चयत्ता इमेसं सत्तानं अब्भन्तरत्वेन अन्तो नाम। रूपारूपभवो तब्बिपरियायतो बहि नाम। तथा हि यस्स ओरम्भागियानि संयोजनानि अप्पहीनानि, सो अज्झत्तसंयोजनो वुत्तो, यस्स तानि पहीनानि, सो बहिद्धासंयोजनो, तस्मा अन्तो असमुच्छिन्नबन्धनताय, बहि च पवत्तमानभवङ्गसन्तानताय अन्तोबद्धा बहिसयिता नाम। निरन्तरप्पवत्तभवङ्गसन्तानवसेन हि सयितवोहारो। कामं नेसं बहिबन्धनम्पि असमुच्छिन्नं, अन्तोबन्धनस्स पन थूलताय एवं वुत्तं। तेनाह “तेसज्झि कामभवे बन्धन”न्ति। इमिना नयेन सेसद्वयेपि अत्थो वेदितब्बो। असमुच्छिन्नेसु च ओरम्भागियसंयोजनियेसु लद्धप्पच्चयेसु उद्धम्भागियसंयोजनानि अगणनूपगानि होन्तीति। अरियानंयेव वसेनेत्थ चतुक्कस्स उद्धटत्ता लब्भमानापि पुथुज्जना न उद्धटा।

सिक्खाकोट्टासोति सिक्खितब्बभागो। पज्जति सिक्खा एतेनाति सिक्खापदं, सिक्खाय अधिगमुपायोति। आगतायेव, तस्मा तत्थ आगतनयेनेव वेदितब्बाति अधिप्पायो।

अभब्बट्टानादिपज्जकवण्णना

३१६. देसनासीसमेवाति देसनापदेसो एव, तस्मा सोतापन्नादयोपि अभब्बा। यदि एवं कस्मा तथा देसनाति आह “पुथुज्जनखीणासवान”न्तिआदि।

जातिव्यसने येसं जातीनं विनासो, तेसं हितसुखं विद्धंसेति, तस्मा व्यसतीति व्यसनं। भोगव्यसनेपि एसेव नयो। रोगव्यसनादीसु पन “यस्स रोगो”तिआदिना योजेतब्बं। नेव अकुसलानि असंकिलिद्धसभावत्ता। न तिलक्खणाहतानि अभावधम्मत्ता। इतरं पन वुत्तविपरियायतो अकुसलं, तिलक्खणाहतञ्च।

गुणेहि समिद्धभावा सम्पदा।

वत्थुसन्दस्सनाति यस्मिं वत्थुस्मिं तस्स आपत्ति, तस्स सरूपतो दस्सना। आपत्तिसन्दस्सनाति यं आपत्तिं सो आपन्नो, तस्सा दस्सना। संवासपटिक्खेपोति उपोसथपवारणादिसंवासस्स पटिक्खपनं अकरणं। सामीचिपटिक्खेपो अभिवादनादिसामीचिकिरियाय अकरणं। चोदयमानेनाति चोदेन्तेन। चुदितकस्स कालोति चुदितकस्स पुगलस्स चोदेतब्बकालो। पुगलन्ति चोदेतब्बं पुगलं। उपपरिक्खित्वाति “अयं चुदितकलक्खणे तिद्धति, न तिद्धती”ति वीमंसित्वा। अयसं आरोपेति “इमे मं अभूतेन अब्भाचिक्खन्ता अनयव्यसनं आपादेन्ती”ति भिक्खूनं अयसं उप्पादेति।

पधानियङ्गपञ्चकवण्णना

३१७. पदहतीति पदहनो; भावनं अनुयुत्तो योगी, तस्स भावो भावनानुयोगो पदहनभावो। पधानं अस्स अत्थीति पधानिको, क-कारस्स य-कारं कत्वा “पधानियो”ति वुत्तं। “अभिनीहारतो पट्टाय आगतत्ता”ति वुत्तत्ता पच्चेकबोधिसत्तसावकबोधिसत्तानम्पि पणिधानतो पभुति आगता सद्धा आगमनसद्धा एव, उक्कट्टनिद्देसेन पन “सब्बज्जुबोधिसत्तान”न्ति वुत्तं। अधिगमतो समुदागतत्ता अगमगगफलसम्पयुत्तापि अधिगमनसद्धा नाम, या सोतापन्नस्स अङ्गभावेन वुत्ता। अचलभावेनाति पटिपक्खेन अनभिभवनीयत्ता निच्चलभावेन। ओक्कप्पन्ति ओक्कन्तित्वा पक्खन्दित्वा अधिमुच्चनं। पसादुप्पत्ति पसादनीये वत्थुस्मिं पसीदनमेव। सुप्पटिविद्धन्ति सुट्टु पटिविद्धं, यथा तेन पटिवेधेन सब्बज्जुतज्जाणं हत्थगतं अहोसि, तथा पटिविद्धं। यस्स बुद्धसुबुद्धताय सद्धा अचला असम्पवेधी, तस्स धम्मसुधम्मताय, सङ्खसुप्पटिपन्नताय च सद्धा न तथाति अट्टानमेतं अनवकासो। तेनाह भगवा “यो, भिक्खवे, बुद्धे पसन्नो, धम्मे सो पसन्नो, सङ्गे सो पसन्नो”तिआदि। पधानवीरियं इज्झति “अद्धा इमाय पटिपदाय जरामरणतो मुच्चिस्सामी”ति सक्कच्चं पदहनतो।

अप्प-सद्धो अभावत्थो “अप्प-सद्धस्स...पे०... खो पना”तिआदीसु वियाति आह “अरोगो”ति। समवेपाकिनियाति यथाभुत्तं आहारं समाकारेनेव पच्चनसीलाय। दळ्हं कत्वा पच्चन्ती हि गहणी घोरभावेन पित्तविकारादिवसेन रोगं जनेति, सिथिलं कत्वा पच्चन्ती मन्दभावेन वातविकारादिवसेन। तेनाह “नातिसीताय नाच्चुण्हाया”ति। गहणीतेजस्स मन्दतिक्खतावसेन सत्तानं यथाक्कमं सीतुण्हसहगताति आह “अतिसीतगहणिको”तिआदि। याथावतो अच्चयदेसना अत्तनो आविकरणं नामाति आह “यथाभूतं अत्तनो अगुणं पकासेता”ति। उदयत्थगामिनियाति सङ्खारानं उदयं, वयज्ज पटिविज्झन्तियाति अयमेत्थ अत्थोति आह “उदयज्जा”तिआदि। परिसुद्धायाति निरुपक्विकलेसाय। निब्बिज्झितुं समत्थायाति तदङ्गवसेन अवसेसं पजहितुं समत्थाय। तस्स तस्स दुक्खस्स खयगामिनियाति यं दुक्खं इमस्मिं जाणे अनधिगते पवत्तारहं, अधिगते न पवत्तति, तं सन्धाय वदति। तथा हेस योगावचरो “चूळसोतापन्नो”ति वुच्चति।

सुद्धावासादिपञ्चकवण्णना

३१८. “सुद्धा आवसिंसू”तिआदिना अद्धत्तयेपि तेसं सुद्धावासपरियायो अब्यभिचारीति दस्सेति।

किलेसमलरहिताति नामकायपरिसुद्धिं वदन्तो एव रूपकायपरिसुद्धिम्पि अत्थतो दस्सेति । तेनाह “अनागामिखीणासवा”ति ।

आयुनो मज्झन्ति अविहादीसु यत्थ यत्थ उप्पन्नो, तत्थ तत्थ आयुनो मज्झं अनतिक्कमित्वा । अन्तरा वाति तस्स अन्तराव ओरमेव । मज्झं उपहच्चाति आयुनो मज्झं अतिच्च । तेनाह “अतिक्कमित्वा”ति । अप्पयोगेनाति अनुस्सहनेन । अकिलमन्तोति अकिलन्तो । सुखेनाति अकिच्छेन । उद्धं वाहिभावेन उद्धं अस्स तण्हासोतं, वट्टसोतज्वाति उद्धंसोतो; उद्धं वा गन्त्वा पटिलभित्तब्बतो उद्धं अस्स मग्गसोतन्ति उद्धंसोतो । अकनिट्ठं गच्छतीति अकनिट्ठगामी । सोधेत्वाति तत्थ तत्थ उप्पज्जन्तो ते ते देवलोके सोधेन्तो विय होतीति वुत्तं “चत्तारो देवलोके सोधेत्वा”ति । तत्थ तत्थ वा उप्पज्जित्वा पुन अनुप्पज्जनारहभावेनेव ततोपि गच्छन्तो देवूपपत्तिभवसज्जिते अत्तनो खन्धलोके भवरागमलं विसोधेत्वा विक्खम्भेत्वा । अयज्झि अविहेसु कप्पसहस्सं वसन्तो अरहत्तं पत्तुं असक्कुणित्वा अतप्पं गच्छति, तत्थापि द्वे कप्पसहस्सानि वसन्तो अरहत्तं पत्तुं असक्कुणित्वा सुदस्सं गच्छति, तत्थापि चत्तारिकप्पसहस्सानि वसन्तो अरहत्तं पत्तुं असक्कुणित्वा सुदस्सिं गच्छति, तत्थापि अट्ठकप्पसहस्सानि वसन्तो अरहत्तं पत्तुं असक्कुणित्वा अकनिट्ठं गच्छति, तत्थ वसन्तो अग्गमग्गं अधिगच्छति ।

चेतोखिलपञ्चकवण्णना

३१९. चेतोखिला नाम अत्थतो विचिकिच्छा कोधो च, ते पन यस्मिं सन्ताने उप्पज्जन्ति, तस्स खरभावो कक्खळभावो हुत्वा उपतिट्ठन्ति, पगेव अत्तना सम्पयुत्तचित्तस्साति आह “चित्तस्स थद्धभावो”ति । यथा लक्खणपारिपूरिया गहिताय सब्बा सत्थुरूपकायसिरी गहिताव नाम होति, एवं सब्बज्जुताय सब्बा धम्मकायसिरी” गहिता एव नाम होतीति तदुभयवत्थुकमेव कङ्खं दस्सेन्तो “सरीरे कङ्खमानो”ति आदिमाह । आतपति किलेसेति आतप्पं, सम्मावायामोति आह “आतप्पायाति वीरियकरणत्थाया”ति । पुनप्पुनं योगायाति भावनं पुनप्पुनं युज्जनाय । सततकिरियायाति भावनाय निरन्तरप्पयोगाय । “पटिवेधधम्मे कङ्खमानो”ति एत्थ कथं लोकुत्तरधम्मे कङ्खा पवत्ततीति? न आरम्मणकरणवसेन, अनुस्सवाकारपरिवितक्कलद्धे परिकप्पितरूपे कङ्खा पवत्ततीति दस्सेन्तो आह “विपस्सना... पे०... वदन्ति, तं अत्थि नु खो नत्थीति कङ्खती”ति । सिक्खाति चेत्य पुब्बभागसिक्खा वेदितब्बा । “कामज्चेत्थ विसेसुप्पत्तिया महासावज्जताय चेव संवासनिमित्तघट्टनाहेतु अभिणहुप्पत्तिकताय च ‘सब्रह्मचारीसू’ति कोपस्स विसयो विसेसेत्वा वुत्तो, ततो अज्जत्थापि पन कोपो ‘न चेतोखिलो’ति न सक्का विज्जातु”न्ति केचि । यदि एवं विचिकिच्छायपि अयं नयो आपज्जति, तस्मा यथारुतवसेनेव गहेतब्बं ।

चेतसोविनिबन्धादिपञ्चकवण्णना

३२०. पवत्तितुं अप्पदानवसेन कुसलचित्तं विनिबन्धन्तीति चेतसोविनिबन्धा । तं पन विनिबन्धन्ता मुट्ठिगाहं गणहन्ती विय होन्तीति आह “चित्तं बन्धित्वा”ति आदि । कामगिद्धो पुग्गलो वत्थुकामे विय किलेसकामेपि अस्सादेति अभिनन्दतीति वुत्तं “वत्थुकामेपि किलेसकामेपी”ति । अत्तनो कायेति अत्तनो करजकाये, अत्तभावे वा । बहिद्धारूपेति परेसं काये, अनिन्द्रियबद्धरूपे च । उदरं अवदिहति उपचिनोति परिपूरेतीति उदरावदेहकं । सेय्यसुखन्ति सेय्याय सयनवसेन उप्पज्जनकसुखं । संपरिवत्तकन्ति संपरिवत्तेत्वा । पणिधायाति तण्हावसेन पणिदहित्वा । इति पञ्चविधोपि लोभविसेसो एव चेतोविनिबन्धो वुत्तोति वेदितब्बो ।

लोकियानेव कथितानि रूपिन्द्रियानयेव कथितत्ता । पठमदुतियचतुत्थानि लोकियानि परित्तभूमकत्ता । ततियपञ्चमानि कामरूपगगभूमिकत्ता, कामरूपारूपगगभूमिकत्ता च । लोकियलोकुत्तरानि कथितानीति आनेत्वा योजना । “समथविपस्सनामग्गफलवसेना”ति वत्तब्बं । “समथविपस्सनामग्गवसेना”ति वुत्तं ।

निस्सरणियपञ्चकवण्णना

३२१. निस्सरन्तीति निस्सरणीयाति वत्तब्बे रस्सं कत्वा निद्देसो । कत्तरि हेस अनीय-सद्दो यथा “निय्यानिका”ति । तेनाह “निस्सटा”ति । कुतो पन निस्सटाति? यथासकं पटिपक्खतो । निज्जीवट्टेन धातुयोति आह “अत्तसुञ्जसभावा”ति । अत्थतो पन धम्मधातुमनोविज्जाणधातुविसेसा । तादिसस्स भिक्खुनो किलेसवसेन कामेसु मनसिकारो नाम नत्थीति आह “वीमंसनत्थ”न्ति । “नेक्खम्मनिस्सितं इदानि मे चित्तं, किं नु खो कामवितक्कोपि उप्पज्जती”ति वीमंसन्तस्साति अत्थो । पक्खन्दनं नाम अनुप्पवेसो, सो पन तत्थ नत्थीति आह “न पविसती”ति । पसादं नाम अभिरुचिसन्तिट्ठानं, विमुच्चनं अधिमुच्चनन्ति तं सब्बं पक्खिपन्तो वदति “पसादं नापज्जती”तिआदि । एवंभूतं पनस्स चित्तं तत्थ कथं तिट्ठतीति आह “यथा पना”तिआदि । तन्ति पठमज्झानं । अस्साति भिक्खुनो । चित्तं पक्खन्दतीति परिकम्मचित्तेन सद्धिं ज्ञानचित्तं एकट्ठवसेन एकज्झं गहेत्वा वदति । गोचरे गतत्ताति अत्तनो आरम्मणे एव पवत्तत्ता । अहानभागियत्ताति ठितिभागियत्ता, विसेसभागियत्ता वा । सुट्ठु विमुत्तन्ति विक्खम्भनविमुत्तिया सम्मदेव विमुत्तं । चित्तस्स कायस्स च हननतो विघातो, दुक्खं । परिदहनतो परिळाहो, कामदरथो । न वेदयति अनुप्पज्जनतो । निस्सरन्ति ततोति निस्सरणं । के निस्सरन्ति? कामा । एवञ्च कत्वा कामानन्ति कत्तरि सामिवचनं सुट्ठु युज्जति । यदग्गेन कामा ततो “निस्सटा”ति वुच्चन्ति, तदग्गेन ज्ञानमि कामतो “निस्सट”न्ति वत्तब्बतं लभतीति वुत्तं “कामेहि निस्सटत्ता”ति । एवं विक्खम्भनवसेन कामनिस्सरणं वत्वा इदानि समुच्छेदवसेन अच्चन्ततोव निस्सरणं दस्सेतुं “यो पना”तिआदि वुत्तं ।

सेसपदेसूति सेसकोट्टासेसु । अयं पन विसेसोति विसेसं वदन्तेन “तं ज्ञानं पादकं कत्वा”तिआदिको अविसेसोति वत्वा दुतियततियवारेसु सब्बसो अनामट्ठो, चतुत्थवारे पन अयमि विसेसोति दस्सेतुं “अच्चन्तनिस्सरणे चेत्थ अरहत्तफलं योजेतब्ब”न्ति वुत्तं ।

यस्मा अरूपज्झानं पादकं कत्वा अग्गमग्गं अधिगन्त्वा अरहत्ते ठितस्स चित्तं सब्बसो रूपेहि निस्सटं नाम होति । तस्स हि फलसमापत्तितो वुट्ठाय वीमंसनत्थं रूपाभिमुखं चित्तं पेसेन्तस्स इदमक्खातन्ति समथयानिकानं वसेन हेट्ठा चत्तारो वारा कथिता, इदं पन सुक्खविपस्सकस्स वसेनाति आह “सुद्धसङ्खारे”तिआदि । पुन सक्कायो नत्थीति उप्पन्नन्ति इदानि मे सक्कायप्पबन्धो नत्थीति वीमंसन्तस्स उप्पन्नं ।

विमुत्तायतनपञ्चकवण्णना

३२२. विमुत्तिया वट्टदुक्खतो विमुच्चनस्स आयतनानि कारणानि विमुत्तायतनानीति आह “विमुच्चनकारणानी”ति । पाळिअत्थं जानन्तस्साति “इध सीलं आगतं, इध समाधि, इध पज्जा”तिआदिना तं तं पाळिअत्थं याथावतो जानन्तस्स । पाळिं जानन्तस्साति तदत्थजोतनं पाळिं याथावतो उपधारेन्तस्स । तरुणपीतीति सज्जातमत्ता मुदुका पीति जायति । कथं जायति? यथादेसितधम्मं उपधारेन्तस्स तदनुच्छविकमेव अत्तनो कायवचीमनोसमाचारं परिग्गणहन्तस्स सोमनस्सप्पत्तस्स पमोदलक्खणं पामोज्जं जायति । तुट्ठाकारभूता बलवपीतीति पुरिमप्पन्नाय पीतिया वसेन लद्धासेवनत्ता अतिविय तुट्ठाकारभूता कायचित्तदरथपस्सम्भनसमत्थाय पस्सद्धिया पच्चयो

भवितुं समत्था बलप्पत्ता पीति जायति । यस्मा नामकाये पस्सद्धे रूपकायोपि पस्सद्धो एव होति, तस्मा “**नामकायो पटिपस्सम्भति**” इच्चेव वुत्तं । **सुखं पटिलभतीति** वक्खमानस्स चित्तसमाधानस्स पच्चयो भवितुं समत्थं चेतसिकं निरामिसं सुखं पटिलभति विन्दति । “समाधियती”ति एत्थ न यो कोचि समाधि अधिप्पेतो, अथ खो अनुत्तरसमाधीति दस्सेन्तो “**अरहत्त फलसमाधिना समाधियती**”ति आह । “**अयज्ही**”तिआदि तस्सा देसनाय तादिसस्स पुग्गलस्स यथावुत्तसमाधिपटिलाभस्स कारणभावविभावनं । तस्स विमुत्तायतनभावो । **ओसविकुत्तुन्ति** नयितुं । **समाधियेव समाधिनिमित्तन्ति** कम्मट्ठानपाळिआरुळ्हो समाधियेव परतो उप्पज्जनकभावनासमाधिस्स कारणभावतो समाधिनिमित्तं । तेनाह “**आचरियसन्तिके**”तिआदि ।

विमुत्ति वुच्चति अरहत्तं सब्बसो किलेसेहि पटिप्पस्सद्धिविमुत्तीति कत्वा । **परिपाचेन्तीति** साधेन्ति निष्पादेन्ति । **अनिच्चानुपस्सनाजाणे** निस्सयपच्चयभूते **उप्पन्नसज्जा**, तेन जाणेन सहगताति अत्थो । सेसेसुपि एसेव नयो । यं पनेत्थ वत्तब्बं, तं **विसुद्धिमगगसंवण्णनायं** (विसुद्धि० टी० १.३७, ३०६) वुत्तनयेन वेदितब्बं ।

पञ्चकवण्णना निड्डिता ।

छक्कवण्णना

३२३. अत्तानं अधि **अज्झत्ता**, अधि-सदो समासविसये अधिकारत्थं, पवत्तिअत्थज्ज गहेत्वा पवत्ततीति अत्तानं अधिकिच्च उद्दिस्स पवत्ता **अज्झत्ता**; अज्झत्तेसु भवानि **अज्झत्तिकानीति** नियकज्झत्तेसुपि अब्भन्तरानि चक्खादीनि वुच्चन्ति, तानि पन येन अज्झत्तभावेन “अज्झत्तिकानी”ति वुच्चन्ति, तमत्थं पाकटं कत्वा दस्सेन्तो “**अज्झत्तिकानी**”ति आह । सदत्थतो पन अज्झत्तज्झत्तानियेव **अज्झत्तज्झत्तिकानि** यथा “वेनयिको”ति (म० नि० १.२४६; अ० नि० ८.११; पारा० ८) दट्ठब्बं । **ततो अज्झत्ततोति** ततो अज्झत्तज्झत्ततो, यानि अज्झत्तिकानि वुत्तानि । अज्झत्तिकानज्झि पटियोगीनि बाहिरानि अज्झत्तधम्मनं विय बहिद्धाधम्मा । “अज्झत्तिकानी”ति हि सपरसन्तानिकानि चक्खादीनि वुच्चन्ति, तथा रूपादीनि “बाहिरानी”ति । अज्झत्तानि पन ससन्तानिका एव चक्खुरूपादयो, ततो अज्जेव बहिद्धाति । “विज्जाणसमूहो”ति एत्थ यदिपि तेसं विज्जाणानं समोधानं नत्थि भिन्नकालिकत्ता, चित्तेन पन एकज्झं अभिसंयूहनवसेन समूहता वुत्ता यथा “वेदनाक्खन्धो”ति । **चक्खुपसादनिस्सितन्ति** चक्खुपसादं निस्साय पच्चयं लभित्वा उप्पन्नं कुसलाकुसलविपाकविज्जाणं चक्खुविज्जाणतासामज्जेन एकज्झं कत्वा वुत्तं । **चक्खुसन्निस्सितो सम्फस्सो**, न चक्खुद्वारिको । **इमे दस सम्फस्सेति** इमे पसादवत्थुके दस विपाकसम्फस्से ठपेत्वा । **एतेनेव नयेनाति** एतेन फस्से वुत्तेनेव नयेन । तण्हाछक्के तण्हं आरब्भ पवत्तापि तण्हा **धम्मतण्हाति** वेदितब्बा ।

अप्पटिस्सयोति अप्पटिस्सवो, व-कारस्स य-कारं कत्वा निद्देसो । गरुना किस्मिज्जि वुत्ते गारववसेन पटिस्सवनं **पटिस्सवो**, पटिस्सवभूतं, तंसभागज्ज यं किज्जि गारवं, नत्थि एतस्मिं पटिस्सवोति **अप्पटिस्सवो**, गारवरहितो । तेनाह “**अनीचवुत्ती**”ति । यथा चेतियं उद्दिस्स कतं सत्थु कतसदिसं, एवं चेतियस्स पुरतो कतं सत्थु पुरतो कतसदिसं एवाति आह “**परिनिब्बुते पना**”तिआदि । **सक्कच्चं न गच्छतीति** आदरं गारवं उप्पादेत्वा न उपसङ्कमति । यथा सिक्खाय एकदेसे कोपिते, अगारवे च कते सब्बा सिक्खा कुप्पति, सब्बत्थ च अगारवं कतं नाम होति समुदायतो संवरसमादानं अवयवतो भेदोति । एवं **एकभिक्खुस्मिपि...पे०... अगारवो कतोव होति** । अनादरियमत्तेनपि सिक्खाय अपरिपूरियेवाति आह “**अपूरयमानोव सिक्खाय अगारवो नामा**”ति । **अप्पमादलक्खणं** सम्मापटिपत्ति । **दुविधन्ति** धम्मामिसवसेन दुविधं ।

सोमनस्सूपविचाराति सोमनस्ससहगता विचारा अधिप्पेता, उपसद्धो च निपातमत्तन्ति आह “सोमनस्ससम्पयुत्ता विचारा”ति । तथा हिस्स अभिधम्मे (ध० स० ८) “चारो विचारो...पे०... उपविचारो”ति निद्देशो पवत्तो । सोमनस्सकारणभूतन्ति सभावतो, सङ्कप्पतोपि सोमनस्सस्स उप्पत्तिया पच्चयभूतं । कामं परित्तभूमका वितक्कविचारा अज्जमज्जमवियोगिनो, किरियाभेदतो पन पठमाभिनिपातताय वितक्कस्स ब्यापारो सातिसयो । ततो परं विचारस्साति तं सन्धाय “वितक्केत्वा”ति पुब्बकालकिरियावसेन वत्वा “विचारेन परिच्छिन्दती”ति वुत्तं । लद्धपुब्बासेवनस्स विचारस्स ब्यापारो पज्जा विय होति । तथा हि “विचारो विचिकिच्छाय पटिपक्खो”ति पेटके वुत्तं । “दिट्ठिसामज्जगतो”ति एत्थ याय दिट्ठिया पुगगलो दिट्ठिसामज्जं गतो वुत्तो, सा पठममग्गसम्मादिट्ठि कोसम्बकसुत्ते अधिप्पेताति आह “कोसम्बकसुत्ते पठममग्गो कथितो”ति । इधाति इमस्मिं सुत्ते । चतूसुपि मग्गेषु सम्मादिट्ठि दिट्ठिगहणेन गहिताति आह “चत्तारोपि मग्गा कथिता”ति ।

विवादमूलककवण्णना

३२५. कोधनोति कुज्झनसीलो । यस्मा सो अप्पहीनकोधताय विगतकोधनो नाम न होति, तस्मा “कोधेन समन्नागतो”ति आह । उपनाहो एतस्स अत्थि, उपनय्हनसीलोति वा उपनाही । विवादो नाम उप्पज्जमानो येभ्य्येन पठमं द्विन्नं वसेन उप्पज्जतीति वुत्तं “द्विन्नं भिक्खूनं विवादो”ति । सो पन यथा बहूनं अनत्थावहो होति, तं निदस्सनमुखेन दस्सेन्तो “कथं”न्तिआदिमाह । अब्भन्तरपरिसायाति परिसब्भन्तरे ।

परगुणमक्खनाय पवत्तोपि अत्तनो कारकं गूथेन पहरन्तं गूथो विय पठमतं मक्खेतीति मक्खो, सो एतस्स अत्थीति मक्खी । पलासतीति पलासो, परस्स गुणे डंसित्वा विय अपनेतीति अत्थो, सो एतस्स अत्थीति पलासी । पलासी पुगगलो हि दुतियस्स धुरं न देति, समं पसारेत्वा तिट्ठति । तेनाह “युगग्गाहलक्खणेन पलासेन समन्नागतो”ति । “इस्सुकी”तिआदीनं पदानमत्थो हेट्ठा वुत्तनयत्ता सुविज्जेय्योव । कम्मपथप्पत्ताय मिच्छादिट्ठिया वसेनेत्थ मिच्छादिट्ठि वेदितब्बाति आह “नत्थिकवादी अहेतुकवादी अकिरियवादी”ति ।

निस्सरणियककवण्णना

३२६. हापेत्वाति कुसलचित्तं परिहापेत्वा पवत्तितुमेव अप्पदानवसेन । अभूतं ब्याकरणं ब्याकरोति “मेत्ता हि खो मे चेतोविमुत्ति भाविता”तिआदिना (अ० नि० ६.१३) अत्तनि अविज्जमानं गुणब्याहारं ब्याहरति । चेतोविमुत्ति-सदं अपेक्खित्वा “निस्सटा”ति वुत्तं । पुन ब्यापादो नत्थीति इदानीं मम ब्यापादो नाम नत्थि सब्बसो नत्थीति जत्वा ।

“अनिमित्ता”ति वत्वा येसं निमित्तानं अभावेन अरहत्तफलसमापत्तिया अनिमित्ता, तं दस्सेतुं “सा ही”तिआदि वुत्तं । तत्थ रागस्स निमित्तं, रागो एव वा निमित्तन्ति रागनिमित्तं । आदि-सद्धेन दोसनिमित्तादीनं सङ्गहो दट्ठब्बो । रूपवेदनादिसङ्खारनिमित्तं रूपनिमित्तादि । तेसज्जेव निच्चादिवसेन उपट्ठानं निच्चनिमित्तादि । तयिदं निमित्तं यस्मा सब्बेन सब्बं अरहत्तफले नत्थि, तस्मा वुत्तं “सा हि...पे०... अनिमित्ताति वुत्ता”ति । निमित्तं अनुसरतीति तं निमित्तं अनुगच्छति आरब्ध पवत्तति ।

अस्मिमानोति “अस्मी”ति पवत्तो अत्तविसयो मानो । अयं नाम अहं अस्मीति रूपलक्खणो, वेदनादीसु वा अज्जतरलक्खणो अयं नाम अत्ता अहं अस्मि । “अस्मी”ति मानो समुग्घाटीयति एतेनाति अस्मिमानसमुग्घातो,

अरहत्तमगो। पुन अस्मिमानो नत्थीति तस्स अनुप्पत्तिधम्मतापादनं कित्तेन्तो समुग्घातत्तमेव विभावेति।

अनुत्तरियादिछक्कवण्णना

३२७. नत्थि एतेसं उत्तरानि विसिद्धानीति अनुत्तरानि, अनुत्तरानि एव अनुत्तरियानि यथा अनन्तमेव आनन्तरियन्ति आह “अनुत्तरियानीति अनुत्तरानी”ति। दस्सनानुत्तरियं नाम अनुत्तरफलविसेसावहत्ता। एस नयो सेसेसुपि। सत्तविधअरियधनलाभोति सत्तविधसद्भादिलोकुत्तरधनलाभो। सिक्खत्तयपूरणन्ति अधिसीलसिक्खादीनं तिस्सन्नं सिक्खानं परिपूरणं। तत्थ परिपूरणं निप्परियायतो असेक्खानं वसेन वेदितब्बं। कल्याणपुथुज्जनतो पट्ठाय हि सत्त सेक्खा तिस्सो सिक्खा पूरेन्ति नाम, अरहा पन परिपुण्णसिक्खोति। इति इमानि अनुत्तरियानि लोकियलोकुत्तरानि कथितानि।

अनुस्सतियो एव दिट्ठधम्मिकसम्परायिकादिहितसुखानं कारणभावतो ठानानीति अनुस्सतिट्ठानानि। एवं अनुस्सरतोति यथा बुद्धानुस्सति विसेसाधिगमस्स ठानं होति, एवं “इतिपि सो भगवा”तिआदिना (दी० नि० १.१५७, २५५) बुद्धगुणे अनुस्सरन्तस्स। उपचारकम्मट्ठानन्ति पच्चक्खतो उपचारज्झानावहं कम्मट्ठानं, परम्पराय पन याव अरहत्ता लोकियलोकुत्तरविसेसावहं।

सततविहारछक्कवण्णना

३२८. निच्चविहाराति सब्बदा पवत्तनकविहारा। ठपेत्वा हि समापत्तिवेलं, भवङ्गवेलज्ज खीणासवा इमिनाव छळङ्गुपेक्खाविहारेन सब्बकालं विहरन्ति। चक्खुना रूपं दिस्वाति निस्सयवोहारेन वुत्तं। ससम्भारकथा हेसा यथा “धनुना विज्झती”ति। तस्मा निस्सयसीसेन निस्सितस्स गहणं दट्ठब्बन्ति आह “चक्खुविज्जाणेन दिस्वा”ति। इट्ठे अरज्जन्तोति इट्ठे आरम्मणे रागं अनुप्पादेन्तो मग्गेन समुच्छिन्नत्ता। नेव सुमनो होति गेहसितपेमवसेनपि। न दुम्भनो पसादज्जत्तवसेनपि। असमपेक्खनेति इट्ठेपि अनिट्ठेपि मज्झत्तेपि आरम्मणे न समं न सम्मा अयोनिसो गहणे। यो अखीणासवानं मोहो उप्पज्जति, तं अनुप्पादेन्तो मग्गेनेव तस्स समुग्घाटितत्ता। जाणुपेक्खावसेनेव उपेक्खको विहरति मज्झत्तो। अयज्जस्स पटिपत्तिवेपुल्लप्पत्तिया, पज्जावेपुल्लप्पत्तिया वाति आह “सतिया”तिआदि। छळङ्गुपेक्खाति छसु द्वारेसु पवत्ता सतिसम्पज्जस्स वसेन छावयवा उपेक्खा। जाणसम्पयुत्तचित्तानि लब्भन्ति तेहि विना सम्पजानताय असम्भवतो। महाचित्तानीति अट्ठपि महाकिरियचित्तानि लब्भन्ति। सततविहाराति जाणुप्पत्तिपच्चयरहितकालेपि पवत्तिभेदनतो। दस चित्तानीति अट्ठ महाकिरियचित्तानि हसितुप्पादवोड्ढन्नचित्तेहि सद्धिं दस चित्तानि लब्भन्ति। अरज्जनादुस्सनवसेन पवत्ति तेसम्पि साधारणाति। “उपेक्खको विहरती”ति वचनतो छळङ्गुपेक्खावसेन आगतानं इमेसं सततविहारानं “सोमनस्सं कथं लब्भती”ति चोदेत्वा “आसेवनतो लब्भती”ति सयमेव परिहरतीति। किञ्चापि खीणासवो इट्ठानिट्ठेपि आरम्मणे मज्झत्ते विय बहुलं उपेक्खको विहरति अत्तनो परिसुद्धपकतिभावाविजहनतो, कदाचि पन तथा चेतोभिसङ्खाराभावे यं तं सभावतो इट्ठं आरम्मणं, तत्थ याथावसभावगहणवसेनपि अरहतो चित्तं सोमनस्ससहगतं हुत्वा पवत्ततेव, तज्ज खो पुब्बासेवनवसेन। तेनाह “आसेवनतो लब्भती”ति।

अभिजातिछक्कवण्णना

३२९. “अभिजातियो”ति एत्थ अभि-सद्दो उपसग्गमत्तं, न अत्थविसेसजोतकोति आह “जातियो”ति। अभिजायतीति एत्थापि एसेव नयो। जायतीति च अन्तो गधहेतु अत्थपदं, उप्पादेतीति अत्थो। जातिया,

तंनिब्बत्तककम्मानञ्च कण्हसुक्कपरियायताय यं वत्तब्बं, तं हेट्ठा वुत्तमेव । पटिप्पस्सम्भनवसेन किलेसानं निब्बापनतो निब्बानं सचे कण्हं भवेय्य यथा तं दसविधं दुस्सील्यकम्मं । सचे सुक्कं भवेय्य यथा तं दानसीलादिकुसलकम्मं । द्विन्नम्पि कण्हसुक्कविपाकानं । अरहत्तं अधिप्पेतं “अभिजायती”ति वचनतो । तं किलेसनिब्बानन्ते जातत्ता निब्बानं यथा रागादीनं खयन्ते जातत्ता रागक्खयो दोसक्खयो मोहक्खयोति ।

निब्बेधभागियछक्कवण्णना

निब्बेधो वुच्चति निब्बानं मग्गजाणेन निब्बिज्झितब्बट्ठेन, पटिविज्झितब्बट्ठेनाति अत्थो । निरोधानुपस्सनाजाणेति निरोधानुपस्सनाजाणे निस्सयपच्चयभूते उप्पन्ना सञ्जा, तेन सहगताति अत्थो ।

छक्कवण्णना निट्ठिता ।

सत्तकवण्णना

३३०. सम्पत्तिपटिलाभट्ठेनाति सीलसम्पत्तिआदीनं सम्मासम्बोधिपरियोसानानं सम्पत्तीनं पटिलाभापनट्ठेन, सम्पत्तीनं वा पटिलाभो सम्पत्तिपटिलाभो, तस्स कारणं सम्पत्तिपटिलाभट्ठो, तेन सम्पत्तिपटिलाभट्ठेन । तेनेवाह “सम्पत्तीनं पटिलाभकारणतो”ति । सद्धाव उभयहितत्थिकेहि धनायितब्बट्ठेन धनं सद्धाधनं । एत्थाति एतेसु धनेसु । सब्बसेट्ठं सब्बेसं पटिलाभकारणभावतो, तेसञ्च संकिलेसविसोधनेन महाजुतिकमहाविप्फारभावापादनतो । तेनाह “पञ्जाय ही”तिआदि । तत्थ पञ्जाय ठत्वाति कम्मस्सकतापञ्जाय पतिट्ठाय सुचरितादीनि पूरेत्वा सग्गूपगा होन्ति । तत्थ चेव पारमिता पञ्जाय च ठत्वा सावकपारमिजाणादीनि पटिविज्झन्ति ।

समाधिं परिक्खरोन्ति अभिसङ्खरोन्तीति समाधिपरिक्खारा, समाधिस्स सम्भारभूता सम्मादिट्ठिआदयो । इध पन सहकारीकारणभूता अधिप्पेताति आह “समाधिपरिवारा”ति ।

असतं असाधूनं धम्मा तेसं असाधुभावसाधनतो । असन्ताति असुन्दरा गारय्हा । तेनाह “लामका”ति । “विपस्सकस्सेव कथिता”ति वत्त्वा तस्स विपस्सनानिब्बत्तिं दस्सेतुं “तेसुपी”तिआदि वुत्तं । चतुन्नम्पि हि सच्चानं विसेसेन दस्सनतो मग्गपञ्जा सातिसयं “विपस्सना”ति वत्तब्बा, तंसमङ्गी च अरियो विपस्सनकोति ।

सप्पुरिसानं धम्माति सप्पुरिसानंयेव धम्मा, न असप्पुरिसानं । धम्मानुधम्मपटिपत्तिया एव हि धम्मञ्जुआदिभावो, न पाळिधम्मपठनादिमत्तेन । भासितस्साति सुत्तगेय्यादिभासितस्स चेव तदञ्जस्स च अत्तत्थपरत्थबोधकस्स पदस्स । अत्थकुसलतावसेन अत्थं जानातीति अत्थञ्जू । अत्तानं जानातीति याथावतो अत्तनो पमाणजाननवसेन अत्तानं जानाति । पटिग्गहणपरिभोगमत्तञ्जुताहि एव परियेसनविस्सज्जनमत्तञ्जुतापि बोधिता होन्तीति “पटिग्गहणपरिभोगेसु” इच्चेव वुत्तं । एवज्झि ता अनवज्जा होन्तीति । योगस्स अधिगमायाति भावनाय अनुयुज्जनस्स । अतिसम्बाधन्ति अतिखुद्दकं अतिक्खपञ्जस्स तावता कालेन तीरेतुं असक्कुण्येय्यत्ता । अट्ठविधं परिसन्ति खत्तियपरिसादिकं अट्ठविधं परिसं । भिक्खुपरिसादिकं चतुब्बिधं खत्तियपरिसादिकं मनुस्सपरिसंयेव पुन चतुब्बिधं गहेत्वा अट्ठविधं वदन्ति अपरे । “इमं मे सेवन्तस्स अकुसला धम्मा परिहायन्ति, कुसला धम्मा अभिवट्ठन्ति, तस्मा सेवितब्बो, विपरियायतो तदञ्जो असेवितब्बो”ति एवं सेवितब्बासेवितब्बं पुग्गलं जानातीति पुग्गलञ्जू । एवं तेसं पुग्गलानम्पि बोधनं उक्कट्ठं, निहीनं वा जानाति नाम ।

३३१. “निद्वसवत्थूनी”ति । “आदि-सद्वलोपेनायं निद्वेसो”ति आह “निद्वसादिवत्थूनी”ति । नत्थि दानि इमस्स दसाति निद्वसो । पज्जोति जातुं इच्छितो अत्थो । पुन दसवस्सो न होतीति तेसं मतिमत्तन्ति दस्सेतुं “सो किरा”ति किरसद्दग्गहणं । “निद्वसो”ति चेत्तं देसनामत्तं, तस्स निब्बीसादिभावस्स विय निन्नवादिभावस्स च इच्छितत्ताति दस्सेतुं “न केवलज्जा”तिआदि वुत्तं । गामे विचरन्तोति गामे पिण्डाय विचरन्तो ।

न इदं तिथियानं अधिवचनं तेसु तन्निमित्तस्स अभावा । सासनेपि सेक्खस्सापि न इदं अधिवचनं, किमङ्गं पन पुथुज्जनस्स । यस्स पनेतं अधिवचनं, येन च कारणेन, तं दस्सेतुं “खीणासवस्सेत”न्तिआदि वुत्तं । अप्पटिसन्धिकभावो हिस्स पच्चक्खतो कारणं । परम्पराय इतरानि, यानि पाळियं आगतानि ।

सिक्खाय सम्मदेव आदानं सिक्खासमादानं, तं पनस्सा पारिपूरिया वेदितब्बन्ति आह “सिक्खत्तयपूरणे”ति । सिक्खाय वा सम्मदेव आदितो पट्टाय रक्खणं सिक्खासमादानं, तज्ज अत्थतो पूरणे परिच्छिन्नं अरक्खणे सब्बेन सब्बं अभावतो, रक्खणे च परिपूरणतो । बहलच्छन्दोति दळ्ळहच्छन्दो । आयतिन्ति अनन्तरानागतदिवसादिकालो अधिप्पेतो, न अनागतभवोति आह “अनागते पुनदिवसादीसुपी”ति । सिक्खं परिपूरेन्तस्स तत्थ निविट्ठुअत्थिता अविगतपेमता, तेभूमकधम्मनं अनिच्चादिवसेन सम्मदेव निज्झानं धम्मनिसामनाति आह “विपस्सनायेतं अधिवचन”न्ति । तण्हाविनयनेति विरागानुपस्सनादिविपस्सनाजाणानुभावसिद्धे तण्हाविकखम्भने । एकीभावेति गणसङ्गणिकाकिलेससङ्गणिकाविगमसिद्धे विवेकभावे । वीरियारम्भेति सम्मप्यधानवीरियस्स पग्गण्हे, तं पन सब्बसो वीरियस्स परिव्रूहं होतीति आह “कायिकचेतसिक्खस्स वीरियस्स पूरणे”ति । सतियज्जेव नेपक्कभावे चाति सतोकारिताय चैव सम्पजानकारिताय च । सतिसम्पजज्जबलेनेव वीरियारम्भो इज्झति । दिट्ठिपटिवेधेति सम्मादिट्ठिया पटिविज्झने । तेनाह “मग्गदस्सने”ति । सच्चसम्पटिवेधे हि इज्झमाने मग्गसम्मादिट्ठि सिद्धा एव होति ।

असुभानुपस्सनाजाणेति दसविधस्स, एकादसविधस्सापि वा असुभस्स अनुपस्सनावसेन पवत्तजाणे । इदज्झि दुक्खानुपस्सनाय परिचयजाणं । आदीनवानुपस्सनाजाणेति सङ्खारानं अनिच्चदुक्खविपरिणामतासंसूचितस्स आदीनवस्स अनुपस्सनावसेन पवत्तजाणे । अप्पहीनट्ठेनाति मग्गेन असमुच्छिन्नभावेन । अनुसेन्तीति सन्ताने अनु अनु सयन्ति । कारणलाभे हि सति उप्पन्नारहा किलेसा सन्ताने अनु अनु सयिता विय होन्ति, तस्मा ते तदवत्था “अनुसया”ति वुच्चन्ति । थामगतोति थामप्यत्तो । थामगमनज्ज अज्जेहि असाधारणो कामरागादीनमेव आवेणिको सभावो दट्ठब्बो । तथा हि वुत्तं अभिधम्मे “थामगतानुसयं पजहती”ति । कामरागो एव अनुसयो कामरागानुसयो । ये पन “कामरागस्स अनुसयो कामरागानुसयो”ति वदन्ति, तं तेसं मतिमत्तं । न हि कामरागविनिमुत्तो कामरागानुसयो नाम कोचि अत्थि । यदि “तस्स बीज”न्ति वदेय्युं, तम्पि तब्बिनिमुत्तं परमत्थतो न उपलब्भतेवाति । एसेव नयो सेसेसुपि ।

अधिकरणसमथसत्तकवण्णना

अधिकरीयन्ति एत्थाति अधिकरणानि । के अधिकरीयन्ति? समथा । कथं अधिकरीयन्तीति? समनवसेन, तस्मा ते तेसं समनवसेन पवत्तन्तीति आह “अधिकरणानि समेन्ती”तिआदि । उप्पन्नानं उप्पन्नानन्ति उट्ठितानं उट्ठितानं । समथत्थन्ति समनत्थं ।

“अट्टारसहि वत्थूही”ति लक्खणवचनमेतं यथा “यदि मे ब्याधी दाहेय्युं दातब्बमिदमोसध”न्ति, तस्मा तेसु अज्जतरज्जतरेन विवदन्ता “अट्टारसहि वत्थूहि विवदन्ती”ति वुच्चन्ति । उपवदनाति अक्कोसो । चोदनाति अनुयोगो ।

अधिकरणस्स सम्मुखाव विनयनतो **सम्मुखाविनयो**। सन्निपतितपरिसाय धम्मवादीनं येभ्य्यताय येभ्य्यसिककम्मस्स करणं **येभ्य्यसिका**। अयन्ति अयं यथावुत्ता चतुब्बिधा सम्मुखता **सम्मुखाविनयो नाम**।

सङ्गसामगिवसेन सम्मुखीभावो, न यथा तथा कारकपुग्गलानं सम्मुखाता। भूतताति तच्छता। सच्चपरियायो हि इध **धम्म**-सद्दो “धम्मवादी”तिआदीसु (दी० नि० १.९, १९४) विय। विनेति एतेनाति **विनयो**, तस्स तस्स अधिकरणस्स वूपसमनाय भगवता वुत्तविधि, तस्स विनयस्स सम्मुखता **विनयसम्मुखता**। तेनाह “यथा तं...पे०... सम्मुखता”ति। येनाति येन पुग्गलेन। विवादवत्थुसङ्घाते अत्थे पच्चत्थिका **अत्थपच्चत्थिका**। **सङ्गसम्मुखता परिहायति** सम्मतपुग्गलेहेव वूपसमनतो।

नन्ति विवादाधिकरणं। “न छन्दागतिं गच्छती”तिआदिना वुत्तं **पञ्चङ्गसमन्नागतं**। गुळहकादीसु अलज्जुस्सन्नाय परिसाय गुळहको सलाकग्गाहो कातब्बो लज्जुस्सन्नाय विवटको, बालुस्सन्नाय सकण्णजप्पको। यस्सा किरियाय धम्मवादीनो बहुतरा, सा **येभ्य्यसिका**ति आह “धम्मवादीनं येभ्य्यताया”तिआदि।

“चतूहि समथेहि सम्मती”ति इदं सब्बसङ्गाहिकवसेन वुत्तं। तत्थ पन द्वीहि द्वीहि एव वूपसमनं दट्ठब्बं। **एवं विनिच्छित्तन्ति** सचे आपत्ति नत्थि, उभो खमापेत्वा, अथ अत्थि, आपत्तिं दस्सेत्वा रोपनवसेन विनिच्छित्तं। पटिकम्मं पन आपत्ताधिकरणसमथे परतो आगमिस्सति।

न समणसारुप्यं **अस्सामणकं**, समणेहि अकत्तब्बं, तस्मिं। **अज्झाचारे** वीतिक्कमे सति।

पटिचरतोति पटिच्छादेन्तस्स। पापुस्सन्ताय **पापियो**, पुग्गलो, तस्स कत्तब्बकम्मं तस्स **पापियसिकं**। **सम्मुखाविनयेनेव वूपसमो नत्थि** पटिज्जाय तथारूपाय, खन्तिया वा विना अवूपसमनतो।

एत्थाति आपत्तिदेसनाय। पटिज्जाते आपन्नभावादिके करणं किरिया “आयतिं संवरेय्यासी”ति, परिवासदानादिवसेन च पवत्तं वचीकम्मं **पटिज्जातकरणं**।

यथानुरूपन्ति “द्वीहि समथेहि चतूहि तीहि एकेना”ति एवं वुत्तनयेन यथानुरूपं। **एत्थाति** इमस्मिं सुत्ते, इमस्मिं वा समथविचारे। **विनिच्छयनयोति** विनिच्छये नयमत्तं। तेनाह “**वित्थारो पना**”तिआदि। **समन्तपासादिकायं** विनयट्ठकथाय (चूळव० अट्ठ० १८४-१८७) **वुत्तो**, तस्मा वुत्तनयेनेव वेदितब्बोति अधिप्पायो।

सत्तकवण्णना निट्ठिता।

निट्ठिता च दुतियभाणवारवण्णना।

अट्ठकवण्णना

३३३. अयाथावाति न याथावा। अनिय्यानिकताय **मिच्छासभावा**। विपरीतवुत्तिकताय **याथावा**। निय्यानिकताय **सम्मासभावा** अविपरीतवुत्तिका।

३३४. कुच्छित्तं सीदतीति **कुसीतो** द-कारस्स त-कारं कत्वा। यस्स धम्मस्स वसेन पुग्गलो “कुसीतो”ति वुच्चति,

सो कुसीतभावो इध कुसीत-सद्देन वुत्तो । विनापि हि भावजोतनं सद्दं भावत्थो विज्जायति यथा “पटस्स सुक्क”न्ति, तस्मा कुसीतभाववत्थूनीति अत्थो । तेनाह “कोसज्जकारणानीति अत्थो”ति । **कम्मं** नाम समणसारुपं ईदिसन्ति आह “चीवरविचारणादी”ति । वीरियन्ति पधानवीरियं, तं पन चङ्कमनवसेन करणे “कायिक”न्तिपि वत्तब्बतं लभतीति आह “दुविधम्पी”ति । पत्तियाति पापुणनत्थं । ओसीदनन्ति भावनानुयोगे सङ्कोचो । मासेहि आचितं निचितं वियाति मासाचितं, तं मज्जे । यस्मा मासा तित्ताविसेसेन गरुका होन्ति, तस्मा “यथा तित्तमासो”तिआदि वुत्तं । वुट्ठितो होति गिलानभावाति अधिप्पायो ।

३३५. तेसन्ति आरम्भवत्थूनं । इमिनाव नयेनाति इमिना कुसीतवत्थूसु वुत्तेनेव नयेन । “दुविधम्पि वीरियं आरभती”तिआदिना, “इदं पठमन्ति इदं हन्दाहं वीरियं आरभामीति एवं भावनाय अब्भुस्सहनं पठमं आरम्भवत्थू”तिआदिना च अत्थो वेदितब्बो । यथा तथा पठमं पवत्तं अब्भुस्सहनज्झि उपरि वीरियारम्भस्स कारणं होति । अनुरूपपच्चवेक्खणासहितानि हि अब्भुस्सहनानि, तम्मूलकानि वा पच्चवेक्खणानि अट्ठ आरम्भवत्थूनि वेदितब्बानि ।

३३६. आसज्जाति यस्स देति, तस्स आमोदनहेतु तेन समागमनिमित्तं । तेनाह “एत्थ आसादनं दानकारणं नामा”ति । भयाति भयहेतु । ननु भयं नाम लद्धुकामता रागादयो विय चेतनाय अविसुद्धिकरं, तं कस्मा इध गहितन्ति? न इदं तादिसं चोरभयादिं सन्धाय वुत्तन्ति दस्सेतुं “तत्था”तिआदि वुत्तं । अदासि मेति यं पुब्बे कतं उपकारं चिन्तेत्वा दीयति, तं सन्धाय वुत्तं । दस्सति मेति पच्चुपकारासीसाय यं दीयति, तं सन्धाय वदति । साहु दानन्ति “दानं नामेतं पण्डितपज्जत्त”न्ति साधुसमाचारे ठत्वा देति । अलङ्कारत्थन्ति उपसोभनत्थं । परिवारत्थन्ति परिक्रारत्थं । दानज्झि दत्त्वा तं पच्चवेक्खन्तस्स पामोज्जपीतिसोमनस्सादयो उपपज्जन्ति, लोभदोसइस्सामच्छेरादयो विदूरी भवन्ति । इदानि दानं अनुकूलधम्मपरिबूहनेन, पच्चनीकधम्मविदूरीभावकरणेन च भावनाचित्तस्स उपसोभनाय च परिक्राराय च होतीति “अलङ्कारत्थं, परिवारत्थज्च देती”ति वुत्तं । तेनाह “दानज्झि चित्तं मुदुकं करोती”तिआदि । मुदुचित्तो होति लद्धा दायके “इमिना मय्हं सङ्गहो कतो”ति, दातापि लद्धरि । तेन वुत्तं “उभिन्नम्पि चित्तं मुदुकं करोती”ति ।

अदन्तदमनन्ति अदन्ता अनस्सवापिस्स दानेन दन्ता अस्सवा होन्ति वसे वत्तन्ति । अदानं दन्तदूसकन्ति अदानं पन पुब्बे दन्तानं अस्सवानम्पि विधातुप्पादनेन चित्तं दूसेति । उन्नमन्ति दायका, पियंवदा च परेसं गरुचिक्तीकारट्ठानताय । नमन्ति पटिग्गाहका दानेन, पियवाचाय लद्धसङ्गहा सङ्गाहकानं ।

चित्तालङ्कारदानमेव उत्तमं अनुपक्विकलिट्ठताय, सुपरिसुद्धताय, गुणविसेसपच्चयताय च ।

३३७. दानपच्चयाति दानकारणा, दानमयपुज्जस्स कतत्ता उपचितत्ताति अत्थो । उपपत्तियोति मनुस्सेसु, देवेसु च निब्बत्तियो । ठपेतीति एकवारमेव अनुपपज्जित्वा यथा उपरूपरि तेनेवाकारेन पवत्तति, एवं ठपेति । तदेव चस अधिट्ठानन्ति आह “तस्सेव वेवचन”न्ति । वट्ठेतीति ब्रूहेति, न हापेति । विमुत्तन्ति अधिमुत्तं, निन्नं पोणं पब्भारन्ति अत्थो । विमुत्तन्ति वा विसिट्ठं । निप्परियायतो उत्तरि नाम पणीतं मज्झेपि हीनमज्झिमविभागस्स लब्भनतोति वुत्तं “उत्तरि अभावितन्ति ततो उपरि मग्गफलत्थाय अभावित”न्ति । संवत्तति तथा पणिहितं दानमयचित्तं । यं पन पाळियं “तज्ज खो”तिआदि वुत्तं, तं ततूपपत्तिया विबन्धकारदुस्सील्याभावदस्सनपरं दट्ठब्बं, न दानमयस्स पुज्जस्स केवलस्स तंसंवत्तनतादस्सनपरन्ति दट्ठब्बं ।

समुच्छिन्नरागस्साति समुच्छिन्नकामरागस्स । तस्स हि सिया ब्रह्मलोके उपपत्ति, न समुच्छिन्नभवरागस्स । वीतरागगहणेन चेत्य कामेसु वीतरागता अधिप्पेता, याय ब्रह्मलोकूपपत्ति सिया । तेनाह “दानमत्तेनेवा”तिआदि । यदि

एवं दानं तत्थ किं अत्थियन्ति आह “दानं पना”तिआदि । दानेन मुदुचित्तोति बद्धाघाते वेरीपुग्गलेपि अत्तनो दानसम्पटिच्छनेन मुदुभूतचित्तो ।

परिसीदति परितो इतो चित्तो च समागच्छतीति परिसा, समूहो ।

लोकस्स धम्माति सत्तलोकस्स अवस्सम्भावी धम्मा । तेनाह “एतेहि मुत्तो नाम नत्थी”तिआदि । यस्मा ते लोकधम्मा अपरापरं कदाचि लोकं अनुपतन्ति, कदाचि ते लोको, तस्मा तज्जेत्थ अत्थं दस्सेन्तो “अट्ठिमे”ति सुत्तपदं (अ० नि० ८.६) आहरि । घासच्छादनादीनं लद्धि लाभो, तानि एव वा लद्धब्बतो लाभो । तदभावो अलाभो । लाभग्गहणेन चेत्य तब्बिसयो अनुरोधो गहितो, अलाभग्गहणेन विरोधो । यस्मा लोहिते सति तदुपघातवसेन पुब्बो विय अनुरोधे सति विरोधो लद्धावसरो एव होति, तस्मा वुत्तं “लाभे आगते अलाभो आगतो एवा”ति । एस नयो यसादीसुपि ।

अट्टकवण्णना निट्ठिता ।

नवकवण्णना

३४०. वसति तत्थ फलं तन्निमित्तकताय पवत्ततीति वत्थु, कारणन्ति वुत्तोवायमत्थो । तेनाह “आघातवत्थूनीति आघातकारणानी”ति । कोपो नामायं यस्मिं वत्थुस्मिं उप्पज्जति, न तत्थ एकवारमेव उप्पज्जति, अथ खो पुनपि उप्पज्जतेवाति वुत्तं “बन्धती”ति । अथ वा यो पच्चयविसेसेन उप्पज्जमानो आघातो सविसये बद्धो विय न विगच्छति, पुनपि उप्पज्जेय्येव, तं सन्धायाह “आघातं बन्धती”ति । तं पनस्स पच्चयवसेन निब्बत्तनं उप्पादनमेवाति वुत्तं “करोति उप्पादेती”ति ।

तं कुतेत्थ लब्भाति एत्थ तन्ति किरियापरामसनं, पदज्झाहारेन च अत्थो वेदितब्बोति दस्सेन्तो “तं अनत्थचरणं मा अहोसी”तिआदिमाह । केन कारणेन लद्धब्बं निरत्थकभावतो । कम्मस्सका हि सत्ता, ते कस्स रुचिया दुक्खिता, सुखिता वा भवन्ति, तस्मा केवलं तस्मिं मय्हं कुज्झनमत्तं एवाति अधिप्पायो । अथ वा तं कोपकरणमेत्थ पुग्गले कुतो लब्भा परमत्थतो कुज्झितब्बस्स, कुज्झनकस्स च अभावतो । सङ्खारमत्तज्हेतं, यदिदं खन्धपञ्चकं । यं “सत्तो”ति वुच्चति, ते सङ्खारा इत्तरकाला खणिका, कस्स को कुज्झतीति अत्थो । लाभा नाम के सियुं अज्जत्र अनुप्पत्तितो ।

३४१. सत्ता आवसन्ति एतेसूति सत्तावासा । नानत्तकाया नानत्तसज्जी आदिभेदा सत्तनिकाया । यस्मा ते ते सत्तनिकाया तप्परियापन्नानं सत्तानं ताय एव तप्परियापन्नताय आधारो विय वत्तब्बतं अरहन्ति समुदायाधारताय अवयवस्स यथा “रुक्खे साखा”ति, तस्मा “सत्तानं आवासा, वसनट्ठानानीति अत्थो”ति वुत्तं । सुद्धावासापि सत्तावासोव “न सो, भिक्खवे, सत्तावासो सुलभरूपो, यो मया अनावुत्थपुब्बो इमिना दीघेन अद्धुना अज्जत्र सुद्धावासेहि देवेही”ति वचनतो । यदि एवं कस्मा इध न गहिताति तत्थ कारणमाह “असब्बकालिकत्ता”तिआदि । वेहप्फलो पन चतुत्थंयेव सत्तावासं भजतीति दट्ठब्बं ।

३४२. ओपसमिकोति वट्टदुक्खस्स उपसमावहो, तं पन वट्टदुक्खं किलेसेसु उपसन्तेसु उपसमति, न अज्जथा, तस्मा “किलेसूपसमकरो”ति वुत्तं । तक्करं सम्बोधं गमेतीति सम्बोधगामी ।

यस्मिं देवनिकाये धम्मदेसना न वियुज्जति सवनस्सेव अभावतो, सो पाळियं “दीघायुको देवनिकायो”ति

अधिपेतोति आह “असज्जभवं वा अरूपभवं वा”ति ।

३४३. अनुपुब्बतो विहरितब्बाति अनुपुब्बविहारा । अनुपटिपाटियाति अनुक्कमेन । समापज्जितब्बविहाराति समापज्जित्वा समङ्गिनो हुत्वा विहरितब्बविहारा ।

३४४. अनुपुब्बनिरोधाति अनुपुब्बेन अनुक्कमेन पवत्तेतब्बनिरोधा । तेनाह “अनुपटिपाटिया निरोधा”ति ।

नवकवण्णना निट्ठिता ।

दसकवण्णना

३४५. येहि सीलादीहि समन्नागतो भिक्खु धम्मसरणताय धम्मेनेव नाथति ईसति अभिभवतीति नाथोति वुच्चति, ते तस्स नाथभावकरा धम्मा “नाथकरणा”ति वुत्ताति आह “सनाथा... पे०... पतिट्ठाकरा धम्मा”ति । तत्थ अत्तनो पतिट्ठाकराति यस्स नाथभावकरा, तस्स अत्तनो पतिट्ठाविधायिनो । अप्पतिट्ठो अनाथो, सप्पतिट्ठो सनाथोति पतिट्ठत्थो नाथत्थो ।

कल्याणगुणयोगतो कल्याणाति दस्सेन्तो “सीलादिगुणसम्पन्ना”ति आह । मिज्जनलक्खणा मित्ता एतस्स अत्थीति मित्तो, सो वुत्तनयेन कल्याणो अस्स अत्थीति तस्स अत्थितामत्तं कल्याणमित्तपदेन वुत्तं । अस्स तेन सब्बकालं अविजहितवासोति तं दस्सेतुं “कल्याणसहायो”ति वुत्तन्ति आह “तेवस्सा”तिआदि । तेवस्साति ते एव कल्याणमित्ता अस्स भिक्खुनो । सह अयनतोति सह वत्तनतो । असमोधाने चित्तेन, समोधाने पन चित्तेन चेव कायेन च सम्पवङ्को ।

सुखं वचो एतस्मिं अनुकूलगाहिम्हि आदरगारववति पुग्गलेति सुवचो । तेनाह “सुखेन वत्तब्बो”तिआदि । खमोति खन्ता, तमेवस्स खमभावं दस्सेतुं “गाळहेना”तिआदि वुत्तं । वामतोति मिच्छा, अयोनिसो वा गण्हाति । पटिप्फरतीति पटाणिकभावेन तिट्ठति । पदक्खिणं गण्हातीति सम्मा योनिसो वा गण्हाति ।

उच्चावचानीति विपुलखुद्दकानि । तत्तुपगमनीयाति तत्र तत्र महन्ते, खुद्दके च कम्मे साधनवसेन उपायेन उपगच्छन्तिया, तस्स तस्स कम्मस्स निप्फादनेन समत्थायाति अत्थो । तत्तुपायायाति वा तत्र तत्र कम्मे साधेतब्बे उपायभूताय ।

धम्मे अस्स कामोति धम्मकामोति ब्यधिकरणानंपि बाहिरत्थो समासो होतीति कत्वा वुत्तं । कामेतब्बतो वा पियायितब्बतो कामो, धम्मो; धम्मो कामो अस्साति धम्मकामो । धम्मोति परियत्तिधम्मो अधिपेतोति आह “तेपिटकं बुद्धवचनं पियायतीति अत्थो”ति । समुदाहरणं कथनं समुदाहारो, पियो समुदाहारो एतस्साति पियसमुदाहारो । सयज्जाति एत्थ च-सद्देन “सक्कच्च”न्ति पदं अनुकट्ठति, तेन सयज्ज सक्कच्चं देसेतुकामो होतीति योजना । अभिधम्मो सत्तप्पकरणानि अधिको अभिविसिट्ठो च परियत्तिधम्मोति कत्वा । विनयो उभतोविभङ्गा विनयनतो कायवाचानं । अभिविनयो खन्धकपरिवारा विसेतो आभिसमाचारिकधम्मकित्तनतो । आभिसमाचारिकधम्मपारिपूरिवसेनेव हि आदिब्रह्मचरियकधम्मपारिपूरी । धम्मो एव पिटकद्वयस्सापि परियत्तिधम्मभावतो । मग्गफलानि अभिधम्मो निब्बानधम्मस्स अभिमुखोति कत्वा । किलेसवूपसमकारणं पुब्बभागिया तस्सो सिक्खा सङ्खेपतो विवट्ठनिस्सितो समथो विपस्सना च । बहुलपामोज्जोति बलवपामोज्जो ।

कारणत्थेति निमित्तत्थे। कुसलधम्मनिमित्तं हिस्स वीरियारम्भो। तेनाह “तेसं अधिगमत्थाया”ति। कुसलेसु धम्मेसूति वा निष्पादेतब्बे भुम्मं यथा “चेतसो अवूपसमे अयोनिमनसिकारपदद्वान”न्ति।

३४६. सकलद्वेनाति निस्सेसद्वेन, अनवसेसफरणवसेन चेत्य सकलद्वो वेदितब्बो, असुभनिमित्तादीसु विय एकदेसे अट्टत्वा अनवसेसतो गहेतब्बद्वेनाति अत्थो। तदारम्माणानं धम्मानन्ति तं कसिणं आरब्ध पवत्तनकधम्मानं। खेत्तद्वेनाति उप्पत्तिद्वानद्वेन। अधिद्वानद्वेनाति पवत्तिद्वानभावेन। यथा खेत्तं सस्सानं उप्पत्तिद्वानं वट्ठिद्वानञ्च, एवमेतं ज्ञानं तंसम्पयुत्तानं धम्मानन्ति, योगिनो वा सुखविसेसानं कारणभावेन। “परिच्छिन्दित्वा” ति इदं उद्धं अधोति एत्थापि योजेतब्बं। परिच्छिन्दित्वा एव हि सब्बत्थ कसिणं वट्ठेतब्बं। तेन तेन वा कारणेनाति तेन तेन उपरिआदीसु कसिणवट्ठनकारणेन। यथा किन्ति आह “आलोकमिव रूपदस्सनकामो”ति। यथा दिब्बचक्खुना उद्धं चे रूपं दट्ठुकामो, उद्धं आलोकं पसारेति, अधो चे अधो, समन्ततो चे रूपं दट्ठुकामो समन्ततो आलोकं पसारेति; एवमयं कसिणन्ति अत्थो।

एकस्साति पथवीकसिणादीसु एकेकस्स। अज्जभावानुपगमनत्थन्ति अज्जकसिणभावानुपगमनदीपनत्थं, अज्जस्स वा कसिणभावानुपगमनदीपनत्थं, न हि अज्जेन पसारितकसिणं ततो अज्जेन पसारितकसिणभावं उपगच्छति, एवम्पि नेसं अज्जकसिणसम्भेदाभावो वेदितब्बो। न अज्जं पथवीआदि। न हि उदके ठितद्वाने ससम्भारपथवी अत्थि। अज्जो कसिणसम्भेदोति आपोकसिणादिना सङ्करो। सब्बत्थाति सब्बेसु सेसकसिणेसु। एकदेसे अट्टत्वा अनवसेसफरणं पमाणस्स अगगहणतो अप्पमाणं। तेनेव हि नेसं कसिणसमज्जा। तथा चाह “तज्ही”तिआदि। चेतसा फरन्तोति भावनाचित्तेन आरम्भणं करोन्तो। भावनाचित्तज्हि कसिणं परित्तं वा विपुलं वा सकलमेव मनसि करोति, न एकदेसं।

कसिणुग्घाटिमाकासे पवत्तविज्जाणं फरणअप्पमाणवसेन “विज्जाणकसिण”न्ति वुत्तं। तथा हि तं “विज्जाणञ्च”न्ति वुच्चति। कसिणवसेनाति यथाउग्घाटितकसिणवसेन। कसिणुग्घाटिमाकासे उद्धंअधोतिरियता वेदितब्बा। यत्तकज्हि ठानं कसिणं पसारितं, तत्तकं आकासभावनावसेन आकासो होतीति; एवं यत्तकं ठानं आकासं हुत्वा उपट्ठितं, तत्तकं सकलमेव फरित्वा विज्जाणस्स पवत्तनतो आगमनवसेन विज्जाणकसिणेपि उद्धंअधोतिरियता वुत्ताति आह “कसिणुग्घाटिं आकासवसेन तत्थ पवत्तविज्जाणे उद्धंअधोतिरियता वेदितब्बा”ति।

अकुसलकम्मपथदसकवण्णना

३४७. पथभूतत्ताति तेसं पवत्तनुपायत्ता मग्गभूतत्ता। मेथुनसमाचारेसूति सदारसन्तोसपरदारगमनवसेन दुविधेसु मेथुनसमाचारेसु। तेपि हि कामेतब्बतो कामा नाम। मेथुनवत्थूसूति मेथुनस्स वत्थूसु तेसु सत्तेसु। मिच्छाचारोति गारय्हाचारो। गारय्हाता चस्स एकन्तनिहीनताय एवाति आह “एकन्तनिन्दितो लामकाचारो”ति। असद्धम्माधिप्पायेनाति असद्धम्मसेवनाधिप्पायेन।

सगोत्तेहि रक्खिता गोत्तरक्खिता। सहधम्मिकेहि रक्खिता धम्मरक्खिता। सस्सामिका सारक्खा। यस्सा गमने रज्जा दण्डो ठपितो, सा सपरिदण्डा। भरियाभावत्थं धनेन कीता धनक्कीता। छन्देन वसन्ती छन्दवासिनी। भोगत्थं वसन्ती भोगवासिनी। पटत्थं वसन्ती पटवासिनी। उदकपत्तं आमसित्वा गहिता ओदपत्तकिनी। चुम्बटं अपनेत्वा गहिता ओभतचुम्बटा। करमरानीता धजाहटा। तट्ठणिका मुहुत्तिका। अभिभवित्वा वीतिक्कमे मिच्छाचारो महासावज्जो, न तथा द्विन्नं समानच्छन्दताय। “अभिभवित्वा वीतिक्कमने सतिपि मग्गेनमग्गपटिपत्तिअधिवासने पुरिमुप्पन्नसेवनाभिसन्धिपयोगाभावतो मिच्छाचारो न होति अभिभुय्यमानस्सा”ति वदन्ति। सेवनचित्ते सति पयोगाभावो

अप्पमाणं येभुय्येन इत्थिया सेवनपयोगस्स अभावतो । तस्मिं असति पुरेतरं सेवनचित्तस्स उपट्ठापनेपि तस्सा मिच्छाचारो न सिया, तथा पुरिसस्सपि सेवनपयोगाभावेति । तस्मा अत्तनो रुचिया पवत्तितस्स वसेन तयो बलक्कारेन पवत्तितस्स वसेन तयोति सब्बेपि अग्गहितग्गहणेन “**चत्तारो सम्भारा**”ति वुत्तं ।

उपसग्गवसेन अत्थविसेसवाचिनो धातुसद्दाति “**अभिज्झायती**”ति पदस्स “**परभण्डाभिमुखी**”तिआदिना अत्थो वुत्तो । तत्थ तन्निन्नतायाति तस्मिं परभण्डे लुब्भनवसेन निन्नतायाति अयमेत्थ अधिप्पायो वेदितब्बो । **अभिपुब्बो वा झा-**सद्दो लुब्भने निरुल्लहो दट्ठब्बो । उपसग्गवसेन अत्थविसेसवाचिनो एव धातुसद्दा । अदिन्नादानस्स अप्पसावज्जमहासावज्जता **ब्रह्मजालवण्णनायं** (दी० नि० अट्ठ० चूळसीलवण्णना) वुत्ताति आह “**अदिन्नादानं विय अप्पसावज्जा, महासावज्जा चा**”ति । तस्मा “यस्स भण्डं अभिज्झायति, तस्स अप्पगुणताय अप्पसावज्जता, महागुणताय महासावज्जता”तिआदिना अप्पसावज्जमहासावज्जविभागो वेदितब्बो । **अत्तनो परिणामनं** चित्तेनेवाति वेदितब्बं ।

हितसुखं व्यापादयतीति यो नं उप्पादेति, तस्स यं पति चित्तं उप्पादेति, तस्स तस्स सति समवाये हितसुखं विनासेति । फरुसवाचाय अप्पसावज्जमहासावज्जता ब्रह्मजालवण्णनायं विभाविताति आह “**फरुसवाचा विया**”तिआदि । तस्मा “यं पति चित्तं व्यापादेति, तस्स अप्पगुणताय अप्पसावज्जो, महागुणताय महासावज्जो”तिआदिना तदुभयविभागो वेदितब्बो । “**अहो वता**”ति इमिना परस्स अच्चन्ताय विनासचिन्तनं दीपेति । एवज्झि स्स दारुणप्पवत्तिया कम्मपथप्पवत्ति ।

यथाभुच्चगहणाभावेनाति याथावगहणस्स अभावेन अनिच्चादिसभावस्स निच्चादितो गहणेन । **मिच्छा पस्सती**ति वितथं पस्सति । “**सम्फप्पलापो विया**”ति इमिना आसेवनस्स मन्दताय अप्पसावज्जतं, महन्तताय महासावज्जतं दस्सेति । **गहिताकारविपरीतता**ति मिच्छादिट्ठिया गहिताकारविपरीतभावो । **वत्थुनो**ति तस्स अयथाभूतसभावमाह । **तथाभावेना**ति गहिताकारेनेव विपरीताकारेनेव । **तस्स** दिट्ठिगतिकस्स, **तस्स** वा वत्थुनो **उपट्ठानं**, “एवमेतं न इतो अज्जथा”ति ।

धम्मतोति सभावतो । **कोट्टासतो**ति फस्सपञ्चमकादीसु चित्तङ्गकोट्टासेसु ये कोट्टासा होन्ति, ततोति अत्थो ।

चेतनाधम्माति चेतनासभावा ।

“पटिपाटिया सत्ता”ति एत्थ ननु चेतना अभिधम्मे कम्मपथेसु न वुत्ताति पटिपाटिया सत्तन्नं कम्मपथभावो न युत्तोति? न, अवचनस्स अज्जहेतुकत्ता । न हि तत्थ चेतनाय अकम्मपथप्पत्तत्ता (ध० स० मूलटी० अकुसलकम्मपथकथावण्णना) कम्मपथरासिम्हि अवचनं, कदाचि पन कम्मपथो होति, न सब्बदाति कम्मपथभावस्स अनियतत्ता अवचनं । यदा पन कम्मपथो होति, तदा कम्मपथरासिसङ्गहो न निवारितो ।

एत्थाह — यदि चेतनाय सब्बदा कम्मपथभावाभावतो अनियतो कम्मपथभावोति कम्मपथरासिम्हि अवचनं, ननु अभिज्झादीनम्पि कम्मपथभावं अप्पत्तानं अत्थिताय अनियतो कम्मपथभावोति तेसम्पि कम्मपथरासिम्हि अवचनं आपज्जतीति? नापज्जति कम्मपथतातंसभागता हि तेसं तत्थ वुत्तत्ता । यदि एवं चेतनापि तत्थ वत्तब्बा सियाति? सच्चमेतं, सा पन पाणातिपातादिकावाति पाकटो तस्सा कम्मपथभावोति न वुत्तं सिया । चेतनाय हि “चेतनाहं, भिक्खवे, कम्मं वदामि

(अ० नि० ६.६३; कथा० ५३९), तिविधा, भिक्खवे, कायसञ्चेतना अकुसलं कायकम्म”न्ति (कथा० ५३९) वचनतो कम्मभावो पाकटो; कम्मयेव च सुगतिदुग्गतीनं, तदुप्पज्जनसुखदुक्खानञ्च पथभावेन पवत्तं “कम्मपथो”ति वुच्चतीति पाकटो तस्सा कम्मपथभावो। अभिज्झादीनं पन चेतनासमीहनभावेन सुचरितदुच्चरितभावो, चेतनाजनितभावेन [चेतनाजनिततंबन्धतिभावेन (ध० स० अनुटी० अकुसलकम्मपथावण्णना)] सुगतिदुग्गतितदुप्पज्जनसुखदुक्खानं पथभावो चाति न तथा पाकटो कम्मपथभावोति ते एव तेन सभावेन दस्सेतुं अभिधम्मे चेतना कम्मपथभावे न वुत्ता, अतथाजातियत्ता वा चेतना तेहि सद्धिं न वुत्ताति दट्ठब्बं। **मूलं पत्वाति** मूलदेसनं पत्वा, मूलसभावेसु धम्मेसु देसियमानेसूति अत्थो।

“अदिन्नादानं सत्तारम्मण”न्ति इदं “पञ्चसिक्खापदा परित्तारम्मणा एवा”ति इमाय पञ्चपुच्छकपाळिया (विभ० ७१५) विरुज्झति। यज्झि पाणातिपातादिदुस्सील्यस्स आरम्मणं, तदेव तंवेरमणिया आरम्मणं। वीतिकमित्तवत्थुतो एव हि विरतीति। **सत्तारम्मणन्ति** वा सत्तसङ्घातसङ्घारारम्मणं, तमेव उपादाय वुत्तन्ति न कोचि विरोधो। तथा हि वुत्तं **सम्मोहविनोदनियं** “यानि सिक्खापदानि एत्थ ‘सत्तारम्मणानी’ति वुत्तानि, तानि यस्मा सत्तोति सद्धं गते सङ्घारेयेव आरम्मणं करोन्ती”ति। (विभ० अट्ठ० ७१४) एस नयो इतो परेसुपि। विसभागवत्थुनो “इत्थी पुरिसो”ति गहेतव्वतो “**सत्तारम्मणो**”ति एके। “एको दिट्ठो, द्वे सुता”तिआदिना सम्फप्पलापेन **दिट्ठसुतमुतविज्जातवसेन। तथा अभिज्झाति** एत्थ **तथा**-सद्धो “दिट्ठसुतमुतविज्जातवसेना” तिदम्पि उपसंहरति, न सत्तसङ्घारारम्मणतमेव दस्सनादिवसेन अभिज्झायनतो। “नत्थि सत्ता ओपपातिका”ति (दी० नि० १.१७१) पवत्तमानापि मिच्छादिट्ठि तेभूमकधम्मविसया एवाति अधिप्पायेनस्सा सङ्घारारम्मणता वुत्ता। कथं पन मिच्छादिट्ठिया सब्बे तेभूमकधम्मा आरम्मणं होतीति? साधारणतो। “नत्थि सुकतदुक्कटानं कम्मानं फलं विपाको”ति (दी० नि० १.१७१; म० नि० २.९४) पवत्तमानाय अत्थतो रूपारूपावचरधम्मापि गहिता एव होन्तीति।

सुखबहुलताय राजानो हसमानापि “घातेथा”ति वदन्ति, हासो पन नेसं अत्तवूपसमादिअज्जविसयोति आह “**सन्निट्ठापक...पे०... होती**”ति। **मज्झत्तवेदनो न होति**, सुखवेदनोव एत्थ सम्भवतीति। मुसावादो लोभसमुद्धानो सुखवेदनो वा सिया मज्झत्तवेदनो वा, दोससमुद्धानो दुक्खवेदनो वाति **मुसावादो तिवेदनो**। इमिना नयेन सेसेसुपि यथारहं वेदनाभेदो वेदितव्वो।

दोसमोहवसेन द्विमूलकोति सम्पयुत्तमूलमेव सन्धाय वुत्तं। तस्स हि मूलद्वेन उपकारकभावो। निदानमूले पन गह्ममाने “लोभमोहवसेनपी”ति वत्तब्बं सिया। आमिसकिज्जक्खहेतुपि पाणं हनन्ति। तेनेवाह — “लोभो निदानं कम्मानं समुदयाया”तिआदि (अ० नि० ३.३४)। सेसेसुपि एसेव नयो।

कुसलकम्मपथदसकवण्णना

पाणातिपाता ...पे०... वेदितव्वानि लोकियलोकोत्तरमिस्सकवसेनेत्थ कुसलकम्मपथानं देसितत्ता। वेरहेतुताय वेरसज्जितं पाणातिपातादिपापधम्मं मणति “मयि इध ठिताय कथं आगच्छसी”ति तज्जन्ती विय नीहरतीति **वेरमणी**, विरमति एतायाति वा “विरमणी”ति वत्तब्बे निरुत्तिनयेन “**वेरमणी**”ति वुत्तं। समादानवसेन उप्पन्ना विरति **समादानविरति**। असमादिन्नसीलस्स सम्पत्ततो यथाउपट्ठितवीतिकमित्तवत्थुतो विरति **सम्पत्तविरति**। किलेसानं समुच्छिन्दनवसेन पवत्ता मग्गसम्पयुत्ता विरति **समुच्छेदविरति**। कामज्जेत्थ पाळियं विरतियेव आगता, **सिक्खापदविभङ्गे** (विभ० ७०३) पन चेतनापि आहरित्वा दस्सिताति तदुभयम्पि गणहन्तो “**चेतनापि वत्तन्ति विरतियोपी**”ति आह। **अनभिज्झा हि मूलं पत्वाति** कम्मपथकोट्टासे “अनभिज्झा”ति वुत्तधम्मो मूलतो **अलोभो कुसलमूलं** होतीति एवमेत्थ

अत्थो दट्ठब्बो । सेसपदद्वयेपि एसेव नयो ।

दुस्सील्यारम्मणा तदारम्मणजीवितिन्द्रियादिआरम्मणा कथं दुस्सील्यानि पजहन्तीति तं दस्सेतुं “यथा पना”तिआदि वुत्तं । पजहन्तीति वेदितब्बा पाणातिपातादीहि विरमणवसेनेव पवत्तनतो । अथ तदारम्मणभावे, न सो तानि पजहति । न हि तदेव आरम्भं तं पजहितुं सक्का ततो अविनिस्सटभावतो ।

अनभिज्झा... पे०... विरमन्तस्साति अभिज्झं पजहन्तस्साति अत्थो । न हि मनोदुच्चरिततो विरति अत्थि अनभिज्झादीहेव तप्पहानसिद्धितो ।

अरियवासदसकवण्णना

३४८. अरियानमेव वासाति अरियवासा अनरियानं तादिसानं असम्भवतो । अरियाति चेत्य उक्कट्टुनिद्वेसेन खीणासवा गहिता, ते च यस्मा तेहि सब्बकालं अविरहितवासा एव, तस्मा वुत्तं “अरिया एव वसिंसु वसन्ति वसिस्सन्ती”ति । तत्थ वसिंसूति निस्साय वसिंसु । पञ्चङ्गविप्पहीनत्तादयो हि अरियानं अपस्सया । तेसु पञ्चङ्गविप्पहानपच्चेकसच्चपनोदनएसनासमवयवविस्सज्जनानि “सङ्घायेकं पटिसेवति, अधिवासेति, परिवज्जेति, विनोदेती”ति वुत्तेसु अपस्सेनेसु विनोदनञ्च मग्गकिच्चानेव, इतरे मग्गेनेव समिज्झन्ति ।

जाणादयोति जाणञ्चेव तंसम्पयुत्तधम्मा च । तेनाह “जाणन्ति वुत्ते”तिआदि । तत्थ वत्तब्बं हेट्ठा वुत्तमेव ।

आरक्खकिच्चं साधेति सतिवेपुल्लप्पत्तता । “चरतो”तिआदिना निच्चसमादानं दस्सेति, तं विक्खेपाभावेन दट्ठब्बं ।

पब्बज्जुपगताति यं किञ्चि पब्बज्जं उपगता, न समितपापा । भोवादिनोति जातिमत्तब्राह्मणे वदति । पाटेक्कसच्चानीति तेहि तेहि दिट्ठिगतिकेहि पाटियेक्कं गहितानि “इदमेव सच्च”न्ति (म० नि० २.१८७, २०३, ४२७; ३.२७; उदा० ५५; नेत्ति० ५९) अभिनिविट्ठानि दिट्ठिसच्चादीनि । दिट्ठिगतानिपि हि “इदमेव सच्च”न्ति (म० नि० २.१८७, २०२, ४२७; ३.२७, २९; नेत्ति० ५९) गहणं उपादाय “सच्चानी”ति वोहरीयन्ति । तेनाह “इदमेवा”तिआदि । नीहटानीति अत्तनो सन्तानतो नीहरितानि अपनीतानि । गहितग्गहणस्साति अरियमग्गाधिगमतो पुब्बे गहितस्स दिट्ठिगाहस्स । विस्सट्ठभाववेवचनानीति अरियमग्गेन सब्बसो परिच्चागभावस्स अधिवचनानि ।

नत्थि एतासं वयो वेकल्यन्ति अवयाति आह “अनूना”ति, अनवसेसाति अत्थो । एसनाति हेट्ठा वुत्तकामेसनादयो ।

मग्गस्स किच्चनिप्फत्ति कथिता रागादीनं पहीनभावदीपनतो ।

पच्चवेक्खणाय फलं कथितन्ति पच्चवेक्खणमुखेन अरियफलं कथितं । अधिगते हि अग्गफले सब्बसो रागादीनं अनुप्पादधम्मतं पजानाति, तञ्च पजाननं पच्चवेक्खणजाणन्ति ।

असेक्खधम्मदसकवण्णना

फलञ्च ते सम्पयुत्तधम्मा चाति फलसम्पयुत्तधम्मा, अरियफलसभावा सम्पयुत्ता धम्माति अत्थो । फलसम्पयुत्तधम्माति फलधम्मा चेव तंसम्पयुत्तधम्मा चाति एवमेत्थ अत्थो वेदितब्बो । द्वीसुपि ठानेसु पज्जाव कथिता

सम्मा दस्सनट्ठेन सम्मादिट्ठि, सम्मा जाननट्ठेन सम्माजाणन्ति च । अत्थि हि दस्सनजाननानं सविसये पवत्तिआकारविसेसो, स्वायं हेट्ठा दस्सितो एव । **फलसमापत्तिधम्मा**ति फलसमापत्तियं धम्मा, फलसमापत्तिसहगतधम्माति अत्थो । अरियफलसम्पयुत्तधम्मापि हि सब्बसो पटिपक्खतो विमुत्ततं उपादाय “विमुत्ती”ति वत्तब्बतं लभन्ति । केनचि पन यथा असेक्खा फलपज्जा दस्सनकिच्चं उपादाय “सम्मादिट्ठी”ति वुत्ता, जाननकिच्चं उपादाय “सम्माजाण”न्तिपि वुत्ता एव; एवं अरियफलसमाधि समादानट्ठं उपादाय “सम्मासमाधी”ति वुत्तो, विमुच्चनट्ठं उपादाय “सम्माविमुत्ती” तिपि वुत्तो । एवञ्च कत्वा “अनासवं चेतोविमुत्ति”न्ति दुतियविमुत्तिगहणञ्च समत्थितं होतीति ।

दसकवण्णना निट्ठिता ।

पज्जसमोधानवण्णना

समोधानेतब्बाति समाहरितब्बा ।

३४९. ओकप्पनाति बलवसद्धा । आर्यतिं भिक्खूनं अविवादहेतुभूतं तत्थ तत्थ भगवता देसितानं अत्थानं सङ्गायनं सङ्गीति, तस्स च कारणं अयं सुत्तदेसना तथा पवत्तत्ताति वुत्तं “**सङ्गीतिपरियायन्ति सामगिया कारण**”न्ति । समनुज्जो सत्था अहोसि “पटिभातु त, ं सारिपुत्त, भिक्खूनं धम्मिं कथा”ति उस्साहेत्वा आदितो पट्ठाया याव परियोसाना सुणन्तो, सा पनेत्थ भगवतो समनुज्जता “साधु, साधू”ति अनुमोदनेन पाकटा जाताति वुत्तं “**अनुमोदनेन समनुज्जो अहोसी**”ति । **जिनभासितो नाम जातो**, न सावकभासितो । यथा हि राजयुत्तेहि लिखितपण्णं याव राजमुद्दिक्काय न लज्जितं होति, न ताव “राजपण्ण”न्ति सङ्ख्यं गच्छति, लज्जितमत्तं पन राजपण्णं नाम होति । एवमेव “साधु, साधु सारिपुत्ता”तिआदि अनुमोदनवचनसंसूचिताय समनुज्जासङ्घाताय जिनवचनमुद्दाय लज्जितत्ता अयं सुत्तन्तो जिनभासितो नाम जातो आहच्चवचनो । यं पनेत्थ अत्थतो न विभत्तं, तं सुविज्जेय्यमेवाति ।

सङ्गीतिसुत्तवण्णनाय लीनत्थप्पकासना ।

११. दसुत्तरसुत्तवण्णना

३५०. आवुसो भिक्खवेति सावकानं आलपनन्ति सावकानं आमन्तनवसेन आलपनसमुदाचारो, न केवलं “भिक्खवे”ति, सो पन बुद्धानं आलपनं । तेनाह “**बुद्धा ही**”तिआदि । सत्थुसमुदाचारवसेन असमुदाचारो एवेत्थ सत्थु उच्चट्ठाने ठपनं । सम्पति आगतत्ता कत्थचि न निबद्धो वासो एतेसन्ति **अनिबद्धवासा**, अन्तेवासिका । कम्मट्ठानं गहेत्वा सप्पायसेनासनं गवेसन्ता यं किञ्चि दिसं गच्छन्तीति **दिसागमनीया** । इदानीं तमत्थं वित्थारतो दस्सेतुं “**बुद्धकाले**”तिआदि वुत्तं ।

असुभकम्मट्ठानन्ति एकादसविधं असुभकम्मट्ठानं । तत्थापि पुग्गलवेमत्ततं जत्वा तदनुरूपं तदनुरूपमेव देति । मोहचरितस्सपि कामं आनापानस्सतिकम्मट्ठानं सप्पायं, कम्मट्ठानभावनाय पन भाजनभूतं कातुं सम्मोहविगमाय पठमं उद्देसपरिपुच्छाधम्मस्सवनधम्मसाकच्छासु नियोजेतब्बोति वुत्तं “**मोहचरितस्स...पे०... आचिकखती**”ति । सद्धाचरितस्स विसेसतो पुरिमा छ अनुस्सतियो सप्पाया, तासं पन अनुयुज्जने अयं पुब्बभागपटिपत्तीति दस्सेतुं “**पसादनीयसुत्तन्ते**”तिआदि वुत्तं । **जाणचरितस्सा**ति बुद्धिचरितस्स, तस्स पन मरणस्सति, उपसमानुस्सति,

चतुधातुववत्थानं, आहारेपटिकूलसज्जा विसेसतो सप्पाया, तेसं पन उपकारधम्मदस्सनत्थं “अनिच्चतादि...पे... कथेती”ति वुत्तं । तत्थेवाति सत्थु सन्निके एव । तेमासिकं पटिपदन्ति तीहि मासेहि सन्निद्धापेतब्बं पटिपदं ।

इमे भिक्खूति इमिस्सा धम्मदेसनाय भाजनभूता भिक्खू । “एवं आगन्त्वा गच्छन्ते पन भिक्खू”ति इदं “बुद्धकाले”तिआदिना तदुद्देशिकवसेन वुत्तभिक्खू सन्धाय वुत्तं, न “इमे भिक्खू”ति अनन्तरं वुत्तभिक्खू । तेनाह “पेसेती”ति । अपलोकेथाति आपुच्छथ । “पण्डिता”तिआदि सेवनभजनेसु कारणवचनं । “सोतापत्तिफले विनेती”तिआदि येभ्यवसेन वुत्तं । आयस्मा हि धम्मसेनापति भिक्खू येभ्येन सोतापत्तिफलं पापेत्वा विस्सज्जेति “एवमेते नियता सम्बोधिपरायणा”ति । आयस्मा पन महामोग्गल्लानो “सब्बापि भवूपपत्ति जिगुच्छितब्बावा”ति भिक्खू येभ्येन उत्तमत्थंयेव पापेति ।

सावकेहि विनेतुं सक्कुण्येया सावकवेनेय्या नाम न सावकेहेव विनेतब्बाति दस्सेन्तो आह “सावकवेनेय्या नामा”तिआदि । दसधा मातिकं ठपेत्वाति एककतो पट्टाय याव दसका दसधा दसधा मातिकं ठपेत्वा विभत्तोति दसुत्तरो । दसुत्तरो गतोतिपि दसुत्तरोति एककतो पट्टाय याव दसका दसहि उत्तरो अधिको हुत्वा गतो पवत्तोतिपि दसुत्तरो । एकेकस्मिं पब्बेति एककतो पट्टाय याव दसका दससु पब्बेसु एकेकस्मिं पब्बे । दस दस पज्हाति “कतमो धम्मो बहुकारो अप्पमादो कुसलेसु धम्मेषू”तिआदिना दस दस पज्हा । विसेसिताति विस्सज्जिता । दसुत्तरं पवक्खामीति देसियमानं देसनं नामकित्तनमुखेन पटिजानाति वण्णभणनत्थं । पवक्खामीति पकारेहि वक्खामि । तथा हेत्थ पज्जासाधिकानं पज्चन्नं पज्हसतानं वसेन देसना पवत्ता । धम्मन्ति इध धम्म-सद्वो परियत्तिपरियायो “इध भिक्खु धम्मं परियापुणाती”तिआदीसु (अ० नि० ५.७३) विय । सुत्तलक्खणो चायं धम्मोति आह “धम्मन्ति सुत्त”न्ति । स्वायं धम्मो यथानुसिद्धं पटिपज्जमानस्स निब्बानावहो । ततो एव वट्ठुक्खसमुच्छेदाय होति, स चायमस्स आनुभावो सब्बेसं खन्धानं पमोचनुपायभावतोति दस्सेन्तो “निब्बानप्पत्तिया”तिआदिमाह । तेन वुत्तं “निब्बानप्पत्तिया”तिआदि ।

उच्चं करोन्तोति उदगं उळारं पणीतं कत्वा दस्सेन्तो, पग्गणहन्तोति अत्थो । पेमं जनेन्तोति भत्तिं उप्पादेन्तो । इदञ्च देसनाय पग्गणहनं बुद्धानमि आचिण्णं एवाति दस्सेन्तो “एकायनो”तिआदिमाह ।

एकधम्मवण्णना

३५१. (क) कार-सद्वो उप-सद्वेन विनापि उपकारत्थं वदति, “बहुकारा, भिक्खवे, मातापितरो पुत्तान”न्तिआदीसु (अ० नि० २.३४) वियाति आह “बहुकारोति बहुपकारो”ति ।

(ख) वट्ठुने वुत्ते नानन्तरियताय उप्पादनं वुत्तमेव होतीति “भावेतब्बोति वट्ठेतब्बो”ति वुत्तो । उप्पादनपुब्बिका हि वट्ठुनाति । ननु च “एको धम्मो उप्पादेतब्बो”ति उप्पादनं पेत्य विसुं गहितं एवाति? अज्जविसयत्ता तस्स नायं विरोधो । तथा हि “एको धम्मो परिज्जेय्यो”ति तीहिपि परिज्जाहि परिज्जेय्यतं वत्वापि “एको धम्मो पहातब्बो”ति पहातब्बता वुत्ता ।

(ग) तीहि परिज्जाहीति जाततीरणपहानपरिज्जाहि ।

(घ) पहानानुपस्सनायाति पजहनवसेन पवत्ताय अनुपस्सनाय । मिस्सकवसेन चेतं अनुपस्सनागहणं दट्ठब्बं ।

(ड) सीलसम्पदादीनं परिहानावहो परिहानाय संवत्तनको।

(च) झानादिविसेसं गमेतीति विसेसगामी।

(छ) दुप्पच्चक्खकरोति अनुपचितजाणसम्भारेहि पच्चक्खं कातुं असक्कुणेय्यो।

(झ) अभिजानितब्बोति अभिमुखं जाणेन जानितब्बो।

सब्बत्थ मातिकासूति दुकादिवसेन वुत्तासु सब्बासु मातिकासु। एत्थ च आयस्मा धम्मसेनापति ते भिक्खू भावनाय नियोजेत्वा उत्तमत्ये पतिट्ठापेतुकामो पठमं ताव भावनाय उपकारधम्मं उद्देसवसेन दस्सेन्तो “एको धम्मो बहुकारो”ति वत्त्वा तेन उपकारकेन उपकत्तब्बं दस्सेन्तो “एको धम्मो भावेतब्बो”ति आह। अयञ्च भावना विपस्सनावसेन इच्छिताति आह “एको धम्मो परिञ्जेय्यो”ति। परिञ्जा च नाम यावदेव पहातब्बपजहनत्थाति आह “एको धम्मो पहातब्बो”ति। पजहन्तेन च हानभागियं नीहरित्वा विसेसभागिये अवट्ठातब्बन्ति आह “एको धम्मो हानभागियो, एको धम्मो विसेसभागियो”ति। विसेसभागिये अवट्ठानञ्च दुप्पटिविज्झनेन, दुप्पटिविज्झपटिविज्झनञ्चे इज्झति, निप्फादेतब्बनिप्फादनं सिद्धमेव होतीति आह “एको धम्मो दुप्पटिविज्झो, एको धम्मो उप्पादेतब्बो”ति। तयिदं द्वयं अभिञ्जेय्यादिजाननेन होतीति आह “एको धम्मो अभिञ्जेय्यो”ति। अभिञ्जेय्यञ्चे अभिञ्जातं, सच्छिकातब्बं सच्छिकतमेव होतीति। एतावता च निट्ठितकिच्चोव होति, नास्स उत्तरि किञ्चि करणीयन्ति एवं ताव महाथेरो एककवसेन तेसं भिक्खून् पटिपत्तिविधिं उद्दिसन्तो इमानि दस पदानि इमिना अनुक्कमेन उद्दिसि।

(क) एवं अनियमतो उद्दिट्ठधम्मे सरूपतो नियमेत्वा दस्सेतुं “कतमो एको धम्मो”तिआदिना देसनं आरभि। तेन वुत्तं “इति आयस्मा सारिपुत्तो”तिआदि। एस नयो दुकादीसु। वेळुकारोति वेनो। सो हि वेळुविकारेहि किलञ्जादिकरणेन “वेळुकारो”ति वुत्तो। अन्तो, बहि च सब्बगतगण्ठिं नीहरणेन निग्गण्ठिं कत्वा। एकेककोट्ठासेति एककादीसु दससु कोट्ठासेसु एकेकस्मिं कोट्ठासे।

सब्बत्थकं उपकारकन्ति सब्बत्थकमेव सम्मा पटिपत्तिया उपकारवन्तं। इदानि तमत्यं वित्थारतो दस्सेतुं “अयञ्ही”तिआदि वुत्तं। **विपस्सनागब्भं गण्हापनेति** यथा उपरि विपस्सना परिपच्चति तिक्खा विसदा हुत्वा मग्गेन घटेति, एवं पुब्बभागविपस्सनावट्ठने। **अत्थपटिसम्भिदादीसूति** अत्थपटिसम्भिदादीसु निप्फादेतब्बेसु, तेसं सम्भारसम्भरणन्ति अत्थो। एस नयो इतो परेसुपि। **ठानाट्ठानेसूति** ठाने, अट्ठाने च जानितब्बे। **महाविहारसमापत्तियन्ति** महतियं झानादिविहारसमापत्तियं। **विपस्सनाजाणादीसूति** आदि-सद्देन मनोमयिद्धि आदिकानि सङ्गण्हाति। **अट्ठसु विज्जासूति** अम्बट्ठसुत्ते (दी० नि० १.२७९) आगतनयासु अट्ठसु विज्जासु।

तेनेव भगवा थोमेतीति योजना। नन्ति अप्पमादं।

थामसम्पन्नेनाति जाणबलसमन्नागतेन। **दीपेत्वाति** “एवमि अप्पमादो कुसलानं धम्मानं सम्पादने बहुपकारो”ति पकासेत्वा। यं किञ्चि अनवज्जपक्खिकमत्यं अप्पमादे पक्खिपित्वा कथेतुं युत्तन्ति दस्सेतुं “यं किञ्ची”तिआदि वुत्तं।

(ख) **कायगतासतीति** रस्सं अकत्वा निद्देसो, निद्देसेन वा एतं समासपदं दट्ठब्बं। “अट्ठिकानि पुज्जकितानि तेरोवस्सिकानि... पे०... पूतीनि चुण्णिकजातानी”ति (दी० नि० २.३७९) एवं पवत्तमनसिकारो “चुण्णिकमनसिकारो”ति

वदन्ति । अपरे पन भणन्ति “चुण्णिकइरियापथेसु पवत्तमनसिकारो”ति । एत्थ उप्पन्नसतियाति एतस्मिं यथावुत्ते एकूनतिसविधे ठाने उप्पन्नाय सतिया । सुखसम्पयुत्ताति निप्परियायतो सुखसम्पयुत्ता, परियायतो पन चतुत्थज्झाने उपेक्खापि “सुख”न्ति वत्तब्बतं लभति सन्तसभावत्ता ।

(ग) पच्चयभूतो आरम्मणादिविसयोपि आरम्मणभावेन वणो विय आसवे पग्घरति, सो सम्पयोगसम्भवाभावेपि सह आसवेहीति सासवो । तथा उपादानानं हितोति उपादानियो । इतरथा पन पच्चयभावेन विधि पटिक्खेपो ।

(घ) अस्मीति मानोति “अस्मी”ति पवत्तो मानो ।

(च) विपरियायेनाति “अनिच्चे अनिच्च”न्तिआदिना नयेन पवत्तो पथमनसिकारो ।

(छ) इध पन विपस्सनानन्तरो मग्गो “आनन्तरिको चेतोसमाधी”ति अधिप्पेत्तो । कस्मा? विपस्सनाय अनन्तरत्ता, अत्तनो वा पवत्तिया अनन्तरं फलदायकत्ता । सद्वत्थतो पन अनन्तरं फलं अनन्तरं, तस्मिं अनन्तरे नियुत्ता, तं वा अरहति, अनन्तरपयोजनोति वा आनन्तरिको ।

(ज) फलन्ति फलपज्जा । पच्चवेक्खणपज्जा अधिप्पेत्ता अकुप्पारम्मणताय ।

(झ) अत्तनो फलं आहरतीति आहारो, पच्चयोति आह “आहारद्वितिकाति पच्चयद्वितिका”ति । अयं एको धम्मोति अयं पच्चयसङ्घातो एको धम्मोति पच्चयतासमज्जेन एकं कत्वा वदति । जातपरिज्जाय अभिज्जायाति जातपरिज्जासङ्घाताय अभिज्जाय ।

(ञ) अकुप्पा चेतोविमुत्तीति अरहत्तफलविमुत्ति अकुप्पभावेन उक्कंसगतत्ता । अज्जथा सब्बापि फलसमापत्तियो अकुप्पा एव पटिपक्खेहि अकोपनीयत्ता ।

अभिज्जायाति “अभिज्जेय्यो”ति एत्थ लब्धअभिज्जाय । परिज्जायाति एत्थापि एसेव नयो । पहातब्बसच्छिकातब्बेहीति पहातब्बसच्छिकातब्बपदेहि । पहानपरिज्जाव कथिता पहानसच्छिकिरियानं एकावारताय परिज्जाय सहेव इज्जनतो । सच्छिकातब्बोति विसेसतो फलं कथितं । एकस्मियेव सत्तमे एव पदे लब्धति । फलं पन अनेकेसुपि पदेसु लब्धति पठमट्टमनवमदसमेसु लब्धनतो । यस्मा तं निप्परियायतो दसमे एव लब्धति, इतरेसु परियायतो तस्मा “लब्धति एवा”ति सासङ्कं वदति ।

सभावतो विज्जमानाति येन बहुकारादिसभावेन देसिता, तेन सभावेन परमत्थतो उपलब्धमाना । याथावाति अविपरीता । तथासभावाति तंसभावा । न तथा न होन्तीति अवितथत्ता तथाव होन्ति । ततो एव वुत्तप्पकारतो अज्जथा न होन्तीति पज्जहिपि पदेहि तेसं धम्मानं यथाभूतमेव वदति । सम्माति जायेन । यं पन जातं, तं हेतुयुत्तं कारणयुत्तमेव होतीति आह “हेतुना कारणेना”ति । ओकप्पनं जनेसीति जिनवचनभावेन अभिप्पसादं उप्पादेसि ।

एकधम्मवण्णना निट्ठिता ।

द्वेधम्मवण्णना

३५२. (क) “सब्बत्था” ति इदं “सीलपूरणादीसू”ति एतेन सद्धिं सम्बन्धितब्बं । “सीलपूरणादीसु सब्बत्थ अप्पमादो विय उपकारका”ति एतेन सतिसम्पज्जानम्पि अप्पमादस्स विय सब्बत्थ उपकारकता पकासिता होति अत्थतो नातिविलक्खणत्ता ततो तेसं । सतिअविप्पवासो हि अप्पमादो, सो च अत्थतो सब्बत्थ अविजहिता सति एव, सा च खो जाणसम्पयुत्ता एव दट्ठब्बा, इतराय तथारूपसमत्थताभावतो ।

(ख) तेसं पञ्चसतमत्तानं भिक्खूनं पुब्बभागपटिपत्तिवसेन देसितत्ता पुब्बभागा कथिता ।

(छ) अयोनिमनसिकारो संकिलेसस्स मूलकारणभावेन पवत्तो हेतु, परिब्रूहनभावेन पवत्तो पच्चयो । योनिसोमनसिकारेपि एसेव नयो । यथा च सत्तानं संकिलेसाय, विसुद्धिया च पच्चयभूता अयोनिमनसिकारो, योनिसोमनसिकारोति “इमे द्वे धम्मा दुप्पटिविज्झा”ति एत्थ नीहरित्वा वुत्ता, एवं इमेहि धम्मा नीहरित्वा वत्तब्बाति दस्सेन्तो “तथा”तिआदिमाह । तत्थ असुभज्झानादयो चत्तारो विसंयोगा नाम कामयोगादिपटिपक्खभावतो । “एवं पभेदा”ति इमिना “अविज्जाभागिनो धम्मा, विज्जाभागिनो धम्मा, कण्हा धम्मा, सुक्का धम्मा”ति (ध० स० १०१, १०४) एवमादीनं सङ्गहो दट्ठब्बो ।

(झ) पच्चयेहि समेच्च सम्भुय्य कतत्ता पञ्चक्खन्था सङ्गता धातु । केनचि अनभिसङ्गुतत्ता निब्बानं असङ्गता धातु ।

(ञ) तिस्सो विज्जा विज्जनट्ठेन, विदितकरणट्ठेन च विज्जा । विमुत्तीति अरहत्तफलं पटिपक्खतो सब्बसो विमुत्तत्ता ।

अभिज्जादीनीति अभिज्जापज्जादीनि । एककसदिसानेव पुरिमवारे विय विभज्ज कथेतब्बतो । मग्गो कथितोति एत्थ “मग्गोव कथितो”ति एवमत्थं अगगहेत्वा “मग्गो कथितोवा”ति एवमत्थो गहेतब्बो “अनुप्पादे जाण”न्ति इमिना फलस्स गहितत्ता । सच्छिकातब्बपदे फलं कथितन्ति एत्थापि “फलमेव कथित”न्ति अगगहेत्वा “फलं कथितमेवा”ति अत्थो गहेतब्बो विज्जागगहणेन तदज्जस्स सङ्गहितत्ता । एस नयो इतो परेसुपि एवरूपेसु ठानेसु ।

द्वेधम्मवण्णना निट्ठिता ।

तयोधम्मवण्णना

३५३. (छ) सोति अनागामिमग्गो । सब्बसो कामानं निस्सरणं समुच्छेदवसेन पजहनतो । आरुप्पे अरहत्तमग्गो नाम अरूपज्झानं पादकं कत्वा उप्पन्नो अगगमग्गो । पुन उप्पत्तिनिवारणतोति रूपानं उप्पत्तिया सब्बसो निवारणतो । निरुज्झन्ति सङ्खारा एतेनाति निरोधो, अगगमग्गो । तेन हि किलेसवट्ठे निरोधिते इतरम्पि वट्ठद्वयं निरोधितमेव होति । तस्स पन निरोधस्स परियोसानत्ता अगगफलं “निरोधो”ति वत्तब्बतं लब्धतीति आह “अरहत्तफलं निरोधोति अधिप्पेत”न्ति । “अरहत्तफलेन हि निब्बाने दिट्ठे” ति इदं अरहत्तमग्गेन निब्बानदस्सनस्सायं निब्बत्तीति कत्वा वुत्तं । एवञ्च कत्वा “अरहत्तसङ्खातनिरोधस्स पच्चयत्ता” ति इदम्पि वचनं समत्थितं होति ।

(ज) अतीतं सारम्मणन्ति अतीतकोट्टासारम्मणं जाणं, अतीता खन्धायतनधातुयो आरब्ध पवत्तनकजाणन्ति अत्थो । “मग्गो कथितोवा”ति अवधारणं दट्ठब्बं, तथा “सच्छिकातब्बे फलं कथितमेवा”ति ।

(ञ) आसवानं खये जाणन्ति च आसवानं खयन्ते जाणन्ति अधिप्पायो, अज्जथा मग्गो कथितो सिया ।

तयोधम्मवण्णना निड्डिता ।

चतुधम्मवण्णना

३५४. (क) दारुमयं चक्कं दारुचक्कं, तथा रतनचक्कं । आणट्टेन धम्मो एव धम्मचक्कं । इरियापथानं अपरापरप्पवत्तितो इरियापथचक्कं, तथा सम्पत्तिचक्कं वेदितब्बं ।

अनुच्छविके देसेति पुञ्जकिरियाय, सम्मापटिपत्तिया अनुरूपदेसे । सेवनं कालेन कालं उपसङ्कमनं । भजनं भक्तिवसेन पयिरुपासनं । अत्तनो सम्मा ठपनन्ति अत्तनो चित्तसन्तानस्स योनिसो ठपनं सद्धादीसु निवेसनन्ति आह “सचे”तिआदि । इदमेवेत्थ पमाणन्ति इदमेव पुब्बेकतपुञ्जतासङ्घातं सम्पत्तिचक्कमेत्थ एतेसु सम्पत्तिचक्केसु पमाणभूतं इतरेसं कारणभावतो । तेनाह “येन ही”तिआदि । सो एव च कतपुञ्जो पुग्गलो अत्तानं सम्मा ठपेति अकतपुञ्जस्स तदभावतो । पठमो लोकियोव, तत्थापि कामावचरोव । इधाति इमस्मिं दसुत्तरसुत्ते । पुब्बभागे लोकियावाति मग्गस्स पुब्बभागे पवत्तनका लोकिया एव । तत्थ कारणं वुत्तमेव ।

(च) कामयोगविसंयोगो अनागामिमग्गो, दिट्ठियोगविसंयोगो सोतापत्तिमग्गो, इतरे द्वे अरहत्तमग्गोति एवं अनागामिमग्गादिवसेन वेदितब्बा ।

(छ) पठमस्स ज्ञानस्स लाभिन्ति य्वायं अप्पगुणस्स पठमस्स ज्ञानस्स लाभी, तं । कामसहगता सज्जामनसिकारा समुदाचरन्तीति ततो वुड्ढितं आरम्भणवसेन कामसहगता हुत्वा सज्जामनसिकारा समुदाचरन्ति चोदेन्ति तुदेन्ति । तस्स कामानुपक्खन्दानं सज्जामनसिकारानं वसेन सो पठमज्ज्ञानसमाधि हायति परिहायति, तस्मा “हानभागियो समाधी”ति वुत्तो । तदनुधम्मताति तदनुरूपसभावो । “सति सन्तिट्ठती”ति इदं मिच्छासतिं सन्धाय वुत्तं । यस्स हि पठमज्ज्ञानानुरूपसभावा पठमज्ज्ञानं सन्ततो पणीततो दिस्वा अस्सादयमाना अपेक्खमाना अभिनन्दमाना निकन्ति होति, तस्स निकन्तिवसेन सो पठमज्ज्ञानसमाधि नेव हायति, न वड्ढति, ठितिकोड्ढासिको होति, तेन वुत्तं “ठितिभागियो समाधी”ति ।

अवितक्कसहगताति अवितक्कं दुतियज्ज्ञानं सन्ततो पणीततो मनसि करोतो आरम्भणवसेन अवितक्कसहगता सज्जामनसिकारा । समुदाचरन्तीति पगुणपठमज्ज्ञानतो वुड्ढितं दुतियज्ज्ञानाधिगमत्थाय चोदेन्ति तुदेन्ति, तस्स उपरि दुतियज्ज्ञानानुपक्खन्दानं सज्जामनसिकारानं वसेन सो पठमज्ज्ञानसमाधि विसेसभूतस्स दुतियज्ज्ञानस्स उप्पत्तिपदट्ठानताय “विसेसभागियो समाधी”ति वुत्तो । निब्बिदासहगताति तमेव पठमज्ज्ञानलाभिं ज्ञानतो वुड्ढितं निब्बिदासङ्घातेन विपस्सनाजाणेन सहगता । विपस्सनाजाणज्झि ज्ञानङ्गेसु पभेदेन उपट्ठहन्तेसु निब्बिन्दति उक्कण्ठति, तस्मा “निब्बिदा”ति वुच्चति । समुदाचरन्तीति निब्बानसच्छिकरणत्थाय चोदेन्ति तुदेन्ति । विरागूपसज्झितोति विरागसङ्घातेन निब्बानेन उपसज्झितो । विपस्सनाजाणज्झि “सक्का इमिना मग्गेन विरागं निब्बानं सच्छिकातु”न्ति पवत्तितो “विरागूपसज्झित”न्ति वुच्चति, तंसम्पयुत्ता सज्जामनसिकारापि विरागूपसज्झिता एव नाम । तस्स तेसं सज्जामनसिकारानं वसेन सो पठमज्ज्ञानसमाधि अरियमग्गपटिवेधस्स पदट्ठानताय “निब्बेधभागियो समाधी”ति वुत्तो । सब्बसमापत्तियोति दुतियज्ज्ञानादिका सब्बा समापत्तियो । अत्थो वेदितब्बोति हानभागियादिअत्थो ताव वित्थारेत्वा वेदितब्बो ।

मग्गो कथितो चतुन्नं अरियसच्चानं उद्धटत्ता । फलं कथितं सरूपेनेव ।

चतुधम्मवण्णना निट्ठिता ।

पञ्चधम्मवण्णना

३५५. (ख) “पञ्चङ्गिको सम्मासमाधी”ति समाधिअङ्गभावेन पञ्जा उद्धिट्ठाति पीतिफरणतादिवचनेन हि तमेव विभजति । तेनाह “पीतिं फरमाना उप्पज्जती”ति आदि । “सो इममेव कायं विवेकजेन पीतिसुखेन अभिसन्देती”ति आदिना (म० नि० १.४२७) नयेन पीतिया, सुखस्स च फरणं वेदितब्बं । सरागविरागतादिविभागदस्सनवसेन परेसं चेतो फरमाना । आलोकफरणेति कसिणालोकस्स फरणे सति तेनेव आलोकेन फरितप्पदेसे । तस्स समाधिस्स रूपदस्सनपच्चयत्ता पच्चवेक्खणजाणं पच्चवेक्खणनिमित्तं ।

पीतिफरणता सुखफरणताति आरम्भणे ठत्वा चतुत्थज्झानस्स उप्पादनतो ता “पादा विया”ति वुत्ता । चेतोफरणता आलोकफरणताति तंतंकिच्चसाधनतो ता “हत्था विया”ति वुत्ता । अभिज्जापादकज्झानं समाधानस्स सरीरभावतो “मज्झिमकायो विया”ति वुत्तं । पच्चवेक्खणनिमित्तं उत्तमङ्गभावतो “सीसं विया”ति वुत्तं ।

(ज) सब्बसो किलेसदुक्खदरथपरिळाहानं विगतत्ता लोकियसमाधिस्स सातिसयमेत्थ सुखन्ति वुत्तं “अप्पितप्पितक्खणे सुखत्ता पच्चुप्पन्नसुखो”ति । पुरिमस्स पुरिमस्स वसेन पच्छिमं पच्छिमं लद्धासेवनताय सन्ततरपणीततरभावप्पत्ति होतीति आह “पुरिमो पुरिमो... पे०... सुखविपाको”ति ।

किलेसपटिप्पस्सद्धियाति किलेसानं पटिप्पस्सम्भनेन लद्धत्ता । किलेसपटिप्पस्सद्धिभावन्ति किलेसानं पटिप्पस्सम्भनभावं । लद्धत्ता पत्तत्ता तब्भावं उपगतत्ता । लोकियसमाधिस्स पच्चनीकानि नीवरणपठमज्झाननिकन्तिआदीनि निग्गहेतब्बानि, अज्जे किलेसा वारेतब्बा, इमस्स पन अरहत्तसमाधिस्स पटिप्पस्सद्धसब्बकिलेसत्ता न निग्गहेतब्बं, वारेतब्बज्ज अत्थीति मग्गानन्तरं समापत्तिक्खणे च अप्पयोगेन अधिगतत्ता, ठपितत्ता च अपरिहानवसेन वा ठपितत्ता नसङ्खारनिग्गह्वारिवावटो । “सतिवेपुल्लप्पत्तत्ता”ति एतेन अप्पवत्तमानायपि सतिया सतिबहुलताय सतो एव नामाति दस्सेति, “यथापरिच्छिन्नकालवसेना”ति एतेन परिच्छिन्दनसतिया सतोति दस्सेति । सेसेसु जाणङ्गेसु । पञ्चजाणिकोति एत्थ वुत्तसमाधिमुखेन पञ्च जाणानेव उद्धिट्ठानि, निद्धिट्ठानि च ।

मग्गो कथितो इन्द्रियसीसेन सम्मावायामादीनं कथितत्ता । फलं कथितं असेक्खानं सीलक्खन्धादीनं कथितत्ता ।

पञ्चधम्मवण्णना निट्ठिता ।

छधम्मवण्णना

३५६. मग्गो कथितोति एत्थ वत्तब्बं हेट्ठा वुत्तमेव ।

सत्तधम्मवण्णना

३५७. (ज) हेतुनाति आदिअन्तवन्ततो, अनच्चन्तिकतो, तावकालिकतो, निच्चपटिक्खेपतोति एवं आदिना हेतुना । नयेनाति “यथा इमे सङ्खारा एतरहि, एवं अतीते, अनागते च अनिच्चा सङ्खत्ता पटिच्चसमुप्पन्ना खयधम्मा वयधम्मा

विरागधम्मा निरोधधम्मा'ति अतीतानागतेसु नयननयेन । कामं खीणासवस्स सब्बेसं सङ्खारानं अनिच्चतादि सुदिट्ठा सुप्पटिविद्धा, तं पन असम्मोहनवसेन किच्चतो, विपस्सनाय पन आरम्मणकरणवसेनाति दस्सेन्तो आह “विपस्सनाजाणेन सुदिट्ठा होन्ती”ति । किलेसवसेन उप्पज्जमानो परिळाहो वत्थुकामसन्निस्सयो, वत्थुकामावस्सयो चाति वुत्तं “द्वेपि सपरिळाहट्टेन अङ्गारकासु विया”ति । निन्नस्सेवाति [निन्नस्स (अट्ठकथायं)] निन्नभावस्सेव । अन्तो वुच्चति लामकट्टेन तण्हा । ब्यन्तं विगतन्तं भूतन्ति ब्यन्तीभूतन्ति आह “निरतिभूतं, [नियतिभूतं (अट्ठकथायं)] विगतन्तिभूतं (?)] नित्तण्हन्ति अत्थो”ति । इध सत्तेके । भावेतब्बपदे मग्गो कथितो बोज्झङ्गानं वुत्तत्ता ।

पठमभाणवारवण्णना निट्ठिता ।

अट्ठधम्मवण्णना

३५८. (क) आदिब्रह्मचरियिकायाति आदिब्रह्मचरिया एव आदिब्रह्मचरियिका यथा “विनयो एव वेनयिको”ति, तस्सा आदिब्रह्मचरियिकाय । का पन साति आह “पज्जाया”ति । सिक्खत्तयसङ्गहस्साति अधिसीलसिक्खादिसिक्खत्तयसङ्गहस्स । उपचारज्झानसहगता तरुणसमथपज्जाव उदयब्बयानुपस्सनावसेन पवत्ता तरुणविपस्सनापज्जा [तरुणसमथविपस्सनापज्जा (अट्ठकथायं)] । आदिभूतायाति पठमावयवभूताय, देसनावसेन चेतं वुत्तं । उप्पत्तिकाले पन नत्थि मग्गधम्मानं आदिमज्झपरियोसानता एकचित्तुप्पादपरियापन्नत्ता एकज्झंयेव उप्पज्जनतो । पेमन्ति दळ्ळभत्ति, तं पन वल्लभवसेन पवत्तमानं गेहसितसदिसं होतीति “गेहसितपेम”न्ति वुत्तं । गरुकरणवसेन पवत्तिया गरु चित्तं एतस्साति गरुचित्तो, तस्स भावो गरुचित्तभावो, गरुम्हि गरुकारो । “किलेसा न उप्पज्जन्ती”ति वत्त्वा तत्थ कारणमाह “ओवादानुसासनिं लभती”ति । गरून्जिह सन्तिके ओवादानुसासनिं लभित्वा यथानुसिट्ठं पटिपज्जन्तस्स किलेसा न उप्पज्जन्ति । तेनाह “तस्मा”तिआदि ।

(छ) पेताति पेतमहिद्धिका । असुरानन्ति देवासुरानं । पेतासुरा पन पेता एवाति तेसं पेटेहि सङ्गहो अवुत्तसिद्धोव । आवाहनं गच्छन्तीति सम्भोगसंसग्गमुखेन पेटेहेव असुरानं सङ्गहणे कारणं दस्सेति ।

(ज) अप्पिच्छस्साति निइच्छस्स । अभावत्थो हेत्थ अप्प-सद्धो “अप्पडंसमकसवातातपा”तिआदीसु (अ० नि० १०.११) विय । पच्चयेसु अप्पिच्छो पच्चयअप्पिच्छो, चीवरादिपच्चयेसु इच्छारहितो । अधिगमअप्पिच्छोति ज्ञानादिअधिगमविभावने इच्छारहितो । परियत्तिअप्पिच्छोति परियत्तियं बाहुसच्चविभावने इच्छारहितो । धुतङ्गअप्पिच्छोति धुतङ्गेसु अप्पिच्छो धुतङ्गविभावेन इच्छारहितो । सन्तगुणनिगूहनेनाति अत्तनि संविज्जमानानं ज्ञानादिगुणानञ्चेव बाहुसच्चगुणस्स च धुतङ्गगुणस्स च निगूहनेन छादनेन । सम्पज्जतीति निप्पज्जति सिज्जति । नो महिच्छस्साति महतिया इच्छाय समन्नागतस्स, इच्छं वा महन्तस्स नो सम्पज्जति अनुधम्मस्सापि अनिच्छनतो ।

पविवित्तस्साति पकारेहि विवित्तस्स । तेनाह “कायचित्तउपधिविवेकेहि विवित्तस्सा”ति । “अट्ठआरम्भवत्थुवसेना”ति एतेन भावनाभियोगवसेन एकीभावोव इध “कायविवेको”ति अधिपेतो, न गणसङ्गणिकाभावमत्तन्ति दस्सेति । कम्मन्ति योगकम्मं ।

सत्तेहि किलेसेहि च सङ्गणनं समोधानं सङ्गणिका, सा आरमितब्बट्टेन आरामो एतस्साति सङ्गणिकारामो, तस्स । तेनाह “गणसङ्गणिकाय चेवा”तिआदि । आरद्धवीरियस्साति पग्गहितवीरियस्स, तच्च खो उपधिविवेके निन्नतावसेन

“अयं धम्मो”ति वचनतो । एस नयो इतो परेसुपि । विवट्टसन्निस्सितंयेव हि समाधानं इधाधिप्पेतं, तथा पज्जापि । कम्मस्सकतापज्जाय हि पतिट्ठतो कम्मवसेन “भवेसु नानप्पकारो अनत्थो”ति जानन्तो कम्मक्खयकरजाणं अभिपत्थेति, तदत्थञ्च उस्साहं करोति । मानादयो सत्तसन्तानं संसारे पपज्चेन्ति वित्थारेन्तीति पपज्जाति आह “निप्पपज्चस्साति विगतमानतण्हादिट्ठिपपज्चस्सा”ति ।

मग्गो कथितो सरूपेनेव ।

नवधम्मवण्णना

३५९. (ख) विसुद्धिन्ति जाणदस्सनविसुद्धिं, अच्चन्तविसुद्धिमेव वा । चतुपारिसुद्धिसीलन्ति पातिमोक्खसंवरादिनिरुपक्किलिट्ठताय चतुब्बिधपरिसुद्धिवन्तं सीलं । पारिसुद्धिपधानियङ्गन्ति पुग्गलस्स परिसुद्धिया पधानभूतं अङ्गं । तेनाह “परिसुद्धिभावस्स पधानङ्ग”न्ति । समथस्स विसुद्धिभावो वोदानं पगुणभावेन परिच्छिन्नन्ति आह “अट्ठ पगुणसमापत्तियो”ति । विगतुपक्किलेसज्झि “पगुण”न्ति वत्तब्बतं लब्धति, न सउपक्किलेसं हानभागियादिभावप्पत्तितो । सत्तदिट्ठिमलविसुद्धितो नामरूपपरिच्छेदो दिट्ठिविसुद्धि । पच्चयपरिग्गहो अद्धत्तयकङ्खामलविधमनतो कङ्खावितरणविसुद्धि । यस्मा नामरूपं नाम सप्पच्चयमेव, तस्मा तं परिग्गण्हन्तेन अत्थतो तस्स सप्पच्चयतापि परिग्गहिता एव होतीति वुत्तं “दिट्ठिविसुद्धीति सप्पच्चयं नामरूपदस्सन”न्ति । यस्मा पन नामरूपस्स पच्चयं परिग्गण्हन्तेन तीसु अद्धासु कङ्खामलवितरणपच्चयाकारावबोधवसेनेव होति, तस्मा “पच्चयाकारजाण”न्तिआदि वुत्तं यथा कङ्खावितरणविसुद्धि “धम्मट्ठित्तिजाण”न्ति वुच्चति । मग्गामग्गे जाणन्ति मग्गामग्गे ववत्थपेत्वा ठितजाणं । जाणन्ति इध तरुणविपस्सना कथिता तेसं भिक्खूनां अज्झासयवसेन “जाणदस्सनविसुद्धी”ति वुट्ठानगामिनिया विपस्सनाय वुच्चमानत्ता । यदि “जाणदस्सनविसुद्धी”ति वुट्ठानगामिनिविपस्सना अधिप्पेता, “पज्जा”ति च अरहत्तफलपज्जा, मग्गो पन कथन्ति? मग्गो बहुकारपदे विरागग्गहणेन गहितो । वक्खति हि “इध बहुकारपदे मग्गो कथितो”ति (दी० नि० अट्ठ० ३.३५९) ।

(छ) चक्खादिधातुनान्तन्ति चक्खादिरूपादिचक्खुविज्जाणादिधातूनां वेमत्ततं निस्साय ।

चक्खुसम्फस्सादिनान्तन्ति चक्खुसम्फस्ससोतसम्फस्सधानसम्फस्सादिसम्फस्सविभागं । सज्जानान्तन्ति एत्थ रूपसज्जादिसज्जानान्तम्पि लब्धतेव, तं पन कामसज्जादिग्गहणेनेव गय्हति । कामसज्जादीति आदि-सद्धेन ब्यापादसज्जादीनं गहणं । सज्जानिदानत्ता पपज्चसङ्खानं “सज्जानान्तं पटिच्च सङ्कप्पनान्तं”न्ति वुत्तं, “यं सङ्कप्पेति, तं पपज्चेती”ति वचनतो “सङ्कप्पनान्तं पटिच्च छन्दनान्तं”न्ति वुत्तं । छन्दनान्तन्ति च तण्हाछन्दस्स नान्तं । रूपपरिळाहोति रूपविसयो रूपाभिपत्थनावसेन पवत्तो किलेसपरिळाहो । सद्धपरिळाहोति एत्थापि एसेव नयो । किलेसो हि उप्पज्जमानो अप्पत्तेपि आरम्मणे पत्तो विय परिळाहोव उप्पज्जति । तथाभूतस्स पन किलेसछन्दस्स वसेन रूपादिपरियेसना होतीति आह “परिळाहनान्तताय रूपपरियेसनादिनान्तं उप्पज्जती”ति । तथा परियेसन्तस्स सचे तं रूपादि लब्धेय्य, तं सन्धायाह “परियेसनादिनान्तताय रूपपटिलाभादिनान्तं उप्पज्जती”ति ।

(ज) मरणानुपस्सनाजाणेति मरणस्स अनुपस्सनावसेन पवत्तजाणे, मरणानुस्सतिसहगतपज्जायाति अत्थो । आहारं परिग्गण्हन्तस्साति गमनादिवसेन आहारं पटिक्कूलतो परिग्गण्हन्तस्स । उक्कण्ठन्तस्साति निब्बिन्दन्तस्स कत्थचिपि असज्जन्तस्स ।

दसधम्मवण्णना

३६०. (झ) निज्जरकारणानीति पजहनकारणानि । इमस्मिं अभिज्जापदे मग्गो कथीयतीति कत्वा “अयं हेट्ठा..पे०... पुन गहिता”ति वुत्तं । तथा हि वक्खति “इध अभिज्जापदे मग्गो कथितो” (दी० नि० अट्ठ० ३.३६०) किञ्चापि निज्जिण्णा मिच्छादिट्ठीति आनेत्वा सम्बन्धितब्बं । यथा मिच्छादिट्ठि विपस्सनाय निज्जिण्णापि न समुच्छिन्नाति समुच्छेदप्पहानदस्सनत्थं पुन गहिता, एवं मिच्छासङ्कप्पादयोपि विपस्सनाय पहीनापि असमुच्छिन्नताय इध पुन गहिताति अयमत्थो “मिच्छासङ्कप्पो”ति आदीसु सब्बपदेसु वत्तब्बोति दस्सेति “एवं सब्बपदेसु नयो नेतब्बो”ति इमिना ।

एत्थ चाति “सम्माविमुत्तिपच्चया च अनेके कुसला धम्मा भावनापारिपूरिं गच्छन्ती”ति एतस्मिं पाळिपदे । एत्थ च समुच्छेदवसेन, पटिप्पस्सद्विवसेन च पटिपक्खधम्मा सम्मदेव विमुच्चनं **सम्माविमुत्ति**, तप्पच्चया च मग्गफलेसु अट्ठ इन्द्रियाणि भावनापारिपूरिं उपगच्छन्तीति मग्गसम्पयुत्तानिपि सद्भादीनि इन्द्रियाणि उद्धटानि । मग्गवसेन हि फलेसु भावना पारिपूरी नामाति । **अभिनन्दनट्टेनाति** अतिविय सिनेहनट्टेनिदज्झि । सोमनस्सिन्द्रियं उक्कंसगतसातसभावं सम्पयुत्तधम्मे सिनेहन्तं तेमेन्तं विय पवत्तति । **पवत्तसन्ततिआधिपतेय्यट्टेनाति** विपाकसन्तानस्स जीवने अधिपतिभावेन । “एव”न्तिआदि वुत्तस्सेव अत्थस्स निगमनं ।

अद्धेन सह छट्ठानि पज्हसतानि, पज्जासाधिकानि सह पज्हसतानीति अत्थो ।

एत्थ च आयस्मा धम्मसेनापति “दससु नाथकरणधम्मेसु पतिट्ठाय दसकसिणायतनानि भावेन्तो दसआयतनमुखेन परिज्जं पट्टपेत्वा परिज्जेय्यधम्मे परिजानन्तो दसमिच्छत्ते, दसअकुसलकम्मपथे च पहाय दसकुसलकम्मपथेसु च अवट्ठितो दससु अरियावासेसु आवसितुकामो दससज्जा उप्पादेन्तो दसनिज्जरवत्थूनि अभिज्जाय दसअसेक्खधम्मे अधिगच्छती”ति तेसं भिक्खून् ओवादं मत्थकं पापेन्तो देसनं निट्ठपेसि । पमोदवसेन पटिग्गणहनं **अभिनन्दनन्ति** आह “**साधु साधूति अभिनन्दन्ता सिरसा सम्पटिच्छिंसू**”ति । **ताय अत्तमनतायाति** ताय यथादेसितदेसनागताय पहट्ठचित्तताय, तत्थ यथालद्धअत्थवेदधम्मवेदेहीति अत्थो । **इममेव सुत्तं आवज्जमानाति** इमस्मिं सुत्ते तत्थ तत्थ आगते अभिज्जेय्यादिभेदे धम्मे अभिजाननादिवसेन समन्नाहरन्ता । **सह पटिसम्भिदाहि...पे०... पतिट्ठहिंसूति** अत्तनो उपनिस्सयसम्पन्नताय, थेरस्स च देसनानुभावेन यथारद्धं विपस्सनं उस्सुक्केत्वा पटिसम्भिदापरिवाराय अभिज्जाय सण्ठहिंसूति ।

सुमङ्गलविलासिनिया दीघनिकायट्ठकथाय

दसुत्तरसुत्तवण्णनाय लीनत्थप्पकासना ।

निट्ठिता च पाथिकवग्गट्ठकथाय लीनत्थप्पकासना ।

पाथिकवग्गटीका निट्ठिता ।

निगमनकथावण्णना

थेरानं महाकस्सपादीनं वंसो पवेणी अन्वयो एतस्साति **थेरवंसन्वयो**, तेन; चतुमहानिकायेसु थेरियेनाति अत्थो ।

दसबलस्स सम्मासम्बुद्धस्स गुणगणानं परिदीपनतो **दसबलगुणगणपरिदीपनस्स**। अयञ्चि आगमो ब्रह्मजालादीसु, महापदानादीसु, सम्पसादनीयादीसु च तत्थ तत्थ विसेसतो बुद्धगुणानं पकासनवसेन पवत्तोति । तथा हि वुत्तं आदितो “सद्भावहगुणस्सा”ति (दी० नि० अट्ठ० १.गन्थारम्भकथा) ।

महाट्ठकथाय सारन्ति दीघनिकायमहाअट्ठकथायं अत्थसारं ।

एकूनसट्ठिमत्तोति थोकं ऊनभावतो **मत्त**-सद्दग्गहणं ।

मूलकट्ठकथासारन्ति पुब्बे वुत्तं दीघनिकायमहाअट्ठकथासारमेव पुन निगमनवसेन वदति । अथ वा **मूलकट्ठकथासारन्ति** पोराणट्ठकथासु अत्थसारं, तेनेतं दस्सेति “दीघनिकायमहाअट्ठकथायं अत्थसारं आदाय इमं सुमङ्गलविलासिनिं करोन्तो सेसमहानिकायानम्पि मूलकट्ठकथासु इध विनियोगक्खमं अत्थसारं आदाययेव अकासि”न्ति ।

“**महाविहारवासीन**”न्ति [महाविहारे निवासिनं (अट्ठकथायं)] च इदं पुरिमपच्छिमपदेहि सद्धिं सम्बन्धितब्बं “महाविहारवासीनं समयं पकासयन्तिं, महाविहारवासीनं मूलकट्ठकथासारं आदाया”ति च । तेन पुज्जेन । **होतु सब्बो सुखी लोकोति** कामावचरादिविभागो सब्बोपि सत्तलोको यथारहं बोधित्तयाधिगमनवसेन सम्पत्तेन निब्बानसुखेन सुखितो होतूति सदेवकस्स लोकस्स अच्चन्तसुखाधिगमाय अत्तनो पुज्जं परिणामेति ।

परिमाणतो साधिकट्ठवीससहस्सनवुत्तिभाणवारा निट्ठिताति । परिमाणतो साधिकट्ठवीससहस्समत्तगन्थेन दीघनिकायटीका रचिताचरियधम्मपालेन ।

मिच्छादिट्ठादिचोरेहि, सीलादिधनसञ्चयं ।

रक्खणत्थाय सक्कच्चं, मज्जूसं विय कारितन्ति ॥ (एत्थन्तरे पाठो पच्छा लिखितो)

निट्ठिता सुमङ्गलविलासिनिया दीघनिकायट्ठकथाय लीनत्थप्पकासना ।

दीघनिकायटीका निट्ठिता ।